



Հայկական գիտահետազոտական հանգույց
Armenian Research & Academic Repository



Սույն աշխատանքն արտոնագրված է «Ատեղծագործական համայնքերը
ոչ առևտրային իրավասություն 3.0» արտոնագրով

This work is licensed under a Creative Commons Attribution-NonCommercial
3.0 Unported (CC BY-NC 3.0) license.

Դու կարող ես.

պատճենն և տարածել նյութը ցանկացած ձևացափով կամ կրիչով

ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

✓SwG

317



11999

ՆԱՐԵԿԱՑԻ

НАРЕКЪ АРМЯНСКИЙ МОЛИТВЕННИКЪ



ՓԱՐԻԶ. — ՏՊԱԿՄԱՆԴԻՒԽ ԱՐԱՄԵԱՆ.

PARIS. — Typographie aménienne. WALDER, rue Bonaparte 44.



ԳՐԻԳՈՐԻ

ՆԱՐԵԿԱՑԻՈՅ

ՈՂ. Բ Ե Ր Գ Ո Ւ Թ Ի Ւ Ն

ի Կարողիկոսութեան

ՏԵԱՌՆ ՏԵԱՌՆ ՄԱՏՔԵՈՍԻ

ԵՒ

ի Պատրիարքութեան

ՏԵԱՌՆ ՏԵԱՌՆ ԳԻՐԳԱՅ. Զ.



ՓԱՐԻԶ

ԱԿԱԴԵՄԻԿՈՍ

ՏՊԱԳՐՈՒԹԻՒՆ ԱՐԱՄԵԱՆ

ՀԱԿՈԲ Հ. ՄԱՆԱԳՅԱՆ

1860

h.8 315

80-18013903



9r 3/7





ՆԱՐԵԿԱՑԻՈՅ

ՈՂԲԵՐԳՈՒԹԻՒՆ

ԲԱՆ Ա.

Իիորոց սրբից խօսի ընդ Աստվծոյ:

Ա. ՉՈՅՆ հառաջանաց հեծութեան սրտի՝ ողբոց աղաղակի քեզ վերընծայեմ, տեսողդ զաղտնեաց. և մատուցեալ եղեալի հուր թախծութեան անձին տոչորման՝ զպտուղ ըղձից ճենճերոյ սասանեալ մտացս բուրգառաւ կամացս առաքել առ քեզ: Այլ հոտոտեսցիս հայեսցիս, զթած, քան ի պատարագն ըոլորապտուղ մատուցեալ ծխոյն բարդութեան: Ընկալ զսակաւամասնեայ բանից յօղուած քեզ ի հաճութիւն, և մի ի բարկութիւն. ելցէ ի խորոց աստի զգայութեանց խորհրդակիր սենեկիս՝ վաղվաղակի ժամանել առ քեզ՝ կամաւրական նուէք բանական զոհիս, ողջակիզեալ զօրութեամբ ճարպոյ՝ որ յիսն է պարատութիւն: Եւ ի դնելս իմ ընդ քեզ դատ խառնեալ աղերսիւ, հզօր, մի իբրեւ զհամբարձումն

ձեռաց ամպարշտեալն Յակոբու, ըստ քողոքելոյն Եսայեայ, եւ զանիրաւութիւն Բարելոնի՝ տաղտկալի քեզ Երևեսցի, զոր առակ Եօթանասներորդի Երկրորդի սաղմոսին ազդէ. այլ իբր զբուրեալ խունկն հաճոյական ի խորանին Սելլվայ, զոր Դաւիթն կանգնեալ նորոգեաց տապանակին հանգստեան ի գերութենէն դարձելոյ. որ ի վերսատին գիւտ կորուսեալս հոգւոյ առակի, ընդունելի կամաց քոց լիցի :

Բ. Բայց քանզի ձայնդ ահաւոր դատաստանիդ հատուցման՝ ուժգինս հնչեցեալ իձորն վրէժիսնդրութեան, կրկինս ինձ Երկնէ մարտից յարուցմունս, այժմէն զուշակեալ շարժմունս յուզմանց ներհակականաց, որ յիմումս անձին ցուցանի, խռովութիւնս ամբոխից, հարեալք ընդ միմեանս զէն առ սուսեր՝ խորհրդոյն հոյլք, չարեանցն ընդ քարիսն, և գերեալ զիս ի մահ ըստ հին դիպուածոյն՝ որ նախ քան զշնորհին ժամանել առ իս. զոր ընտրեալն առաջելանականացն դասուց Պաւլոս՝ առօրինակեալ զՄովսէս, զՔրիստոսի Փրկութիւն յաղթող ցուցանէ: Վասն զի թէ մերձէ օր Տեառն, որպէս զիր առէ, ի հովիտն անձուկ ասպարիսին Ցովսափաթու և հեղեղատին Կեդրոնի, փոքր հանդիսարանացն իրաւանց ժամադրութեանց, որ կենցաղականաւ այսր յաւիտենիւ զհանդերձելոցն ինձ կերպարանեն, ապա

ևս յաւէտ մերձեցաւ ի վերայ իմ արքայութիւնն
Աստուծոյ մարմին եղելոյ. մեծապէս գտեալ զիս
առիթ վնասուց՝ բազմաց տոկոսեաց՝ զանազան
մասանց յանդիմանողաց ճշմարտապատմից,
քան զձեռին նորին վերակացումն անդ ուրեմն
երբեմն իհարուածս եղովմայեցւոց և փղշտաց-
ւոց, եւ այլոց բարբարոս ազգաց : Քան զի այն
ընտրութիւն ամօք չափեցաւ, իսկ պատուհաս
իմումս պարտուց առանց աւարտմանունիզահ-
ման : Ահ, զուք և որոգայթ անձողոպրելի, ըստ
մարգարեին և առակողին. տագնապաւ մեծաւ
առ դուրս ինձ հասեալ՝ զամօթն մշտնջենաւոր
աստէն գծագրել : Զոր միայն քո է հրաշագործել
պտուղս դեղոց ի հնարս կենաց ամենավարան
տարակուսանաց հոգւոց վտանգից, քաւիչ ամե-
նայնի՝ զովեալ ի փառս անձառս անսահմանելի
բարձրութեան. յաւիտեանս յաւիտենից :

ԲԱՆ Բ.

Վերսին յաւելուած կրկին հեծուրեան նորին հսկողի առ նոյն
աղերս մադրանաց բանի.

Իխորոց սրից խօս ընդ Աստուծոյ :

Ս. Եւ արդ քանզի առ բարձրեալն Աստուած
յօդաւորական շրթամբք կարդաս, որ զործովք
միայն զրաւի և ոչ ստեղծաբանութեամբ կաշա-
ռի, որ յեզիփատոս միշտ ունիս զսրտիդ զդարձն,
զինչ օրինակ առ այս քեզ նմանազոյն եւ յար-

մարական աստանօր եղից՝ անձն իմ պարտաւոր,
պատժակիցս կործանեցելոյն Սոդոմայ, ըմբերա-
նեալ դատախազս նինուէի, անարի բարբարոսս
քանզիկինն հարաւային, վատթարագոյնս քան
զթանան, յամառացեալս քան զԱմաղէկ, ան-
ըժշկականս քաղաք դրօշելոց, նշմար մնացեալ
ապստամբութեան հինն Խրայէլի, յիշատակա-
րան պահեալ՝ ուխտազանցութեանն Յուդայ,
կշտամբեալս գեր քան զԾուր, տարամերժեալս
քան զԾայդան, խորթաբարոյս քան զԳալիկեա,
աններելիս քան զանհաւանն Կափառնաում,
պարսաւեցեալս իբր զթորագին, բամբասեցեալս
ընդ Բեթսայիդայ, անպարկեշտ ծաղկեցեալ
ալիքս Եփրեմի, աղու աղաւնիս միշտ յիմարու-
թեամբ՝ այլ ոչ հանդարտութեամբ, ի կորեանց
առիւծուց անձնական օճս եղեռնային. կերպս
ձուոց քարբից լցեալ ժանտութեամբ, պատկերս
վերջին հարուածոցն Երուսաղէմի, ըստ բանին
տէրունի՝ և տեսանողացն ձայնի, տաղաւարս
մերժեալ՝ հասեալ ի կործանումն, խորտակեալ
դրացս վատահարան, եւ կրկին ծրդեալ շին-
ւածս խօսուն, թողեալ ժառանգութիւնս յարմա-
րական մոռացեալ տունս աստուածակերտ, ըստ
բանից նախագրեցելոցն Մովսէսի, Դաւթայ և
Երեմիայի, յարկս բանական՝ ունողս բորոտու-
թեան, հարուածեալ խրատու քերմանն, օրինիւ

կազդուրեալ, օծեալ կաւովն՝ ողոքական հեզութեամբ, անձարակ գտեալ յելս հնարից, քակտեալ վերստին ձեռամբ շինողին, արտաքսընկեցեալ իրաւացի հատուցմամբ հրամանաւ հզօրին ի տեղի անուրբք, հերքեալ տարագրեալ խորոցաւ մեծաւ՝ ամենայնիւ առանց խնայելոյ, ծածկեալ դրամս յերկրի չարեօք, ըստ աւանդակորոյս մխտողին՝ որ յաւետարանին ցուցանի :

Բ. Այլ դու Աստուած, Աստուածդ հոգւոց և ամենայն մարմնոց՝ ըստ դաւանելոյ աստուածաշնորհին, երկայնամիտ Եւ բազումողորմ՝ ըստ սրբոյն Յովնանու ձայնին, շնորհեա կատարել ի քոյթ հաճութիւն օրինեալդ կամաց՝ զսկզբաւրեալ մատեան մաղթանաց այսր ողբերգութեան։ Եւ ընդ լալով սերմանել բանիս ի նախընթաց չուս աստիճանաց օթևանացս պատրաստութեան, ի կատարածն ժամանելոյ հաւաքման հնձոցն, դարձայց բերկրեցեալ լրութեամբ քաւութեան՝ պտղոյն երանութեան որայիցն բարութեան։ Մի տացես ինձ արգանդ սրտի անորդի՝ իբր Խրայէլի, Եւ ստինս աչաց ցամաքեալս՝ ով ամենագութ։ Լուր բանական մաղթողիս՝ հզօր և ողորմած, նախ քան երկնի և երկին երկրի, Եւ նա ցորենոյ Եւ զինւոյ և ձիթոյ, Եւ նոքախրայէլի։ Եւ երկնաւորացն աղերս որ առ քեզ հոգւոյն ազդեցէ, քան թէ տարերաց ապականացուաց :

Դու ստեղծիչ՝ եւ ես կաւ, բաց տարակուսելոյն
ի մուտս մաղթանաց այսր հեծութեան՝ կամս
քաղցրութեան՝ զօրանալաստէն. զի մի ի բանալ
վերնայինն երկնի՝ անընտիր գտեալ կրթութեան
վայելման լուսոյ, իբր զնիւթ մոմոյ սպառեցայց
շնչեալ ի միջոյ : Ազի զրկելոյս, ըստ մաղթանաց
գոչման ասողին, և ոյժ թալկացելոյս, և կեանք
մաշելոյս՝ մտացս խղճիւ, այլ ոչ տաժանմամբ
կրից՝ աշխատութեամբ զքեզ խնդրելոյ, առ զա-
ւանդ մաղթանացս, և տուր զողորմութիւն քո
շնորհացդ. ընկալզփոքրս ի տկարէս, և շնորհեա
ի մեծդ առ ի հզօրէդ. զօրացո զբանս զդշման,
առաքեալ ի մեզ հոգի ի բարձանց՝ աստուա-
ծաշունչ պատզամօքս ի սմա եղելոցս : Պարզեեա
բարեբար՝ զառակն եսայեայ, լուսաւորեալ առ
ճշմարտութիւնն, մատուցանելով մահու արժա-
նոյս՝ ընդ պղնձոյս գոյի անարզս ձայնի՝ զուկի
քո շնորհի, ընդ անզարդութեան երկաթոյս սե-
ւութեան գունոյս՝ պղինձ պճնելի, ցոյցք առա-
քինութեան, հրաշեկ կիբանանու . ընդէք կար-
ծրացուցանես զսիրտ եղկելոյս՝ չերկնչելի քէն,
անձառ և ահաւոր : Մի եղեց անպտուղ ի փոքր
վաստակոյս՝ իբր ապաջան սերմանող անքերրի
երկրի : Մի լիցի ինձ երկնել և ոչ ծնանել, ողբալ
և ոչ արտասուել, խորհել և ոչ հառաչել, ամ-
պել և ոչ անձրել, ընթանալ և ոչ հասանել,

ինձ ձայնել և քեզ ոչ լսել. պաղատիլ և անտես
մնալ, կողկողել և ոչ ողորմել, աղաչել և ոչ ինչ
օգտել, զոհել և ոչ ճենաերել, զքեզ տեսանել և
դատարկ ելանել: Լուր ինձ նախ քան զկարդալս
իմ առ քեզ՝ միայնդ հզօր. մի զանվճար տանջա-
նացն տոյժս՝ ընդ թուով աւուրց մեղօք կեցելոյս
չարագործիս ինձ հատուցաներ: Կեցո զիս զթած,
լուր ինձ ողորմած, մարդասիրեա ներող. խնա-
յեա երկայնամիտ, պաշտպանեա ապաւէն, բա-
րերարեա հզօր, ազատեա ամենակալ, կենագոր-
ծեա նորոգող, վերականգնեա ահաւոր, լուսա-
ւորեա երկնային, քժշկեա հնարաւոր, քաւեա
անքնին, պարզեատրեա առատ, շնորհազար-
դեա աննախանձ, հաշտեա անախտակիր, ըն-
կալ անտխակալ, սրբեա ի պարտուց օրինեալ:
Եթէ յառեցից զաչս իմ, նայեցեալ ի հայեցուածս
երկուց վտանգից յաւուր թշուառութեան, զքոյդ
տեսից փրկութիւն՝ յոյս և խնամակալ. եթէ նկա-
տեալ դիտեցից ի վեր յամենազրաւ ուսին սոս-
կալի, հրեշտակ քո խաղաղութեան քաղցրու-
թեամբ ինձ պատահեսցէ: Ցոյց ինձ տէր ի յելիցն
աւուր շնչոյս արձակման՝ մաքրութեան ոգի լու-
սով ամբարձեալ ի յերկնաւորացն երջանկաց՝
պարզեօք սիրոյ քոյ երկեալ հասեալ: Ի յարդա-
րոցն կատարելոց՝ կարեաց ինձ կցորդ ժամանե-
ցուացես. զանակնկալն բարի՛ չարիս ի յուսահա-

տութեանն աւուր շնորհեսցես : Քաւ լիցի քեզ ,
քարեբանեալ , որ փրկութիւնդ ես ամենայնի ,
ոթէ ախտացեալս քո ոչխարի՝ գազան դժնղակ
տացես ուղեկից , մեղօք մեռելոյս՝ անախտ
կեանք , կործանելոյս պարտեօք՝ փրկութիւն :

Գ. Արդեօք մոռասցիս զբարերարելլ՝ ակնկա-
լութիւն . անտեսեսցես զգթասիրելլ խնամող .
այլայլեսցես զմարդասիրելլ անփոփոխ նհան-
ցեսցես զկենազործելլ՝ անվախճան . թողու-
ցնւս զողորմութիւնդ՝ զբաղցրութեանդ բարե-
շնորհ ծաղիկդ . անպատուեսցես զնիւթ պան-
ձանաց քումդ ճոխութեան . յեղանակեսցես
զփառս հերաց քումդ բարձրութեան . ոչ պահես-
ցես զվայելչական զարդ պայծառութեան քումդ
պսակի : Եթէ ողորմածացն է երանութիւն , իսկ
դու բնաւ իսկ արքայութիւն լցեալ փափաք-
մամբ , ոչ զբոլորն պարզեւեսցես փրկութիւն .
ոչ մատուցանիցես դեղ վիրացս , ոչ սպեղանիս
խոցուածոյս , ոչ զարման տկարութեանս . ոչ
ծագեսցես լոյս ի խաւարի՝ յուսացելոյս ի քո
զօրութիւնդ՝ կենաց պարզեսդ տիեզերաց , որ
միայնդ ունիս փառս ինքնութեամբ իսկութեամբ
և յարակայ մշտնջենաւորութեամբ , վկայեալ
ի բնաւից , օրինեալ և փառաւորեալ յերիս յա-
փառեանս , և անդք քան զպայման սահմանի
իմանալեացն յաւիտենից . ամէն :

ԲԱՆ Գ.

Վերսիա յաւելուած կրկիճ հնծութեան .

Ա. Տէր իմ տէր տուփիչ պարզեաց, ինքնաբուն
բարի, ամենից տիրող հաւասարապէս, միայն
արարիչ զբնաւս յոչէից, փառաւորեալ, ան-
քնին, ահեղ, ահարկու, սոսկալի, հզօր, սաստիկ,
անտանելի, անմերձենալի, անըմբռնելի, անի-
մանալի, անձառելի, անտեսանելի անզննելի,
անշօշափելի, անորոնելի, անսկիզբն, անժամա-
նակ, անշամանդաղիտութիւն, աներկեան տե-
սութիւն, ճշմարիտ էականութիւն, բարձր և
խոնարհ, օրինաբանեալ գոյութիւն, անստուեր
ծագումն, ամենափայլ ճառագայթ, խոստովա-
նեալ լոյս, անտարակոյսվստահութիւն, անտար-
տամ հանգիստ, անյեղի կնիք, անսահմանելի
տեսիլ, վկայեալ անուն, ճաշակ քաղցրութեան,
բաժակ բերկրութեան, հաստիչ հոգւոց հաց,
օտար մթութեան սէր, աներկբայ խոստումն,
ծածկոյթ ցանկալի, զգեստ անկապուտ, օթոց
բաղալի, զարդփառաց, ձեռքնկալումեծ, ապա-
ւէն գովեալ, աննուազելի շնորհ, անպակասելի
գանձ, անապական անձրե, արփիացնցուղ ցող,
ամենատեղաց դեղ, ձրի բժշկութիւն, կրկնաձիր
առողջութիւն վեհագոյն խրախոյս, անպատիր

կոչումն, համօրէն աւետիս, սորկամեծար թագաւոր, աղքատասէր պաշտպան, մշտահարուստ տուիչ, անխափան դիմեցումն, աննահանջելի հրաման, անհամառօտ յոյս, երկար տեսողութիւն, անզղական տուր, ամենաբաշխ ազ, արդարակշիռ ձեռն, անաշառառես ակն, միսիթարութեան ձայն, տփոփառաց լուր, բերկրութեան բերումն, անուն կենդանի, նախախնամող մատն, անգայթագդելի ելք, անխարդախ ընթացք, կենդանարար կամք, աննենգելի խըրատ, աննախանձ պատիւ, լայնական հնարք, անձկական պայման, անգտանելի հետք, աներեւոյթ շատիդ, անշափազիր պատկեր, որքանութիւն անսահման, աննմանական տիպ, անզուգական գութ, ողորմութիւն բազմազեղ, խոնարհութիւն տօնելի, համբոյր փրկական : Եւ ևս քան զայս ազդմունք վայելչականք՝ աստուածութեանդ նուիրելիք . օրինեալ, գովեալ, բարեբանեալ, քարոզեալ, աւետաբանեալ, հոչակեալ, հնչեցեալ, պատմեալ, անխարելի կամք աղաչեալ, և որ ինչ առ մեզ բերին առ ի քէն հոսմունք քաղցրութեան, զորհանդերձելոցն ճառից լուսաբանեն կերպաւորութիւնք . որով զուարժ ցուցանիս ի փրկութիւն իմ, երանութիւն, իբր ի պարարտութենէ իմեքէ ախորժ տենչանօք

լցեալ. զի ոչ իմովս ինչ սնոտիապատուաստ
փառատրիս երգով, այլ զի պատճառ իմն առցես
զիոքըս աղերս՝ մեծիդ փրկանաց :

Բ. Եւ քանզի առ ամենայն հասակ անկեցեալ
յերկրի ազգ բանականաց՝ այս պատուէր նկարա-
զրական նորոգ մատենի ողբոց նուազի, որ
զամենեցունց ունի զկրից պատահմանց նշաւա-
կեալ յիւրում պատկերի, իբր կցորդ մեծ գիտա-
կական կարեաց համայնից, առ բոլոր գումարս
բազմահոլով տիեզերակոյտ քրիստոնէից, առ
նախնի ժամն ժամանողաց, և առ երկրորդ կո-
չեցեալ չափու արբունն, առ որ ի կատարած
աւուրն կալեալ՝ սակաւաձեռն ծերութեամբն,
առ պարտաւորս և արդարս, առ ինքնարգոյ
բարձրայօնն և սիալեալ անձնադատ գտեալն,
առ բարիսն և եղեռնագործս, առ նկունս և առ
արիս, առ ստրուկս և ներքոյանկեալս, առ
սեպուհս և գերաշխարհիկս, միջակայնոց և պա-
յազատաց, շինականաց և տոհմականաց, ար-
ւաց և իզաց, հրամայողաց և հնազանդելոց,
գերելոց և նուաստից, վեհից և փոքունց, պատ-
ւականաց և ռամկաց, ձիավարժից և սոսկակա-
նաց, քաղաքականաց և գեղջկաց, արքայից
քոռոզութեանց ի սանձս ահաւորին ըմբռեցե-
լոց, միայնացելոց՝ վերնականացն խօսակցաց,
մաքրականաց տիրանուէր զգաստութեանց,

քահանայական երջանկակրօն ընտրութեանց ,
այցելութեանց բարեզգեստից դիտողութեանց ,
աթոռակալութեանց նախազահից սրբանուէք
տեսողութեանց .որոցոմանց աղերս աղաչանաց ,
և ոմանց խրատ բարեաց առ դէմս աղօթից
այսու մատենիւ մատակարարեցի , ձեռնարկեալ
հոգւոյդօրութեամբ՝ կարգելինձ մաղթանսբազ-
մաղիմիս , և ամենեցուն սոցին խնդրուածս՝ գթու-
թեան մեծիդ յանդիման լինել սովաւ հանապազ :

Գ. Եւ արասցես զսոյն ընթերցողացն ի սիրտս
յստակս՝ բժշկութիւն հոգւոց և մաքրութիւն յան-
ցանաց , թողութիւն պարտուց և արձակուրդ
մեղաց կապանաց : Եղիցի բղխումն արտասուաց
սովաւ վարժելոցն . և պարզեեալ տացի իձեռն
սորին ապաշաւ ըղձից : Շնորհեսցի Տէք և ինձ
ընդ նոսին առ ի քէն զղջումն կամաց , և նոցա
իմովս ձայնիւ շունչս բարեհամբոյրս . նուիրեսցի
վասն իմ այսու մատենիւ պաղատանք նոցին , և
բանիւս այսու հեծութիւնք նոցին ընդ իմ խնկես-
ցին : Ընդ համբոյր ճաշակման այսր ողբերգու-
թեան , շնորհ լուսոյ քոյ մտեալբնակեսցէ : Եթէ
ելցեն ինձ բարեպարիշտք ընծայիլ սովաւ , ըն-
կալ կենդանեօքն վասն քո , զթած , և զիս ընդ
նոսին . Եթէ ախտս ինչ սրբանուէրս կաթուա-
ծոց աչաց սովիմբ բերիցի , Եղիցի ի քէն խնա-
մակալ և յիս անձրեեալ . Եթէ գրեսցի և իփրկու-

թիւն կարգեսցի հաղորդելոցն յայս կիրս կենաց,
արասցես կամաւ քո օրհնեալ' և ինձ համարեալ:
Եթէ հեծութիւնս աստուածանանյս ի ձեռն այսը
բանի ի գաղտնեանց ուրուք յառաջ եկեսցէ, օգ-
տեցայց քեւ բարձրեալ' և ես ընդ նմին, եթէ
ձեռն մաքուր' խնկով հանդերձեալ առ քեզ համ-
բարձցի, հասցէ միասցի ընդ իմս ձայնի և աղա-
չողացն աղերս յառաջ մատուցեալ : Եթէ պաղա-
տանս բազմադիմիս ընդ իմս երկնեսցի, լիցի և
ինձ քեւ և վասն սորին կրկին նուիրեալ, եթէ
յարգեսցի այս անձին բանի պատարագ՝ քեզ ի հա-
ճութիւն, նախայլոցն ընդ իս քեւ ընծայեսցի : Եթէ
ի տիրանաց ինչ ձանձրութենէ ոք նուաղեսցի,
կանգնեսցի վերստին հաստարանաւ այս հառա-
չանաց՝ ի քեզ յուսացեալ. Եթէ համբարտակն
վստահութեան մեղօք յատակի, այսու արձանօք
պատկանեցելովք աջով քո պաշտպան՝ դարձեալ
կառուսցի : Եթէ յուսոյն ձգարան սուսերըն յան-
ցանաց հատեալ կտրեսցի, կցեսցի դարձեալ միւս
անգամ կամօք ամենակալիդ բարւոք պատուաս-
տեալ. Եթէ վտանք մահու անձնական ցաւոյ զոք
պաշարեսցէ, զտցէ փրկութիւնս սովաւ առ ի յոյս
կենաց՝ յաղօթելն առ քեզ կեցուցիչ. Եթէ տագ-
նապաւ ոք տարակուսի ի սիրտ խոցիցի, քաղ-
ցրութեամբ քո՛ սովաւ ապրեալ ողջասցի : Եթէ
անքաւելի կորստեամբ պարտեաց՝ յանդունդս

ոք խորոց իցէ ընկլուզեալ, Եկեսցէ իլոյս կարթիւ
այս հնարից՝ քև պատսպարեալ. Եթէ թմբրու-
թեամբ խաբից խաւարին գործոց իցէ ոք վնա-
սեալ, զօրասցի անդրէն վասն քո՝ միայն ապա-
ւէն ի քեզ ապաստան եղեալ: Եթէ պահպանակն
վստահութեան զանձն ուրուք լրցէ, ընկալցի
այսու միջնորդիւձեռն քո զնա՛ ամփոփեալի նոյն
հաստատութեան. Եթէ ամայի ի զգուշութենէ
պահողացն ոք դեզերեսցի, սպասեսցէ սովիմբ
առ ի նոյն դարձ նորոգողիդ : Եթէ սարսուռ
դիւային ջերման՝ զողութեամբ ինչ զոք խոռ-
վեսցէ, սթափեսցի ի սոյն յայս նշան խոստովա-
նեալ և երկրպագեալ խաչիդ խորհրդոյ. Եթէ
անօրէնութեան մրբիկ խորտակիչ հողմոյ յան-
կարծ բախեսցէ զի աստուածս մարմնոյ շինուա-
ծոյ մարդոյ յերկրային ծովուս, հանդարտեսցի
անդրէն դեկաւ այս թեոց ի քեզ պատկանեալ :

Գ. Եւ արասցես լինել դեղ կենաց առ հնարս
ցաւոց հոգւոց և մարմնոց քոց ստեղծուածոց՝
զայս կարգեալ սահման ողբոց մատենի սկզբնե-
ցելոյ յանուն քո՝ բարձրեալ : Զսկսեալս իմ դու
կատարեա. Եղիցի հոգի քո խառնեալ իսա. Չունչ
զօրութեան մեծիդ միասցի ի քո ինձ շնորհեալ
ստեղծաբանութիւնս զի դու տաս զօրութիւն
վիատեալ սրտից, և ընդունիս փառս յամենե-
ցուեց . ամէն :

ԲԱՆ Դ

Վերսին յաւելուած կրկին հիծութեան.

Ա. Եւ քանզի սկիզբն կալայ խօսել ընդ քեզ՝
որ ի ձեռին ունիս զշունց կենդանութեան հոգ-
ւոյս բազմամեղի, յիրաւի սարսեալ դողացեալ
տազնապաւ մեծաւ յաւէտ երկնչիմ. վասն զի
ահաւոր և անտանելի և ի սահմանէ բանի
փախչելի յիշատակ անձողոպրելի անաչառդ քո
ատենի՝ ի կշտամբումն իմ պարտաւորի՝ արա-
րիչ երկնի եւ երկրի: Նա զի և չիք իսկ բժշկու-
թիւն բազմավտանգ սաստկութեան վիրացս ա-
նողջանալի, խայթմանց խածուածոց մահաբերին
բերանոյժանեաց՝ որսողին զանձն իմ ի կորուստ:
Մանաւանդ զի ոչ գոյ պատախանի, ըստ առա-
կողին, յաւուր պատերազմի, և ոչ բանիւ իրա-
ւանալի, և ոչ վերարկուաւ պատսպարելի, և ոչ
դիմակօք կեղծաւորելի. ոչ առ երես բանիւք
մատչելի, և ոչ կերպարանօք երբեք խաբելի:
ոչ յօղուածովք բանից ստելի, ոչ արազմամբ
ուտից փախչելի, ոչ դիկանց դարձուցանելի, ոչ
դիմաց ընդ երկիր մածուցանելի, ոչ բերանով
ընդ հող հաստատելի, ոչ ի խորս երկրի դողելի:
Քան զի մերկ են քեզ ծածկեալքն, և հրապա-
րակեալ են աներեւոյթքն. արդարութիւն իմ
նուազեալ և ի սպառ ունայնացեալ մեղանքն

յայտնեցեալ և յաւէտ առաւելեալ. չարիքն իմ
մնացական և ես կորստական. իրաւանցն կը-
շիո պակասեալ և անիրաւութիւն խսկոյն զօրա-
ցեալ. բարեացն բերք հալեալ և սիալմունքն
արձանացեալ. աւանդն կորուսեալ և դատա-
կնիքն այժմէն գտեալ. մահուն մուրհակ գծեալ
և աւետեացն կտակ եղծեալ: Բարերարն տըխ-
րեցեալ և բանսարկուն ուրախացեալ. հեշտա-
կաց գունդն թախծեալ և սատանայ խնծդիւք
պարեալ. վերնական զօրքն ողբացեալ և ստոր-
նայինքն բերկրեցեալ. սպասողին մթերք լցեալ
և պահողին զանձն կապտեալ. օտարին կողմն
կանգնեալ և ստացողին պարզե մատնեալ.
հաստողին ձիր մոռացեալ և կորուսչին հաղբքն
պահեալ. երախտիք փրկչին հենգնեալ և բելի-
ար զուարթացեալ. կենացն աղբիւր փակեալ
և զոռողին ժանգ ժանդիս ժամանեալ:

բ. Եւ արդ ոչ ապաքէն ըղձալի էր, ըստ զը-
րոյն կանխութեան նախանձելոյ, և ոչ ստեղծա-
նիլն երբէք յարգանդի և ոչ նկարիլն ի յորովայ-
նի, ոչ ի ծնունդյառաջազայիլ և ոչ ի լոյս կենաց
հասանիլ, ոչ ի թիւս մարդկան գրիլ և ոչ ի հա-
սակ աճման ամբառնալ, ոչ ի պատկեր գեղոյ
զարդարիլ և ոչ բանիւ հանդերձաւորիլ, քան
ընդ այսպիսեաց սաստկագունից և սարսափե-
լեաց ըմբռնիլ պարտուց, զոր և ոչ վիմաց կարծ-

բութիւն բերէ, թող թէ մարմնոց լուծականութիւն :

Գ. Եւ արդ տուր բարեգութ՝ աղաչեմ զքեզ, տուր ինձ ողորմութիւն, որ զայսոսիկ դու ինքնին քեզէն քոյովդ բանիւ քեզ սահմանեցեր ասելով, թէ « Տուք զայդ նուէր յանուն փրկութեան ձերոյ Աստուծոյ և սուրբ եղերուք. զի ողորմութիւն կամիմ և ոչ զպատարագ » : Ահա բարձրացիր վերստին խնկեալ այսր յիշատակաւ, որ ունի զամենայն, և ի քէն է ամենայն, և քեզ փառք յամենեցուն . ամէն:

ԲԱՆ Ե.

Վերսին յաւերուած կրկին հեծուրիան.

Ա. Ե՞ս արդ ես երկրածինս մարդ՝ կենցաղականաւանկայուն գոյիւ զբաղեալ, և յիմարութեամբ պատրողականաւ գինեաւս յիմարեալ, որ ամենայնիւ ստեմ և ոչ միովիւփ ճշմարտեմ : Քանզի որովք դիմօք վերագրեցելովք նշանակօք աղարտեցելովք յանդգնեցայց լինել յանդիման քում դատաստանիդ, ով իրաւադատ ահաւոր, անձառ անպատում, հզօր Աստուած բոլորից : Քանզի դասեալ աստստին ի սոյն զապերախտութիւն մեղուցեալ անձինս առ քումդ երախտիս, ցուցից զիրաւունս քո միշտ զօրացեալ և զանիրաւութիւնս իմ յաւէտ պարտաւորեալ : Որ արարեք



զիս իքո պատկեր պանծալի իձեռն վեճիդ տը-
պաւրութեան, զուկարս օժանդակելով։

Բ. Զարդարեցեր բանիւ, փայլեցուցեր փըչ-
մամբ, մտօքնոխացուցեր, իմաստիւք ամեցուցեր
հանձարով հաստատեցեր, ի շնչականացն որո-
շեցեր, հոգւով իմանալեաւ խառնեցեր, ծնար
հայրաբար, սնուցեր դայեկապէս, տածեր ստա-
ցողապէս, տնկեցեր զամպարիշտս ի քումդ
գաւթի. ջրովն կենաց ոռոգեցեր, աւազանին ցո-
ղով մաքրեցեր, կենացն վտակաւ արմատացու-
ցեր, հացիւդ երկնայնով ջամբեցեր, աստուա-
ծային արեամբդ արբուցեր, անհպիցն և անհա-
սանելեանցն ընտանեցուցեր, զաշս երկրեղէն
ի քեզ համարձակեցեր, լուսովդ փառաց վերա-
ծածկեցեր, զիողանիւթ մատունս անմաքուր ձե-
ռացս ի քեզ մատուցեր, զմոխիրս անարզ մահա-
ցու՝ իբր զնշոյլ լուսոյ յարգեցեր, զիայր քո հզօր
ահաւորօրհնեալմարդասիրապէսևանարժանիս
իմոյ անձին կնքեցեր։ Ոչ կիզեր զբերանս լցեալ
նանրութեամբ՝ իժառանգակիցն կարդալ զքեզ,
ոչ կշտամբեցեր զյանդնեալ ի քո կցորդութիւն,
ոչ ստուերացուցեր զտեսիլ աշացս ի քումդ
ակնարկութիւն, ոչ արգելանաւ կապանաց ընդ
մահապարտացն տարագրեցեր, ոչ խորտակեցեր
զդաստակ բազկիս՝ որ անմաքրապէս առ քեզ
համբառնայր, ոչ մանրեցեր զոստս իմոց մա-

տանցս ի շօշափելն զբանդ կենաց, ոչ պատեցին
զինև մառախուղը ի ձօնելն զքեզ՝ ահաւոր, ոչ
փշրեցեր զպարս ատամանցս յըմբոշխնելն զքեզ՝
անսահմանելի, ոչ զնացեր բարկութեամբ խո-
տորնակ՝ խոտորնակի ընդ քեզ հետևողս, իբր
ընդ վրիպեալ տունն Խօրայէլի, ոչ խայտառակե-
ցեր ի հարսնարանիդ զանարժանս քումդ պա-
րերգութեան, ոչ ի գձուձ հանդերձին տեսիլ
զանօրինեալս յանդիմանեցեր, ոչ կապահօք ձե-
ռացս և ոտիցս յարտաքին խաւարն հալածեցեր:

Գ. Զայս ամենայն մասունս բարեաց և զներե-
լոյդ երկայնմտութիւն ընկալեալ ի քէն՝ բարե-
րար, օրինեալ և յամենայնի միջտ երկայնամիտ,
փոխադրեցի վնասակարս պարտեաց՝ անթիւս
և բազմօրինակ անօրէնութիւնս, մարմնակա-
նաց և անձնականաց՝ ամենակիր բազմածուփ
խորհրդոց յուզմանց երկրաքարշութեանց : Զայ-
սոսիկ քեզ, Աստուած իմ և տէր, ընդ այսքա-
նեաց բարեաց փոխաբերեցի . զայս քեզ ինձէն
հասուցի չարիս, ըստ մովսիսեան յանդիմանու-
թեան առակի, մոռացեալ գիմաստութիւն և սի-
րողս յիմարութեան : Զայսց բարեաց երախ-
տեաց կաճառս՝ ընդունայնութեան զնացիւք՝
չարաշար ունայնացուցի. զայս լուսաւորութիւն
շնորհաց անճառից ի բարձրելոյդ խնամոց բար-
դեցեալ՝ մըրկաւն խելազարութեան ցնդեցի ; Եւ

թէպէտքազումանգամծանուցարկարկառմամբ
ձեռին քո այցելութեան ձգել զիս առ զեզ, ոչ
հաւանեցայ ըստ մարգարէին որ զիսրայէլէ ամ-
բաստանութեան. և թէպէտ խոստացայ դաշնա-
ւորեցի քեզ հաճոյանալ. և ոչ ընդ այսմ սահմա-
նաւ ուխտիւ փակեցայ, այլ դարձեալ զնոյն նիւ-
թեցի չարիս, անդստին յոճն առաջին մատեայ,
փշոցն մեղաց հերկեցի զանդաստան սրտիս յո-
րոմանն արդիւնատրութիւն : Առ իս ելանեն
առածք աստուածարեալ սուրբ մարգարէիցն .
քանզի մնացեր յինէն խաղողոյ, և ես ընդ այնո-
րիկ փուշառաւիդեցի. դարձայ յանախորժ դառ-
նութիւն պտղոյ, այգիս օտարացեալ, բուռնհարի
զանհաստատ հողմոյ, որովք միշտ տատանեալ
այսր անդր տարաքերիմ. ըստ ձայնի երանելոյն
Յոբայ ընդ ճանապարհ իմն անդարձ զնացի .
ի վերայ աւազոյ շինուածս յիմարութեան կա-
ռուցի : Լայնատարր հետովք խաբեցայ կենացն
անձկալեաց հասանել. փակեցի ինձէն զելիցն
ուղևորութիւն. քացի կամաւ զկորստեան խոր-
խորատն : Խցի զպատուհան լսելեացս իմոց առ
բանիդ կենաց ընդունելութիւն. կափուցի զաչաց
հոգւոյս հայեցուած առ ի զկենացն դեղ նկատել :
Ոչ ընդոստեայ ի թմբրութեանց լքմանէ մտացս
ի պատգամ փողոյդ ահաւորութեան. ոչ զգաս-
տացայ ի բողոք գումի հորափորձական աւուրն

ընտրութեան, ոչ երբէք զարթեայ ի նիրհմանէ քնոյն մահացուի, որ ի կորուստն կարապետէ : Ոչ ետու հանգիստ քոյ հոգւոյդ ի մարմնեղէնս տաղաւարի . ոչ ընդ բնութիւն շնչոյս խառնեցի զմասն շնորհաց քումդ պարզեալ . իմոյս ձեռօք կոչեցի կորուստ, ըստ առակողին, զիոգիս կենդանի մահացուցանել :

Դ. Եւ զինչ է ինձ սակաւս և նուազագոյնս յօդել սահմանս կսկծելիս չափաբերականս, մինչ անցեալ է ըստ քանակութիւն և վրիպեալ ըստ բժշկութիւն : Արդ քո է ընձեռել կեանս հոգւովմեռելոյս, և անոխակալութեամբ մատչել առ այցելութիւն դատապարտելոյս Որդի Աստուծոյ կենդանւոյ . քեզ փառք յամենայնի . ամէն :

ԲԱՆ Զ.

Վերսին յաւելուած կրկին հեծորեան .

Ա. Իսկ արդ զինչ բարւոք գոյ առ այս, կամ որ օգուտ ինձ առ սոյն սահման ընթացից ձայնիս հեծութեան՝ լքանել, և ոչ զամբարեալ շարաւ մահացու վիրիս՝ խարանաւ բանիս արտաքս հերքել, և կամ զծանրութիւն սրտիս մթերեալ ցաւոյս հոգեկան խիթոյս, իբր տաղտկացուցանողական հնարաւորութեամբ, մատնամուխ զզուանօք փսխել :

Բ. Եւ քանզի ոչ գտայ արժանի պարծելոյ ի փառս

ընդ սրբոցն զաս, որոց լի են քերանք նոցա ծաղու, և շրթունքիւրեանցցնծութեամք, ըստ առակողին և սաղմոսողին, ի կարգն երկրորդ դիմեցից՝ զնմանիս իմյիշատակեհամայնատանօր, թէպէտ առ իմում թերութեան բարուց անբարեաց՝ և նոքա յաղթականք իցեն, իբր ապաշաւեալն քան զանապաշխարն : Տօնելի եղեւ Մանասէառ իմոց պարտուցառաւելութիւն, պատուեցաւ և փարփսեցին առ դժնէիս ամբարշտութիւն. զովեցաւ անառակ որդին առ անդարձիս ուխտազանցութիւն . յիշատակեցաւ կեղծաւորութիւն որդւոյն Ամասեայ առ անշնորհութիւն ապախտաւորիս. օրինաբանեալ եղեւ աւազակն, որ դատախազն է անհաւատից, պատուեցաւ և կինն պոռնիկ՝ սկզբնամայրն ապաշաւողաց : Ոչ պակաս քան զՓարաւոն զատեղծուած սրտիս իմ խստացուցի . ըստ օրինակի խոռվութեան մըրք-կաց ծովու ծփեցայ . ոչ այնքան սարսեցի և պատկառեցի ի սաստկութենէ քումդ հրամանի, որքան ալիք ծովուն յեզերացն : Ընդ թիւս չափուց կշռութեան առ իմս զործոց՝ և աւազոյն կոյտ սահմանեցաւ. պակասեաց անբաւիցն շիղջք առ համբարս իմոցս անօրէնութեանց :

Գ. Զի թէպէտ և յոյժ բազում են մանունքն իյափունս ջրոյն համահաւաքեալք, այլ ուրոյնք և առանձնականք ի ծննդոց անելութենէ. իսկ

մեղանքիմոյսյանցանաց՝ անթիւք, զորսանհնար
է առնուլ իմիտ : Ամս և ծնունդք իւր, ոմս և
շառաւփղք իւր, ոմս և բիծք իւր, ոմս և ար-
կածք իւր, ոմս և փուշք իւր, ոմս և արմատք
իւր, ոմս և հաստուածք իւր, ոմս և պտուղք
իւր, ոմս և նշխարք իւր, ոմս և ճիւղք իւր,
ոմս և ոստք իւր, ոմս և արմկունք իւր, ոմս և
ճիրանք իւր, ոմս և մատունք իւր, ոմս և
խըրտմունք իւր, ոմս և զօրութիւնք իւր, ոմս
և ազդմունք իւր, ոմս և նշմարանք իւր, ոմս
և մնացուածք իւր, ոմս և ստուերք իւր, ոմս
և մթութիւնք իւր, ոմս և յարձակմունք իւր,
ոմս և հնարք իւր, ոմս և պատիրք իւր, ոմս
և դիտմունք իւր, ոմս և դիմեցմունք իւր, ոմս
և չափք իւր, ոմս և խորք իւր, ոմս և զարշու-
թիւնք իւր, ոմս և կայծակունք իւր, ոմս և
կիրք իւր, ոմս և մթերք իւր, ոմս և գանձք իւր
ոմս և ցնցուղք իւր, ոմս և աղբերք իւր, ոմս և
գիտք իւր, ոմս և շանթք իւր, ոմս և հրդեհ-
մունք իւր, ոմս և պատկառանք իւր, ոմս և
վիճք իւր, ոմս և անդունդք իւր, ոմս և բոր-
բորմունք իւր, ոմս և աղջութիւնք իւր, ոմս և
ամպրոպք իւր, ոմս և կայլակք իւր, ոմս և
հրամունք իւր, ոմս և հեղեղք իւր, ոմս և սառ-
նամանիք իւր, ոմս և դրունք իւր, ոմս և շափողք
իւր : Հնոցն և տապ իւր, հրատն և գոլորշիք իւր,

հալոցն ճարպին և ճենճերմունք իւր , օշինդրն
և դառնութիւն իւր , կործանիչն և հնազանդեալք
իւր , բռնաւորն և յելուզակք իւր , գոռողն և
սպառագէնք իւր , աւազակապետն և գումար-
տակք իւր , գազանն և կորիւնք իւր , խածա-
նողն և ծակոտուածք իւր , ապականագործն և
նմանիք իւր :

Դ . Արդ այսոքիկ պէտք են զիսաւորութեանց
ապականողաց ոգւոց համայնից , դասեալք ընդ
ինքեամբք նուաճութիւնք մասանց՝ իւրաքան-
չիւր ոք ի սոցանէ բիւրք բիւրուց և հազարք հա-
զարաց . խկ զհամայնիցս թիւ նա միայն զօրէ
խմանալ , որ զառ ի մենջ չեռութիւնն զրեալ՝ իբր
զէռութիւն գործոց տեսանէ : Եւ արդ եթէ ոք
զանձն ոչ խարեսցէ , և առ երեսս ոչ կերպարա-
նեսցի , և կեղծաւորաբար ոչ անհաւատեսցէ , և
մարդ զինքն ծանիցէ , և հասարակաց բնու-
թեամբ վարեսցի , և երկրածին զանձն դիտեսցէ ,
և ի չափու իւրում կանոնին կացցէ , իմասցի
ծանիցէ զնախաթիւ մասունս արկածիցդ վերա-
գրելոց , թէ ոչ ընդունայն ինչ զրեցի և կամ
զբնաւ խսկութիւն սահմանեցի , որ ի մերս բնու-
թեան պտուտէի ազգի ազգի վրիպականութիւն .
այլ ի բիւրուցն արգասեաց չարեաց չափ մէ
երևեցուցի , զի նոքօք և զայլսն իմաստասիրես-
ջիք , թէպէտ և ոչ բաւանդակապէս :

ԲԱՆ Է.

Վերսիմ յաւերուած կրկիմ հեծուրեան.

Ա. Եթ զի մի զփրկութեանն վստահութիւն
ի սպառ կտրեցից, և ապազէն եղեալ մատնեցայց այսքանեաց աներեսութից ընդդիմամարտից, որք ոչ այլինչ են՝ քան թէ ընտանի թըշնամիք ինքնածին բուսեալք զոր վերագրեալքդ սահմանեցին՝ զորքանութիւն պատկերին ձևոյ եղեալ ահարկուս, ցուցից առ սմին բազմաբոյլ բոնութեան մարտկացդ՝ զօրեղ ախոյանս աստուածականս՝ ամենայաղթողս և անպարտելիս, թէ և կսկծելիս կիրս և դժուարակութ պտուղս ծառոց անհասանելեաց, և անկոխ ճանապարհաց երկք և տաժանմունք : Քանզի զայն ամենայն զունդս չարութեան բանսարկուին զօրաց՝ սակաւ մի արտօսը կաթուածոց աչաց, իբր զմանիս զեռունս բազմոտանիս խխայթից երկրի տկար խլրտմանց՝ անկեալ ի վերայ ծորումն ձիթոյ կամ դոյզն դեղ ինչ սատակչական, զամաքեցուցանէ. և դոյզն մի հառաչումն սրտի հեծութեան ելեալ ի յօգւոյ, իբր շնչումն հարաւային ջերմութեան խառնեալ յարեւու, զսառնամանեաց սաստկութիւն հալէ. քանզի ըստ միումդ նմանութեան հեշտածինք են, և ըստ միւսումդ դիմադրութեան դիւրամենք :

Ը. Այլ ես ոչ երբէք կասեցից դատել զդատապարտեալս՝ բանից կակծմամբ, պարսել զպարտաւորեալս իբր զվեասակար անփրկանաւոր անհամոզելի. վասն զի զոմանս սատակեալ ի իմոց նեղչանցն, ոմանց զօրութիւն տամ կենդանանալ առ հոգւոյս կորուստ : Տունկս դառնոստեան, որ զգարշութիւն անառակ վարուց ծաղկեցի. բարունակս ապականաքեր և մահողկուզեան, որ զկորստեան զինին երկնեցի. Քանանու զաւակս և ոչ Յուղայի, ըստ ասից մեծին Դանիէլի. որդիս գեհնենին, ոչ արքայութեան. ժառանգս դժոխոց, և ոչ փառացն փափաքելեաց. Եիւթս տանջանացն, և ոչ հանգստեան : Սպերախտս առ երախտաւորդ, ապաշնորհս առ բազմապարզեդ, միշտ մեղուցեալս առ երկայնամիտդ, դառնացուցիչս քաղցրութեան բարերարիդ, ծառայս չար և վատ, ըստ տէրունեան յանդիմանութեանն, իմաստունս զչարիս գործել ըստ Եսայեայ նախասացութեանն, միրս առ ժանդագործութիւնս զազրութեան . փոյթս առ ի բարկացուցանել զտէրն, մշտաշարժս առ գիւտս սատանայականս, հանապազորդեան վիշտս ստացողին, թոյլս առ բարեանցն թոիչս, ծոյլս առ երանութիւնն ընտրութեան, դանդաղս առ դիտմունս խոստացելոցն, անարիս առ կարիս պիտանեացն և օգտակարացն,

պաշտօնեայս տիրադրութ երախտամուաց :

Գ. Վայ անձինս մեղաւորի, զի զարարիչն իմ բարկացուցի . վայ որդւոյս կորստեան, որ զկենդանութեանն ձիր մոռացայ . վայ պարտապանիս անհամար բիւրուց քանքարաց որ ոչ զոյ հատուցանել . վայ բեռնակրիս ծանրութեան մեղաց դժնէից, որ չունիմ դառնալ առ հանգստարարն . վայ վնասակարիս տէրունեան պարաւըն, որ չիք հնար յանդիման լինել հզօրին . վայ եղէզնախոխիւ կիզանողականս նիւթոյ, որ տոչորելոց եմ ի գեհնենին . վայ ինձ առ այս յիշատակ, զի նեաք բարկութեանն Աստուծոյ այրեցելովք են գործեալ . վայ յիմարութեանս, որ ոչ մտառեցի զծածկեցելոցն յայտնութեան հանդէս, վայ ամբարշտիս, զի միշտ անդադար ոստայնս չարեաց կկեցի . վայ զմարմինս պարարողի կերակուր որդանցն անմահից, կտտողացն թունաւորաց զիարդ համբերեցից . վայ ինձ առ արբումն մահուն բաժակի, որպէս զյաւիտենականն տութեցայց . վայ ինձ առ ելս անարժան ոգւոյս յեղկելի մարմնոյս, իբր դատաւորին ճշմարտի յանդիմաննեցայց . վայ ինձ առ նուազութիւն իւղոյն լապտերաց, զի անարծարծելի է աղօտանալն . վայ ինձ առ ճեպ տազնապի ահին պակուցման, յորժամտագաստին մուտն փակեսցի . վայ ինձ առ ձայնին ահաւորութիւն դողացուց-

չաց և սարսափելեացն բանից՝ Երկնաւոր թագաւորին վճռաւ կնքելոյն, թէ ոչ գիտեմ զքեզ:

ԲԱՆ Ը.

Վերսին յաւելուած կրկին հեծուրեան.

Ա. Եթ արդ զինչ գործեսցես անձն իմ կորուսեալ, կամ ուր թաքիցես, կամ զիարդ ապրեսցիս, կամ որպէս ելցես ի մեղաց բանդէ : Թանզի բազում են պարտիքդ և անթիւ հատուցմունքն, սաստիկ կշտամբանքն և անվախժան նախատինքն. անողորմ են հրեշտակքն և անկաշառդատաւորն, հզօր ատեանն և անաշառ բեմն, քստմնելի սպառնալիքն և անողորմ հատուցմունքն, ահարկու հրամանն և մերկապարանց յանդիմանութիւնքն, հրեղէն են գետքն և անանցանելի են վտակքն, թանձրամած խաւարն և արտաքոյ այցելութեան մատախուղն, ապականութեան է գուբն և մշտնջենաւոր է տագնապն, ամենազդաւ տարտարոսն և անզերծ սառնամանիքն : Եւ արդ արդարե քեզ են զանձեալ դառինքս այսոքիկ դժնդակք և տարժանելի օթեանք անբմբերելեացդ պատուհասից, ով անարժան անձն իմ մեղաւոր, չարագործ, պոռնիկ, բազմաբիծ և սահման անդաստանի բնաւին անմաքրութեան : Ահա զարդիւնս գործոց ձեռաց քոց ժառանգեսցես՝ թիւրեալդ ի յուղութեանց

և զառածեալդ ի մաքրութեանց, տարագրեալդ յարդարութեանց և ի կարգաց պարկեշտութեանց, ունայնդ ի լիութեանց հոգեպարզե հարստութեանց, նախանձարկու բարերարին և ամենակալ թագաւորին :

Բ. Եւ քանզի կառուցեր քեզ անել արգելան և անփախչելի որոգայթ, խոստովանեալ քեզէն զանբժշկականդ քո վեր և զանօրինակդ հարւած, վկայելով զանձինդ զպարտականդ մահու զանբուժելիդ բեկութիւն, ով չարդ ի բարեաց, ով դառնութիւնդ ի քաղցրութեանց, ով խաւարդ ի լուսազարմից, ով կապտեալդ ի պճնելոց, ով դսրովեալդ ի գովելոց, ով անբարիշտդ ի բարեպաշտից, ով շնչականդ ի բանականաց, ով անմիտդ ի մտաւորաց, ով անհանձարդիմասանց, ով անմաքուրդ յընտրելոց, ով մահացուդ ի կենդանեաց, ով խոհերականդ ի սրբոց, ով արբշուդ ի պարկեշտից, ով կեղծաւորդ յարդարոց, ով անպիտանդ ի պիտանեաց, ով անարգդ ի փառաւորաց, ով նուազդ յառաւելութեանց, ով գերիդ ի գերազունից, ով նուաստագոյնդ ի վեհից, ով աղքատդ յընչեղաց, ով անարժանդ ի փրկութեանց, ով տնանկդ ի բարձրութեանց և ի հոգևոր հարստութեանց, և հատուածեալդ յօրհնելոց:

ԲԱՆ Թ.

Վերսին յաւելուած կրկին հեծութեան :

Ա. Եթ արդ զինչ արժանաւոր ըստ քեզ բամբասանս շարագրեցից ի կտակ մաղթանաց մատենի այսր ողբերգութեան, ով անձն իմ թըշւառ, ամենապատկառ և առ պատասխանիս բանից անբարբառ, անպիտան Աստուծոյ և սրբոց մասնակցութեան : Զի եթէ զիհմ մի ծովոց ի յորակութիւն դեղոյ յեղեղեցից, և զղաշտս ասպարիսօք բազմօք սահմանեալ՝ ի տարածումն լայնութեան քարտենի չափեցից, և զպուրակս յոքունց անտառաց շամբից եղեգանց իհասոււածս գոյութեան զրչաց կազմեցից, և ոչ զթիւ մի ի բարդելոցն անօրէնութեանց զօրեցից ընդ զըրով սահմանի զրաւել : Նա՝ զի թէ զմայրս Լիբանանու ի մի լուծ կշռոց զօդեցից, և կամ ըզլեառն արարատեան ի կէտ ամբարձման նժարի միոյ արդարութեան միջնորդ կացուցից. ոչ հաւասարէ այնր հարթութեան համազուգակցել :

Բ. Ծառոս ամբարձուղէջ՝ ստուաբաստեղճ՝ տերեւալից՝ ունայն ի պտղոց, նմանակից յաւէտ հարազատ այնր թզենւոյ՝ զոր տէրն զօսացոյց. քան զի սաղարթօք վարսից, այս է արտաքին դիմօք բարեշուք կերպից իբր պսակաւ իմիք պաճուռնեալ, բացականացն զոս բաղձալի, իսկ

Եթէ մերձեսցի անկողն խուզել զիսնդրելին ,
գոցէ զքեզ ունայն ի բարեաց և գարշելի ի գե-
ղեցկութեանց , ծաղը տեսողաց և նշաւակու-
թիւնք նախատողաց : Զի եթէ ապաժաման
յանզգոյշ ժամուն հերապանծ տունկն պտղակո-
րոյս անկենդան , որ դոյզն պատկերն է անպատ-
րաստից , եկն ընդ անիծիւք , եւ կամ երկիր
ոռոգեալ ցողով , և ոչ բազմապատիկ զաւանդս
արգասեաց երկրագործութեան տածողացն մա-
տուցանէ՛ լքեալ մոռանի , իսկ դու ով անձն իմ
եղկելի , սահման բանաւոր և տունկ կենդանի՛
և ոչ իժամու իւրում պտղաւոր , իբր ոչ զնոյն
կրեսցես պատիժ նախնում առակիդ : Վասն զի
զիամայնն ընկալար ի քեզ անպակաս յառաւե-
լութեանց , սկզբնաւորեալ ի մարդն առաջին և
մինչեւ իսպառումն ծննդոց նորին , զքերս գոր-
ծոց նանրութեանց և զգիւտս նորոզս՝ առելիս և
անախորժելիս հաստողին զքեզ Աստուծոյ :

Գ. Եւ վասն զի եղի զքեզ նպատակ հանդէպ
երեաց տեսութեան մտացս՝ անձն իմ անպի-
տան , վիմօք ձգելոց արձանաց բանից , իբր
զանընդել զազան վայրենի՛ անողորմաբար զքեզ
քարկոծել : Որ թէպէտ և ոչ պատահիմ անուա-
նիլ արդար , սակայն յառաջնումն պատասխան-
ուց իբր ընդ ոստիսի ումեմն ընդ անձին յօժարա-
միտ կամօք ոգորիմ , ըստ իմաստութեան բանի .

և զյոյզս մտաց խորհրդոցս գաղտնեաց իքը
զգիխաւորեալյանգաւորութիւնչարութեանգոր-
ծոց խոստովանեալ, քեզ տարածեցից՝ Աստուած
իմ և տէր : Զի որով չափով չափեցից զանձինս
ստգտանք, ի քոցդ աննուազ գթութեանց այսրէն
չափեցայց՝ ընկալեալ զշնորհիդ յաճախագոյնս
ընդ մեծագունիցս պարտեաց : Եւ որքան վիրացն
հարուածք անբժշկականք և անհնարաւորք ճա-
րակեսցին, այնքանեօք չափովք կրկին առ սմին
և իմաստք արուեստից բարձրեալ բժշկիդ բարե-
հու չակեալ լուսաւորեսցին . և ի պարտուցն առա-
տատրութիւն բարեբանեալ միշտ պսակեսցի,
ըստ խնկաւորդ քում առակի : Զի քո է ֆրկու-
թիւն, և ի քէն է քաւութիւն, և աջովք նորո-
գութիւն, և մատամբք քո զօրեղութիւն, և ի հրա-
մանաց քոց արդարութիւն, և յողորմութեանց
քոց ազատութիւն, և յերեսաց քոց լուսաւորու-
թիւն, և ի դիմաց քոց զուարձութիւն, և հոգւովդ
քո բարութիւն, և օծմամբ իւղոյ քոյ սփոփու-
թիւն, և ցողով շնորհի քոյ զուարթութիւն . և
դու տաս մխիթարութիւն, և մոռացուցանես
զվիատութիւն, և բառնաս զխաւար վշտաց, և
զիեծութիւն ողբոց ի ծաղը փոխես : Եւ քեզ վայել
է օրինութիւն գովութեամբ հանդերձ յերկինս՝ և
յազգս հարցն և ի ծնունդս նոցա, և յաւիտենից
յաւիտեանս, ամէն :

ԲԱՆ Փ.

Վերսին յաւելուած կրկին հնծուրեամ .

Ա. Եւ արդ քանզի միապէս մատնէ կորստեան
և զղջումնն ուժգնապէս և մեղանչելն մոլեզնա-
բար. զի թէ և օտարացեղ իմն են ի միմեանց
այլայլութիւնք նմանութեանցն, սակայն զկեր-
պարանս երկաքանչիւրոցն առ միմեանս
եղեալ, զմի և զնոյն վիատութեան ծնունդս
արտադրեն : Զի մինն զիզօրին ձեռն իբր ապի-
կար թերահաւատէ, իսկ միւսն ըստ նմանութեան
քառոտանեաց պաճարեղինաց յանզգայս եղեալ,
զյուսոյն առասան խզէ. վասն որոյ ընդ առաջ-
նումն միշտ փաղաքշեալ՝ հանապազ խնդայ
սատանայ, իսկ երկրորդաւն՝ ըստ նմանութեան
լափիզող դժոխորովայն գազանի՝ իբր կերա-
կրով արեամբ պարարի :

Բ. Եւ արդ իբր զգանեալ բազմահարուածեան
հեծանաւ և յափն մահու ժամանեալ, դոյզն ինչ
դարձումն շնչոյ ընկալեալ և յոզի կենդանի
եկեալ կազդուրեցայց, պատսպարեցայց, կանգ-
նեցայց, յարեայց յանկենդանականս կորստենէ,
օժանդակեալ ՚Քիստոսի ձեռամբն՝ որ զթածն
է յամենայնի. ի բարերար յերկնաւոր հօրէն՝
փրկութեան և բժշկութեան պտուղ ընձեռեալ
ինձ մեղուցելոյս, ախտացելոյս և մահացելոյս :

Եւ սկզբնաւոր ողբերգութեան այսը աղերսանաց՝ զիաւատոցն շինուած կառուցից. քանզի և ոմն ի նախնեացն սոքիմբք զինեալ, փոխեցաւ իսկոյն յանմահականն վիճակ վերին. զապաշխարութեանն դեղ ընկալեալ, ապաշաւանաց թոշակաւն զգրաւականն անեղծութեան աստեն ժառանգեաց, ի վեր քան զորոց առաքեալ ընդ նմին ցուցանէ, որք զիանդէսն մրցանակին յերկրի կատարեալ, ապազայիցն և երկնաւորացն յուսոյ հաւատացին, և անտեսիցն ճոխութեամբ փարթամացան։ Խոկ զիսրախոյս տէրունի պաշտելի բանին յիշեալ առ սմին, զի ամենայն ինչ հնարաւոր է այնմ որ հաւատայն, է զի և զշափն ընտրականացն բարեմասնութեան Աստուծոյ հաճելեացն զննեալ աստանօր, զայս պատկեր բանի ընկալաք նախնի զահերէց առ ի սրբութեանցն մուտ սոքիմբ հանդերձել. առանց որոյ և ոչ տէրն փառաց զիւրսն առ մեզ հրաշագործեաց զօրութիւնս, եթէ ոչ նախ լծակից խնդրեաց բարերարութեանն իւրոյ զիաւատսն մեր. ուստի և կեանս ընձեռել զօրէ ինքնիշխան բաւականութեամբ առ ընթեր գոլով Աստուծոյ. քանզի հաւատք քո կեցուցին զքեզ, օրհնաբանեալն Աստուծոյ բերան վկայեաց։ Քանզի արդարի սեռն տեսութիւն և կատարեալ իմաստութիւն և առ Աստուծ ընտանու-

թիւն և բարձրելոյն ծանօթութիւն՝ հաւատոց
մասն՝ երջանիկ և ընտրեալ անուն, որ յարա-
ձգեալ մնայ անվթար և անփակելի, պատուակից
գոլով սիրոյ և յուսոյ : Զի Եթէ փոքու սերմանի
զոյի հատի մանանխոյ չափոյ նուաստի հաւատք
զլերանց մեծութիւն փոխէ զօրեղապէս ի սիրտս
ծովու, ապա յիրաւի ընկալաք զսոյն սկզբնաշա-
փղ առաջնորդ կենաց՝ աներկմիտ պաշտօն առ
Աստուած, որ զապառնիսն և զծածկեալսն
յուանց երկբայութեան ի հոգւոյն աչս տեսանէ.
Երրորդութեանն փառատրելի անուամբն պա-
տուեալս հաւատք՝ ընդ սիրոյն դասեալ և յու-
սոյ : Զի թէ և զերիսն հատուածս առանձնաւո-
րականս ի մի և ի նոյն խորհուրդ դիտեսցես,
յաւէտ մեծասցիս նոքօք ի յԱստուած. քանզի
թէ հաւատաս ի նա, և սիրես. որով և յուսաս
աներեւութից պարզւաց նորին : Նմա փառք
յաւիտեանս, ամէն :

ԲԱՆ ԺԱ.

Վերսին յաւերուած կրկին մեծութեամ.

Ա. Եւ արդ ես յետինս դաւանողաց՝ ունայն ի
բարեաց, նայեցեալ խորհրդով մտացս՝ ի սկզբ-
բնաւորն իմ եղելութիւն ի ձեռն ձեռին ստա-
ցողին իմոյ յանէից յուսով հաւատամ Յիսուսի
Քրիստոսի առնել զոր կամի : Քանզի հաւա-

տացի, վասն որոյ և խօսեցայ խրատեալ Պաւ-
ղոսիւ, ուսեալ ի Դաւթայ, թէ և արդ կենդանի
մաղթանք նոցա այց ինձ արացէ. որպէս
հաւատովք ճանաչել զնա, և զգօրութիւն յարու-
թեան նորա, ըստ առաքելոյ, և զիաղորդութիւն
չարչարանաց նորա, և որ զկնի բերին ասա-
ցեալքն : Կցորդ է սմին և յոյժ նմանատիպ՝ հաւա-
տալն իսկապէս և ի նորոգս այս փոխադրու-
թիւն, որ ի մեղացն ի քաւութիւն, և ի չարազոր-
ծութենէ յարդարութիւն, և յանմաքրութենէ ի
սրբութիւն, և յանքաւելեացս պարտեաց մահու
յանցանաց՝ յանդատապարտն երանութիւն, և
ի ծառայական կապանացս յերկնաւորն ազա-
տութիւն : Քանզի զիարդ ոչ արդեօք չքնաղ քան
զբան՝ և ի մթութենէ երկեանութեան խաւարի
զտեալ՝ և Աստուծով օժանդակեալ և օգնեալ
սիրտ մեղաւորի, որ ընդ մարմնապէս ծիծաղելն՝
առ նմին հեծէ հոգեպէս : Որ թէպէտև յամբարձ-
մանէ բարձրութեան գերազունիցն կայից՝ ստո-
րասուզեալ ծանրութեամբ յանդնդային վիին
խորխորատ զբոյն կործանման, նորագիւտ մե-
ղօքն անջրելեօք, ունի և նշխար նշուլից՝ փըր-
կութեան կենաց հպաւոր, իբր կայծակն լուսոյ
պահեցեալ ի միտս և յոզի, որպէս զիուրն նշա-
նաւոր և զարմանաւոր թանձրամած՝ հրաշիւք
մակարդեալ վեհին հրամանի ի յատակս ներքինս

Ծիրհեալ զրհորոցն։ Ուստի և մեղուցելոյն ի
սպառ թախսծելոյ, և ակնկալութիւն բարւոյն բար-
ձելոյ, և համարձակութիւն շնորհին լքելոյ, յու-
սալ վերստին անդրէն միւսանգամ նախապար-
զեիցն փառազարդութեանց դարձեալ հասանել.
քանզի և յաստուածուստ անդուստ հանդերձի
և այս՝ ներգործիլ առ սոյնս. վասն զի սա զտը-
ւողին զօրութիւն ամենահնար աւետարանէ։
Յոր խունկ հաճութեան մեծապէս հոտոտի Աստ-
ւած, քան յամենայն բուրումն անուշից, և քան
ի խառնեալն երբեմն աղացմամբ, ի սպաս խորա-
նին, որ է կերպարան անձանց խոնարհից զիշեալ
ըեկութեամբ՝ առ ի միութիւն նոյն նմանութեան։
Էստ որում հարցեալ փրկչին ամենից ցոմանս
ախտացեալս տեսանելեօք, հաւատայք ասելով
առ այդ թէ կարող եմ առնել ձեզ զայդ, ոչ պար-
զեեաց աչաց նոցա լոյս եթէ ոչ նախ զհաւատո-
ցրն զրաւ ընկալաւ։ Քանզի զինչ քան զմեռելու-
թիւն քառօրեայն դիոյ առ կենդանութիւն մեզ
անյուսազոյն, առ որ կանանցն ժամանելոց ի
յոտս արարչին հաւատոցն հանդերձանօք, ան-
յապաղաբար զփառացն Աստուծոյ տեսին զհան-
դէս՝ ի յեղբօրն կենդանութիւն։

Բ. Խոկ աստստին անկապուտ շնորհին մնացե-
լոյ զկնի մեղանացն՝ հզօրագոյն են վկայք։ Նախ
ենովք, զկնի Ահարոն, յետ նոցա Դաւիթ, դար-

ձեալ և Պետրոս. ընդ որս և փոքրին Եղիազար.
որ ի մեծէն Աստուծոյ ողբրմեալ՝ մեծագունիցն
վկայեցաւ : Աւելորդ է առ այս և բանն առակի
անառակ որդւոյն. թողում զպոնիկն՝ որ ի
տեառնէ գովեցաւ, և զմաքսաւորն՝ որ ի բարե-
գործէն յիշատակեցաւ, և զաւազակն երջանիկ՝
որ յարձակումն վերջին շնչոյն հաւատովքն
պսակեցաւ, և զոր անքաւելին են պարտիք՝
զիաղորդեալքն սպանման մահու արարչին, առ
որս և զլխաւորն ընտրելոց Պաւլոս, որ երբեմն
նախնին էր անօրինաց : Յորոց ոմանք ծանօթու-
թեամբ օրինին զլորեանքն անդրէն կանգնեցան
բիւրապատկեան գերազանցութեամբ քան զնա-
խակրօնիցն առաւելութիւն : Խոկ որ նախ քան
զօրինակին տուչութիւն զաւանդն պահեալ հայ-
րենի մերձաւորագոյն գոլ պատուիրանի սկըզբ-
նահօրն դաւանութեան, որ և զնախնոյն պար-
տիս ինքեան վարկուցեալ, զնորայսն խրովքն
տուժեաց կրից տաժանմամբ, ոչ քաւեցաւ միայն
ծածկեալ ի յերկրի, այլ չարչարելեաւն մարմ-
նով՝ քանականաց բնութեան կենաց կարա-
պետ՝ յաղթող զօրապէս բռնութեան մահու
փոխեցաւ : Խոկ ոմանք ի բուսոյ տհաս հասակին
չարութեամբն յերկարաձգեալ, ի կատարեալ
տիս ժամանակին ոչ ի բարձրութեանն կայից
հոսեցան, քան թէ իստորնականաց թշուառու-

թեանց դժնէից կենացս ի կամարն երկնից համբարձան։ Եւ թէ այն ժամանեաց կանխաւ՝ զօրացեալ ի չարեացն դարձ, որ մինչև յուկեղէն նիւթ յեղանակեալ հողոյս գոյութեան, և պատկերն արքունի ի պատիւ կերպիս մերոյ նկարեալ արքունականն քանդակուածով, անկորուստ և անփոխաղիք և յաղթող դաւաճանութեան զմերս ենթաղրեալ բնութիւն, ապա առաւել յուսալի Է. այժմ մերկապարանոց լուսաւորութիւն անքող և անվերարկու՝ տերամբ Քրիստոսիւ ուխտեալ. որով և միջտ հաստատեալ պահի ի մեզ քանն տէրունի, ըստ մարզարէին ձայնի, ուխտ խաղաղութեան և կնիք հաստատութեան առ հաշտարարն միջնորդ՝ երկնային անմահ կենդանի և մշտնշենաւոր բարեխոս։ Ապա ուրեմն ըստ այսու կանոնի ճշմարտագունի, և անփոխաղրելի սահմանի, և արարչաւանդ պայմանի, համբուրեմ հաւատոց շրթամբք զպատկեր քանիս, և ակն ունիմ փառացն շնորհի. քանզի արդարեւ յարդարացուցանելն զմեզ Աստուծոյ՝ ոչ ոք զօրէ դատապարտ առնել, ըստ առաքելական քանին սահմանի։

Գ. Այլ յայս անստուերագիր վստահութիւն ապաստան, կամ կործանեալս կանգուն, թշուառացեալս՝ յաղթող, վրիպեալս՝ ի դարձն կենդա-

նական, ամենաթշուառ չարագործս՝ ի յոյսն, մահու մատնեցեալս՝ ի կեանսն, ընդ ապականութեամբ վաճառեալս՝ ի ձիրն, դժոխային զործովք գրաւեալս՝ ի լոյսն, ստորնասէր անանակենցաղս՝ յերկինս, կրկին զայթակղեալս՝ ի վերսատին փրկութիւնն, մեղօք կապեցեալս՝ ի հանգստեանն խոստումն, անըժկական վիրօք վարանեալս՝ ի դեղն անմահացուցիչ, տումբակեալս վայրագութեամբ՝ ի տանձսն հանդարտութեան, սրացեալս վարատական ի կոչումնն, ապառում դժնդակս՝ ի հեզութիւն, ընդդիմաբան լուսացողս՝ ի ներումնն : Ի Քրիստոս Յիսուս և ի Հայր նորին հզօր և ահաւոր, յանուն և ի կամս բարերարութեան Հոգոյն ճշմարտի. օրինաբանեալ իսկութեանն և մի աստուածութեան զօրութիւն և փառք յաւիտեանս. ամէն :

ԲԱՆ ԺԲ.

Վերսիմ յաւելուած կրկին հեծուրեան .

Ա. Եւ արդ քանզի յաւէտ յառաջնում զղման յուսահատութեանն բանիւ լրայ, և տարակուսանաց հեծանաւն ի մահ ձաղկեցայ, աստանօր ի յուսոյն կերպարան փոխեալ՝ յարգահատել համարձակեցայց, զերբորդութիւն սուրբ կարդալով յօգնականութիւն ինձ մեղաւորիս : Որ և անդստին իսկ յօրհնաբանելին և ի դաւանելին

զկենդանարարն ընաւից Աստուած, իսկոյն և կռ-
չումն ընտանի ձայնի ահաւորութեան անուան
շնորհաձիրն բարերարի մահացելոյս է կենդա-
նութիւն, ըստ մարգարէին նախաճառութեան, -
թէ որ կարդայ զանուն տեառն, նա կեցցէ : Իսկ
ես ոչ միայն կարդամ, այլ նախ հաւատամ մե-
ծութեան նորին. ոչ եթէ վասն պարզեաց նորա
մատուցեալ յողոք դեգերիմ, այլ իբր զկենդա-
նութիւն իսկապէս, և զշնչոյ տուրեառութիւն
հաւատի, առանց որոյ ոչ է շարժողութիւն
կամ ընթացութիւն. զի ոչ այնքան յուսոյն հան-
գուցիւ, որքան սիրոյն կապանօք բերիմ : Ոչ
ի տուրսն, այլ ի տուրդն յաւէտ կարօտիմ. ոչ
փառքն են ինձ անձկալի, այլ փառաւորեալն
է համբուրելի. ոչ կենացն փափազանօք, այլ
կենարարին յիշատակաւն միշտ ճենձերիմ. ոչ
վայելիցն տարփանօք հեծեմ, այլ հանդերձողին
տենչանօք յերիկամանց աստի կականիմ. ոչ
զիանզիստն ինդրեմ, այլ զիանզուցչին զերեսս
աղաչեմ. ոչ հարսնարանին խնձոյիւք, այլ փե-
սային անձկութեամբ մաշիմ : Իձեռն որոյ զօրու-
թեան վատահապէս ակնկալութեամբ վերազրե-
ցեալդ յանցանօք բեռանց՝ աներկմիտ յուսով
հաւատամ՝ ի կարողին ձեռն ապաստանեալ, ոչ
քաւութեան միայն հասանել, այլ զնոյն ինքն տե-
սանել՝ յողորմութիւն և ի զթութիւն և յերկնիցն

ժառանգութիւն, թէպէտ և յոյժ եմ տարագրելի:

թ. Եւ արդ բազում պատկառանք ամաչեցելոց դիմաց կորացեալ, զմիջնորդ ազդման կափուցմանց երկակի շրթանց՝ արժանափակ աղիսիւ կարկերոց՝ առ անհամարձակ լեզուիս շարժութիւն, նորոգեցից իյերգ հառաջման պաղատանաց յեղանակութեանց աղիողորմ հեծեծանաց ի բարձունս աղաղակելոյ :

Մարդան գօտուոք Արհաւաց գիշեայնոյ :

Դ. Ընկանա քաղցրութեամբ, տէր Աստուած հզօր, զդառնացողիս զաղաչան. մատիր զթութեամբ առ պատկառեալս դիմօք. փարատեան, ամենապարզե, զամօթական տխրութիւնս. բարձ յինէն, ողորմած, զանբերելի ծանրութիւնս. անջրպետեա, հնարաւոր, զմահացու կրթութիւնս. աւարեա, միշտ յաղթող, զիսարդին հաճութիւնս. բացադրեա, վերնային, զնուելոյն մառախուղ. կնքեա, կնցուցիչ, զկորուչին ընթացմունս. ցրուեա, ծածկատես, զըմբընողին չար գտմունս. խորտակեան անքննին, զմարտողին դիմեցմունս : Տեառնագրեա քո անուամբդ զլուսանցոյց երդ յարկիս. պարփակեա քո ձեռամբդ զառաստաղ տաճարիս. զժագըրեան քո արեամբդ զմուտ սեմոց սենեկիս. կերպացն քո նշանդ ի հետս ելից մաղթողիս. ամբացն քո աջովկի զհանգստեանս խշտի. մաք-

թեսես ի հաղբից զծածկարան անկողնոյս .
պահեսցես քո կամօքդ զտառապեալ անձն ոգ-
ւոյս . անխարդախ արասցես զքո շնորհեալ շունչ
մարմնոյս . կացուսցես շրջափակ զպար զօրուդ
երկնայնոյ . կարգեսցես ի դիմի ընդդէմ դիւացն
դասու : Տուր հանգիստ բերկրութեան մահա-
հանգոյնս նիրհման ի խորութեան գիշերիս , բա-
րեխօսութեամբ հայցուածոց որբոյ Աստուածած-
նիդ և ամենայն ընտրելոց : Ամփոփեալ պարու-
թեա զպատուհան տեսութեանց զգայարանացս
իմաստից անզարհուրելի զետեղմամբ ի ծիփական
խոռվութեանց , կենցաղական զբաղմանց , անըր-
ջական երազոց , խօրականաց ցնորից , յիշատա-
կաւ քո յուսոյդ անվնասելի պաշտպանեալ : Եւ
սթափեալ վերստին ի ննջմանէ ծանրութեան
ամենազգաստ արթնութեամբ , հոգենորոգ զբ-
ւարթութեամբ ի քեզ արձանացեալ , զայս ձայն
մաղթանաց բուրմամբ հաւատոց , քեզ ամէնօրհ-
նեալ թագաւոր փառաց անձառից , փառաբա-
նողաց երկնագումար խմբից երգակցեալ՝ յեր-
կինս առաքել : Զի դու փառաւորեալ ես յամե-
նայն արարածոց յաւիտեանսյաւիտենից . ամէն :

ԲԱՆ ՃԳ.

Վերսին յաւերուած կրկին հնծուրեան .

Ա. Ա.ՍՏՈՒԱԾ բարերար հզօր ահաւոր , հայրդ
բարի ողորմութեանդ շնորհի , որոյ անունդ իսկ

մեծիդ զգթութիւն և զընտանութիւն աւետարանէ, քաղցը դժնիկից և անգոհացողաց : Ընդ քեզ և Որդիդ քո իբրև զքեզ, զօրաւոր ձեռն իբրև զքոյիդ, անժամանակ տէրութեամբ ահեղ, ընդ արարչութեանդ քում բարձրացեալ : Եւ Հոգիդ սուրբ ճշմարտութեան՝ բղխեալ առ ի քէն անըսպառութեամբ՝ կատարեալ իսկութիւն զոյի, էութիւն մշտնջենաւոր, հաւասար քո ամենայնիւ, փառակից որդւոյ քոյ տէրութեամբ : Երբեակ անձնաւորութիւն՝ համայն անքնին, տրոհեալ ի դիմաց՝ ուրոյն զատուցմամբ՝ իսկ միաւորեալ համազուգութեամբ, նոյնազոյ բնութեամբ տիրապէս, անշփոթ և անանջրպէտ՝ միով կամօք և կցորդութեամբ. ոչ երիցութիւն ումեմն ի յումեմն և ոչ քթթել մի ական առ նուազութիւն միոյն ժամանեալ, քան թէ պատճառ սիրոյ երկնայնոյ անստուեր լուսոյ՝ որ առ մերն է ծանօթութիւն, միով պսակաւ սրբասացութեան անսկզբնաբար աստուածաբանեալ : Քանզի արդարեւ վերաձայնեալս այս խոստովանութիւն երեքփառատեանդ դաւանութեան ըզվիմն հաւատոյ Պետրոս երանեաց . իսկ զդատապարտելոյս անձն մեղօք՝ բերենբան քո ակնարկութեամբ, ով խնդրողդ գերելոյս, հրաշանորոգ արդարացուցէ : Քանզի թէպէտ և քո իցեն պարզեք, և քո ողորմութիւնք, այլ ոչ

ի պարզեսն ես այնքան հոչակեալ, որքան յողորմութեան . զի երկրորդն զքոյդ յաճախէ ըզփառս, իսկ առաջինն զճգնաւորացն յայտնէ զգործս. զի պարզեաք՝ վաստակոցն են փոխատրութիւնք, իսկ ողորմութիւնք՝ մեղուցելոյս բարերարութիւնք :

Բ. Եւ արդ մի զօրասցի մարդկայինս գործք առաջի քոյոցդ շնորհաց, Աստուած զթութեանց, թէ և անդր իսկ իցեն քան զօրէնս հասարակաց բնաւորականս հոսմանց. այլ յաղթող եղեալ քոյդ երկայնմտութեան, նուազ եղիցի առ քումդ մասին ընթացք երկրածնաց : Քանզի և որ մաքրութեամբն պերճանային օրինականացն վրատահութիւնք ի լուսաւորել քոյդ արդարութեան գուշակ ներկայիս, ամենանուազ անձկութեամբ լրեալ հրեութիւնն յետնեալ, և յաւէտ ընդ տարագրական ողորմելոցն, առաւել նոքա գտան կարօտեալ մարդասիրութեան : Եւ քանզի ամենայն ինչ հնարաւոր է քեզ, բարերար, լուր պաղատանաց զոչման հեծութեանս՝ որ կարդամս առ քեզ. ողորմեա, կեցո և մարդասիրեա : Զի քո է երկայնմտութիւն, քաղցրութիւն, փրկութիւն, քաւութիւն և փառք յամենեցունց յաւիտեանց ազգաց. ամէն :

ԲԱՆ ԺԴ.

Վերսին յաւերուած կրկին նեծուրիան .

Ա. Պաշտօն առ քեզ լուսոյ ճառագայթ , արքայ Երկնաւոր , զովեալ անպատում , որդի անճառ մեծիդ Աստուծոյ . խոնարհեցո զունկն քո՞քարձրեալ բարեգութ , կենաց ապաւէն , նորոգ մերձեցեալ կրկին աստանոր ի հառաչումն նուաղս ձայնի վիրաւորելոյ :

Բ. Ոչ ցուցեալ է Երբէք , եթէ աղաչեաց զքեզ ի ձեռն աւազականցն սրոյ խողխողեալն , քանզի կարկամեալ էր , ոչ ձայն պաղատանաց զկնի արձակեաց քանզի անկորինչ էր . ոչ մատամբքն տատանելոց զաղէտ վտանգին յայտնեաց տեսողիդ , քանզի խորտակեալ էր . ոչ աչս կողկողազինս արտասուօք ողբոց բարերարիդ յանդիման կացոյց , քանզի վնասապարտ էր . ոչ ի պատգամ բանից միջնորդի զողորմածիդ կամս հաճեցոյց , զի անայցելու էր . ոչ հայթայթմամբ խորտակեալ մարմնոյն արիւներանգ ներկուածով ձորձոց ըզգթածիդ զսիրտ ճմլեցոյց , վասն զի անյոյս էր . նա և ոչ ծնօվքն հաստատութեամբ իբր զարշապարաւ ոտին վարեցաւ , այն զի անյարիր էր քանզի կիսամեռն ասել կենդանւոյն սակաւ ինչ նուազ է ի մեռելութենէ : Մանաւանդ զի ի քոյոցդ խրատեալ բանից , և բարերարեալ քոյդ ողոր-

մութեամբ, և փառօք քո լուսազարդեալ, ոչ
միայն զի ոչ վերջացաւ ի հակառակն քո ընթա-
ցից, այլ ստահակեալ ապստամբութեամբ յիւր
թշնամեացն թիւ յաւելաւ, ընդ նոսին դաշնա-
ւորեցաւ, միաբանեաց ատելեացն քոց :

Գ. Իսկ դու բազմապարգև, բարերար, անո-
խակալ, ամենակեցոյց, ոչ միայն զի ոչ պահե-
ցեր զչարագործին մեղաց յիշատակ, այլ և ոչ
բանիւ յանդիմանեցեր . ոչ ոտն հարեր անկելոյն,
այլ կարեկցաբար մատուցեալ զծայրագոյն ցու-
ցեր զիսնամս , Ոչ քահանայապէս ըստ ահարով-
նեան տկար օրինին՝ զօրաւոր առ մահուն պաշ-
տօն՝ դատապարտիչն անիծիւք և բռնալիք
քառանցն ձգմամբ ի խորտակումն խոցելոյն
արագեալ մատեար . և ոչ որպէս դետականն
կարապետային անկատարագործ՝ ի յերկուցն
միջի բաժանեալ խորոց , հնոյն լրումն և նորոյս
սկիզբն, ունայն ի հոգւոյ յապաշխարանն հան-
դիսացեալ՝ զվիրաւորելոյն տեսեր զվտանգ, զի
մի սատակիչն օրինակութեամբ տապարաւն
արմատակտրաւ՝ զմահուն պաշտօն ի քեզ նկա-
տեալ, յառաջ քան զփորձ առակայիցն տատա-
կեսցի . այլ հեթանոսացն պահպան անուն առ-
րեստանեայցն, որք ի հրէիցն ընկալեալ զօրէնս
ամբողջ պահեցին, զոր նոքա մոռացան, նոցին
կցորդեալ մարմնոյդ վերաբկուաւ մերակերպա-

րան խառնութեամբ, զազատարարն զծազբեցեր զաւետիս առ օտարազգիսն. և աստուածաբարդ Շերգործութեամբ անապականաւ ձեռն կարկառեալ, յարուցեր զմարդն Շախնի մեղուցեալ ի մահ իւրովքն ծննդովք : Զտրտմեցելոյն սիրտ բերկրեցուցեր, և զվհատեալն հաստատեցեր, զթշուառացեալն մի անգամ՝ կրկին զուարթացուցեր : Աւազանին կենարար օծմամբն և բաժակաւնլուսոյլցեր. հացիւդերկնայնովարար. չականդ քոյին մարմնով նոր յեղանակեցեր : Վերակացութեամբ երջանկացն ազանց ընտրելոց յանձանձեցեր, զրգեցեր և խնամարկեցեր : Հանդարտընթաց զրաստուն տածողութեամբ անզզուելի պահեցեր, մինչև յարկն լուսոյ ածեր : Ի ձեռն երկաքանչիւրոց միջնորդաց՝ նախնեաց և երկրորդաց տուչութեան կտակաց կենդանականց, մարդասիրապէս դարմանատրեցեր : Եւ որպէս երբեմն ընդ Մովսիսի՝ թևս տարածեալ արծուոյն օրինակաւ ընկալար զնա, և ի հանգիստն հանդարտութեան երկրին բարութեան առաջնորդեցեր, և զբանին կերակուր ջամբել հրամանատրեցեր վարդապետութեանց :

Դ. Եւ արդ որ զբնաւն ծայրագունին բարութեան լուսոյ յամենայնի բովանդակապէս հրաշգործեցեր, զօձտողինզգանձ քեզ սեպհականեալ՝ զքո ստացուածն առ քեզ դարձուցեր,

կեցու և զիս մաքրեալ ի մեղաց պարտեաց, որ
ձրի պարզեւես և անպատրաստից. ընդ որոց և
ինձ տացես քաւութիւն և բժշկութիւն, բարե-
գութ, զօրեղանքնին, անեղծ, ահաւոր, օրհնեալ
միշտ յաւիտենից յաւիտեանս. ամէն :

ԲԱՆ ԺԵ.

Վերսիմ յաւելուած կրկին հեծուրիսն.

Ա. Իսկ դարձեալ աստուատ վերստին առ նոյն
հեծութիւն սրտիս վտանգի ինձէն մատուցեալ,
սովին նուազաւ ի նոյն ոճ բանի զամենապար-
զեդ արգահատեցից, տագնապեալ ոգւոյս վը-
տանգիւ ի սպառ. իբր մեռեալ կենդանւոյ ան-
մահիդ մաղթեմ Աստուծոյ խոստովանեալ ընդ
փառացդ քո զիմս անարգութիւն, և առ չարեօքս
իմուլք զբոյդ բարութիւն. որովք յաղթեալ զտայ
քան թէ բժշկեալ, և ամաչեցեալ քան թէ համար-
ձակեալ, ուխտակորոյս աւանդամոռաց :

Բ. Իսկ կրկին առակն որ առ իս, որ ոչխարին
տրուպն տարացուցիւ, որ յետին անզգայու-
թեանն էք մատնեցեալ՝ մոլորեալ, և իլերինս
ուր ոչ է այցելութիւն՝ ընդ զազանականացն
դիւաց և կոռոցն վայրենութեան թափառեալ,
ոչ մերձաւոր գոլ սակաւ մի հօտին, ոչ բան ու-
նէի, որով և զցաւոցն աղէտ պատմէի, ոչ ձեռն
ձգողական, որ համերցն է ազդողական : Իսկ

դու միայն գովեալդ յսկզբանցն յաւիտեանց և
յարդի ծնելոց, գտեալ ըստ մաղթանաց գոչման
երգողին՝ զիս զմեղուցեալս յաննշոյլն մոլորու-
թեան, խնամողօրէն տեսչութեամբ կամաց հովին
կոչեցար. և ոչ միայն հոգացար, այլ և խնդրե-
ցեր. և ոչ գտեր միայն, հրաշագործ, այլ անձա-
ռելիդ բարերարութեամբ սիրոյ իկենդանարարդ
քո յուս բարձեր, և ընդ երկնային զօրուն դա-
սեցեր ի հայրենիդ քո ժառանգութիւն : Եւ արդ
դու հզօր կենարար օրինեալ այցելու գթածդ
յողորմութեան, եթէ զնոսա ընկալար զապարա-
նեալս աղերսանաց, որ մինն ի միջոց մահու
սահմանի էր չարչարեցեալ, իսկ միւսն ըստ
անբանանիցն անզգայութեան վտարանդի բա-
ցամերժութեամբ յանբնական վայրի վարանեալ,
ի բառաչ ձայնի բարբառոյ, որ անկերպաւոր
աննշանական, աստուածային բարեխնամու-
թեամբդ տնտեսեցեր զտիեզերահրաշն խնամո-
ղութիւն առ կորուսելոյն մեծ թշուառութիւն,
յայտնեաց վերստին և արդ գթութեանցդ խորք
և բարերարութեանցդ հոսանք՝ առ անօրինեալս
առաւելութեամբ վերագրելոցդ օրինակութեամբ
առ բազմօրինակ մահու պարտականս, առ որ
ի բարութեանց խառնից քաղցրութեանց յատուկ
համս չար, առ անդամս մարմնոյ արժանաւորս
հատման, առ համանարակ ամենաբոլոր ախտա-

ցեալ հոգիս վիրաւոր, առ հաւասարեալս անզգայութեանց անասնոց, առ օտարացեալս յընտանութենէ իմաստնոց, առ աննմանս հանգունակից բանաւորութեանց : Ար եթէ տարացոյց գոյր, ես ասէի . թէ նմանակից գոյր իմ, պատմէի . թէ հանգունակից գոյր, ես ճառէի . թէ հաւասար գոյր, ես զրէի . թէ զուգազործ գոյր, ցուցանէի . թէ օրինակ գոյր, ես ազդէի . թէ յանցեալսն, հայթայթէի . թէ ի Եերկայումս աստ, ես յուաայի : Բայց քանզի անցեալ է ըստ օրինակ, և հրաժարեալ ըստ նմանութիւն, զոր միայն քո է քաւել, բժշկել և կենազործել, կենդանարար համայն մեռելոց, նորոգութիւնդ տիեզերաց :

Գ. Զի եթէ սրբոյն սրտի տեսութեամբ երջանկին Դաւթայ անօրէնութիւն չարեաց բարձրացեալ ասի քան զզլուխ, և ըստ ծանրութեանց բեռանց դժուարակրելոց յանցմունք մեղաց, իսկ որ առ իս կրին սփալմունք գերազանցէ քան զիեղեղին ջրակուտակ տիեզերասոյզ ամենապառ ծովուն յորդութիւն, և զիսոց լերանց վերադրէ : Այլ շնչեսցէ ող քո քաղցրութեան իբր առ նոյիւն, և որ զիերինս հալէ գօրութիւն, ցամաքեցուցանելզիդս ջրակոյտս բազմակոհակս՝ և երկրակործան իմոցս պարտեաց և լեռնակարկառ բարձրութեան մեղացս ամբարձելոց : Եւ

համառօտեալ զբան քո հզօր՝ ամենակար հնարաւորութեամբհակիրճհատուցմամբ, արասցես ահա ելս քաւութեան, ըստ մարգարէին, առ ովերկայնամիտ ողորմած օրհնեալ, թողցես միանգամայն երկարաձիգս անօրէնութիւն և ներելով իմս յամառութեան բարեգործեսցես խսկապէս, հատցես բոլորովին զանվճարելի պարտուց զարժանահատոյց տոկոսեացս տոյժս տարժանակիրս : Նա զի և չիք խսկ առ քեզ ցատումն սրտի, և կամ բորբոքումն բարկութեան, որպէս ոչ կրկին նենգութիւնք և կամ նշմարանք մթութեան. քանզի կեանք են ի կամաց քոց և լոյս, և ոչ արարեր և ոչ զմահ խնդաս ընդ կորուստ մարդոյ ըստ Դաւթի և Սողոմոնի :

Դ. Եթէ մարդկան կարգեցեր զայս կէտ սահմանի մեծի պայմանի՝ ի բարեվիճակդ քո կանոնաց՝ ոչ փոխատրել անդրէն չարի չար, այլ եօթանասնիցս եօթն թողուլ անդուստ իյաւուր զիւրաքանչիւր մեղանաց զպարտս. և այդ քան առ մեզ, որ միշտ ի բնութեան ունիմք բնաւորաբար ուղերձեալ զբիծս չարեաց անհամար բիւրուց նորոգ յայտնելոց, որք օրինաւորին երեկին յանդաստան սահմանի ամենաբոյս փշածին բնութեանս, ըստ անսուս քո վկայութեան, որ թէ միտք մարդոյ ի խնամս չարի են արձանացեալ ի մանկութենէ : Զի որ զկատարեալ մաք-

բութիւնն ունէր աւետարանիչն կենացդ բանի
Յովիաննէս, և զինքն ընդ հասարակաց բնու-
թեան լծակցեալ, հաստատեաց զճշմարտութիւն
քո առ իմս ստութիւն յոյժ արդարացեալ. թէ
ասեմք, ասէ, մեղս ինչ մեք չունել, սուտ առ-
նեմք զնա : Եւ արդ կատարեալ է բան քո խըն-
կեալ, և ի գլուխ ելեալ անպակաս իստուգութենէ
առ իմս մոլորութիւն և դժնդակ անիրաւութիւն։
Վասն որոյ խնայեա յիս ողորմութեամբ, քաղ-
ցրութեան ճաշակաց աղբիւր, միայն օրինեադ
յամենայն յաւիտենից. ամէն։

ԲԱՆ ԺԶ.

Վերսիմ յաւելուած կրկին հեծուրեան.

Ա. Եր արդ դու միայն Աստուած երկնաւոր,
բարձրեալ, բարեզործ. քո է զօրութիւն, քո
ներողութիւն, քո բժշկութիւն, քո առատու-
թիւն, քո են պարզեք, քո միայնոյ են ձիրք ձրի.
քո քաւութիւն, քո պաշտպանութիւն, քո հնարք
անիմանալիք, քո արուեստք անգտանելիք, քո
չափք անչափելիք, դու սկիզբն և դու կատա-
րած : Քանզի ոչ երբէք ստուերացուցանէ զլոյս
ողորմութեան քո խաւար սրտմտութեան. վասն
զի ոչ ես զրաւեալ ընդ մասամբք ախտից՝ ի վերդ
քան զբան : Պատկեր անպարազիր անդր քան
զորքանութիւն կշռութեան, անչափ լայնու-

թիւն փառաց, անտարրափակ ընդարձակութիւն հատու գօրութեան, անամփոփելի առաւելութիւն բացարձակութեան, անտկարանալի բարերարութիւն զթութեան : Դու դարձուցանես, քատ մարգարէին, յայգ զատուերս մահու. որ իշեր կամաւ ի տարտարոսն ներքին արգելականացն բանտի, յորում և մաղթանացս դուռն էր աղխեալ, և գերեալ անտի զմթերիցն կապուտ վտարանդելոցն հոգւոց, սուսերբ հրամանի մաղթական բանիդ զկապ սատակման մահուն խզեցեր, և զմեղացն կարծիս ցրուեցեր : Դարձ առ իս' որ զընդամ զընդանաւ վիխ տղմասիզ զբոյս յերկադս մեղաց. վիրաւորեալ խոցմամբ սլաքաց բանսարկուին նետից :

բ. Այլ դու յամենայնի տէրդ բարերար, լոյսդ ի մէջ խաւարի, օրինութեանդ զանձ, ողորմած, զթած, մարդասէր, կարող, գօրաւոր, անպատում, անքնին, անճառ, բաւական քատ սրբոյն Յակոբայ, անհնարիցդ ամենից դիւրապատրաստ հնարաւորութիւն, հուր ծախիչ զխոփիս մեղաց, ճանանչ կիզանող ընդ հանրական թափանցանցութեան խորհրդոյ մեծի. յիշեա զիս յողորմութեան քո, օրինեալ, և մի յիրաւունս քո. ի ներողութեան քո, և մի ի հատուցման. յերկայնմտութեան քան ի հաւաստութեան: Եթէ կշռեցես զմեղանաց իմոց ծանրութիւն, ընդ

քաղցրութեան քո և մի ընդ արդարութեան . զի
առ սակ նախնումն՝ յոյժ է նուազեալ, իսկ ի
ներհակ վերջնոյս յաւՀտ ծանրակիր :

Գ. Արդ մատիր առ իս, բարութիւն, որպէս
յունկանն բժշկութիւն հակառակ քո համբար-
ձելոյն. բարձ ի մեղուցելոյս գնողմ մահու խոռո-
վութեանս, զի հանգիցէ յիս ամենակալ հոգիոն
խաղաղութեան : Եւ քեզ փառք յամենայնի ,
յաւիտեանս յաւիտենից . ամէն :

ԲԱՆ ԺԷ.

Կերտսին յաւերուած կրկին հեծուրեան .

Ա. Արդ աղաչեմ զինամակալդ վտանգաւորաց
տաժանելեաց կրից թախծութեանց հոգւոց վշտա-
ցելոց, մի յաւելուր հեծութեանս ցաւ, մի խոցեր
զվիրաւորեալս, մի դատապարտեր զպատճեալս,
մի տանջեր զչարչարեալս, մի գաներ զնարուա-
ծեալս, մի զլրեր զանկեալս, մի կործաներ
զզայթագդեալս, մի մերժեր զնեռացեալս, մի
տարագրեր զնալածեալս, մի ամաչեցուցաներ
զպատկառեալս, մի կշտամբեր զնարթուցեալս,
մի խորտակեր զբեկեալս, մի խոռվեցուցաներ
զամբոխեալս, մի ալեկոծեր զբքացեալս, մի սա-
սանեցուցաներ զդղրդեալս, մի շփոթեր զմըըր-
կեալս, մի կեղեքեր զգիշատեալս, մի շաղչախեր
զբեկեալս, մի գօշեր զմորմոքեալս, մի կուրացու-

ցաներ զխաւարեալս, մի զարհութեցուցաներ
զապշեալս, մի խորովեր զխարշատեալս, մի մա-
հացուցաներ զիմանդս, մի բեռանց ծանրութեան
մատներ զտկարս : Մի անուր յաւելուր կարկա-
մեալ թիկանցս, մի կրկնակի ողբումն զառն հե-
ծութեանս, մի ուժգնապէս վարեսցիս առ հողս
մի սաստկապէս առ մոխիրս, մի անաշառապէս
առ ստեղծուածս, մի ահարկութեամբ առ փո-
շիս : Մի ընդհարկանիր խստութեամբ մեծդ ընդ
փոքուս, լյադ ընդ ստորնականիս, ընութեամբ
բարիդ ընդ ի ընէ չարիս, ողկոյզդ օրհնութեան
ընդ պտղոյս անիծից, քարցըրութիւնդ իսկապէս
ընդ համայն դառնութեանս, փառաւորեալդ
անփոփոխ ընդ ամենեւին անարգիս, կենացդ
նշխար ընդ կաւոյս զանգուածոյ, տէրդ տերանց
ընդ տղմիս երկրայնոյ, աննուազլիութիւնդ ընդ
չքաւոր ստրկիս, անկապուտ ճոխութիւնդ ընդ
անպատսպար տառապելոյս, անկարօտ բարու-
թիւնդ ընդ ամենաթշուառ աղքատիս : Քանզի
ով ոք հասեալ յառաւօտ' և ի ծագման լուսոյն
խիթայ մթանալ, և կամ ընթերակաց կենաց՝
մահանալ, կամ ազատութեան՝ և պարտաւորիլ,
կամ շնորհաց՝ և դատապարտիլ, կամ փրկու-
թեան՝ և մատնիլ, կամ նորոգման՝ և եղծանիլ,
կամ օրհնութեան՝ և տարագրիլ, կամ բժշկու-
թեան՝ և վիրաւորիլ, կամ լիութեան՝ և նուա-

զիլ, կամ յաճախութեան հացի և քաղցնուլ, կամ
գետոց հոսանաց՝ և պասքիլ, կամ մայրենի
զթոց՝ և նենգիլ, կամ խնամոց աստուածեան
աջոյդ՝ և զզուիլ:

Բ. Եւ արդ ընդ ախտացելոյն սաստկապէս
մարմնոյն բորոտութեամբ հոգլոյս վտանգաւ և
ես պաղատիմ, տէր եթէ կամիս, կարող ես զիս
սրբել: Էնդ աչացուացն նեղելոց մշտագիշերն
խարիսխանօք՝ մեծակական ձայնիւ հառաչեմ.
ոչ որդի անուանեմ Դաւթի. այլ ծնունդ էիդ Աս-
տուծոյ դաւանեմ. ոչ միայն ուաբրի կոչեմ, որ
փարզապետացն է պատիւ կարծողական զիսկն
զիտելոյ, այլ տէր երկնի և երկրի հաւատամ:
Ոչ ձեռինդ միայն ձգմամբ հպաւորութեան. ով
բարեգութ Աստուած մերձաւոր, այլ ի բացեայ
զոլով միջոցաւ մեծաւ՝ ակն ունիմ զօրել քո բա-
նիդ առ իմ բժշկութիւն: Ոչ թէ ինչ խորոց
կասկածանաց միջոցի բանի, որ երկմտութեան
կարծի նշանակ, ի մէջ արկանեմ կամելոյն և
ողորմութեան, այլ կամիս որպէս բարեգութ, և
կարես որպէս զարարիչ. ասա բանիւդ. և բժշ-
կեցայց: Էնդ հարիւրապետին հաւատոց և ես
Ծակցեմ. ոչ մինչ անձուկ միայն բացակայու-
թեամբ հեռի լինելով խորան ի խորանէ հաւա-
տամ ազդել քոյ կարողութեանդ առ յարութիւն
և բժշկութիւն. այլ ի վերինն երկնի բազմելով և

ի ստորինս երկրի բովանդակ, առ հրաշիցն ըստանչելութիւն ոչ ունիմ հատուցանել:

Գ. Ծնորհեա ինձ, որպէս դատակնիք բանին քո վճռեաց առ պոռնկին ընդունելութիւն, հընգից հարիւրոց դենարաց պարտուց շնորհաբաշխութիւն՝ Աստուած բարութեանց և տէր երանութեանց, որ յաճախն ընձեռել՝ բազումս փառաւորիս, և ի շատն մատուցանել՝ նովին չափ սիրիս, և յառաւելն ողորմել՝ կրկին բարգաւաճիս, և յայսքան բարիս իրաւամբք գովիս և ամենայնի տէր գոլով հաւասարորդ ճանաչիս և որ զբոլորն ունիս՝ ընդ մերումս կշռիս, և անձառելեաւդ ձրիւ մերայնովքս վճարիս, և ընդ երկրաւորիս զանգախճանն պարտ վարկանիս, և մեծազրեալ քո զմերն՝ վեհս գոհաբանիս, և ի սակաւուն տուչութիւն դոյզն փառաւորիլ ոչ ամբարտաւանիս։ Արա և ինձ զնոյն գթութիւն ունողիս զգործս անհամար պարտուց. զի և ի ճառս երախտեաց քումդ պարզեաց՝ նորին իսկ սակով սիրելն կարգեսցի. և քեզ փառք յամենայնի, ամէն։

ԲԱՆ ԺԲ.

Վերսին յաւելուած կրկին հեծուրեամ.

Ա. Արդ ես ծնունդս մեղաց, որդիս մահացու երկանց, արդարեւ անսահման բիւրուց քանքա-

բաց տուժից զոլ հատուցանող իմիում աւուր :
Այլոչ թէ առ փոքրկութիւն մարդկային մտաց
հայցեմ ներութիւն, այլ առ աննուազ լիութիւն
փրկչիդ Յիսուսի Քրիստոսի պաղատիմ մարդա-
սիրութիւն, որ չէի երբեմն և ստեղծեր, չմաղ-
թեցի և դու արարեր, չև ևս եկեալ ի լոյս՝ և
տեսեր, ոչ յայտնեցեալ իմ՝ և գթացար, ոչ կար-
դացեալ՝ և խնամարկեցեր, ոչ համբարձեալ
ձեռն՝ և նայեցար, ոչ պաղատեալ՝ և ողորմե-
ցար, ոչ կերպացեալ ձայնիս՝ և լուար, ոչ հեծե-
ծեալ՝ և ունկնդրեցեր, գիտելով զարդեան դի-
պուածոյս՝ չանտեսեցեր, նախահայեցդաշօք
Ըկատեալ զպատժապարտիս չարազործութիւնը՝
և յօրինեցեր : Եւ արդ զքո արարեալս և զքե
փրկեալս և զայսքանեաց խնամոց յանձանձեալս
մի իսպառ կորուսցէ մեղացն հարուած գիւտք
բանսարկուին, մի յաղթեացէ յամառութեանս
իմոյ մառախուղ՝ ներողութեան քո լուսոյ, մի
սրտիս կարծրութիւն՝ երկայնամիտ բարու-
թեանդ, մի մահացու մսեղիս՝ ամենակատարդ
լրութեան, մի տկարութիւն նիւթոյ՝ անպարտե-
լի բարձրութեան :

բ. Ահա կարկառեմ զկարկամեալ բազուկս
հոգւոյս յանուն քո՝ հզօր, արասցես ողջ իբրև
զպուաշինն մինչ ի դրախտին փափկութեան
զպտուղն կենաց կթէի : Կաշկանդեալ զոսացեալ

ի կոր կործանմամբ ընդ կնոջն տագնապելոյ՝
կայ անուղելի հոգւոյս թշուառութիւն, ընդ եր-
կիր պշուցեալ մեղացն կրմամբ՝ սատանայական
բուռն կապանօք, զի մի զերկնայնոյդ ընկալցի
զողջոյն. խոնարհեաց առ իս, միայն ողորմած,
զի բարձրացուցես զփայտս խոնարհ բանաւոր
անկեալ, և զչորացեալս ծաղկեցուցես ի բարի
կրօնս վայելչութեան, ըստ աստուածաբանու-
թեան սուրբ մարգարէին : Որպէս զ'ի ծնէ կոյրն
անլուսաւոր՝ չունիմ տեսարան, որով զատեղծ-
չիդ նկատեալ զկերպ մաղթեցից, հզօր բարե-
գութ, միայն դու պաշտպան ակնարկեալ խնա-
մովք անձառ քոյ սիրոյ՝ ի շնչական խօսուն քո
անօթս, յանէից գոյաւորութիւն լուսոյ հաստեա-
ցես : Ընդ երկոտասանամեայ չարեօք չարչա-
րեալ վշտագին կնոջն տանջեցելոյ՝ զետովք
մեղանաց արեան հեղեղիմ. հայեաց ի բարձանց
անմատոյց լուսովդ պարածածկեալ, ուր ոչ է
քղանձք ձեռաստեղծական վերարկուի ձորձոյ,
այլ տարածումն հրաշից ամենայն ուրեք զօրա-
ցեալ : Ոչ օծութեամբ իւղով՝ պատժապարտս ընդ
մեղաւորին մատուցեալ առ կենդանաձիր ոտից
զարշապարդ՝ զկաթիլս աչացս վարսիւք հերացս
ընծայեցուցանեմ, այլ զամբիծ հաւատս ամ-
բարձմամբ բազկացս ստոյգ դաւանմամբ հոգւոյ
ողջունիւ շրթանց կափուցմամբ զերկիր համ-

բուրեմ, խառնեալ հեծութիւն աղբերցս արտա-
սուաց՝ բժշկութիւն հոգւոյս աղերսեմ։ Վատ-
նեալ մեղանօք հոգւոյս գոյութիւն լուծեալ
մեղկութեամբ, և յերկուց կայից միայնակողմամբ
անհաստատ հետովք զնթացից գործին՝ նահանջ-
մամբ չարին՝ զինտեականն բարձողութիւն
շինուածոյ մարմնոյս՝ առ ելս ծառոյն կենսա-
սիթ պաղոյն խափանեցելոյ, պատսպարեսցես
անդրէն վերստին, միայն հնարաւորդ առ ի փըր-
կութիւն։ Զփառաբանարան հաստուածոյ կեր-
պիս ի.քէն եղելոյ՝ ամրափակ խցմամբ համրա-
ցոյց արգել հողմն բանարկուին. հոգիդ քո
ազդեալ մեծդ ողորմութեամբ, ըստ յաւետա-
րանին բժշկեցելոյ, հրաշափառապէս բարեզոր-
ծեսցես բանդ կենդանի՝ ինձ խօսողութիւնն ան-
սայթաքելի։ Անկեալ կամ չարեօք ի մահիճս
ախտից ընկողնոց մեղաց՝ դի կենդանի և խօսուն
մեռեալ, կարեկցեալ իմումս թշուառութեան՝
ողբականօք քքուանաց ձայնից, ով բարերար
որդի Ստուծոյ, օրինաբանեալ աշացդ ցողով
վերականգնեսցես ի կենդանութիւն, իբր զսիրե-
լին ի յանշնչական մեռելութենէ։ Ստոյգ դառ-
նացողս ի զբի մեղաց կամ տարակուսեալ, ձեռն
մատուցեալ՝ արև անատուեր որդի բարձրելոյ,
հանցես զիս ի լոյս քումդ նշուլից։ Ընդ աղիողորմ
թշուառութեան կականման ձայնի այրւոյն ի

Նային մօր միամօրին, տատանմամբ մատանցն, կոծմամբ կրծիցն, հոսմամբ արտասուացն, տըւայտանօք տխրութեան դիմացն, և ես պաղատիմ վերջին հեծութեամբս, տուր յուսահատելոյս զքաջալերութիւն միսիթարութեան զթածքո բանիդ, ասելով և ինձ գովեալդ բարի ստեղծիչ աշխարհի, թէ մի լար գերի բազմաց ողբալի. որով ընդ պատանւոյն կենդանացելոյ ի մշտացելոյ ծնողին սփոփանս՝ զամենապարտ ոգիս ընկալայց ի քէն ընդ նմին կրկին նորոգեալ: Ընդ այսակիր անզգայելոցն դիւալլուկ և քարակոշկուն հեղձամղձուկ եղկելի անձանցն, քստմնելի գիսախտիւ հերացն, վայրեներես բանդագուշելոցն, ի քէն ողորմկալ փրկիչ բոլորից, իբրև զնոսին առ քեզ դիմեցից. հերքեալ մերժեացես զգունդս չարացն ապականողաց ի քո խորանէս, զի ժամանեալ հոգիդ քո բարի այսրէն հանգիցէ, լցեալ զմարմինս մաքրութեամբ շնչոյս՝ զգեցմամբ անդամոցս, զգաստ արասցես զխելազարեալս ամենաթշուառ: Ընդ գերեցեալ դժոխաբնակաց վտարանդելոցն հոգւոց արգելեալ կամ վտանգի. զճառագայթ ողորմութեան փառաց քոց ծագեալ՝ լոյսդ իմ անձկութեան, ի կապանց օցտողին զերծեալզիս ապրեցուացես: Գաղտնորոգայթ աներևութերակ վրիպակ արանետ զարշութեամբ մեղացս ջրգողեցեալ ոգւոյս կեր-

պարան կայ ի տագնապի . զծանկեալն ի տեսողութեանց զչարագործին թիւնիցն այտուցմուն , քո ինքնաւորդ զօրեղութեամբ որդի Աստուծոյ , գթածաբար առողջացուցես : Էզրագմազան տարազս ցեղիցն զանազանից ախտաւորութեանց մահացուցանողաց իւրականօք կորստեան բերիւք , դժնղակամարմն շառափոք հաստատեցելովք ի յանդաստանի անօրէն մարմնոյս , տարակորզեսցես ի ձեռն ձեռինդ ամենակալի , որ արօրադրեալ միշտ՝ և մշակես զսահմանս հոգւոց առ բանիդ կենաց արդիւնատրութիւն :

Գ. Եւ քանզի անցաւ ըստ նմանութիւն օրինակութեանց յանցուածոցս վէր , ըստ ճարակողն քաղցկեղի , առ բնաւ անդամս մասնաւորեալ զախտին տարածումն , չիք սպեղանի իրը խարայելի առ անչափութիւն խարանացն մատուցանել . ի խարսխաց բարձիցս մինչև ցափն կառուցման լրութեան անդամոցս չէ առողջութիւն , այլ ամեննեին անբժշկութիւն : Խսկ դուռդրմած բարերար օրհնեալւ երկայնամիտ թագաւոր անմահ , լուր պաղատանացս արզահատութեան սրտիս վտանգի , որ կարդամս քեզ տէր ի նեղութեան :

ԲԱՆ ԺԹ.

Վերսին յաւելուած կրկին հեծութեան .

Ա. ՆԱՅԵԱՅ ԱՄԵՆԱԻԱՅԵԱԳ ՄԵՍՈՒԹԻՒՆ ԿԵՆԱԳ
ՔԱՐՈՒԹԵԱՆ յՈՒՍՈՅ Ի ՄԵԾԱՔԱՐՔԱՈ ԱՂԱՂԱԿ ՋԱ-
ԼԱԳԲԵԱԼ ԱՆՁԻՆԸ ՀԵծեծանաց : ԱՆԻԱՍ ՄԵԾՈՒ-
ԹԻՒՆ, ԱՆՈՒՆ ԱԻԱԿՈՐ, ՔԱՐՔԱՈ ԿԵՆԴԱՆԻ, ԼՈՒՐ
ԳԱՆԿԱԼԻ, ՃԱՇԱԿ ԱԽՈՐՄԵԼԻ, ԿՈՉՈՒՄԸ ՊԱՂՏԵԼԻ,
ՔԱՐՈՒԹԻՒՆ ԽՈՍՏՈՎԱՆԵԼԻ, ԱԳԴՈՒՄԸ ԽՆԿԵԼԻ,
ԽԱԿՈՒԹԻՒՆ ՊԱԼԱՆԵԼԻ, ԷԿՈՒԹԻՒՆ ՓԱռԱՄԵԼԻ,
ԳՈՅՈՒԹԻՒՆ ՕՐԻՆԱՔԱՆԵԼԻ, ՄԵՐ ՑԻԱՊԱ ընդ Հօր
ՔՈՒՄ ԳՈՎԵԱԼ և ԵՐԿՐԱՊԱԳԵԱԼ: և ընդ Հոգւոյդ
ՄՐԵՋ ՔԱՐՃՐԱԳԵԱԼ և ՎԵՐԱՃԱՅԵԱԼ, ՈՐ ՄԻԱՅՆ
ՄԱՐՄՆԱԳԱՐ ՎԱՍԻ մԵՐ ըստ մեզ, զի արացես
զմեզ վասի քո ըստ քեզ, լոյս ամենայնի, յամե-
նայնի ողորմած, հզօր, ԵՐԿԻՆԱՅԻՆ, և այժմ զլու-
ծեալ և զիսրտակեալ հողանիւթ անօթս ասու-
ւածօրէն հրաշակերտութեամբ, աղաչեմ գթած,
նորոգ հաստատեա : Զքոյին պատկերս մեղօք
հնացեալս' ի քրայս հալոցաց կայծակամբ բանիդ,
պաղատիմ առ քեզ, վերստին ձուլեա : Զխախ-
տեալ շինուածս քումդ հանգստեան խորանի
մարմնոյս՝ պահպանաւ հոգւոյս, մաղթեմ քարե-
րար, ի բնակութիւն քեզ մաքրագործեա : Մի
հատուցաներ չարեացն իմ գործոց զնոյն փոխա-
տրութիւն : Արբեալ եմ ըստ մարգարէին բանի՝

և ոչ ի գինւոյ. Թափեա զմրուրս անօրէնութեան
թմբրութեան մահութաժակիս՝ ազատարար հրա-
մանաւդ ամենակեցոյց, զի մի զքոյդ քամեցից
ի վերջին աւուր յետնում հատուցմանն :

Բ. Արդար ես յիրաւունս քո, և յաղթող ի դա-
տաստանի . Եթէ մահու մատնես, ճշմարիտ են
զործք քո. Եթէ դատապարտես՝ աստուստ սկը-
սեալ զտանջողականն կշտամբութիւն, ստոյք
են հատուցմանք քո. Եթէ յանդունդս խորոց
սուզեսցես, թէ զկենդանութիւն շարժմանս
բարձցես, թէ զբանիս զօրութիւն ունայնացուս-
ցես, թէ զաշացս պատուհանս ստուերացուսցես,
թէ զկենացն ճաշակ ի քեզ ինքն ամփոփեսցես,
թէ զիասարակաց կերակրոյս դարմանս բարձ-
ցես, թէ զաւուրցս հարստութիւն համառօտես-
ցես, թէ ընդ իշման քաղցրութեան ցողոյ և հուը
տեղասցես, թէ ի լրութենէ բանի քոյ սովեցուս-
ցես, թէ զականջացս դրունս խցցես, թէ զշնորհիդ
ձիր կտրեսցես, թէ զգետին յատակի ոտիցս սա-
սանեցուսցես, թէ յանձկալի երեսաց լուսոյդ քոյ
հանձես, թէ ի համօրէն աշխարհէ հաստի հերքես-
ցես, թէ փայլատակմամբք հրոյ պակուսցես, թէ
անբժշկական ցաւօք դատեսցես, թէ թիւաց չա-
րաց մատնեսցես, թէ զազանաց ժանեօք մանրես-
ցես, թէ հողմով ցաման հոսեսցես, և թէ այլ ինչ
նորոգ արարած տանջանարանաց կազմեսցես՝

չար քան զտարտարոսնեւ տաստիկ քան զգեհենն, թունաւորագոյն քան զորդունսն, տարակուսելի քան զխաւարն, երկիւղագին քան զփորխորատըն, ողորմելի քան զմերկութիւնն, վկայեմ անձամբ անձին՝ յոյժ պարտապան գոլ սոցա :

Գ. Եւ քանզի յաւէտ տպաւորագոյն են նմանութիւնք փոխատրութեանցն առ ազակցութիւն մեղանացս՝ իբր պատկերակիցք միատեսակք զուգաշափողք նշանակիչք այսր խորհրդոյ, արդ կարեոր է խոստովանելև յանդիմանել զերեացն ծածկոյթս առ ծանօթութիւն խնդրողին : Որպէս՝ զի ոչ ջերմն սիրով առ ընկերին կարիս մասուցայ, յիրաւի ի նախնումն վտանգին տազնապեալ սառնում : Եւ զի ոչ զցանկականն խրոխտականութիւն սանձեցի, յարժանի կրեմ եղիելիս զանցովանալի զկիզումն : Եւ քանզի ոչ սիրեցի զլուսոյդ աւետիս, արդար հատուցմամբ ի մթութիւն ըմբռնողական միզին կորստեան վրիպեալ դանդաշեմ . Եւ զի ոչ խորեցի զմանունս փոքրունցն յանցանաց իբր անվնասակարք վարկանելով, պատկանապէս ի խաճանողականացն զազիրն զեռնոց խթեալ խոցուիմ : Եւ զի ոչ ձեռն կարկառի առ կիրս վտանգաւորին՝ այց առնել նմին, ի դէպ իսկ ըստ զծազրութեան այսր օրինակի ապականութեան զբոյ նուիրեալ մատնիմ :

Դ. Եւ արդ ոչ յաստուածուստ ամենաքարի

զանձուցդ չարիս, և ոչիլուսոյդ նշովից խաւար, և ոչ յապափնութենէդ գայթագղութիւն, այլ ես ինձէն կորստեան որդիս զտի զայսոսիկ. մեղանք անօրէնութեան իմոյ զանձեցին նիւթեցին զայսքանեաց բարկութեան մթերս. հոգւոյ իշխանին մոլորութեան հնազանդեալ, թողի զտեղի քո նորա, ըստ զրոյն խրատու յանդիմանութեան: Եւ քանզի յայտնեցաւ յետուստ գաղտնեաց առականաց մարմնոյս անդամոց, և արկաւ զերեսօք կերպիս անվայելուչ ստուեր ամօթոյս, ըստ մարգարէին առակի, տգեղս ցուցեալ զիս ամենէին իբր մերկացեալ խայտառակեցելոյս պոռընկի, ծագեա յիս զլոյս քաւութեան, արքայ երկնաւոր. զի թօթափեալ զմեղաց փոշիս ըստ աւետեաց ձայնին դարձելոցն ի թաքելովնէ, նըստայց վերստին կանգնեալ ի հողոյ, և ի հաստատութիւն յուսոյդ հիմնացեալ անսասանելի, ըստ եսայեան բանին, զգեցեալ զզօրութիւն բազկի կարութեան նախնում մաքրութեանն, վասն մեծութեան փառաց քաղցրութեան ամենապարզև քոյ աստուածութեանդ. օրնեալյափափեանս. ամէն:

ԲԱՆ Ի.

Վերսիմ յաւերուած կրկին նեծուրեան.

Ա. Տէք տէք անօխակալ և երկայնամիտ, ներող, բարեգութ, հզօր, ողորմած. ահա ճշմար-

տութեամբ են գործք քո, և խոստովանեալ դա-
տաստանք քո. վկայեալ են ընտրութիւնք քո՝
տեսողդ ծածկութից : Ընդ երից երջանկաց ման-
կանցն՝ որք կիզանողական բոցովն փորձեցան և
ոչ վնասեցանի բարելովնի, զնոցա թախծութեան
զերգն հառաջեմ, մեղայ, անօրինեցայ, յանցեայ,
ապստամբեցայ, և պատուիրանաց քոց ոչ ան-
սացի : Եւ քանզի մաքուր գոլովի վնասուց նոքա
և զայս խոստովանութիւն գոչէին, խակ ես ընդ
նոցայն նովին աղերսիւ ձայնակցեալ սմին ողբոց
երգութեան, և այլ յաւելից ամենապարտս մա-
հու : Ընդ Դանիէլի երանեալ և սուրբ մեծ մար-
գարէին, որ ի քում հարազատութեան ազգակա-
նութենիւ տանն Յուդայի շառաւիդ ընտրեալ,
զնորայն առեալ ընդունական և նուիրական
բանից պաղատանս, իմովս պատժականութեան
գոչմամբ հեծութեանս և այլ կրկնեցից : Ի մէջ
զիտութեանս անպատշաճականս զնացի, զար-
տուդի սխալեալ դժնդակապէս . այս է ամենայնիւ
ամենայն իրօք մեղանչելն : Ըստ սահման կշռու-
թեան կամաց քոց արտաքս վազեցի . որ է հա-
ւաստի կերպարան բասիր անօրէնութեան :
Անգլիտիցն չափոց չարութեան գործոց լրումն յա-
ճախութեան նիւթեցի . որ է ճշգրիտ պատկեր
յանցաւորութեան : Սպառնացար, և ոչ զարհու-
թեցայ . արգահատեցեր, և ոչ երբէք լուայ . որ է

ապստամբութեան յայտնի նշանակ : Քեզ արդարութիւն հանդերձեցեր, բարերար, և ինձ ամօթև պատկառանս պատրաստեցեր . քեզ փառս վայելչականս, և ինձ նախատինս յարմարաւորս . քեզ քաղցրութեան յիշատակ, և ինձ մաղձ քացախեալ ի կատարածի . քեզ բարեբանութիւն անլոելի, և ինձ ձայնս ողբոց աղաղակի . քեզ օրհնութիւնս երգոց խնկելի, և ինձ մերժումն տարագրութեան, քեզ իրաւունս բազմարժանիս, և ինձ պատասխանատուութիւնս ամենավարանս . քեզ բարձրութիւնս անձառգովեատից, և ինձ զամիւն լիզելոյ պատիժ ձաղանաց :

Բ. Եւարդընկալար դուբարեաց ընտրութեանց անկշիռ սահման՝ զքոյոցդ ախորժականաց կընդորկաց պտղոց վերառեալըստ քեզ, և ես զիմոյս աստիճ առ սմին պարսաւանս յոզունս կրկնակի բարդեալ ինձ ըստ իս : Խսկ եթէ անարատիցն մաղթանաց այս էր յանձնառութիւն, խսկ ինձ զնրս հիւսեցից շարս և տողս բանից դսրովականաց, որ քան զամենայն դժնեայս յաւէտ վրիպեցայ : Մալորեցայ անառակ ընթացիւք ի միտս վայրենիս . յանդնեցայ շրթամբք խօսից ի բանս երկրաւորս . զակատեցայ անկասելի ի պատկառելեացն զործոց : Փքացայ, վերացայ, որ յետ սակաւ մի ժամանակի ի հող մահու եմ իշանելոց . զոռոզացայ, բարձրացայ, որ և ոչ զգրաւական

հոգւոյս տուրեառութեան շնչոյս ունիմի ձեռին։ Ամբարտաւանեցայ փոշիս շնչաւոր, ամբարհաւանեցայ կաւս ձայնաւոր, հպարտացայ հողս անարգութեան, ի վեր ամբարձայ մոխիրս մերժելի, բազուկ կառուցի բաժակս մանրելի։ Տարածեցայ առաւել իբր վեհ, և դարձեալ իբր ըզհերքեալ առ իս ինքն ամփոփեցայ։ Բարկութեանն բոցով ցոլացայ տիղմս բանաւոր. իբր զանմեռ ոք մեծամտեցի, ոք ընդ քառոտանեաց մահու եմ փակեալ։ Գիրկս արկի կենցաղոյս սիրոյ, և ի քեզ թիկունս փոխանակ դիմաց դարձուցի. ի թռիչս մտաց ընդ խաւար խորհրդոց սլացայ. զանարատ հոգիս մարմնոյս փափկութեամբ յաւէտ վտտեցի. զզօրութիւն աշական կողմանս տկար արարի, ահեկանաց կայից ուժգնութիւն տալով յաղթեցի։ Զքեզ իսկ տեսի հոգացեալ վասն իմ, զոր չէ աստ զքելի, և ոչ պատկառեցի. իբրև զնաւ վայրենի սրացայ, ըստ ովտեան բանին առ նփրեմ, ի նախնին իմ տովորութիւն։ Յաղօթարանն վայրի ընդ պատաղմունս այսր կենցաղոյս շրջանակեցայ. ոչ կացուցի յոտին զերիվար մտացս երաստաւբանին։ Ընդ հին չարութեանցն նորոգ ինքնաստեղծութիւնս գտի. անուրս ըստ Յոբայ ծանունս և անտանելիս ինձեն ինձ սատոկացուցի. առիզած անկարկատելի, ըստ Նրեմիայի, զանձն իմ

արարի. իբր զվիժած անգրելի կոչման, ըստ
առակարկութին, ի մարդկանէ համարոյ եղծայ.
իբր զիանդերձս ինչ ապարահից, ըստ եսայեան
բանին, զազրացայ. որպէս զթրծեալ աման խե-
ցեղէն փշրեցայ անարծարծելի. ըստ բամբասա-
նացն Եղոմայ ի մարգարէէն զչորրորդ չափն
անօրէնութեան սատակման ինձ պատրաստեցի:
Եւ զինչ ստութիւն առ այս՝ և զայս յաւելուլ բնդ
այս. քանզի զվրանն իսկ դիւանուէք Մողոքայ
առի ինձ այսրէն՝ առ դժոխցն ժառանգութիւն,
լրեալ զերկնայինն յեղանակաւ իմն օրինակի
նմանակիր ձևակերպութեան, որպէս առակ
պատկերի աստեղն Անփանայ բաքելականի՝
յիսրայէլէ պատուեցեալ ցուցաւ ի Սինայ:

Գ. Իսկ արդ զի ի նախնի շնորհին համարձա-
կութենէ դարձեալ փոխեցայ, զրկեցայ, ելայ,
նեռացայ, բաժանեցայ և անպատուատելի կա-
րեցայ, արդ ընկալ զիս տէք վերստին կերպարա-
նեալ ի պատկեր հազւոյ, զանարժանս կենաց
իբր զմահապարտ. իբր զչարագործ, իբր զպատ-
կառեալ; իբր զկրխան եղեալ բանարկութին,
որպէս զանքըշկելի մանրեցեալ որպէս զիասեալ
յատակս մահու. որպէս զգարշեցեալ, որպէս
զիստան զտեալ քո կոչմանդ, որպէս միան-
գամայն ի կորուստ վարեալ, որպէս դեզե-
րեալ, որպէս վանեցեալ, որպէս տարակու-

սեալ, որպէս թշուառացեալ, որպէս վհատեալ,
որպէս կործանեալ, որպէս խորտակեալ, որպէս
բեկեալ, որպէս զթախծեալ, որպէս յոզի տըրտ-
մեցեալ, որպէս թշնամանեալ : Խոկ դարձեալ
ակնարկելով քո՝ զթած, մարդասէր, հզօր,
ի յաղերս բանիս՝ որպէս զղացեալ, որպէս խոս-
տովանեալ, որպէս ի յոտս քո դիմեցեալ, որպէս
զապաշխարեալ : Որ կշռես, գրես և մեծ համա-
րիս զհառաչ հոգւոյ և զազդումն զնչոց հեծու-
թեան, զկսկիծ, շրթանց, զպասքել լեզուի և
զտխրականութիւն երեսաց, զկամս խորհրդոց
և զյօժարութիւն խորութեան սրտից : Որ փըր-
կութիւնդ ես անձանց, և տեսող ոչ գործեցելոց
և ստեղծիչ բոլորից, և բժիշկ վիրաց աներեւու-
թից, պաշտպան յուսացելոց, և բարեխնամոդ
տէր ամենեցուն : Եւ քեզ փառք յամենայնի ,
յաւիտեանս . ամէն :

ԲԱՆ ԻՍ.

Պերսիան յաւելուած կրկին հեծուրեան .

Ա. Եհ քանզի ես ինձէն անձամք իմով ինքնա-
գրաւ ի մահ՝ ոչ կացի երբէք ի յոտս մարդոյ, և
ոչ սիրտ բանականի սաացայ՝ ըստ գրոյն, և
քանզի ոչ փոփոխեցայ ի նախակարգելոցդ, և
ոչ ընդ բարւոք ուղին ընթացայ, ընդէր ոչ զիս-
տորնական հետոցն խաւարայնոց զդէմս ցուցից

ի սահման կարգի այսք ընթերցուածոյ : Առ որս
ածեալ յարմարեալ առ ոոյն զկերպարան տե-
սակի բանիդ երեսաց , ըստ վերագոյնդ նշանա-
կելոյանփոխաղբեկի պահելով , խոստովանեցայց
վերստին դարձեալ աստանօր զմնացեալ չա-
րութեանցն զբիծս , զոր յաջորդաւդ է իմանալի :

Բ. Օտար ժանտագործս արժանապատիժս՝
աճեցուն արարի զնացիւք անսաստութեան
զգունդն բելիարայ : Կաքաւս կայթից և ցոյցս
վազից խաղալկացն դիւաց գարշելեաց ճարտար
խաբողաց ծուլութեամբս իմով շնորհեցի : Գանս
զաղտնիս և խոցուածս անյայտս ի կործանեցե-
լոցն դահճաց ընկալայ : Ոչ հերքեցի զվանեալսն
խաչիւն Քրիստոսի , քան թէ անդրէն առաւել
կրկին իսկ զօրացուցի : Վասն իմոյ հիքոյս անօ-
քենութեան անունդ Յիսուսի հայնոյի ի մէջ այ-
սականաց , որպէս վասն Խորայէկի իմէջ հեթա-
նոսաց : Հարուածս հարուածոց վնասակարս
ապականութեանց ժանգոյ և թրթրոյ և այլոց
կերչաց վատնողաց զծաղիկ հոգւոյս , ըստ սրբոյն
Յովելեայ հրաշական ողբոցն , որ ի ցոյցս երկրի
վասն Խորայէկի՝ յառակս հինից և չարաց հոգ-
ւոց , յիս ինքն տնկեցի . ստեղծանել զնոսա պատ-
րաստեցայ , քան թէ սատակել : Բիւրս կուտեալ
հաւաքեցի անձին իմում մարտիկս մահազէնս ,
կշտամբիչս ինձ գոյացուցի անիրաւս և անպատ-

կառելիս. Եերհակս ինձ զօրացուցի սպառումս
և անկռուելիս. գառփիս ինձ առի մասունս ընդ
քաղցրաւենեացն ճաշակաց, առ ստացողն միշտ
Եենգաւորս, և առ բանսարկունյաւէտ հաւատա-
րիմս : Աւաղ աղէտիս, վիշտ վտանգիս, խաւար
ամօթոյս մութ պատկառանացս. զիարդ և առ
բանիս յանդիմանութիւն համարձակեցայց. մեծ
է ձայնս գուժի, և անբերելի բողոքս աղաղակի :
Քանզի թէ զիոզիս էր զիմ տեսանել, տգեղս և
նուաղս և ամենեին Եերգեւալս, ցաւովք հե-
ծութեանս ի վերջինս վարեալ վարանումն, և
մընոտեալ աղտեղեալ գունով զազրութեան իբր
զպաշտօնատար մեհենի. վասն զի նոյն է սպաս
տանելձուեալպատկերի, և մեղաց ախտի : Արդ
ես զնացի ընդ այս ճանապարհ կորստեան
հետոց խաւարի . Ետու զբաժինն քո ցանկալի
յանապատ անկոխս, ըստ մարզարէին որ առ
քահանայսն Խորայէլի ամբաստանութեան :

4. Եւ զիարդ ասացից անձին իմում մարդ՝
գրեալս ընդ անմարդիս . և իբր անուանեցայց
բանական՝ անբանիցն յիմարութեան կցորդեալ.
և որպէս կոչեցայց տեսանողական՝ մթացու-
ցեալ զլոյսս որ յիս . և ընդէք համբաւեցայց զգա-
յական՝ զիմաստիցս դրունս փակեալ. կամ
որովք ցուցայց տպաւորութիւն նկարազրու-
թեան անեղծին շնորհի՛ անձամբ ինձէն յոզի

մահացեալ. նա և ոչ շարժողական և կամ շնչական ունիմ անուանել, թող թէ հոգեկան կամ մտաց ընդունական. անպիտանս ի թիւս անօթոց, անարզս ի քարինս որմոց, արհամարհեալս ի կարզս կոչեցելոց, վատթարս ի յազգս հրաւիրելոց, արհաւրօք մահու պակուցեալս, անխրախուսելի ի բոլորեցունց՝ ցաւովք և տանջանօքն երուսաղեմի ըստ Երեմիայի բանին խրատեցեալ, պակասեալ աւուրցս ի հեծութենէ. և ընթացք ամացս ի հառաջմանէ, ըստ նուազարանց երգողին: Իբր ասուի ի ցեցոյ և փայտ, ի յորդանէ, ըստ իմաստնոյն բանի ի խիթմանէ սրտիս հալեցայ. իբր զոստայն սարդից մաշեցայ, ըստ սաղմոսողին, և խոտան գտայ. իբր զամպ առաւոտեայ և զցող վաղորդայնի՝ ըստ մարզարէութեանն ձայնի՝ սպառեցայ: Այլոչ ի մարդ ոք ունիմ զյոյս, եթէ անիծեալ իտեսանողէն անյուսադրելի վհատիմ. այլի քեզ, տէր իմ ոգեսէր, որ ընկղմեալ ի քոյդ զթութեանց բարեաց անբաւից, և ի ըսեռելոյն ժամու ի խաչին մաղթեցեր մեծդ ողորմութեան առ Հայր քո բարձրեալ՝ քո չարչարողացն: Արդ շնորհեա ինձ յոյս քաւութեան կեանք, և ապաէն, և ի տուր շնչոյս թշուառի՝ առից զոգիդ քո բարի: Եւ քեզ ընդ Հօր Հոգւովդ սրբով՝ զօրութիւն, յաղթութիւն, մեծութիւն, և փառք յաւիտեանս, ամէն:

ԲԱՆ ԻԲ.

Վերսիմ յաւերուած կրկիմ հեծութեան .

Ա. ԴԱՐՁԵԱԼ այլաբանեցից ի նոյն շարունակ բարդեալ զկշտամբանացս եղանակ դսրովեալ անձինս, ածեալ մատուցեալ կրկին կացուցեալ նովին պատկերաւ ի նոյն պայմանի . թերևս զըեցէ ինձամենագէտն զայս յանդիմանութեան դատակնիք կոկծեցուցանողականս բանի ճշմարիտ խոստովանութիւն համայնից գործոց զայտնութեանց չարեաց :

Բ. Այլ ոմն ձիս խօսնական կարծրերախ սանձակոտոր արձակերասան, յովանակս անհամբոյր վայրենական և անկրթական, երինջս աւողական անուղղական և անվարժական : Մարդ մոլեգնական տարագրական և կորստական, մանուկս մեղանչական անխրատական և վարատական, անտեսս մահապարտական տարտամական և անզորժական, բանականս անառական զազանական և անմաքրական: Զիթենիս ամայական անպողական և կործանական, մարմինս հոգւոյս իմ թախիծողական դատողական և տանջողական, խոցեալս անքժկական անխնամական և անկանգնական: Ոսկի շարս կայսերական՝ արդ վատնական և անզտական,

ծառայս սիսալական փախստական և թշուառական :

Գ. Ահա ես ինքն ինձէն կամաւորապէս անձնամատն և մաքմնակործան, հոգեկորոյս և միշտ մտախաք, կամակոր իսկ և սրտաքեկ, ուշամոռաց և հանճարազրաւ, զղայազիրկ և իմաստասպառ, յայրատատես և եղեռնալուր : Ես աստուատ և անդուստ բանիւք բորբոքմամբք մահաքեր երկամբք վնասեալ ոչ միով իւիք տեսութեամբ իգործ ընտրութեան քեզ պիտանացուս, տէրդ բոլորից . ողբամ զորովայնն, որ երկնեացն զիս, աշխարեմ զոտինսն, որ դիեցուցին . ընդէք ոչ մաղձ մակարդեալ ընդ կաթինն ձգեցի, և զիարդ ոչ դառնութիւն ինձ ընդ քաղցրութեան ջամբեալ մատուցաւ : Զի եթէ ես ինձէն անձին իմում գմնեայ դատախազ համբարձայ այսքանեօք բանիւք, և ունիմ տակաւին զսուր բարկութեանս անխոնարհելի, ով ոք ի յերկրածնաց աստի զիս ողոքեսցէ . զամենայն խայտառակեցից, զբնաւ էութիւնս դատեալ տուժեցից, զնամօրէն զվնասակարացն զգունդ զանեցից, զխոցողացն զինուորութեանց դատախազեցից, զգայականացն զիսաւորութիւնս կշտամբեցից : Մեղայ ամենայնիւ յամենայնի, ողորմեա գթած . ոչ նոր ինչ գտեր յիս զյանցանցս պարտեաց մառախուղ, այլ նոյն եմ

յաւէտ նովին պատահմամբ պարտաւորութեան, անկցելի ձորձով սխալեալ առաջի քո՝ անփոփոխելի, և դու միայն իսկապէս զթած օրինեալ մարդասէր, ընդ աջմէ իմոյս փրկութեան կանխեալ ներութեամբ անայլայլելի :

Դ. Արդ մատո, խնամակալ, հզօր, երկնաւոր, բարի, ամենից հաստիչ յոչէից, զբանիդ զօրութեամբ իմաստից կայծակն իգործի ազդման լեզուիս շարժութեան, առիթ մաքրութեան յամենուատ զգայականաց գոյաւորութեանց յիս մասնաւորելոց՝ քո ձեռակերտից, սոքոք առ ի քէն եղելովք և բժշկելովք կրկին հանդերձանօք, անպակաս ձայնիւ. անհատ բարբառով, քեզ վերընծայել գոհաբանութիւն իփառս մեծութեան Հօրդ քոյ Աստուծոյ մերոյ, յաւիտեանս. ամէն :

ԲԱՆ ԻԳ.

Վերսին յաւելուած կրկին հեծուրեամ.

Ա. Տէր Աստուծ ամենայնի, զօրաւոր յամենայնի անպարազիք և անվայրափակ տեղի ամենեցուն. բոլոր խկութեամբ հուպ յամենեսին, անուբեք վայրից, և չիք սահման առանց քո : Ոչ երևեալ երբէք, և ոչ տեսականութիւն առանց քո ծագման լուսաւոր : Փառք ահաւութեան, անուն անհասութեան, կոչումն մե-

ծութեան, ձայն անբաւութեան, իսկութիւն անքննութեան, անմատչելի հեռաւոր, և անընդմիջելի մերձաւոր, տեսող հեծութեան, նկատիչ թշուառութեան. մօտակաց թախծութեան, ամենաբոյժ հնար անձարութեան, հայր զթութեանց, ծագող ողորմութեան, Աստուած միսիթարութեան:

բ. Հայեաց տէր ողորմութեամբ ի պատկեր վշտաց դառնութեան բազմավտանգ կրիցդ կարեաց, զոր հանդէպ քո տարածանեմ. կցորդակից լեր բժշկապէս, և մի ի խոյզ ընտրութեան կոչեր դատաւորաբար: Արդարեւ մեծ է վտանգ տարակուսանաց ցաւոց այսր վարանման յորժամ իցէ մարմինն մեղօք զրաւեալ. և անձն ի զործոց չարեաց ոչ մեկուսացեալ, գործնականացն զործի սովորութեամբ կարեաց կապեալ, զանգուածն հանդերձանաց մահացու կրիւք շաղախեալ. զգայութիւն սրտին իմաստից խեթիւ խոցուտեալ, ակնկալութիւն բարեացն ընաւին բարձեալ, և իբանականութեան ընդ անասունս դասակարգեալ, և զագիր զարշութիւն ընդ գոյութեան շարամանեալ, և տեսականացն ողջ ելով իմանալիքն վիրաւորեալ, և ի սաստկութենէ յանցանացն յիշատակի յաւէտ յուստահատեալ, և տագնապաւ նախագործելոցն միշտ տարակուսեալ, և յատակութիւն աղերսին ի

սպառ պղտորեալ, և խղճիւ մտացն յուզմանց
կրկին ճենձերեալ, և ձեռն ի մաճի գործոյն
զյետնոցն հետազօտեալ, և կերպ ի յառաջ դի-
մեալ՝ ոտք ի վերջ կոյս յետահարեալ, և զիտու-
թեամբ էիցն՝ ի չէիցն միշտ խաբեցեալ, և ի
մտացն մարտ՝ ի փոքունցն յաղթահարեալ, և
ի թառանչ սրտին հազարին դուռն հրդեհեալ,
և խոնաւ զօրութիւն քմացն ամենայն ուրեք տո-
չորեալ, և անարև միգով յամենայն մասանց
պարփակեալ, և լայնութիւն ակնկալութկանն
ամենևին իսպառ ամփոփեալ, և անքերելեացն
տոյժ ի զգալիսն տպաւրեալ, և եղկութիւն
կորատեանն իյուշ անդ եկեալ, և դատակնիք
հատուցմանն ի դիւանի մտացն զրեցեալ, և բա-
րերարին ակն ի ցատումն իմն երևեցեալ, և լոյս
բնութեամբ՝ զանգուածոյ հողոյս զայրացեալ, և
ահաւորութիւն էին ընդ փոքրկութիւն բնու-
թեանս ընդհարեալ, և միշտ որոտմամբ բանից
բանաւոր մոխրոյս բարկացեալ, և իրաւանցն
վիմօք զարժանիս մահու կոշկոնեալ, և որ իմն է
տաղանդ՝ յանառակս աստէն կորուսեալ, և
պատուական իրին ստացուած իբրև անարգ
յերկրի թաղեալ, և տաժանմանցն արզասիք
ծուլութեանն մթով ծածկեալ, և իբրև զի
բաց բարձեալ նշմարան ճրագի չերևեալ, և պա-
տասխանարան լեզուիս՝ յիրաւանցն օտար՝ կար-

կեցեալ, և անհամբոյք շրթանցս դրութիւն օրինաւոր դատմամբ պապանձեալ, և յուզմունք մտացս ի զանազան մասունս ցնդեալ, և զկեալն ի վերայ օգտին ոչ ինչգիտացեալ, և ի կշռութիւն բարւոյն ընտրութեան յիմար երեեալ, և ընթացք ելիցն նհանջմամբ չարին խափանեալ, և վառարան իւղոյն աճիւնովն հնոցի լցեալ, և անուանս զիր ի կենաց մատենէն եղծեալ, և կըշտամբանք ընդ երանութեան անդ արձանացեալ:

Գ. Եթէ զինուոր տեսանեմ, մահու ակն ունիմ. Եթէ պատզամաւոր, խստութեան. Եթէ մատենազէտ, մուրհակի կորստեան. Եթէ օրինաւոր, անիծից. Եթէ աւետարանական, փոշւոյ ոտիցն թօթափելոյ. Եթէ բարեկրօն, յանդիմանութեան. Եթէ ապառում, կոկծման : Եթէ ջրովն ընտրութեան փորձիմ՝ խորտակիմ. Եթէ դեղ ինչ դատման ձգեմ, սատակիմ : Եթէ բերս նկատեմ բարութեան, ի կարծեաց չարեացս փախնում. Եթէ ձեռն համբարձեալ, կորանամ. Եթէ փոքր ինչ խրտուիլ, սարսեմ. Եթէ սակաւ մի թնդիւն, ընդոստիմ. Եթէ ի խրախնանս ըմպելեաց հրաւիրիմ, դողամ. Եթէ մեծիդ յանդիման լինիմ, սարսափիմ. Եթէ ի հարցումն բանի կոչիմ, կարկիմ. Եթէ ի բաւամբք քննիմ, համբանամ : Արդ այս քան ամենաթշուառ և ողորմագին տարակուսանացս ի վերայ միմեանց բարդելոց, որք զսորեւ.

զգայականաց սրտիս գոյութեան ի ներքուսուտ
անդուսուտ անբժշկական ցաւօք՝ աներևակի նե-
տիւք խոցոտեալ, անարտաբերելի մշտակիր
յարամնաց հանապազամուխըւեռեալ աստուսուտ
ընդ հոգւոյս. յցեալ շարաւով կրկին հարուածով,
վտանգ սատակման մահու գուշակեն : Թարախ
մթերից պատեալ զերկաթով գաղտնեացս ծա-
ծուկք ազդեն ինձ տագնապս՝ վերս պահեալս
անխնամարկելիս ընդ ելս շնչոյս տուրեառու-
թեան, յորոց նեղութեանց չարաչար ճնշեալ
աղաղակ ձայնիս, խառնեալ արտասուօք՝ կող-
կողագին թախծանօք հոգւոյ, բարեգործիդ հնա-
րաւորութեան յերկրաստեղծիցս նահատակաց
ընդ իմ մաղթողաց, վերջին հեծութեամբս և ես
ընդ նոսին արտասուօք ողբոց ամենեքումբք
նուիրողօք՝ զաղերսանս ըղձիցս ի ստորեայնոցս
աստի յերկինս առաքեմ: Նորինեա տէր անդոր-
րութիւն կենաց հանգստեան ողորմելի վաստա-
կեցելոյս ի յընդունայն երկրագործութիւնս, հա-
մայնդ յամենայնում. ամենայնիւ ստացեալ
քեզ փառս :

ԲԱՆ ԻԴ.

Վերսիմ յաւելուած կրկին հեծուրեան .

Ա. Եւ արդ որո՞ց իննդրոց արժանաւոր վարկա-
նելով զիս մատչիմ աղերսել, արքայութեանն

յորմէ վրիպեցայ, եթէ փառացդ վայելչութեան
յորմէ զրկեցայ, թէ ընդ կենացդ անմահականաց
յորմէ հերքեցայ. թէ ընդ հրեշտակսն պարակցու-
թեան յորոց ճեղքեցայ, թէ ուռ որթոյն կենդան-
ւոյ յորմէ քանցեցայ, թէ ոստ տնկոյն բերկրու-
թեանյօրմէ գոսացայ, թէ ծաղիկփառացն շնորհի
յորմէ թափեցայ, թէ պանձանացն ժառանգաւոր
յորմէ կորացայ, թէ հայրենի ծոցոյն հարազատ
յօրմէ ընկեցայ, եթէ զգեստովն ըւսոյ պարծիմ
յօրմէ մերկացայ, եթէ ի ստացող դարձին յուսա-
ցայց յօրմէ խորթացայ, եթէ ի լուսոյն իղձս դիմե-
ցից յօրմէ մեկնեցայ, եթէ Յիսուսի յոսկերսն յօ-
դիմ յօրմէ մերժեցայ, եթէ ի թեւս նորա մերձիմ
յօրմէ օտարացայ, եթէ յապաւէնն ապաստանե-
ցայց յօրմէ խեթացայ. եթէ ի փրկութեանն նորո-
գութիւն յօրմէ մահացայ, եթէ ի զգաստութեանն ն
զուարթութիւն յօրմէ ես լքայ, եթէ ի կանոն կե-
նացն ուխտի յօրմէ փոխեցայ, եթէ ի սահմանն
հաստադրական յօրմէ սահեցայ, եթէ յանշարժ
վիմին պնդութիւն յօրմէ սասանեցայ, եթէ ի շարս
գումարտակին յօրմէ հոսեցայ, եթէ ի քաղաքն
անդրանկաց շինիմ յօրմէ զերեցայ, եթէ հանա-
պազորդեան հացին աղօթեմ զոր ոչ վաստակե-
ցայ, եթէ փոխաղրութիւն երկանցն խնդրեմ յոր
ոչ քրանեցայ, թէ պարզեծքն պասկեցայց յոր
չհանդիսացայ, թէ արձան ինձ կենաց զրեցից

յորմէ շնչեցայ, թէ զերախտեացդ ձիր յիշեցից
զոր միշտ մոռացայ :

Բ. Ահա հատաւ և կամ խզեցաւ լար կենաց
յուսոյն, տիրեցայ ի բորոտութեանցն գարշու-
թենէ համայն ախտացեալ, ամենայնիւ սպա-
ռեալ զմարմինս ապականութիւնն շրջապա-
տեալ՝ մեռոյց Աստուծոյ : Դոյզն պալար
փայլունակ տղեղ լսնացեալ, մնացուած ինչ
պահեալ նախունակ երկդիմի կերպին, որ ըզ-
կրկին անմաքրութիւնն նշանակէ, պարծա-
նացն նշոյլ ամենեսին ինձ շիջաւ, փրկութիւնն
մատնեցաւ, բարին ստուերացաւ, ելք կենացն
բնաւին փակեցաւ, մխիթարութիւնն բարձաւ,
դատաստանին ատեան մերձեցաւ, թոյնք մա-
հուն ինձ արծարծեցաւ, սպանեալն կրկին ինձ
կենդանացաւ, լաստին դադարք վիմօք խցաւ,
շավիղն յուսոյն կուրացաւ, շնորհին ծածկոյթ
յինէն մերկացաւ, փառացն վայելչութիւն
ստուերացաւ, հանձարն առաջնորդական խա-
փանեցաւ, կշտամբանացն փուշ բազմացաւ,
անօրէնութեանն ուղէշ ծաղկեցաւ, բոց գեհենին
ինձ բորբոքեցաւ, ծառայութեանն լրւծ սաստ-
կացաւ, ստրկութեանն կապ զօրացաւ, ունողն
յարկին կառուցման ահա անկաւ, բարձրու-
թեանն վստահարան կործանեցաւ, ընտանու-
թեանն միաւորութիւն անշրպետեցաւ, սրբու-

թեանն սիրող հոգին Աստուածոյ տրտմեց աւ :

Գ. Եւ քանզի զվերջինն համբուրեցի դառն ութիւն, տանջանս' խէթս' տիսրութիւնս, վիշ տս հոգեկանս, ցաւս անխնամարկելիս, տարակոյ սս անյուասպարելիս, ամօթանսանպարուրելիս, խայտառականս անվերարկելիս, պատկառանս անհամարձակելիս, փախուստս անդառնալիս, հալածանս անմարդասիրելիս, երկայն ուղեւրութեան ապաձեռն անթոշակութիւնս. իսկ դու փրկութիւն զօրութիւն և օգնութիւն, ողորմութիւն լուսաւորութիւն քաւութիւն և անմահութիւն տէք Ցիսուս Քրիստոս, որդի Աստուծոյ կենդանւոյ, արարիչերկնի և երկրի, որ ընձեռես ջուր պասքելոցն ի ծարաւուտ վայրս անապատի, օրհնեալ, բարեգութ, հզօր, մարդասէք, երկայնամիտ, խնամակալ, հնարաւոր, այցելու, պաշտպան աննախանձ, պահապան յաղթող, կեանք անկորուստ, միջնորդ երկնային, լիութիւն աննուազ, երանութիւն տօնելի, ձեռն ձրգեալսիրոյողորմութեան քոյաջոյ՝ ընկալևմատոքաւեալ և սրբեալ զիս զամենապարտս' Բանդ կենդանի' առ հաւասարապատիւ քո Հոգի, զի քև վերստին հաշտեալ յիս դարձցի : Եւ ի ձեռն քո իւրովն կամօք մաքուր նուփրեալ, զօրեղն ինքնութեամբ զիս Հօր ընծայեալ, անդէն առ նմին նովիմբմիշտիքեզնչոյս ողջունիւկապեալ

ընդ շնորհիդ՝ իքեզ միանալ անբաժանելի։ Վասն
որոյ քեզ ընդ Հօր քում Հոգւովդ սրբով՝ երրեակ
անձնաւորութեանդ ի միում բնութեան և ի մի
աստուածութեան փառք, և ի ստեղծականաց
էից զոհաբանութիւն յաւիտեանս յաւիտենից.
ամէն :

ԲԱՆ ԻԵ.

Վերսին յաւելուած կրկին հեծուրիան,

Ա. ԲԱՅՅ քանզի իվերայ այսքանեաց զերու-
թեանց ամենաթշուառ վտանգաւորիս մի զմիով
ել և ելս առնելոյ, զոր զերպարանս անցիցն
ի մասնէ վերաճառեալքդ նախազրեցին. ուստի
և վոխեալ զեղանակ բանիս՝ այլ ոչ զեղկութիւն
աղէտիս :

Բ. Այն զի ծով է ինձ ծփանաց կենցաղոյս բեր-
մունք յոյժ նմանագոյն. յորում կոհակօք բազմօք
անթիւ դիմեցմանց տատանեալ հոգիս ի յայսմ
աշխարհի մարմնոյս շինուածով իբր ի նաւակի :
Զոր եսայիսա մարգարէ զյանկարծաղէպ կատա-
րածն որ ի պարսկականն հինից՝ երուսաղէմի և
Սամարիայ կործանմանն, նմանութեամբ այսը
օրինակի կերպաւորեցոյց. որ և առ իմս հոգևո-
րական խորտակումն զուգաձանել՝ ոչ է սխալա-
կան : Քանզի մինչ դեռ չուէի ես յանհոգութեան
անտարակոյսն վստահութեամբ, դոյզն կասկած

արկածից իմիտ բերելով առ խորոց փոքր միջոցին, որ իմեց հանգատեանն և աշխատութեանն, իբր այն թէ հասեալ իցեմ, ձմեռն յամարանի բքաբեր հողմով ժամանեալ երեքալեանն դիմակցութեամբ ամբոխեաց զիանդարտութիւնն : Աւտի նաւն ի բախմանէ վայրենի ալեացն խորտակեցաւ : Թեոցն ձեռնարկութիւն քայքայեցաւ, կայմն ամբարձման ի կայից իւրոց խլեցաւ, առագաստին թռչարան յանկարկատելի ծուէնս պատառեցաւ, շինուածոյն շուք անզարդեցաւ, առասանք ձգողականացն խզեցաւ, տեսարան զլիոյն դիտակի խոնարհեցաւ, ապաւանդակին պարան կտրեցաւ, ապաւինութիւն խարսխին լուծաւ, լուծք ստուարք ամոլիցն կցորդութեան բաժանեցան, սամիք ուղղացն հետոց գալարեցան, լաստ հիմանն հաստարանի ընկղմեցաւ, դեկանց կառուցմունք անդրէն սուզան, չուոցն յարմարութիւնք պակասեցան, ողնափայտին պատսպարան խկոյն բեկաւ, կապարանք զրստին հաստուածոյ յօշատեցաւ, գոգք ամփոփման ծոցոյն կազմածոյ անարգեցան, խելք շրթանցն եզերաց խախտեալ ոստեաւ, պաղպաջունք բազմականացն անկեալ բարձաւ, վանդակապատին վայելչութիւն յատակեցաւ, զահաւորակին հանգստարանն շփոթեցաւ, մածմունք տախտակաշարք իմիաբանութեանց միմեանց անջատեցան,

հեղոյսք պնդման բևեռացն քարշեցան : Արգա-
սիք իրին յիշատակարան ողբոց ինձ նմանեցաւ :
Նաւուղիղն հանդէպ նաւին դեզերեալ ողբայ,
ձեռն ի ծնօտի եղեալ՝ արտասուաց գետս ի ջու-
ցանէ : Նշմարք սակաւ մնացուածոցն՝ ի ծայրից
ծփմանց ազդելոյ ծովուն, իբր խողխողեալ բա-
նաւոր, ողորմագին թախծանօք հեծէ : Վասն զի
թէ զբարի նաւապետն երկնաւորօքն զօրօք յաշ-
խարհիս ծովու առ ի զխորտակեալս իմ տապան
իմանալի զոյութեանս առցէ աշխարել բանիս
յարմարութիւն, ոչ ինչ վրիպեսցէ ի ստուգու-
թենէ : Քանզի արդարեւ ելաց բարեզութն տէր
յառակ մարդկութեանս զթաղեալ ազգակիցն,
ելաց առ նմին և զերուսաղէմ մոլեալ և զթուդաս
մոլեզնեալ, յորոց երկուցն կորեաւ վստահութիւն
յօրինակ նմանութեան աղարտեալ նաւի . իսկ
միւսն հասեալ յատակս անդնդոց՝ առասան
յուսոյն ձեռամբ ունողին յանքոյթն արտաքե-
րեաց խաղաղութիւն :

Գ. Արդ իցէ թէ յաւելից հայել զբազմախորտա-
կելի տապանակ մարմնոյս իմոյ նորոգեալ : Իցէ
արդեօք տեսանել զփշրեալս նաւ ողբալի հոգւոյս
ողջացեալ : Իցէ արդեօք տեսանելզբաժանեցեալս
միջոցաւ մեծաւ՝ վերստին կցեալ : Իցէ արդեօք
տեսանել զյոքնաթախիծ սիրտ վշտացելոյս բեր-
կրեցեալ : Արդ իցէ ակն ունել նայել զյաւէտ

խաթարեալ կերպարան ընութեանս կրկին հանդերձեալ : Իցէ արդեօք թէ տեսից զքակտեալ տաղաւար թշուառացելումս միւսանգամ կանգնեցեալ : Իցէ արդեօք յուսալի նայել զտարամերծեալ գերիս ազատեալ : Ապաքէն գուցէ ակնունել զանկեալս ի շնորհէդ լուսոյ դարձեալ կազդուրեալ : Արդեօք տեսից զվայելչութիւն ընտանիդ քո պայծառութեան յողորմութիւն ինձ երևեցեալ : Եթէ տեսից երբէք զամենատխուր կերպարան հոգւոյս իմոյ ժպտեցեալ : Արդեօք լուայց ընդ ձայնի գուժիս աւետեաց համրաւ ինձ առաքեցեալ : Արդեօք տեսից զբիւրակործան վնասեցեալս անօթ կազմեցեալ : Իցէ թէ տեսցեն պատուհանք աչացս իմաստից զմուրհակ պարտուցս իմոց պատառեալ : Եթէ յայտնեսցի օրն իմ անձկութեան շնորհին քաւութեան բարւոք ինձ ծագեալ : Արդեօք մտից ի խրախնանութիւն խորանին լուսոյ քև առաջնորդեալ : Իցէ թէ կենդանի լինիցին ոսկերքս , ըստ եզեկիէլի , ցամաքեալքս ի կենդանութեանց եկաւորութեամբ ազդողական շնչոյս զօրացեալ : Իցէ թէ յաւելից հայել ի տաճար սուբ քո , աղաղակաւն մարգարէին ի պորտոյ կիտին , հերքեալս ի լուսոյ որ կամ առաջի քո ամաչեցեալ : Եթէ ինիցի խաւարասնունդս մթացելոյ ծագման առաւօտ : Եթէ հասցէ տեսանել զտազնապեալս

մշտասառոյց յեղանակս զարնանն մօտ : Եթէ տեսից զցող անձրևոյն կանաչացուցանողն հոգւոց ինձ արօտ : Եթէ իցէ արդեօք նկատել զգացանաբեկ հերքելի ոչխարս վերստին կամաց զթութեան քո հօտ :

Դ. Եւ քանզի ըստ բանին Յոբայ շուրջ պատեալ են չարեացն հնարք ընդ որ ոչ կարացից անցանել . իսկ եթէ լոյս ողորմութեան բարերար կամաց քոց ցուցցի, զթութեան քոյ դուռն բացցի, ճառագայթ փառաց քոց ծաւալեսցի, խնամք ձեռին քոյ յայտնեսցի, արեգականդ կենաց օր տարածեսցի, առաւոտիդ ըղձալի տեսիլ մերկացի, առաւոտութիւն քաղցրութեան քոյ աղբերացի, վտակարարչիդ կողիցհոսեսցի, ծորումն անապակ սիրոյ քոյ հեղցի, ծագումն աւետեաց շնորհի քոյ երևեսցի, պարզեիդ քո ծառ ծաղկեսցի, մասունք օրհնեալ մարմնոյդ բաշխեսցի, համառօտեալն ակնկալութիւն հանդիպեսցի, հատուածեալ ձայն ողջունի քոյ տէր լուիցի, հեռացեալդ խաղաղութիւն մերձեսցի . յայսոսիկ յաւէտ սովին սահմանաւ երանականաւ հաւատ ընկալեալ յուսոյ հաստատնոյ, ապաւինեալ ի Հոգիդ քո սուրբ, որ ընդ Հօր քում պաշտի ձայնիւ քաղցրութեան ընդ քեզ փառատրեալ ի լոյս անմատոյց, որով կեանք և երանութիւն քաւութեամբ հանդերձ ընծայեալինձ մեղապար-

տիս . յաւանդ անկորուստ ընդ իս պահելով առհաւատչեայ ճշմարիտ յիշատակի , իձիր անեղծութեան անուամբդ անձառելեաւ ահաւորութեան հզօրի սրբոյ միայնոյ և անքննելի տէրութեան երբեականձնաւորութեանդ՝ որ եսդ յիսկութեան յէութեան և յարակայութիւն բարձրութեան քաղցրութեամբ և ողորմութեամբ մարդասիրութեամբ պսակեալ հանդերձեալ և թագաւորեալ : Սյո առ ամենեսին ամենայնիւ յամենայնի կարող ես , զթած . և քեզ վայել է փառք յայսմ յաւիտենի և ի հանդերձեալ մշտնջենաւորութիւն յայտնութեան աւուրն մեծի , յաւիտեանս . ամէն :

ԲԱՆ ԻԶ.

Վերսին յաւերուած կրկին հնծուրեամ .

Ա. Եհ արդստուգապէս և իրաւաբար , ընդ որս որք ըստ ձայնից կողկողանացն և զբանիցն յարմարութիւն հանդերձեն , ի նոյն զիր բերեալ զաւարտմունս տանցն , որովք առաւել սաստիկ մորմոքեալ միլեցուցանեն զաղէտս կարեացն սրտին ըղձից առ արտասուացն բղխմունս . ուստի և բազմեալ իմ ի զլուփս պարու ակմբից դասուայնը երախանաց , որք զլալեանցն յեղանակեն բանաստեղծութիւն , և ես ընդ նոսին՝ նոցին հնծութեամբ աւաղական ձայնարկութեամբ զանձինս տարածանեմ զվշտակրութիւն , որ ոչ

բնաւին մեռեալ աշխարհի, և ոչ իսկապէս կենդանի Աստուծոյ, ոչ ջերմ սոսկ և ոչ ցուրտ յատուկ, ըստ առակի աւետարանչին զրեալ իյայնութեանն. երիցս ատելի երբեակ տէրութեանն և ամենատես արարչութեանն: Եւ այս են պատկանեալ թախծականացն կերպաղրութիւնք, կրկին ողօրմելի այսու երևեցեալ՝ որ ի մի զիծ սահմանեալ կացուցանեն զթշուառութեանցն զօրինակ, այսպիսի կցորդութեամբ շաղկապեալ:

Բ. Պարտուցն ժխտեալ տաղանդացն՝ ճեպով մեծաւ ի տուժի, ես ապիկար մատնեալ անարժան գործովք յիրաւի, վատնիչ արքունի գանձուց կրկնադատ և անթափելի, պատասխանատու մեծին ըմբռնեալ անհրաժարելի, բիւրքանքարոյ խնդիր՝ ես չունիմ կշիռ մի ունկի: Անբարեխօս կապեալ ի պահեստ դառն արգելանի, հեծումն և վաստակ ցաւոց ճաշակեալ յաննշոյլ բանտի, անապաւէն տանշեալ անթոշակ կամ ողօրմելի. այլ յեղանակ ինձ ողբականց աստուատ կնքեցի, փոխատրեցի սովին բարբառով կոծ կսկծելի, կարգաղրեցի շրջաբերութեամբ ի նոյն պայմանի, անհատական թիւ խորհրդական երկեակ տասնեկի: Աղքատութեանն հնոց յամենուատ մասանց մրրկի, անպատճապար թշուառ վտանգեալ սրտիւ ի զրաւի, տարակուսեալ հոգեով ապաշնորհ այր ի վրի-

պակի , անխնամելի հայցմամբ դատաստանն յինէն պահանջի : Մեղաց և մահու զինուք զգայարան զաղտնեացս խոցի , անփրկելի մատնեալ բռնութեան չարեացս գերի , սուր սուսերաւ սաստից գոյութիւն բնութեանս յօշատի : Յիշատակաւ բեմին աստստին ի դատաստանի , անձագելի մուայլ չարատես աշացս երևի , անձեռնկալ կապեալ եղկելիս ի տարակուսի , ահարկութիւն դիմաց պատկերի վերնոյն տեսանի : Յոյժ անարև և անվերարկու ի տարտարոսի , անապաւէն մոլար մորմոքեալ ի հուր գեհենի , անյատնելի կորուստ կործանեալի մեղաց վի : Ահա զոր ունիմ արծաթ անպիտան ոչ երբէք յարգի , և ոչ ընդունի և կամ համբարի ի զանձ տէրունի , հայցուած պղտոր և ձեռն անմաքուք աննուիրելի : Այլ բեկեալ սրտիւ մատանց տատանմամբ յոյս առեալ դարձի , զդէմս ի յերկիք եղեալ պաղատիմ մօրդ Յիսուսի , բարեխուեա մաղթեա քաւութիւն ինձ մեղաւորի՝ դու զօրաւոր փրկանակ կենաց իսկունի երկնի , քեզ օրնութիւնք ձայնից և բուրմունք խնկոց ի յերկրի և անուշից իւղոց մատուցումն յամենայնի :

Գ. Արդ յասացեալ ողբոցս հիւսուած այլ մասն յաւելի , բարերարին շնորհաց արտասուաց պըտուղ մատուցի . զկորստեան խորս չափելով զորքանն երբէք ոչ զտի , մասնաւորօք բանիւք

ի հանդէս նորին ջանացի, զմտացս արագեալ
զթևս յերեոյթ իրին ոչ հասի, զուշին պարտու-
թիւն յանվթարելեացն բաժակ բարկութեան
ի ձեռն իմ առի, զտարտամութիւն տարակուսա-
նացս իբր ճաշակումն մահու արբի, և այժմ
զյանցիցն յանախութիւն ողորմելի ձայնիւ յերգ
արկի : Ա.Ե.Երեոյթ կրակարան տապոյ բորբոք-
մամբ մեծաւ անզովանալի, անտեսական իմն
քրայս հալոցաց սաստիկ եռացմամբ անշիջա-
նելի , սլաքս նետից պատկանեալ դեղովք ի
շտեմարան խորութեան սրտի, խիթք ցաւոց խո-
ցուման մահու ի զնացս երակաց գոյութեան
լերդի, կիրք երկանց անճարակ ճեպոյ ի պա-
տուած աղեացս անելանելի . անզօրելի դեղոց
շերմութիւն ի յերիկամանց մատունս երկակի ,
անհնարաւորդառութիւն մաղձի ի նախադուռն
իմոյս կոկորդի : Աւազս ձայնից լքուցանողաց
ի փողս շնչոյս խոշորս հնչի, բազմահատուած
էութիւն բնութեանս ներհակք միմեանց ի պատե-
րազմի, երկշոտութեամբ կարծեաց վարանեալ
ամենայնիւ կայ ի վտանգի . հարազատաց դաւա-
ճանառութիւն անհաշտելի ի կոտրուածի , ոչ
մեռեալ և ոչ կենդանի թաղեալ ի մեղաց գարշու-
թեան տղմի , կասկածաւոր պատժապարտու-
թեամբ վերակնարկելով քեզ բարերարի , յա-
նակնկալ կենաց վիէ արտաքերելի լոյս անձկալի:

Դ. Նոյն ինքն որ զայս բան տպաւորեաց՝ ընդ
երջանկացն ասակեսցի, ակնարկելով քո ողոր-
մութեան անարատիցն հաղորդեսցի, վասն զեն-
ման Աստուծոյ բանիդ՝ բարեգործեալ քև կեն-
դանասցի. օրհնութիւն գովեալ քո շրթանց
ի գլուխ բաշխողի այսր մատենի, հաստատեսցի
ըղձականութիւն սողոմոնեան բանիս առակի,
նկարագրեա Հոգւով քո բարձրեալ ի նորոգումն
անեղծանելի. զի դու միայն ես երկայնամիտ
ներող, քեզ փառք յամենայնի, ամէն :

ԲԱՆ ԻԵ.

Վերսին յաւերուած կրկին հեծութեան.

Ա. Եթ քանզի ընդ ողբաձայնիցն բանատեղ-
ծութեանց վերընծայելոց զդրութիւն թուոցս
յարմարեցի կական և հեծութիւն, հառաչանք
կողկողագին, դառնութեան լալումն և արտա-
սուաց երգ, դարձեալ սկսայց զնառ պաղատա-
նացս խոստովանօրէն զղականաբար զգաղտ-
նածուկն յայտնաբարբառ. զի անդրադար-
ձութեամբ սկզբմամբն և վերջաւորօքն բառիւք,
զնոյն համաձևութիւն ի մի թախանձ նմին մաղ-
թանաց հոգեկեցոյցն խոնարհութեան պատանօր
եղից :

Բ. Մեղայ մեծիդ բարերարութեան՝ անարզս
մեղայ, մեղայ ծագման ճառագայթից՝ խաւարս

մեղայ, մեղայ շնորհացդ անքաւ երախտեաց՝
արդարե մեղայ, մեղայ սիրոյդ վերնում զթու-
թեան՝ յայտնապէս մեղայ, մեղայ ստացողիդ
յոչէութենէ՝ ստուգապէս մեղայ, մեղայ գերու-
նակ գոգոյդ զրգացաց՝ անքաւս մեղայ, մեղայ
աննուազ լուսոյդ վայելման՝ նենգողս մեղայ,
մեղայ ճաշակման անձառդ կենաց՝ բազումս
մեղայ, մեղայ անհաս պարզեացդ ձրից՝ հանա-
պազ մեղայ, մեղայ գուլեալ մարմնոյդ Աստու-
ծոյ՝ մահու չափ մեղայ, մեղայ պաշտելի արեան
արարչիդ՝ խսկապէս մեղայ : Ահա արդարե
օրհնեալ է հատուած բանի յուսադրական սրտի
այսր մեղայի, սոյն սա պատուելի աւանդ,
անմոռաց պատուէր, հայրենեացն տուր, նա-
խահարցն օրէն, համայնից թոշակ, անհերքելի
բան, զօրաւոր պատասխանի, կենդանութեան
կամուրջ, ախորժելի վերնոյն, սիրելի սրբոց,
անխզելի կապ, հրաշալի բարբառ, անշրջելի
պատճառ, բաղձալի աղերս, փափաքելի սեղան,
սրտաբեկ հնչումն, անհնարից ճարակ, կարծ-
րութեան վանիչ, աստուածապաշտից սահման,
հեթանոսաց զիրք, վաղնջուց կանոն, քրիստո-
նէից հարազատ, արարչութեանն յաղթող, ան-
ջըրապէտ հզօր, խտրոց ահաւոր, արուեստ
բարձրութեան, խորութիւն անչափ, հիացման
տեսիլ, խորհուրդ կնքեալ, ընդ որ չիք ումեք

անցանել, եթէ ոչ անմբռնելի մտաց արագման
զաս ծանիցէ : Զայն բարեպատեհ հրաշաւորա-
կան, որ ոչ յիշատակեցաւ ի վերջին դատակնիք
դասուն լրելոյ . գուցէ առ նմին խզեալ համառօտ
զվրիժակն իրաւանց մահուն հասելոյ, յորմէ
ընտրութիւնն ապագործ եղեալ, զսահմանն յա-
փտենական քակտեսցէ : Զարդ փառաց մեծու-
թեան, որով նոյն ինքն աստուածութիւնն պսա-
կեալ բարզաւաճի : Քանզի ով ոք դիմեալ կալաւ
զեղչերաց սեղանոյ այսր սրբութեան, և ոչ առ
ծամայն պրծեալ ի պատմոց անարատ գտաւ :
Իսկ եթէ Աքար զարմեան և Սաւուդ կիսեան և
Յուդա սիմոնեան ասելով զսոյն ոչ արդարացան,
և ես վկայեմ իրաւամբք խոստովանեալ զայս
պայման բանի, զի ակամայիցն բռնադատելոց
ոչ է կատարեալ սէր, ուստի և ոչ բովանդակա-
պէս փրկութիւն : Իսկ ես կամաւ համբուրեմ
դարձեալ կրկնելով զերջանիկ բանիդ զմկրտու-
թեան հարազատս :

Գ. Մեղայ, երախտեացդ մոռացութեան՝ վերս-
տին մեղայ, մեղայ մարմնոյ ձեռն յոգի հարեալ՝
յիմարս մեղայ, մեղայ առ կեանսդ դրժողութեան՝
իսկ և իսկ մեղայ, մեղայ բանիդ ապախտ առնե-
լոյ՝ չարաչար մեղայ, մեղայ ի յօր սատակման
ինձէն ստիպեալ վատթարս մեղայ, մեղայ պար-
տականս անկենդան մահուն՝ ձաղելիս մեղայ,

մեղայ անպատկառս քո բարձրութեան՝ տաղտ-
կալիս մեղայ : Վերջին ինձ կրկին աշխար
հոգեոր՝ զի ի կորուստ և ի կործանումն ինձ
երևեցաւ, զի անդարձս վտարեցայ, զի որդիս
թշնամի զրեցայ, զի ի բարձանցն երկնից ընկե-
ցայ, զի փուշս վարուց դիզի : Եւ ևս առ սմին
ողբք աղաղակի, զի անձամք զանձն անարգեցի,
զի բազին կորումչին գտայ : Այլ իմն կոկիծ դժբն-
դակ սրտի, զի զիս ունին առ որ չեմ, զարտաք-
նայարդար բաժակս անմաքուր, զբուալ որմս
զարշունակ, զսին պարծանօք պաճուճեալս,
զլոյսս ի մոայլ շրջեալ՝ զգերանակիր ակնս թը-
շուառացեալ, զջահս փառաց շիջեալ, զամենայ-
նիւս յամենայնի ամենայն իրօք վնանակարս,
առ տնօրինականսն տէրունականս, առ յայու-
նութիւնսն աստուածայինս, առ երևմունսն ա-
րարչագիրս, առ խոնարհութիւնսն սարսափե-
լիս, առ այն զոր տեսի աչօք իսկ իմովք, առ որ
մեծ է պատասխանատուութիւնս քան առհամօ-
րէն աւետարանին զարմանս, հիացմունս, հոգս
հալողականս, անդամունս անհնարաւորս,
թուականութիւնս մտաց անբարդելիս, ելմունս
անկատարս, իջմունս անհաստատս, յուսահա-
տութիւնս յարմարականս, յանդիմանութիւնս
պատշաճականս, ձաղանս պատեհագոյնս, նզո-
վըս իրաւացիս, անէծս արժանահատոյցս : Արդ

այսոքիկ են մեղաւորիս իմ կշտամբութիւնք, և
ինքնահարուած տանջանաւորութիւն :

Դ. Եւ քանզի կարող ես զայս ամենայն զպար-
տը թողով և զխայթուածս մահու բժշկել, տէր
ողորմութեանց, Աստուած բոլորից, Քրիստոս
թագաւոր բարձրեալ Հօր որդի, ստեղծիչ զթած
բարերար, օրհնեալ առաստ հարուստ, ահաւոր
հզօր ողորմած, տեսուչ ձեռնկալհաստիչ, ապրե-
ցուցիչ դարմանիչ կեցուցիչ, երկայնամիտ անո-
խակալ ապաւեն, բժիշկ գովեալ երկնաւոր,
անձառ լոյս կեանք, յարութիւն նորոգութիւն
քաւութիւն. Եթէ հայեսցես մարդասիրութեամք,
ըստ որում քոյդ են սովորութիւնք, նայեցեալ
իքեզ կողկողիմ և ես. Եթէ լուփեցես, հառաչեմ.
Եթէ ունկն մատուցանիցես, պաղատիմ. Եթէ
անսայցես, աղերսեմ. Եթէ ներեսցես, աղաչեմ.
Եթէ առ իս դառնայցես, գոչեմ : Ապա Եթէ ան-
տես առնիցես, կործանիմ. իսկ Եթէ առ ոտն
հարկանիցես, լամ. Եթէ զոգեպահն ոչ ընծայես-
ցես, մեռանիմ, ապա Եթէ ահարկու դէմս ցու-
ցանիցես, սաստկիմ. իսկ Եթէ սաստեսցես,
դողամ. Եթէ խեթիւ տեսանես, սոսկամ. ապա
Եթէ սաստկանաս, սարսափեմ. Եթէ հալածես.
հեծեմ. իսկ Եթէ ընդ վայր հարկանիցես, հերքիմ,
Եթէ զողբոց վհատութիւնս ոչ առցես, տագնա-
պիմ. Եթէ խստանաս, փախնում, ապա Եթէ

սպառնաս, ընկճիմ : Խոկ եթէ քննես, քարկոծիմ. ապա եթէ ուժգինս ակնարկես, սուզանիմ. եթէ ոչ անխայեցես, մերժիմ. եթէ կոչեցես, խիթամ. խոկ եթէ աչս յառեցես, ամաչեմ. եթէ ձայն տացես, երկնչիմ : Զքարեացն պարզե մատնեալ, զերանութիւնն թողեալ, զջնորհն լքեալ, զուխտն ցրեալ, զաւանդն կենաց մոռացեալ, զիամարձակութեան վստահութիւն կորուսեալ, զստեղծիչդ էիցս բարկացուցեալ, զանձառութիւն շնորհին ընդունեալ, զպատւոյն պատկեր այլայլեալ : Խոկ եթէ առ այս խեղդ մահու հեծութեան ցաւոյ մարդասիրեալ առ խաժամանեցուցես, տէր Յիսուս Քրիստոս, զաղդեալն զիր լնանիլ իյխս, եթէ բժշկութիւն դաղարեցուցանէ զմեղս մեծամեծս, որով ամենառատ քաղցրութեամբ պատռաստեալ ի քեզ, զքոյդ կերպարան լրւոյնկարեալ յոզի՝ վերստին գտեալ պնդեցայց քաւեալ, և ստեղծեալ կրկին ի փրկութիւն անմահից կենացն անախտականց . և քեզ ընդ Հօր Հոգւովդ սրբով փառքյափառեանս . ամէն :

ԲԱՆ ԻԾ.

Վերսին յաւերուած կրկին հեծութեան .

Օ. Ե՞ւ արդ զնրս յայտնեցից, և յաղազս ոյց նշանակեցից, և վասն որպիսեանց ճառեցից, և

զորքան ծածկեալս մերկացուցից, և կամ վասն
որոնց խոստովանեցայց. զներկայիցս զոր արդէն
ունիմ, թէ զանցելոցն՝ զոր մթերեցի. զապայիցն՝
յորոց կասկածեմ, թէ զբազմասահ շարժու-
թեանցն՝ յորոց զլորեցայ. զփո՞քըն ինձ համա-
րեալ՝ որ է Աստուծոյ մեծ զրեցեալ, թէ զանկեր-
պազրելին չիշատակելի. զնուազն՝ որ է առա-
ւել, թէ զթեթեագոյնսն՝ որ են ծանունք,
զնոգեկանացն կրից կորուչաց, թէ զմարմնա-
կանաց ախտից սպանողաց. զառ դրունս հեշ-
տականացն, թէ զծայրակոտոր վնասակարու-
թեանցն. զաներեւութիւն, թէ զտեսականացն.
զառ ձեռն հպաւորութիւն, թէ զառ նոյն ինքն
շունչ հեռաւորութիւն. զլայնականն դիւրին
խաճմունս, թէ զերկարաւորն նետաձզութիւն.
զխորութեանն զանչափութիւն, թէ զամենա-
ծախին յայտնատեսիլ. զյոգնագլուխն պոռնկու-
թիւն, թէ զառողջութեանն անբժշկութիւն.
զպարարումն չարին մարմնովս, թէ զսովիլն
բարւոյն հոգւովս, զխնամովն հանդիսանալ յոչ
ախորժելիսն Աստուծոյ, թէ զբուադատութեանն
տոռամբ ձգիլն ի նոյն մոլեզնութիւն. զառ ի
մահն մեղաց, թէ զընդունայնութեանն կար-
ծեաց :

Բ. Արդարեւ որպէս կամաւ խելազար զերծեալ
ի ձորձոյ, զառականացս տեսիլ յանդիմանեցի,

զընդդէմսն գործեալ իմաստնոյն, որ թէ հանճարեղքն վերարկեսցեն զամօթս իւրեանց, օտարացեալս ի կրօնից, հեռացեալս ի կարգաց, ի սրբութեան անսուրբ, ի կուտութեան անմաքուր, յարդարութեան ամբարիշտ, ի բարեպաշտութեան վնասապարտ, բերանովս մերձ առ ստացողն և հեռի երիկամբք, շրթամբքս պատուամատոյց, ըստ մարգարէին, այլ ոչ եթէ սրտիւ : Եւ եթէ պարտ է զբատմնելիսն ասել աստանօր, չարքան զտանցանսն յանդզնութիւն, իբր զուր իմն պաշտօնատարս Աստուծոյ, ի միտս անկայունս երկեակ ճանապարհաւ մահու վարանեալս՝ ջանամ և ոչ ինչ օգտիմ, պնդիմ և ոչ հասանեմ, փութամ և ոչ ժամանեմ, պնձկամ և ոչ տեսանեմ, փափաքիմ և ոչ հանդիպիմ, կարօտիմ և ոչ պատահիմ, ունիմ զամենայն երկրի, և եմ պատզամաւոր աղօթանուէր ամենայն աշխարհի : Այլ թող զբազումս զայսոսիկ, բարերար, և մի ունիցիս. դիւրինք են քեզ զսոսին եղծանել, քան ինձ տաժանաւորս աջով նկարել. վասն այնորիկ զրեցի առանց խնայելոյ, զի դու առատապէս ջնջեսցես, ծրննեալ, որ վասն մեր մեղաւորացս երկայնամիտ անուանեցար, ըստ մաղթանց բանի հեծութեան սրտի Նզրի երջանկի, յոյժ նեղեալ անձն և ձանձրացեալ ոզի բանին յիշատակաւ, որ զոյն պատմէ. յամենայն կրից

մահացուցանողաց վտանգեալ, անկեալ ի ինվ
գարշութեան մեղաց անդնդականաց ապակա-
նութեանց. քանզի չհաւատամ, թէ լսես իսկ ինձ,
ըստ Յորայ ձայնին : Արդ ես ինձէն ինքնադրով
անձնադատ գերի՝ կամաւորապէս մատն եղեալ
բնութեանս, արգելի փակեցի կնքեցի առ յիշէն
յամենայն մասանց զկենացն հնար, զի ի փրկու-
թիւն մեղօք կապելոյս կրկին մեծասցիս զովեալ:

Գ. Եւ քանզի իմարգարէէն բարւոք խրատեալ
փորձ գոցուք, մաղթել ընդ նմին հոգւով քո եր-
գեալ՝ յուսով հաստատնով ի քեզ ապաստանեալ.
Առէք ընդ ձեզ բանս, ասէ նվսէէ, և դարձարուք
առ տէր Սատուած ձեր, և ասացէք ցնա, կարող
ես թողուլ զմեղս. զի ընդունիցիք զբարիս, և
վայելեսցեն իբարութեան անձինք ձեր : Ահա Ս.ս-
տուած խօսեցաւ, և ովէ որ ոչ լուիցէ. նոյն ինքն
վկայեաց, և ովէ որ ոչ հաւատացէ : Արդ այսո-
քիկ վճիռ պաշտելի, նուիրեալ պայման, սահ-
ման նոյնազոյ, կենաց աւետիս, կէտ տէրունի,
դուռն բարութեան, սփոփանաց հրաւէր, ճըշ-
գրիտ պատկեր, անստգիւտ զանձ, անմոռաց
յիշատակ : Այսու առ սոյն և ես հաւատ ընկա-
լեալ, աստուստ վկայեմ սմին՝ ընդ մարգարէին,
կարող ես յամենայնի թողուլ զմեղանս բազմա-
բեղունս. և ես զօրացիս կրկին բարձրացեալ՝
առ ամենաթշուառ կործանեալ հոգիս : Յամե-

Յայնի իշխես, ամենայնի բաւես, ամենայն ուրեք հասանես, ամենից բռնութեանց յաղթես, զամենայն կարծրութիւն փշրես, զամենայն ընդդիմահար վանես, զամենայն խատութիւն վատնես, զամենայն սրացեալ ընդունես, զամենայն դառինս անուշես, զամենայն դժուարամոքելիս քաղցրացուցանես, զամենայն զպարտս շնորհես, զամենայն յանցանս թողուս : Կարող ես, զօրաւոր, հզօր, հնարաւոր, ամենարուեստ, զամենեցուն զմեղս ընկղմելև չքացուցանելքառնալ ի միջոյ, իբր զճանանչ փոքու կայծական սահմանեալ ի չափ ոչէից՝ անկեալ ընկլուզեալ կորուսեալ ի տիեզերատարածն ծովու :

Դ. Արդ բանիւ մաղթանաց վերծանողացն այսմ մատենի, ողորմեա վասն խաչի և չարչարանաց մահու Որդւոյ քոյ, Հայր զթութեան : Սկիզբն առաքողի ողբերգութեան ձայնի այսմ արտօսրածին նուագի, որ զայս դեղ փրկութեան կենաց մեզ յարմարեցոյց, Եղիցի թժշկեալ յանուն քո հզօր : Որ հետս Ելից խոստովանութեան մեզ նկատեցոյց այսու պայմանաւ պատշաճականաւ, լիցի անարատյիւրոցն պարտեաց : Որ զիպարտութեանն թևս հարթել մեզ վարդապետեաց իսոյն կանոնի կենաց պատգամի, Եղիցի զերծեալ ի չար կապանաց մահու արկածից սկզբնականաց վերջոց և միջնոց, Երբորդութեամբդ բարեգործեալ,

ի նորոգութիւն լուսաւորութեան. ընդ որում և
մեք զրեսցուք երջանիկ գտեալ ընդ սմին :

Ընդդիմամարտ դիւաց այս նուագ աղօրից, և դիւասարուռ.
շերմնատագնատ ախտաւորութեանց Ասուծով փարատիչ:

Ե. Արդ այսքանեացս անբաւից հրաշից հան-
դերձիչ Հայր ամենաստեղծ՝ անունդ ահաւոր,
ձայն սարսափելի, կոչումն ընտանի, բան համ-
բուրելի, ազդումն սքանչելի, հրաման սոսկալի,
էութիւն անքննելի, գոյութիւն անճառելի, իս-
կութիւն անբաւելի, գօրութիւն անզննելի, կամք
ամենաբարի, տէրութիւն անսահմանելի, մեծու-
թիւն անչափելի, բարձրութիւն անբովանդա-
կելի, որքանութիւն անկշռելի, առաւելութիւն
անհասանելի, պատճառ որդւոյ հայրութեամբ,
այլ ոչ նախադրութեամբ, քև և ի ձեռն քոյդ ան-
պարազիր գօրութեանդ սաստեն տագնապոդ և
դիւական տենդիս ջերմութեան, որ սպրդեալ
մուծաւ ընդ մեղաց, զի փախիցէ ի մարդոյս՝
զարհուրեալ ի սխրալի և յանբաւելի արեան
վտակի գառինդ երկնաւորի, որով սրսկեալ
միանգամ ի մշտնջենաւորս համայն մաքրեցաք:

Զ. Եւ արդ յայս պատկառելի խոնարհութենէ
արարչակերտս խորհրդոյ՝ ամաչեսցէ սատանայ
ի գործս չարեաց իւրոցն հրեշտակաց. տանջեսցի
և հալածեսցի, հեռացեալ և արտաքս առաքեալ
ի շինուածոյ խորանէ քումդ ընակութեան

յարտաքին խաւարն : Եւ զնշեալ մաքրեա զար-
տասուս ողբոցս ի դիմաց մերոց, և զիառաչումն
ձայնիս հեծութեան ի սրտից մերոց : Եւ յիշատա
կաւ հարման հեղուսիցն քստմեափուշ տաժա-
նատեսիլ ոգեպահանջից, որով պնդեցաւ միա-
ծինդ քո յաշտարակ խաչին, ցաւեսցի չարին :
Եւ ի կողահերձ սայրասուը սլաքէ ուժգին բախ-
մանէ, որով զվերն մեծ ընկալաւ, ի սպառ սա-
տակեսցի սկզբնարար մահուն : Եւ զի խոճար-
հեցոյց զգովեալն զլուխ յաւանդել զոգին ի ծոց
քո, բարձրեալ, ապստամբութիւն անբարի բա-
րուցն Բելիարայ ի կոր կործանեսցի, ամենայնիւ
հերքեալ ի կորուատ : Եւ զի դողեալ ծածկեցաւ
անմահն իսկութիւն յորավայնի երկրի, այսու
ամբարձեալն հպարտութիւն կարծեալ զոռոզին
ի յատակս մահու դժոխոց մթին ստուերին յա-
ռեալ դիտեսցէ . և յիշեսցէ զառաջին հարուածն
անքաղական, որով մահացաւ դիմամարտու-
թիւն թիւնից վիշտապին կենարարն կրիւք ամե-
նազօրին : Վասն զի ի փառս քո. Հայր ողորմու-
թեան, իբր ի զովեստ Արդւոյ քոյ Հոգւովդ
սրբով զայս խոստովանիմ. քանզի ոչ պիտակ
ինչ սոսկ զօրութեանն ունի զմիւսմէն առ մի
խորհրդականն խորութեան, այլ զանսկիզբն
բանդ անձնաւոր ընդ անժամանակդ հօր փա-
ռաւորեմք : Եւ քեզ միայնոյ սուբբ Նըրորդու-

թեանդ, հաւասարապատիւ տէրութեանդ, համաբուն անքամին ինքնութեանդ՝ օրհնաբանութիւն. գովութիւն զօրեղութիւն անձառ վայելչութիւն մեծութեան, բարեվիճակ հարթութեան, զուգակշիռ հաւասարութեանյաւիտեանսամէն:

ԲԱՆ ԻԹ.

Վերսին յաւելուած կրկին հեծուրեան.

Ա. Եւ արդ դու միայն սկիզբն բարեաց, գթութիւն անձառ, Արդի բարձրեալ միոյդ Աստուծոյ, որ զողջոյն զօրն թողութեան ցուցեր փրկարան, և ոչ կորստեան դատապարտարան, յեղանակեալ ինձ զաւուրն չար առ մեծ աւետիս ակընկալութեան : Բժիշկ ախտացելոյս, հովիւ մոլորեալ ոչխարիս, տէր ապաւինեալ ծառայիս, գինի անապակ մեծ տրտմեցելոյս, սպեղանեաց դեղ վիրաւորեցելոյս, ազատութիւն մեղօք զրաւելոյս, օրհնութիւն բարեաց մերժելոյս, կնիք շնորհաց խոտելոյս, օծումն կոչման կապտելոյս, կանգնումն վերստին կործանեցելոյս, պատսպարան հզօր գլորեցելոյս, օժանդակ վեհ գայթակղեցելոյս, դուռն բարձրութեան տարակութելոյս, սանդուխք երանութեան եղկելոյս, հանապարհ շաւղաց մոլորելոյս, թագաւոր ներող պարտելոյս, քաղցր յուսադրութիւն լրելոյս, ձեռնկալ կենաց հերքելոյս, մեծդ միայն և

ամենառատ, որ զիկութիւն բարեաց սահմանեալ
հեղուս անշափ յաճախութեամբ քան զոր խըն-
դրեմք և իմանամք, ըստ Պաւուսի գոհաբանու-
թեան : Քանզի իննուց յսնից և թուոց երից և
չորեակ տասանց ի վաղորդայնէ տունջեանն
առ մուտս արեւուն, անդուստ առ նմին յաւէտ
կարկառմամբ իսկ և իսկ ի սոյն անարգել սըր-
տիւ, ի վեր է քան զաղերսանաց ակնկալութիւն
մարդկան, բարեգործել միմեանց շնորհատրու-
թիւն . իսկ առ իմս թշուառութեան և անարգու-
թեան զքոյդ եղեալ փառս, ամենակարող զօրու-
թիւն ահեղ, բոլորից Աստուած, օրհնեալ տէր
Քրիստոս, որովք սահմանեսցի կշռութեամբ
չափոյ հաստողիդ ընդ հողոյս հաւասարութիւն
կցորդեալ : Քանզի մնաս յայսոսիկ անբաւ և
անհետազօտելի, ամենեին բարի անմասն բար-
կութեան խաւարի, ուստի յոյժ նուազ են քում
մեծութեան աստեղացն թիւք, զորս զոյացու-
ցեալ յոչեց յորջորջմամբ անուանց կնքեցեր, և
կամ հիւթ երկրի՝ ի յօդս հեղեալ, զոր ի չզոյից
հաստեալ տարածումն յատակի կառուցեր, քան
ինձ նախազքեալ համարդ սակաւութեան,
որովք քեզ նմանիլ վարդապետեցեր :

բ. Ահա ծածկեցաւ և ընկդմեցաւ ի քոյդ լոյս
կամաց երկայնմտութեան՝ հանուըց չարութիւն,
իբր դոյզն մռայլ ի տապ արեւու, և որպէս աս-

տուստ իսկ կիրք բնութեանց զհասարակաց
բարուց ցուցանէ : Քանզի ով ոք ի մարդկանէ
մեղաւ և ոչ զղացաւ . ով ոք զազրացաւ և ոչ
ամաչեաց . ով ոք գարշեցաւ և ոչ պատկառեաց .
ով ոք սխալեաց և ոչ ապաշաւեաց . ով ոք կոր-
ծանեցաւ և ոչ հեծեծեաց . ով ոք գայթակղեցաւ
և ոչ ստրջացաւ . ով ոք պարտեցաւ և ոչ ին-
քեամբ ըմբերանեցաւ , ով ոք պատրեցաւ և ոչ
յոգլոց ելաւ . ով ոք ճաշակեաց լեղի և ոչ դառ-
նացաւ . ով ոք անկաւ ի բարձրութենէ և ոչ ըն-
դուտեաւ . ով ոք կորոյս մեծութիւն և ոչ աշխա-
րեաց . ով ոք զրկեցաւ յերանութիւնէ և ոչ ելաց .
ով ոք կապտեցաւ ի շնորհէ փառաց և ոչ ողբաց .
ով ոք գտաւ ինքեան վնասակար և ոչ ըստ-
գտաւ . ով ոք մերժեցաւ յերեսացն Աստուծոյ և
ոչ հառաչեաց . ով ոք լուաւ զԱստուծոյ սպառ-
նալիսն և ոչ սոսկացաւ . ով ոք ընդ մի չարեացն
հազարս չաւաղեաց . ով ոք մերկացեալ յաւուրս
ձմերայնոյ և ոչ զոփացաւ . ով ոք անօրինեցաւ
և ոչ քարամբք զմիտսն կոծեաց , ով ոք ետես
զատրուկն յիւրում մեծութեան և ոչ զկծեցաւ .
ով ոք կատարեաց չարիս և ոչ զինքն իսկ նզո-
վեաց . ով ոք ախտացաւ և ոչ զանձն դսրովեաց .
ով ոք յամօթալեացն զործեաց և ոչ զիւրն մար-
մին ձաղեաց . ով ոք ի պատկառելիսն հպեցաւ և
ոչ զօրն իւր անիծեաց . ով ոք զգործեցեալսն յի-

շեաց և ոչ տապացաւ. ով ոք զգաղտնիսն մտա-
բերեաց, և ոչ խորովեցաւ. ով ոք զծածուկսն
նկատեաց և ոչ մահ կորստեան խնդրեաց. ով
ոք զաներևոյթսն կերպաւորեաց և ոչ կրկին
յերկիր կրրացաւ. ով ոք ընդ մեղացն հեշտու-
թեան բոց անշէջ հնոցի ոչ խառնեաց. ով ոք զվը-
նասակարսն բնութեանն, և ոչ պապակեցաւ.
ով ոք զկամաւ ներգործեալսն, և ոչ սատակման
ինքեան աղօթեաց. ով ոք զանձառելիսն, և ոչ
խոռվեցաւ. ով ոք զանկրելիսն էութեանն, և ոչ
թախմեցաւ. ով ոք զմեծամեծսն, և ոչ մաշեցաւ.
ով ոք զանբծութեանն ապականարարսն, և ոչ
տոչորեցաւ. ով ոք զտարազրութեանն պատ-
ճառ յանցմունս, և ոչ տագնապեցաւ. ով ոք
զերեսացն աղտեղի տեսիլ, և ոչ բարկութեան
վերնոյն զանձն պարտ վարկաւ. ով ոք զմի ի
կարեռացն մեղաց յաչս կերպացոյց և ոչ զի-
նուք մահու խոցեցաւ, ով ոք զխայտառակա-
նացն, և ոչ վայս վհատութեան ընդ հեծութիւնս
ձայնին հիւսեաց. ով ոք յարքայական զահոյիցն
տնանկացաւ և ոչ կարկամեալի վայր զլորեցաւ.
ով ոք ընդ պսակին պերճութեան՝ հող ի զլուփս
եղեալ և ոչ կրկին չարչարեալ յոգի մահացաւ.
ով ոք ընդ պայծառ պատմուճանին քրծազգած
եղեալ և ոչ տիրեցաւ. ով ոք զկեանս իւր կո-
րոյս և ոչ արեան արտասուս երկնեաց. ով ոք

ընդ արկանելեաց լուսոյ խաւար զգեցաւ և ոչ
նուեղեցաւ. ով ոք ի վերայ սպոյ սիրելոյ ոչ
թառամեցաւ: Ահա այս կերպարանք ճշգրր-
տագոյնք պարտաւորիս յանդիմանութեան,
տիսուր դէմ, քաղեալ ճաճանչ, ցամաքեալ
խոնաւութիւն, երիթացեալ շուրթն, անշրեալ
տիպ, տրտմեցեալ ոգի, այլայլեալ ձայն, կըրկ-
նեալ պարանոց: Եւ զի թէ ոք զիսկութիւնն
խկ նշանակեսցէ, ոչ անօրինէ. անամբար-
տաւան միտ, անհպարտ սիրտ, անխնդրող
պարզեի թշուառ, անաղերսալի պասքեալ, ինք-
նակշտամբելի դեզերեալ, իրաւամերժ սովեալ,
արդարալուկ քաղցեալ, պատշաճադատ հար-
ւածեալ, ինքնավկայ մահապարտեալ, արժա-
նապէս հանեալ, անձնանէծ եղկելի: Եւ զայն
թարգմանեալ ցուցանէ արդարագործ փարիսե-
ցին կշտամբեալ. և մեղապարտ մաքսաւորն
բարեհամբաւեալ:

Դ. Եւ արդ եթէ զչարիսն՝ հնարաւորութիւն
բանսարկուին գտողին զմեզ զայթակղեալս,
զիւրսն ի մեզ սերմանիս առ օրն համարեսցի,
զիարդ ոչ զբարիսն անկեալս ի մեզ հոգւոյ
արութիւնս ի խնամակալութենէ կամաց կեցուց-
չիդ օն և օն զրեսցես, տէր բարեզութ, հզօր և
յաղթող, քաւիչ մեղուցելոց, կարող յամե-
նայնի առ ամենայն փրկութիւն: Եթէ զան-

դունդս առ երկինս փոխես, և կամ զխաւար մթութեան ի լոյս հաստատես, եթէ զդառնութիւն լեղւոյ ի մանանայի քաղցրութիւն կազմես, և կամ զկոծ սաստկութեան վշտաց ի պարս դասու բերկրութեան հարսանեաց կարգես, դիւրինք և հնարաւորք են քեզ այսոքիկ. և ես քան զսոսին բաւես առ նոսին տիրեալ համայնից ահաւորապէս, և քեզ փառք յաւիտենից յաւիտեանս. ամէն :

ԲԱՆ 1.

Վերսիմ յաւելուած կրկիմ հեծուրեան.

Ա. Ե՞ս արդ ճշմարտեսցի բան քո, ողորմած բոլորից Աստուած, ներող և օրհնեալ, ի բազմագթելին դարձաւորութիւն աւուրն պատկերի զջման մեղաւորին. թէ և առ յետին խոկ շունչն իցէ ընտրութիւն, և կամ ի մէջ չարութեանն փոխադրութիւն : Մանաւանդ զի դժնեայ կցորդս այս անձնիշխանական՝ միշտ մարտիկ, խարող շողոքորթ, յարեալ ի ստութիւն, ըստ առակողին արածող հողմոց, դժուարունելի հաստողին փախչող, գերեալ որսողին մոլեկան մարմնոյս, ներհակ տնկակից, յոգնապատճառեան ամենավարան, զոր քո է զիտելզքանեացն յաճախութիւն : Եւ զկնի մեղանացն, ողորմագինս իմն ողբարկութիւնս վհատականս տաժա-

նակոծս բազմաւաղելիս, քո առաջի տէր գթարկութիւնս զրեալս արտասուօք, թառանչս թշուառութեանց կարգելոց անբաւս չար վտանգից մեղսատագնապ պատկառեցելոյն :

Բ. Եւ զի մի կրկնաբանութիւնս ի շատիսոսութիւն կրթեսցի, առաւելքան զսոյն այսուողբալի. քանզի ոչ երբէք համարձակի խնդրել իւր զարքայութիւն, այլ զտանշանացն թեթևութիւն, ոչ ընդ կենդանեացն ի լոյս, քան թէ ընդ գերեզմանկանացն զգայական շնչովն ի խաւար. ոչ ընդ ամբարձեալսն, այլ ընդ բեկեալսն և ընդ խորտակեալսն : Իհանզատեան իւրում վաստակեալ, ի խրախութեան ինքեան տրտմեցեալ. դիմօք ժպտեալ և մտօք խոցեալ. կերպ ի ծաղը և աչք ի յողբումն. եղեսք զսփոփանս ձևացուցանէ և արտասուքն զգառնութիւն սրտին ճըշմարտէ : Ըմպանակք երկու յերկոսին ձեռին, մինն արեամբ և միւսն կաթամբ. երկու ըուրանցք կայծակնաւորք, մինն խնկով և միւսն ճենճերիւ. սկաւառակք կրկին կրաւորականք համոց, մինն քաղցու և միւսն դառնութեամբ. բաժակք զոյգ առ երկուս բերմունս, մինն արտօսը և միւսն ծծումբ. տաշտք կրեցեալք ի ծայրս մատանց, մինն զինի և միւսն լեղի. դրունք տեսանելեաց ներհակաց, մինն իլաց և միւսն ի վրիպումն. խանութք հալոցականաց

հակառակութեանց, մինն արծարծէ և միւսն
շիջուցանէ. հայեցուածք դիմաց երկուց մինն
դոյզն ողոքանօք և միւսն անխայելի բարկու-
թեամբ. համբարձումն երկակի բազկաց, ոմն ի
հարուածս և ոմն ի մերժումն. դէմք կրկնակի
կերպից, մինն տիսրեալ և միւսն ցասուցեալ,
կշտամբանօք ընդ միոյ երկու, մինն աստեացս
և միւսն ապառնեացն. ապաւինութիւնք կար-
ծողականց, մինն գոնէ և միւսն թերես. ի մի
բերան երկակի բարբառ, մինն եղկութիւն և
միւսն խոռվութիւն. երկուս ազդմունս ի միում
սրտի, մինն կեղակարծ յուսոյ և միւսն ճշգրիտ
կօրսուեան. ամպ լրթագոյն ահազնատեսիլ կըր-
կին տեղացմանց, մինն նետս և միւսն քարինս.
որոտումն ահեղ երկոցունց բերմանց, մինն կար-
կուտ և միւսն հրացան. ցայդ ցաւազին երկուց
վտանգից, մինն լալոյ և միւսն մահու. առաւոտ
սզոյ երկուց բողոքմանց, մինն սաստից և միւսն
սպառնալեաց. արեգակունք երկու իյերկուց
ծայրից, մինն խաւարի և միւսն կիզման :

Գ. Եթէ հարուածոց աջ կառուցանի, ինքեան
վարկանի. և թէ ձեռն պարզեաձիր, ոչ իւր ակն
ունի : Իպարձանս ուրուք կորանայ, յամբար-
ձումն զլխոյ ընկճի, ի չարեացն յիշատակ հեծէ,
ի ճառս մաքրոց պատկառէ, ի պատմութիւնս
հանդերձելոցն երերի : Եթէ օրհնի յումեքէ յայ-

տնի, ի ծածուկ զանձն անիծանէ, եթէ գովեստ
յումեքէ լսէ, պարսաւանօք զինքն կշտամբէ.
Եթէ դսրովեսցի սաստկապէս, ինքեամբ ինքեան
վկայէ. Եթէ ձաղեսցի ուժգին, սակաւ հատու-
ցումն առաւելպարտուցն զրեսցէ. Եթէ ըղձումն
մահու ինքեան լսիցէ, այս ասէ, և դարձեալ
կրկնէ. և Եթէ որոգայթ մահու ճայթեսցէ յերկնէ,
հազիւ զդէմսն համբառնայցէ : Զիւրոց իրաւան-
ցըն մատեան խփեալ, զպատասխանութեանն
յոյս լքուցեալ, զհամարձակութեանն ընթացս
փակեալ : Եւ Եթէ ոչ էր անփրկանաւոր կո-
րուստ գերելոյն, զիւրովին երթալ ոչ ինչ դան-
դաղէր : Արդարեւ վայ մեղաւորին՝ որ տարակու-
սեալկայցէ ի վերայ երկուց ճանապարհաց, ըստ
հոգելից բանի իմաստնոյն :

Դ. Եւ արդ զիանդ ոչ ողորմեսցիս, բաբեզութ-
այսքանեացս ճայնարկութեանց կողկողագինս
հեծեծանաց, որ անուամբս այսու մեծայար, թէ
ողորմած եմ ես տէր : Մհա առ չարութիւն
գերւոյս բարութիւն քո, առ մահապարտիս
դառնութիւն քաղցրութիւն քո, առ կորուսելոյս
յայտնութիւն ճառագայթ քո, առ յանդգնելոյս
մոլութիւն ողորմութիւն քո, առ խակութիւն
վնասակարիս հեզութիւն քո, առ կործանելոյս
այցելութիւն աջ քո, առ ընկղմելոյս վերբերու-
թիւն ձեռն քո, առ բժշկութիւն անողջանալի

խոցուածոյս մատն քո, առ պակուցելոյս պաշտ-
պանութիւն ոգի քո, առ ապախտաւորիս իմ
վստահութիւն երկայնմտութիւն քո, առ օծումն
ամենադժենէիս զօրութիւն քո, առ մեղաւորիս
քաւութիւն հրաման քո, առ փախուցելոյս
ապաւինութիւն ոտք քո, առ սրացելոյս պատս-
պարութիւն բազուկ քո, առ վրիպելոյս առաջ-
նորդութիւն լոյս քո, առ տարակուսելոյս հնա-
րաւորութիւն հանձար քո, առ անիծելոյս կրկին
ստացումն օրհնութիւն քո, առ վհատելոյս քա-
ջալերութիւն խրախոյս քո, առ վշտագնելոյս
միսիթարութիւն բաժակ քո, առ նեղելոյս ընդար-
ձակութիւն կամք քո, առ ատեցելոյս կոչումն
սէր քո, առ հաստումն սասանեցելոյս բան քո,
առ հոգւով վիրաւորելոյս կաթուած արեան քո,
առ աներեւոյթ մթերսցաւոցսակնարկութիւն քո;
առ յուսահատելոյս անդրէն ընտրութիւն իշխա-
նութիւն քո, առ պատուաստումն կորեցելոյս
կցորդութիւն քո, առ խաւարաւ մահու ծածկե-
լոյս նշոյլ կենաց քոց, առ խռովեցելոյս իմ հան-
դարտութիւն խաղաղութիւն քո, առ վայրագու-
թիւն օտարացելոյս ողջոյն քո, առ մոլորելոյս
դարձաւորութիւն ձայն քո : Զի դու տիրես ամե-
նայնի գթութեամբ, և չիք ի քեզ մասն ինչ խա-
ւարի. և ոչ է բարութիւն առանց քո, և քեզ
վայելէ փառք յաւիտեանս . ամէն :

ԲԱՆ ԼԱ.

Վերսիմ յաւելուած կրկին հնծութեան .

Ա. Եւարդ քանզի բազմացուցի պայմանաւ բանիս զաղէտ տագնապի հեծութեան ձայնիս մեծ հառաջանացս անսփոփելի խմոյս վտանգի . զի դու ողորմած սկզբնահայրդ խոստովանութեան անյայտ ծածկութից որդի Սատուծոյ կենդանւոյ տէք ՅիսուսՔրիստոս , քաղցրութեամբ նայեսցիս քաւել : Արդարեւ կարող ես , ճշմարտապէս բաւական ես , եթէ կամիս հնարաւոր ես , կամիս առաւելապէս , որպէս և կարես : Հարատանաս մեծապէս ընդ տալն քան եթէ ընդ առնուլն , բազմանան քեզ զանձք ի ցրուելն քան ի ժողովելն , յաճախեն ստացուածք քո ի սփուելն քան ի ճշղելն , կուտին քեզ համբարքի տարածանելն քան ի շտեմարանելն : Հաւատամ այսմ ամենայնի՝ զտանել քեւ ելք փրկութեան . հաւատամ անարզս ընդ պատուականին , յուսամ ընդ Աբրահամու և ընդ Աննայի . զի մինն բանիդ քո հաւատաց և միւսն քահանայապետին բարբառոյ անսաց : Վասն որոյ և ոմն ի խորին ծերութեան անհամար որդւոց հայր հաստատեցաւ , զառանցեալն և զամուլն արզանդ Սառայի՝ անդաստան պտղածին արդեան օրհնութեան բազում ժողովրդոց մարգարեից ւըբոց

և. Թագաւորաց ընտրելոց հայել յուսացաւ : Խսկ
միւսն զանհանդերձելի երկիր որովայնին սենեկի
եօթնեակ զաւակօք բարգաւաճեցոյց, որ է թիւ մի
անբաւութեան զբնաւն նշանակելոյ զէութիւն,
աստուածութեանն յարակայութիւն սահման
անհետազոտելի, և աւազանին նորածին որդւոց
անհատ յորդութիւն : Այս թիւ պանծալի, որում
ոչ է կէտ կցորդի և ոչ սպառուած վախճանի,
այլ կոյս ոմն է ուրոյն ընտրութեամբ նուիրեալ
յաւէտ անձառ վիճակաւ համայն յափտենիւ,
դժուարաթարգմանելի մերոց իմաստից :

բ. Արդ համարեա յարդարութիւն անյուսալի
փրկութեան հոգւոյս զամենավարան ձայն կող-
կողանաց սրտիս հեծութեան, ընդ նախազրելո-
ցըն երջանկաց եղեալ և դասեալ զայս դաւանու-
թիւն փոքր հաւատոց իմոյս խնդրուածոց, զի
կեցից և ես առ նոքօք բերկրեալ ընդ նոսին,
բուռն հարեալ քան զիմոց գործնց զբոյդ շնոր-
հաց : Մանաւանդ զի կրկին բարձունք են և փա-
ռաւորք և քան զչափ կշռութեան բանի զերա-
գոյնք, իմումս խոռվութեան հաշտարանք և
հզօրապէս քաւարանք, և կարծեաց թերութեան
մտաց սլացեալք . ընդ արեանքո ահաւորի և ըստ
մարմնոյ ծնողդ քո խնկելի . պարք առաքելոցն,
դասք մարգարէիցն, գունդք մարտիրոսացն՝
ձիաւորեալքն հետևակսպառազէն արիութեամբ

մերկամարտիկն մրցութեամբ, գումարք միան-
ձանց, բոյլք բանականաց ընտրելոց, ժողովք
բարեկրօնից, հոյլք հոգեղինաց յերկրէ երկնա-
ւորաց, զինուորութիւն վերնականաց ընդ մեզ
կցորդելոց, աւանդք երախայրեաց, մատուց-
մունք զուարակաց, լուցմունք զամբարաց, բուր-
մունք խնկոց իւղոց հանդերձանօք, յաղթանակք
փրկական նշանաց, կառուցմունք խորանաց
աստուածաբնակաց, ձեռք քահանայից շնորհիւ
կատարելոց : Առ շարժումն անձին լիշտակ
Աստուծոյ, առ փոփոխումն զարշապարի, առ
կարկառումն աջոյ և ամբարձումն բազկի, առ
բարիս գոհութիւն, և առ գթել աղաչանք, առ
բանս ընտանիս, առ խօսս հասարակաց, առ
ձայնս բնաւորականս, առ գործոց յաջողուածս,
առ առաքինութեան ջերմութիւնս, որ ի տուն-
ցեան և ի զիշերի ընթացմունս օգտակարաց
հոգեւորաց քեւ առաջնորդեալք . ի նիրնել և
ի զարթնուլ, ի պատերազմի ազգաց, ի մար-
տրս դիւաց, ի հակառակութիւնս հերձուածո-
ղաց, առ փոքրունս. առ մեծամեծս, առ ձը-
գումն ըմպելեաց և ճաշակումն կերակրոց, և որ
ինչ մի անգամ ի կիրս մեր կերպանան, եթէ
հեշտականս եթէ տատամսելիս. վասն ումանց
աղօթս՝ մնալ ի նոսին, և յաղագս ոմանց՝ զի
զերծ արասցես սքանչելապէս հնարիւք անճա-

ոիւք. հաւատացեալյամենեցունց, թէ բաւական
ես յամենայնի, կաթնաբոյծ հասակաց, տիոց
պատաճեաց, մտաց վայրենեաց, ստամբակաց
գոռողաց. մինչ զի առ թատերս տեարանաց,
և առ կոյտս խառնիմաղանձ բազմութեանց, և
կամ առ կաքաւս կայթից անախորժականաց
կամաց հզօրիդ՝ ոչ ես մոռացեալ :

Գ. Արդ դու ստացաք զամենեսեան և քո են
ամենեքեան, և ողորմեսցիս ամենեցուն՝ միայն
բարեգութ. զի թէ և մեղիցեն քո են. վասն զի
ի քում համարի են. քան զի գիտեն զզօրութիւն
քո, ըստ ստակողին մաղթանաց : Որում և ես
կցորդիմ թշուառս բանիւ վկայեալ սորին յան-
ցաւորապէս. յանդգնիմ ասել, թէ որ կարդայ
զքեզ գովեստիւ, ծանուցեալ զքեզ թէ իցես, թէ
և եօթեամբք իցէ վարակեալ կրկնապատիկ
պատճաւորութեամբ, առ այս օրինակ կիրթ ձեռ-
նարկութեան, զիարդ ոչ քո իցէ : Յորս է տեսա-
նել ի մեջ արջնատես ագռաւուց սպիտականիշ
երամս աղաւնեաց, ի մեջ խրոխտականաց ձիոց
անմաքրից որոշս հանդարտաբարս, ի թիւ շանց
զազանականաց զառինս նուիրելիս, հեզութիւն
ի խստութեան, կատարելութիւն ի թերութեան,
խոնարհութիւն յամբարհաւաճութեան, ճըշ-
մարտութիւն ի ստութեան, միամտութիւն
ի մանկութեան, անբժութիւն յայլամտութեան,

բարօրութիւն ի չարութեան, պարկեշտութիւն
ի վսութեան, ողորմութիւն յանգթութեան,
ապաշաւանք յանյուսութեան, քաղցրութիւն
ի բարկութեան, հաշտութիւն ի թշնամութեան,
անոխութիւն ի խածանողութեան, քաջալերու-
թիւն ի վկութեան, օրհնութիւն ի նետաձգու-
թեան: Յոր ոչ բաւականացայ երբէք ի դատել
ճշգրտապէս, թէ ով յերկրածնաց աստի կան-
խեսցէ ժառանգել զքեզ, որ միայն անաշառա-
բար կշտամբես իրաւամբք զարդարութիւն՝ առ
ամպարիշտ մաքուրն և առ պոռնիկ զղացեալն.
առ ամենեսին բարեգործ՝ միայն թագաւոր օրհ-
նեալիբարձունս և յամենայն յաւիտեանս. ամէն:

ԲԱՆ 18.

Վերսին յաւեղուած կրկին հեծուրիսն.

Ա. Եւ արդ ես յետնեալս ի նախադրութեանց
արժանաւորաց զքեալ ինձէն ընդ պարտաւորսն
պատժոց, հայցեմզողորմութիւն ընդ ամենեցուն
մաղթանաց. ընդ նկունս և անհամարձակս, ընդ
տկարսն և փոքրկունս, ընդ ընկեցիկսն և ար-
համարհեալս, ընդ տարագրեալսն և առ քեզ
դարձեալս, ընդ երկուացեալսն և ճշմարտեալս,
ընդ կործանեալսն և յարուցեալս, ընդ ընկճեալ-
սըն և հաստատեալս, ընդ զլորեալսն և կանգնե-
ցեալս, ընդ մերժեալսն և ընկալեալս, ընդ

ատեցեալսն և կոչեցեալս, ընդ ապշեալսն և զգաստացեալս, ընդ անառակեալսն և զսպեալս, ընդ հեռացեալսն և մերձեցեալս, ընդ հերքեալսն և սիրեցեալս, ընդ պատկառեալսն և զուարթացեալս, ընդ ամաչեցեալսն և խնդամտեալս : Այլ եւ պատմեմ աստանօր դարձեալ՝ ոչ զմեղսն երուսաղեմի, ըստ մարգարէին հրամանառութեանն որ առ ժողովուրդն նախնի, և կամ տանն Յակոբու զանօրէնութիւնս նորա, այլ իմոյս ժամանեցից յայտնութեան . քանզի աւաղ ընդ աղէտս մահու յարելով ըստ մարգարէին, յանդիմանեցից զիս ինքն ինձէն իմովս ձայնիւ ըստ սաղմոսողին . որպէս զի յանձնառական յայսմ համայնապատում խոստովանութենէ ոչ կարօտացեալ կրկնակին, միանգամայն ի սպառ սրբեցայց օրնեալ հրամանաւ էիդ :

Բ. Եւ արդ կրկնելով ծունը բարերարիդ քաղցրութեան, տարածեալ զանձն իմ առաջի, զի մահ գլորմանն ցուցից կերպարան . որ ի հող խոնարհեալ մածայ ընդ երկրի, և ընդ անցաւորս այս կենցաղ կորստեան՝ անասնական զետնաքարշութեան սողնոյ սահեցմամբ՝ կամօք բնեռեցայ : Այլ ի քեզ տէր յեցեալ՝ իբր իհաստարան կենացգաւազանիյարմատոյն Դաւթի ընձիւղեալ մարմնով անձառ շաղկապմամբ յանեղ աստուածութիւնդ, կանգնեցայց անդրէն կիսայար՝ պատ-

կառեալ իքոցդ երախտեաց ի վայր կորացեալ
դիմօք, աչք ի բարձունս յառեալ ողորմագին
տեսութեամբ ի քեզ մերձդ ի հեծութիւն, բնաւին
ողորմութիւն, բոլորովին քաղցրութիւն, զիհ
լուսոյս արտասրւօք լցեալ՝ պաղատանս յուսոյ
առաջի մեծիդ վերընծայեցից : Լուր ամենառառ
աննուազ երկայնմտութեամբ քո դառնացուցչիս
միայն դու ի յամենայնի սահման փրկութեան,
Աստուած բոլորից, անձառ մեծութիւն, անբո-
վանդակելի բնութիւն, անքննելի իսկութիւն,
հզօր զօրութիւն, կարող բարերարութիւն, ան-
պակաս լրութիւն, անձառ ժառանգութիւն,
վայելչական վիճակ, առատ պատրաստութիւն,
անստուեր իմաստութիւն, տենչալի տուրք,
անձկալի ձիր, բաղձակի բերկրութիւն, անտխուր
հանգիստ, անտարակոյս գիւտ, անկապուտ
կեանք, անծախելի ստացուած, անփոխանոր-
դելի բարձրութիւն, ամենաքուեստ բժիշկ, ան-
սասանելի հաստատութիւն, դարձուցիչ մոլորե-
լոց, գտիչ կորուսելոց, յոյս ապաւինելոց, լոյս
խաւարելոց, քաւիչ մեղուցելոց, ծածկարանդ
փախուցելոց, անզորբիչ խուվեցելոց, փրկու-
թիւնդ մահացելոց, արձակիչդ կապելոց, ազա-
տիչդ մատնելոց, պատսպարանդ սահեցելոց,
վշտակիցդ գայթազդելոց, երկայնմտութիւնտա-
րակուսելոց, լուսոյ տեսակ, ցնծութեան ցոյցք,

օրհնութեան անձրև, հոգի երեսաց, զօրութիւն
դիմաց, հովանի գլխոյ, շարժարան շրթանց,
ազդումն բանի, կառավար անձին, բարձումն
բազկի, ձգումն ձեռին, երասանակալդ սրտի,
ընտանի անուն, մերձաւոր ձայն, կցորդութիւն
հարազատ, խնամածութիւն հայրենի, խոստո-
վանեալ անուն, պաշտեցեալ պատկեր, անպա-
րազիր տիպ, երկրպագեալ տէրութիւն, բարե-
բանեալիշատակ, խնդութեան մուտք, անփրեպ
շաւիդ, փառաց դուռն, ճշմարտութեան ճանա-
պարհ, երկնամեմ սանդուղք : Եւ այլ բազմու-
թիւն բանից զովեստից անհամար կարգաց և
տանց անբաւից, զոր ոչ բերէ բերան երկրածին,
և ոչ տանի գործի մարմնեղէն, և ոչ կշռեն իղձք
հոգեղլեցք :

Գ. Առ քեզ Հայր ամենայն ակն տեսողի, Աս-
տուածդ ամենայնի, նայեա ի պաղատանս հա-
ռաչման ձայնի քոյոց ծառայից, և եթէ յաղախ-
նաց ոք աղաչեսցէ : Եւ նկալցող ողբերգութեան
լալոյ արտասուաց աչացս ցանկասիրի յանարաս
ուս մարդեղութեան քոյ, Քրիստոս . և օրինա-
կաւ խորհրդոյ հերաց կնոջն յանցաւորի՝ զառ
քեզ դարձն և զդաւանութիւն, և համբուրիւ
շրթանցս առ ճաշակ փրկութեան կենացդիաղոր-
դութեան՝ համաշնչապէս զանքակ միութիւն, և
զնոյն զթութիւն նորին ողորմութեանը ընկալեալ

ի քէն, բարերար, գրաւականեսցես զմեծդ պարզեց ընդ փոքու հաւատոց . և ի ձեռն գթութեան սիրոյ քոյ առ քո անձկալի անունդ խոստովանեալ ծառայիս, դարձին ձմերունք հողմոյն խոտութեան ի յօդ հանդարտութեան, և մրրկին սաստկութիւն ի սիք ախորժութեան, և կարծիք երկիւղին ի մեծ վստահութիւն, և պատուհաս պատժոցն յերանութեան պատահումն . և վտանգը թախծանացն ի հոգեոր խրախճանութիւն, և ալէկոծութիւն ծփանացն ի խոր խաղաղութիւն, և ղեկացն թևարկմունք յանքոյթ նաւահանգիստն, և բերք բեռանցս մեղաց փոխարկեսցի ի թոշակ շնորհաց : Եւ յայսքանեացս ամենից բիւրուց բարութեանցս ի քէն եղելոց՝ մեծասցի անուն հզօրիդ խնկեալ և խոստովանեալ, ամաչեսցէ բանսարկուն չարեաց՝ հերքեալ և հալածեցեալ, ունայնասցին մուրհակք մեղացս, խզեսցին հաղբքն, որոշեսցին որոգայթքն, կապտեսցին կապանքն, վանեսցի վիճն, վերասցին վնասքն, պարսեսցին պատրանքն, չըրեսցին մեղքն, պատառեսցին պարտիքն, խորտակեսցի լուծն, քակտեսցին քեղիքն : Եւ ընդ մուայլ մթութեան չարեացն յանցանաց և դիւացն բանակաց պաշարողաց՝ արև փառաց քոց ժամանեսցէ կեցուցանել փրկել և լուսաւորել, յաջմէ և յահեկէ, ի դիմաց և ի թիկանց . և եղիցի նշոյլ առաւօտու

հոգւոյ գարնայնոյ ընդ ակնկալութեան սպասողացն քումդ երևման : Զի դու ես բարերար առ ամենեսին, և հնարաւոր են քեզ ամենայնք . և ամենեցուն զկեալն կամիս և զփրկութիւնն բաղձաս :

Դ. Ով ամենապարզև ձեռն Յիսուսի Քրիստոսի և առ իս դարձցիս կարկառմամբ շնորհի աջոյդ քոյ սրբոյ բնակեալ միացեալ, և ոչ հեռացեալ յանձկութեան սրտէ սիրոյ սենեկիս . և անեղծական քո նկարագիր՝ Եշարք պանծալի լուսոյ քրիստոնէական փրկաւէտ կոչմանս՝ ընդ իս պահեսցի, միջնորդեալ ընդ քեզ ի մատեան յաւիտեան կտակաւդ կենաց հոգւոյդ աւետեաց երկնից յօրինողիդ : Եւ քեզ միայնոյ պատճառիդ, և միոյդ ի միոյ պատճառէ, և ունողիդ զպատճառ միոյ, երբեակ անձնաւորութեանդ և միոյ աստւածութեանդ վայելեն փառք յերկնաւորացն վեհից, ի սրբոցն դասուց, յաւիտեանս յաւիտենից, ամէն :

ԲԱՆ ԼԳ.

Վերսիմ յաւելուած կրկիմ հեծութեամ.

Ա. Արդ զյարմարութիւն պաշտաման բանիս խայրեաց հոգւոյս քեզ նուիրելոյ, օրինեալ բարեգութ, կցորդելով ընդ խնկազեստիցն զուգամասնապէս խառնեսցես ի յանուշութիւն

կազմութեան իւղոյն Մարիամու կնոջ բարեպաշտի : Յոր հաւասարեալ նոյնութեամբ ընդ երջանիկ պոռնկացն ի քէն ընկալելոցն յաւետահրաշ յարգանօք, պարարեացիս մեծապէս խմովս բանիւ նուաստիւ, ընկալեալ յանհաս և ի բարեքանեալդ գլուխ բարձրելոյդ, անկշտամբելի ի բամբասանաց սաղմոսին, մի օճշէ զտերեսուոց գագաթան իւղ մեղաւորին : Այլ արացես զօրանալ կրկին յանախութեամբ բուրման խոստովանութեան այսր մատենի ի բազումս ազդեալ, համաստիու ամենատարած և աշխարհալիր տանն տեսակաւ, ըստ օրինակի համեմատութեան նոցայն յիշատակի : Քանզի դու նոյն տէր զգաստացուցիչ նախնի չարախորհից կանց մեղաւորաց, որոց առակեալ զմարգարէին կերպարան՝ քումդ ճշմարտատիպ պատկերի յեղանակեցեր, անդուստառ սոսին անձառ ներգործութեամբ իյիս վերաբերեալ զծայրագոյն շնորհին կատարումն : Ընդ անասնական գարւոյն կերակրոյ զբազմահամբար պտուղ ցորենոյդ կենացդ հացի, ընդ ապականացու արծաթոյն զարքունականդ պատկեր, ընդ յիմարաբար թմբրութեան զինւոյն զբաժակդ արեան արարչիդ, ընդ իւղոյն առելոյ ի յայրատ կնոջէն հնոյ ժողովրդեանն զծումն շնորհին առ իս դարձելոյ, ընդ զերծման գլխաշուք կտաւոյն զանա-

պականութեան վերարկուն, ապարանջանին պմնութեամբ՝ զթոհչս բարեմասնութեան օրինիւն և աւետարանաւն՝ հանդերձ զործնական առաքինութեամբն, ընդ ունկանն զնդի վայելչականն զարդու՝ զանստուեր յիշատակ տէրունականդ ձայնի, ընդ քայոս պերճութեան լանջացն՝ զյոքնահաւաք աւանդս ուղղութեան քոյինակրօն Ծոյդ քաղցրութեան :

Բ. Բայց զի է յայսոսիկինձ պարծել, և ոչ վերստին ի սոյն պատկառել : Այլ յայլ օրինակ փոխեալ զմատեան մաղթանաց այսր ողբերգութեան, որ ինչ ինձ է յարմարաւոր, ամենայնիւնատուցից զպատիժ պարտուցս իմոց մեղանաց, ի մարգարէիցն տառից բերեալ համառօսս՝ ի սոյն յարկ մուծից սաստիկ դատախազ. ընդ ողբոց նոցին Ծակցեալ, քան թէ ընդ բերկրումն նոցա պարել. յորս հառաջանս, ձայնս հեծութեան, բողոքս բարկութեան, նախատինս խորտակման, լալումն կարեւոր : Այլ մեծիդ Աստուծոյ զթութիւն ամենաժաման՝ կանուխ ազդեցաւ յիմ յուսատրդւթիւն, առ որս՝ զղմունս, խոստովանութիւնս, աւետիս, պարզեւս, լուսոյ երևմունս, խրախոյսս աստուածայինս, փառաց ժառանգութիւնս, հրաշից յայտնութիւնս, սքանչելեաց տեսութիւնս. յորոց ոմանք յոյս ընձեռեն, և ոմանք վհատութիւնս բազումս մատուցանեն.

յորս եւ կամաւ կործանեալ՝ կորստեանն վիճակեցայ : Զի եթէ զգեստ Աստուծոյ զվարագուրին պատրուակ ասաց Եղեկիէլ, յորում արարժողովուրդն կուռս կարկատունս, որով պոռնկել ասէ ի նոսա, իսկ որքան պատիմ անմաքրութեանս եղիցի զԱստուած զգեցողիս ներքոյ և արտաքոյ : Զարմանամ, թէ զիարդ ոչ կիզում, հիանամ, թէ իբր ոչ այրիմ . ափշիմ, թէ որպէս չյափշտակիմ տանջեալ, լքեալ, չարչարեալ, ջաղխեալ, մանրեալ, խորտակեալ, կորեալ . բաժանեալի յօրինակէ ժանեաց կորուչին, ըստ զրոյն : Այլ այս միայն է պահեցեալ ինձ նշոյլ յիշատակի փրկութեան յուսոյ, զի քրիստոսեան աւետարանն կեանս է ամենեին, իկերպարանաց պատկերի բանին ծանուցեալ . որովառ մեղանսն դառձն, առ պարտիսն շնորհն, առ եղծումն նորոգութիւնն, առ անօրէնութիւնն քաւութիւնն, առ վերն բժշկութիւնն, առ վտանգն անդորրութիւնն, առ պատիմն ներումնն, առ պատերազմն հանդարտանալն, առ հուրն անձրևն, առ պատուհասն պարզեն, առ ակնկալութիւն սատակմանն ձիրն, առ զործարան մահուն կենացն ազատութիւն :

Գ. Եւ զինչ է ինձ զայսքանեաց յիշմանց ի թիւ արկանել, և ոչ զանձառելիսն աստանօր դասել : Յիշատակաւ Հօրն բարձրելոյ՝ յմրդին կցորդու-

թիւն, յանուն միածնին՝ առ Հայրն ընտանութիւն, սոցին ակնարկութեամբ ընդ Հոգւոյն հաղորդութիւն . խաչին փրկանք, բանին սփոփութիւն, բարձրք վարձ կամացս առ կշռութիւն զիտողին, աւազանն կենդանարար՝ հաշտութեանն միջնորդութիւն, և այլք ամենայնք անթիւք բարիք ի բարերարէն բարդեցեալք, ազատք ի հարկէ, արձակք ի լծոյ, իշխանականք և ոչ իշխեցեալք: Այսոքիկ են, որ ինձ ի մէջ զառնութեանն մահու՝ կեանս անտարակոյսս աւետարանեն. քանզի եթէ ոչ զայսոսիկ ունէի, կանխաւ արդեօք կորուսեալ էի խսկ և խսկ ըստ բանի երգողին : Ոչ փոքրիկութեամբ նրդւոյ զՀայր վառաւորեմ, ոչ նուաստութեամբ Հոգւոյ զմրդի նախադասեմ . համափառ ունիմ զերեսեան՝ և նոյն արարչութեամբ : Քանզի և ի դէմս Հոգւոյն սրբոյ այս են աղաչանք, նախընծայ սկզբան պատարագին՝ յորում զառնդ երկնաւոր զենանի, զայս աղօթեցի :

Աղօք, որ նախ բան գպատարազն մատուցանի :

Դ. Ամենակալ բարերար մարդասէր Աստուած բոլորից, յօրինող երեւութից և աներեւութից, փրկող և հաստատող, խնամող և խաղաղարար, հօր հզօր հոգի, հայցեմք բազկատարած մաղթանց գոչմամբ հեծութեան՝ յանդիման եղեալքեզ ահաւորիդ : Մատչիմք մեծաւ դողութեամբ սաս-

տիկ երկիւղիւ մատուցանել նախ զբանականս
զայս պատարագ քում անզնին զօրութեանդ ,
իբր աթոռակցի փառակցի և արարչակցի հայ-
րենի անկապուտ պատուոյդ , և քննողի ծած-
կութեան խորոց խորհրդոց ամենակատար կա-
մաց հօրդ էմմանուէլի՝ զքեզ առաքչի , փրկչի և
կենդանատուի և արարչի ամենայնի : Ի ձեռն
քո ծանուցաւ մեզ երրեակ անձնաւորութիւն
միասնական սստուածութեանդ , յորոց մի և դու
ճանաչիս անհաս : Քե՛ և ի ձեռն քո առաջինքն
նահապետական տոհմին շառաւիդք՝ տեսանողք
անուանակոչեալք զանցեալսն և զգալոցսն , զե-
ղեալսն և զոչ զոյացեալսն անստուերաբար բար-
բառով բանի վերապատմեցին : Ոգի Աստուծոյ
քարոզեալ զքեզ Մովսէսի , որ ի զնալն քո ի վե-
րայ ջրոցն , անպարագիր զօրութիւն , ահեղ շըր-
շարկութեամբ տածողականաւ՝ թեապարփակ
պաշտպանողորէն զթասիրեալ ի ծնունդս նորո-
գրս՝ զաւազանին խորհուրդ ծանուցեր : Յոր
կերպարան օրինակութեան՝ նախ քան զկառու-
ցանեւ զլոյծդ մածուած վերջնում վարագուրիդ՝
յօրինեցեր , կարող տիրապէս , զբովանդակ բնու-
թիւնս ամենից բնաւից բոլորից զոյից ամենայն
էից յանելից : Քե ստեղծանին ի նորոզութիւն
յարութեան ամենայն եղեալքս առ ի քէն յայնմ
ժամանակի , որ է օր վերջին այսմ կենցաղի , և

օր առաջին երկրին կենդանեաց : Քեզ հնազանդեցաւ միութեամբ կամացն որպէս հօրն իւրում ազգակիցն քո, էակիցն Հօր անդրանիկն Որդի մերովս կերպիւ . զքեզ աւետարանեաց ճշմարիտ Աստուած հաւասար և համագոյ հօր իւր հզօրի, և զառ ի քեզ հայհոյութիւնն անքաւելի քարոզեաց, և իբր զաստուածամարտիցն զքո հեստերցն չարաբանական բերանս կարկեաց, և զիւրն շնորհեաց արդարն և անարատն գտիչն ամենայնի, որ վասն մեղաց մերոց մատնեցաւ, և յարեաւ վասն զմեզ արդարացուցանելոյ : Նմա փառք ի ձեռն քո, և քեզ բարեբանութիւն ընդ հօր ամենակալի, յաւիտեանս յաւիտենից . ամէն :

Դարձեալ կրկնեացի ի նոյն կարգ բանի, մինչեւ Վասահուրիւնն լուսոյ երածաղէս յայտնեացի ազդեալ, աւետարամել վերսին զերկին խաղաղութիւն :

Ե. Աղաչեմք և պղերսեմք արտասուալից հառաչմամբ յամենայն անձնէ զփառաւորեալ արարչութիւնդ անստեղծ անժամանակ Հոգւոյդ զթածի որ բարեխօսոդ ես վասն մեր յանմոււնչ հեծութիւնս առ ողորմածդ Հայր . որ զսուրբսն պահես, և զմեղուցեալսն մաքրես և տաճարս կազմես կենդանի և կեցուցիչ կամաց բարձրեալդ Հօր : Արդ ազատեան զմեզ յամենայն անմաքուր գործոց, որ ոչ է հաճոյքումդ բնակու-

թեան. և մի շիջին առ ի մէնջ լուսոյդ շնորհաց
փայլմունք ի տեսականացս աչաց իմաստից .
վասն զի գրեզ ուսաք միանալ ի մեզ ի ձեռն
աղօթից, և ընտիր վարուց խնկելոց : Եւ քանզի
մինդ յերրորդութենէդ պատարագի, և միւսդ
ընդունի՝ հաճեալ ընդ մեզ հաշտարար արեամբ
անդրանկի իւրոյ, իսկ դու ընկալցիս զմեր պա-
ղատանս, և յարդարեացես զմեզ օթևանս պատ-
ւականս ամենայն պատրաստութեամբ ի վայե-
լումն ճաշակման երկնաւոր գառինդ, առանց
պատժոց դատապարտութեան ընդունել զայս
անմահացուցիչ մանանայս կենաց նորոյ փըր-
կութեան : Եւ հալեսցի ի հրոյս յայսմանէ զայ-
թագդութիւնս մեր, որպէս մարգարէին կեն-
դանախարոյկ կայծակամբն ի ձեռն ունելեաց
մատուցման . զի յամենայնի քոյդ քարոզեսցի
զթութիւն , որպէս Որդւովդ աստուծոյ՝ Հօր
քաղցրութիւն . որ զանառակ որդին մերձեցոյց
ի հայրենի ժառանգութիւնն, և զպունիկսն յա-
ռաջեցոյց յերկնային արքայութիւնն արդարոցն
երանութեան : Այն այն և ես մի եմ ի նոցանէ .
և զիս ընկալ ընդ նոսին իբր մարդասիրութեան
կարօտեալ մեծի, շնորհօք քո ապրեալ, զա-
րեամբ Քրիստոսի ստացեալս : Զի յայսմ ամե-
նայնի, յամենայնի ծանիցի քո աստուածու-
թիւնդ ընդ Հօր փառաւորեալ համապատուա-

բար իմի կամս և իմի իշխանութիւն գովութեան, զի քո է զթութիւն և կարողութիւն և մարդասիրութիւն, զօրութիւն և վառք յաւիտեանս յաւիտենից. ամէն :

ԲԱՆ ԼԴ.

Վերսին յաւելուած կրկին հնձուրեան .

Ա. Արդ առ այսոսիկ թշուառացեալ շնչոյսիմոյ իղձք, և առ քեզ դաւանութիւնք յարմարականք, որ բովանդակես բանիւ զամենայն՝ Աստուած, զոր ի նախնին ճառեալ և յերկրորդումս ցուցից : Խոկյանդիմանութիւնս զրաբանականս՝ ի կոյտս բազմութեան ազգաց, և թարգմանութիւնս ժողովրդոց, զայս արգահատութիւնս մաղթողականս նուիրեցի, զոր Եերքնաշարեալքդ սահմանադրեն գոհաբանութիւնք :

Ի հանդիսարանս խօսից առենի բանս մադրանաց, որով հոգին Աստուծոյ հաւեսեալ հասանէ յօգնականութիւն :

Բ. Աղաչեմզանփոփոխելի տէրութիւն ամենազօր Հոգւոյդ հզօրի. առաքեան զցող քաղցրութեան քոյ, և բարեգործեան ի յանձին և յիշխանական ազդման զգայութեան զամենալից շնորհս բազմապարզեւ քո ողորմութեան : Եւ հերկեան զբանական անդաստան մարմնեղէն կարծրացեալսրտիս՝ յընդունակութիւն արգասեաց հոգեւոր սերմանդ : Քում ամենիմաստ էութեանդ

խոստովանիմք զամենայն պարզես ի մեզ ծաղկեալ և ամեցեալ. որ ձեռնադրես առաքեալս , լցուցանես մարգարէս , ուսուցանես վարդապետս , բարբառեցուցանես համերս , և բանազիակեալ ականջս խլից . որպէս ազգակիցն քո էակիցն Հօր անդրանիկն Որդի քոյին գործակցութեամբ ներգործելով զայս ամենայն , քարոզեացգրեզ Աստուած հաւասարակից խկութեան Հօր : Շնորհեան և ինձ մեղաւորիս խօսել համարձակութեամբ զկենդանարար խորհուրդ աւետեաց աւետարանիդ , հետևել արագաթոիչ ընթացիւք մտաց ընդ անհուն ասպարէզս քոյինաշունչ կտակարանաց : Եւ ի մատչել իմ ի զլուս հանդիսի մեկնութեան բանի՝ նախաժամանեսցէ առ իս զթութիւն քո , խօսելով յիս զարժանն և զպիտանիսն և զհաճոյսն քո ի ժամանակի , ի փառսեի զովեստաստուածութեանդ քո , և ի լրութիւն շինութեան կաթողիկէ եկեղեցւոյ : Եւ կարկառեան ի վերայ իմ զամենամերձ աջ քո , և զօրացն զիս շնորհօք զթութեանդ քո . Փարատեան ի մտաց իմոց զմէզ մթութեան մոռացութեան , ապաքինեալ ընդ նմին զխաւար մեղաց , ամբառնալ ուշիւ իմաստիցս ի կենցաղոյս երկրէ ի բարձունս : Լուսաւորեան ի յիս վերստին զծագումն անստուեր հրաշից զիտութեան աստուածութեան քոյ , հզօր , արժանի լինել առնել

և ուսուցանել յօրինակ բարեաց աստուածասէք լսողաց : Եւ քեզ ամենայն փառք յամենայնի ընդ Հօր ամենակալի և ընդ Որդւոյդ միածնի և բարերարի , այժմ և յանվախճան յաւիտեանս . ամէն :

Իսկ զիաւատոյ սահման բանի ընտրութեան շնորհի կենաց կանոնի առ համագոյ սուրբ Երրորդութեան զայս վարդապետեցի , զոր շաւիդ կարգիդ վերանկարէ :

ՄՐՈՎԴՈՒԹԻՆ ԱՆԱՀԱՅԱԿԱՆ ՇՈՐԾ ԱՏԵՂՋԱՐԱԿԱՆ ԱՊՀԵԱԼ
յԱՍՏՈՒԹՅՈՒՆ , յոր ինչ ի Նիկիայն սահմանեցաւ հաւաս :

Գ. Խոստովանիմք և դաւանեմք , պաշտեմք և Երկրպագեմք զզուզափառ միութիւն ամենասուրբ Երրորդութեանն , աստուածութիւն անձառ , միշտ բարի , նոյնագոյ , հաւասարապատիւ , անհաս իմաստից թեւոց սլացման , ի վեր քան զօրինակ և անդը քան զնմանութիւն , զերազանց գոլով սահմանի անպարազիր բացարձակութեամք , յառաջ քան զիմն յաւիտեանց անտարբափակ էութեանց ստեղծականացս կարգաց , օրհնաբանութեամբ անթարզմանելեաւ ամենահարուստ մեծութեամբ յաւէտ պասկեալ , հաստիչ ժամանակաց և որ ի ժամանակի են կերպաւորեալք . ինքն պատճառ հանդերձիչ և յարմարապէս յօրինիչ տեսականաց և աներևութիւն : Ոչ անուամբ չափեալ և ոչ յորջորջմամբ նշանա-

կեալ, ոչ որակութեամբ նմանեալ և ոչ քանակութեամբ կշռեցեալ, ոչ օրինակաւ ձևացեալ և ոչ որպիսութեամբ ծանուցեալ, ոչ ի թերութենէ տարածեալ և ոչ ի լրմանէ ամփոփեալ, ոչ ուրեք երբէք գրաւեալ և ոչ ի տեղւոջ վայրի երևեալ :

Դ. Հայր զթութեանց՝ ունող ամենայնի, և Աստուած հանուրց որ յերկնի և որ յերկրի, բաց ի բանէն միայնոյ՝ որով զամենայն ինչ ունի. ստեղծիչ և տուիչ շնչոց ամենից, բաց ի Հոգւոյն իսկակցէ որով զհամայնն կազմեաց :

Ե. Մինն յերջանկափառ համազօր ահաւորութենէ երիցն անձնաւորութեանց խոնարհեալ ի վերուստ անդուստ ի ստորինս, որ Էրն իսկ ի բնէ անբաժ ի ներքնոցս՝ անկապուտ մնալով փառացն աթոռոյ, և անկարօտ դիմացն ծնողին իւրոյ, մտեալ իսենեակ կուսին արգանդի պարզաբար, և ելեալ անտի յօդաւորաբար մարմին էապէս անորոշելի, անթերի մարդկութեամբն և անպակաս աստուածութեամբն : Մի որդի հօրն միայնոյ, և միածին անդրանիկ աստուածամայր տիրածին կուսին, արարիչն յեղականումն մարդ ելով ճշմարիտ սկզբնածին. ահա ոչ զկնի եղելոց երկրաստեղծիցս նմանութեան, այլ նոր և չըքնաղ, թագաւորաց վեհափառ, որ ոչ ցուցաւ ի դարս, և ոչ գոյացաւ ի ժամանակս, անդրանիկ ըստ սաղմոսողին, քան զամենայն թագաւորս

Երկրի, անապական խառնութեամբ կերպացեալ
զմերս ի մարմնի, ըստ օրինի հոգւոյ ընդ մարմնոյ,
և ոսկւոյ ընդ հրոյ, և կամ յայտնապէս խսկ ասել՝
լուսոյ ընդ օդոյ, ոչ փոփոխեալ և ոչ անջատեալ:
Նոյն ինքն եկեալ կամաւորութեամբ ի խաչն
մահու, իբր զգառն անարատ ի սպանդ վարե-
ցաւ, և հանդերձեաց զօրեղ ինքնիշխանութեամբ
զարարածոց իւրոց փրկութիւն. չարչարեալ խ-
կութեամբ կենդանեօք՝ եղաւ ի շիրմի անորոշելի
յատուածութենէն. եռօրեայ թաղմամբն ի դժո-
խը՝ սանդարամետականացն վհատելոցն բան-
տարգելիցն քարոզեալ ցուցաւ նորոգումն և լոյս:
Եւ աւարտեալ զտնօրինականացն զփրկանա-
ւորն զտնտեսութիւն, աստուածապէս վերակեն-
ցաղեաց. և կառավարեալ ի թևս հողմոց ելեալ
ի Քրովքս ամպով անքննութեան ծածկեցաւ.
համբարձեալ զեր ի վերոյ ամենայն երկնի, նըս-
տաւ ճոխութեամբ յաթոռն իւրական սկզբնա-
ժառանգ հօրն հաւասարութեան, յորմէ և բնաւ
խսկ ոչ մեկուսացաւ, անկրորուատ առեցելովն և
աննուազ սեպհականօքն : Որով և եկեսցէ ի դա-
տաստան հատուցման, քննել զծածկեալսն կըշ-
ռութեամբ չափոյ արդար իրաւանց. որում
սպասեմք և յոր աղօթեմք, հաւատացեալք յա-
մենայնի՝ ամենայնիւ ամենակալ տէրութեան
նորա. որ արդարե մինն է միայն ի միայնոյն,

ի, միոյն փառակցութիւն յաւիտեան երկրպագեալ :

2. Բարեբանեմք միշտ և օրհնեմք ընդ Որդւոյ և ընդ Հօր և զՀոգի էութեան նոցին, ամենազօր, ճշմարիտ, կատարեալ և սուրբ, որ յանէից գոյացոյց զբոլոր եղեալքս ամենայն . ինքնազործ հոմիշխան երկուցն ևս ընդ նմին անեղծ և անսահման թագաւորութեան . որ ինչ պատճառն առաջին և բանն անաւոր նորին ինքնութեան , նոյն ինքն և հոգին բարձրացեալ : Բարի ինքնակալ, ամենից բաշխիչ զիօրն պարզես ի գովեստ անուան փառաց միածնին . որ ազդեաց յօրէնսն, շնչեաց ի մարգարէսն, փշմամք ազգակցին տըպաւորեցաւ յառաքեալսն, կերպիւ աղաւնւոյ ցուցաւ ի Յորդանան ի մեծութիւն փառաց եկելյն, փայլեաց ի զիրս աւանդականաց, արարհանձարեղս, զօրացոյց իմաստունս, լցոյց վարդապետս, օծ արքայութիւնս, օժանդակեաց թագաւորս, ետ վերակացուս, հրամանատրեաց փրկութիւնս, շնորհեաց ձիրս, հանդերձաւորեաց քաւութիւնս, զմկրտեալսս ի մահն Քրիստոսի՝ ի բնակութիւն իւր մաքրազարդեաց . զոր Հայր և Որդի, զնոյն և Հոգին Երգործեաց, և ինքն է Աստուած ինկեալ տիրապէս ամենայն յամենայնի :

Ե. Քանզի ոչ նախաթուելով Երրորդութեանն

ոք մեծ ինչ քան զմիւսն, և կամ զկնի անուանիլն
նուաստագոյն առ նմանն, և կամ ի մինն ասելով
խառնակութիւն գոլ դիմացն, և կամ յերիցն
տրոհումն ուրոյնութիւն ել կամացն : Քանզի
անմեծար հայր ամենայնիւ, եթէ ոչ զբանն ու-
նիցի ինքեան զօրութիւն. որպէս ոչ գոլով ընդ
նմա հոգւոյն՝ անհագագ ոմն և անկենդան և առ
ամենայն հրաման նուազեալ : Խսկ բանն եթէ ոչ
անուամբ հօրն ծանիցի, որբ ոմն և կամ լքեալ և
կամ ի մահացուէ ումեմնէ ոչէի : Որպէս և հոգին
եթէ ոչ ի պատճառէն նշանակեսցի, ապաշուք
ոմն թափառեալ՝ իբր զշունչ ինչ անդասելի :
Այլ եթէ ոք հակաճառական բանիւ յաւակնի
կապտել զհայր ի յիւրմէ բանէն, որ թէ էր եր-
բեմն յորժամ և չէր, և անբանութեանն բամբա-
սանօք պատուել վարկանի զվեհին մեծութիւն,
և կամ ստրկութիւն տացէ բղխողին՝ ոչ բնաւո-
րաբար գոլով հոգւոր, որով այլ իմն գոյութիւն
օտար մուծանել և կամ ամբոխումն ինչ այլայ-
լական յանարատ պատիւ միութեան սուրբ Եր-
բորդութեանն, զայնպիսիսն քարամբք պարսից
հաւատոյ բանից, իբր զդմեղակ դես դիմամար-
տիկս զազանականս հերքեալ ի միջոյ ի բաց
հալածեմք, եղեալ ի նզովս զնոյնս ընդ նոսին՝
փակեմք ընդդէմ նոցին զկենացն մուտ եկեղե-
ցականս զաւթի : Ուստի զսուրբ Երբորդութիւնն

փառաւորելով ի նոյն տէրութիւն միակցորդ հաւասարութեան, զուգաձայն սըբաբանութեամբ, հանգունատիպ հարթութեամբ, օրհնեալ և փառաւորեալ յերկնի և յերկրի, ի ժողովս անդրանկացն, և յազգս երկրածնացս բանականաց, յափիտեանս յաւիտենից. ամէն :

Ը. Արդ զայս գոչումն ծածուկ խորհրդոց կերպաւորելոց յայսմմատենի՝ ամենալուրականջաց մեծիդ Աստուծոյ ընծալեցուցի. սովիմբ սպառազինեալ, և ապա մտի ի հանդէսն : Այլ ոչ եթէ կարօտեալ իմոյս ինչ ձայնի այսու մեծանաս, որ մինչև ստեղծեալ էր քո զամենայն՝ նախ քան զինելն երկնի փառաբանչօքն անմահից և երկրաստեղծս բանաւորօք, դու քեզէն ի քումդ լրութեան փառաւորեալ խսկ էիր. այլ զի զմերժեալս զիս յարգեսցես, անձառ քաղցրութիւն, ճաշակել զքեզ բանիս հաղորդութեամբ : Խսկ զինչ պարտ իցէ ըստ արքունական հրամանիդ կենաց կանոնիդ ասել, աղոնայի տէր, և զիրամայեալ պատուէրդ ոչ առնել. որ ինձէն խսկ զիս զոսկեղէն տախտակս խօսուն՝ նուիրեալ քումդ պատգամի, զգրեալս մատամբդ Աստուծոյ եղծի, որ և խորտակելն է իրաւացի. և ես տիսրատեսակ մրով զերկրորդն նմանութիւն առեալ հայթայթեմ : Այլ արդ քանզի բազմօք պաղատեցայ դրուակօք խանդաղատականօք, որ ոչ է զրեալ

ի յայս կարգ ձայնի, ըմբ բարեգութ, ըստ սմին
բանի այնմ ամենայնի : Եղիցի և այս աղերս
բարբառոյ հայցման աղօթից յօդեալ ընդ նոսին.
թերես ի մաքրոց և ի կամարարից այս նուեր
հացի պանից բաղարջուց իւղով զանգելոց ի սե-
ղան փառացդ քոց մատիցէ :

Թ. Այլ դու բարերար և յամենայնի մարդասէր,
Քրիստոսդմի Ս.ստուծոյ միոյ, հզօր և ամենակալ,
որ յաղթես գթութեամբ խնամոց քաղցրութեան
քո, ոչ հասարակականաց միայն մարդկութեանս
իմոց գոյակցաց, առ որս յաւէտ է ամբոխութիւն
և բիւրամասնեայ հակառակութիւն, այլ և հրեշ-
տակացն անախտականութեան, նաև և ևս քան
զայս՝ սրբասնելոցն անարատութեան. յորոց մի
էր և Հեղիաս, որոյ ցոյցք խատութեանն ի Յորեք
Երինն նշանակեցաւ յերիս օրինակս, ի շար-
ժումն մեծ, ի հողմն ուժգին, ի հուրն կիզանողա-
կան. իսկ քոյդ հեզութիւն երկայնմտութեան
իհանդարտութիւն մեղմութեան օդոյն քաղցրու-
թեան. քանզի կամաց ողորմութեանց դու միայն
ես, ըստ զրեցելումն : Վասն զի թէ և հաճոյք
գտան մերասերքս առաքինութեամբն յեղանա-
կեալ յայլ նմանութիւն վերնային, սակայն եր-
կրածինք են և նոքա, ընտրեալք ի մարդկանէ.
իսկ դու ոչ ունիս չարանալ իսկութեամբ բարիդ,
յամենայնի օրհնեալդ, ամենեալդ, փրկութիւնդ,

ամենայնիւ հանգիստդ, համայնից անդոքրութիւնդ, համօրէն ախտացելոց դեղ առաջութեան, աղբիւր ջրոյ կենդանւոյ ըստ Երեմիայ : Դարձ առ իս և ողորմեա ինձ, որ այնքան ծարաւես պասքիս անկարօտդ Աստուած իմում Փրկութեան, մինչ զի զուարթնոցն Երկնից անմահից օրհնաբանողացքան իմնընծայեցեր մարդկօրէն Փրկական քահանայապէս և քաւչապետաբար՝ անեղծական յարակայութեամբ մշտընցենաւոր պաղատանս օրհնեալդ քո գթութեան ի մերոց զիմաց կենցաղականաց վասն իմ լքելոյն հաշտութեան մաղթել, ողորմեա Երուսաղեմի . որ է լուսաւոր խորհուրդ յայց Ելանելոյ մեծիդ յայտնութեան առ հրեշտակականն թափուր տեղի ստորանկելոց ի ձեռն մարդկան՝ քո կցորդութեամբ աւետարանեալ առակաւ այսր օրինականս Երուսաղեմի :

Ժ. Արդարե լուար բարեգութ, անսացեր թագաւոր, ունկնդրեցեր կեանք և յոյս, ի միտ առեր Երկնաւոր, յարգեցեր հզօր, նկատեցեր ծածկագէտ, տեսեր խնամակալ, կարեկցեցեր անպատում, խոնարհեցար միշտ բարձրեալ, նուաստացար ահաւոր, յայտնեցար անճառ, ամփոփեցար անսահման, քանակեցար անքընեին, մածար ճառագայթ, մարդացար անմարմին, շօշափեցար անքանակ, կերպաւորեցար

անորակ, լցեր իսկապէս զաղաչողացն բաղձանս : Դու իսկ եղեր թշուառացելոյս ինձ՝ ձայնիւ զուարթնոցն՝ բարի բարեխօս, միջնորդ կենդանի, պատարագ անմահ, սպանդ անվախճան, նուէր մաքրութեան, ողջակէզ անծախ, բաժակ անսպառ : Ահա ողորմած, մարդասէր, օրհնեալ, միշտ կատարեսցես առ մեղուցելոյս զբարեբաստութիւն կամաց քոց կենդանատուաց, զովեալ երկայնամիտ . և քեզ վայել է փառք յաւիտեանս . ամէն :

ԲԱՆ 16.

Վերսին յաւելուած կրկին հնծուքեան .

Ա. Եհ արդ, տէր զօրութեանց . մեծութիւն ահեղ, անտարակոյս տեսաւորութիւն, կամք ամենընդարձակ, առատութիւն անպակաս . ով ոք զօրեսցէ տօնել հանդիսիւ պարերզութեամբ ի միոյ կաթուածոյ ցողոյ քումդ բարութեան, որ ցանկ դեգերիս պատրաստել պատճառս հնարից իմում փրկութեան : Եւ զոր մեծն է զրեցից պատմել յապառնիսն . քանզի ոչ անուանեցար հրեշտակասէր, և որ զպետութիւնս նոցունց հաստատեցեր, այլ և զերկինս դամբարօք նոցին զմատանց քոց զործ, ոչ զրեցեր երբէք սիրել զնոսա . այլ առեր ի պատիւ մեծաց զովեստից առաջին դասեալ զմարդասիրութիւնն : Վասն որոյ կրկին

մեծացուցեր քեզ անուն անձառ ի խորհուրդս
սոսկալիս, զերկնայինս լուսակերպիցն կոչեցեր
զնոսին սպասաւորս և զլխաւորս յատուկի մատա-
կարարութեանց . իսկ զստորնային ծնունդս
մանկանացուաց՝ տիրական և աստուածական
պաշտելի անուամբդ պերճացուցեր : Անցեալ
վերստին ըստ սահման կշռութեան չափոյ, լայ-
նեցեր քեզ կտակս գրոց ճառից անքաւից զանա-
պակ ծորմանն ծայրագունին վերնում բարու-
թեանն : Եւս և ի մարդանալդ քո միդյէութենէն,
ոմանց վասն ինքեանց և կիսոց վասն այլոց զե-
ղեր առատութեամբ զտուրս կենաց, արուեստս
բազմօրինակս, սքանչելիս աստուածագործս,
նշանս նշմարտատեսիլս : Որպէս զի թէ անդա-
մալուծին պակասելոյն ի հաւատոցն հոգաբար-
ձացն առաջարկութեամբ զցոյցս յուսոյն՝ գթա-
ցեալողորմեցար, եւ որչափ զօրեսցէ առաւելքան
քո ամենակար առ ախտալից մարմնոյս մաքրու-
թիւն աղաղակողիս հառաչման . քանզի արդա-
րև մեծ են չափք հրաշից, քան զանմաքրեալս
հոգի՝ սուրբ հաստել, զլուացեալս պատկեր՝ ան-
տիրելի աղտոյ ներգործել . նա զի և երկրորդս
առ աւելութեամբ յաւազանին շնորհ յաճախեալ
զփառսն հայրենի բարձրացուցանէ :

բ. Դու ես տէր որ սրբես զմեզ, որպէս ընտրե-
ցելոյն քո նախաստաւորեցեր Մովսէսի . դու ես

որ ի մեղս եւյանօրէնութիւնս վերակացու եղեք .
տոհմին Յակոբայ, մինչ յեզիատացւոցն երկրի
ընդ խաւարն հեթանոսաց ընտանենային : Դու
ես, որ օրէնսգէտ առնես զմեղաւորսն ի ճանա-
պարհի, ըստ բանի երգողին Դաւթայ . դու ես
որ փոխատրես զքարեղէն սրախց կարծրութիւն
ի լոյժ կակղութեան մարմնոյ գոյութեան բանի
ընդունելութեան : Դու ես, որ բաւես ընձեռել
սիրտ այլ, և ճանապարհ մի՛ երկնչելիքէն զքո-
վանդակ կենացն սահման . դու ես, որ տաս զեր-
կիւղ քո ի միտս խստութեան առ քեզուշ ունել
հաւատովք, ըստ մարգարէիցն ձայնի :

Գ. Զօրհնեալ քո շրթանցդ զաշխարհաստեղծ
բերանոյդ զաստուածեղէն անձրևացդ զկեցու-
ցանողդ կաթուած մատոն լսելեացս դրանց բա-
ցարան, որով զօձինխորամանկութիւն բանսար-
կուին թիւնից բարձցես և բժշկեսցես : Ամենա-
կալդ ձեռօք զխօսականացս շարժողական գործի
ըմբունեալ՝ ազդեա զօրութիւն ձայնի, որ տաս
բնաւից ընտրութիւն բանի . զի դաստիարակեալ
զպատշաճականն միյանդգնաբար խօսելովիբը
զնախնին լքայց իյուսոյդ, և անբանութեան
մատնեցայց վանեալ յորսողէն : Լուսաւորեան
վերստին զխաւարեցեալ հոգւոյս աչս կենդանա-
բաշխաջոյդ կարկառմամբ, զի միհամարձակու-
թեանն շիշեալ լապտեր շնչմամբ վիշապին՝ ի

Եերքոյ զբուանին ստորածածկեցայց : Բարձ
զանօրէնութիւնս իմ, տէր, և ընկեա ի խորս
ծովու . որ է փոքր առակ մեծութեան քումդ
անբաւութեան, ըստ մարգարէին, զիմս ընկըղ-
մել չարութիւն : Կանգնեա կործանեալս անձին
նշան վստահութեան, զի մի յուսահատութեանն
կոթող կառուցեալ՝ զծածկեցելոցն բողոքեցէ :
Բաց, հզօր և գթած, զբժշկարանիդ կենաց վար-
դապետարան, զի զառ ի ներքոյսն մշակութեան
կորուսչին սերմանց՝ մանգաղաւ կամացդ հուպ
առ արմատ խուզեալ հնձեսցես : Դէմ եղեալ հե-
տևել առ քեզ բոլորիցդ Աստուած՝ պետքուեան
օրինակութեամբն, ի կենցաղիս ծովումեղանացս
ալեաց ընկըուզայ. մատն ժամանեա զաջդ կեցու-
ցիչ յօգնականութիւն ինձ սասանեցելոյս : Էնդ
քանանուհեոյն ձայնի ի խորոց սրտիս պաղատիմ,
սովեցելոյս ասպականասպաս կաղկանձողական
ամենաթշուառ վտանգաւորիս, ապրուստ կե-
րակրոյ փշրանաց հացի ի բազմազեղդ քո սեղա-
նոյ մասնաւորեսցես : Արա փրկութիւն նիւթոյ
խորանիս որդւոյս դառնութեան, որ եկիր խնդ-
րել և կեցուցանել զիս զկրուսեալս : Զի քո է մե-
ծութիւն, յաղթութիւն և զօրութիւն, և դու ես
քաւութիւն և բժշկութիւն, նորոգութիւն և երա-
նութիւն, և քեզ վայելէ փառք և երկրպագու-
թիւն յաւիտեանս, ամէն :

ԲԱՆ 12.

Վերսին յաւելուած կրկին հևծուրեան .

Ա. Եհ քանզի անթիւ են յաճախեցեալ և գերազանցութեամբ միշտ առաւելեալ փրկանաւորդ արգասիք շնորհաց առ պարտուց իմոց առաւելութիւն, չարչարանացդ հանդէս և յանձնառութիւն : Զափդ ամփոփիչ ամենից հոգւոց գոյից արարիչ ի գործարանի մահուն նշանի խաչին հեղուսեր, զի զձեռնարձակութիւնն իմ ընդդիմութեան կամաց քոց լքցես : Զընթացողականդ լծակցութիւն երկոցունց ոտիցդ կեցուցանողաց՝ յանարգելութեանս պատճառ՝ ի պատժարանի փայտին մածուցեր, զի զփախուցեալս փայրազութիւն թշուառացելոյս գրաւականեսցես զթածաբար :

Ե. Ոչ գօսանալձեռաց կոփողացն հրամայեցեր օրհնեալ զագաթանդ, որ զթզենւոյն տունկ առժամայն չորացուցեր, զի և զառ իս ներելոյդ օրինակ կանխաւ աւետարանեսցես : Ոչ գանողացն ապիրատութեան զխոստովանեալդ Աստուած սպառնացար, որ զարուսեակն մթացուցեր, զի մահացելոյս անձին բարութիւն հանգստեամբ հանդերձ զործեսցես : Ոչ զիայհոյչացն հնարաւոր չարարանութիւն կապտեցեր, որ զլուսնին պատկեր երանգաւ արեան զունե-

ցեր, զի զանհամարձակ լեզուս ի գովեստ քեզ
զօրացուսցես : Ոչ նախատողացն մոլեզնութեան
սաստեցեր, որ զտարերս սասանեցեր, զի զթը-
շուառ ացեալս գլուխ զթութեանդ օծմամբ իւղես-
ցես : Ոչ ի մոլորեցուցիչն կարդալ զքեզ աս-
տուածասպանիցն՝ զօդուած ծնոտիցն բաժանե-
ցեր քակտեալի միմեանց, որ զկարծրութիւն վի-
մացն հերձեր, զի զանունակս բարեաց հոգիս՝
ի քերմանէ ընդունայնութեան ողորմութեամբ
հանդարտեցուսցես : Ոչ զպահապանացն սուրս
ընդերաց իւրեանց մատուցեր, որ զորովայն օձին
սահեցման հողոյ մատնեցեր, զի զտառապեալս
մարմնոյ ոսկերս իբր ի զանձարանի պահեալ,
կենաց յարութեան արժանացուսցես : Ոչ ի կըն-
քելն զշիրմին փականս կենդանակիր քո զերեզ-
մանին անդրէն յորսայսեալս զնոսին յանդունդս
երկրի սուզեցեր, զի ի տապանակի անձինս
զնշխար լուսոյդ հանգուսցես : Ոչ ի համբաւելն
զքեզ կորուսեալ, և իբր զերկրաւոր մարմին
գողացեալ, համայնաշինջ և ամենասպառ ըզ-
սերմն ծննդոցն կրծատեցեր, զի զիս զա-
նարժանս յիշատակի ընտրութեան բարեաց՝
անկորուստ և անվնասելի ընդ փրկեցելոցն հա-
ղորդեսցես : Ոչ յարծաթոյն կրկնակապէն կա-
շառաձգութիւն, որ ի զանձարանէ հօր քում
նուիրանաց քեզ գրաւ մատնութեան և անար-

գութեան մասնաւորեցին՝ զուրացողացն մոլեգ-
ելոց, ըստ հին հարուածոց հանոյն Մովաքու՝
ի յարձան քարի յեղանակեցեր, զի զիս զվրի-
պեալս ի հաստատութեանց և ընդ իշխանու-
թեամբ մահու վաճառեասլ արեամբ քո փրկեալ,
ի հաստատութիւն վիմիդ կառուսցես : Օրհնեալ
կրկին, օրհնեալ վերստին, յամենայնի միշտ
օրհնաբանեալ յաւիտեանս յաւիտենից . ամէն :

ԲԱՆ ԼԵ.

Վերսին յաւելուած կրկին հեծութեան .

Ա. Աբդ այդ գումարտակ վերադասեցեալ բա-
րեշնորհութեան քոյդ պարզեաց առ իմս երախ-
տիս, ով ամենազութ բարերար գովեալ և ամե-
նազօր, թէ և սակաւք շարագրեցան աստանօր
եղեալ, այլ արքայազունք են և իշխանականք
ինքնակալութեանց, որդիք զօրութեանց, ծը-
նունդք վեհից, մեծափառք, լուսանորոգք և հը-
րաշապատիւք . յաղթողական վերամբարձու-
թեամբ դրօշիւքհոչակեալք ըստ զիխոց զիխոց պը-
տակապանոյն զեղազարդելոց, բերեալ ընդ ին-
քեանս անթիւ պետութիւնս օրհնաբանողաց,
համբոյրս հեզս երջանիկս և խաղաղականս աս-
տուածային հարազատութեանց այնոցիկ նահան-
գաց, զորոց մարզարէն մաղթեաց ասելով . Զարթոն
տէր զզօրութիւնս քո, և նկ կեցուցանել զմեզ .

որք յոյժ զօրեն հալածել զմեղս, և զանյուտութեանն կարկուտ հալել և փախուցանել, քան թէ նախամարտիկն զինուորութիւն երկնային պարուն զգիշերավարն իաւարասէր սկզբնաներհակ բարւոյն Աստուծոյ : Քանզի և զբնաւն այսքանեացս ձրից, որ ի բարձրելոյն ինձ անձրևեցաւ տկարիս, թշնամւոյս և ապախտաւոր ծառայիս, անձառ է ասել . իսկ եթէ համարձակեսցի ոք զօրել խօսել, զակաւս ի բազմացն քան թէ զիսկութիւն համանգամայնիցն . առ այսոսիկ զառաջին նիւթն յիշելով յորմէ հաստեցաւն, իբր զտկար ոք նկուն ի զօրութենէ մեծէ հերքեալ պարտեսցի :

Բ. Այլ թէպէտ և այսպէս զրեցի, և դարձեալ զնոյն վկայեմ առ թերի խակութիւն հողոյս՝ և կատարելութիւն հաստողիդ, և առ բարիսն իմ չարժանութիւն, սակայն ամենալոյս աննախանձ և բազմազեղուն գովեալ արարչութեանդ զօրեղութեան՝ վանեալ են կարծրութիւնք արտաքերութեան սրտի բանսարկուին . որ քարին առակաւ՝ յուսահատն վհատութեան, սպառմամբ խոպանացման աղբերացս երկուց, որ ի զգայականս Եղեմայ բղիսել պատրաստեաց տնկողն, զի ոռոգեալ ծաղկեսցի նովաւ որ ի յիս բարեգործութեան կենսատունկն ղրախտ, ահա մի ցամաքութեամբ արտասուացս՝ աղանդահնար

պատրանօք՝ չարաչար խորամանկեսցէ վերստին հանել ի փափկութենէ նախնոյ վիճակին : Խոկ յորժամ կացցէ Աստուած համբարձեալ հրաշիւք արուեստից ի մէջ աստուածոց նաշտարանցն խաղաղութեամբ, բարձեալ ընդ ինքեան զշնորհացն կտակ, առ որ ամենայն վնասակարութիւնքիարդախութեանց և կարճմտութիւնք սրտնեղութեանց իբր ընդ վիմեղէն լերին պնդութեան բաղիւեցեալ ցնդին, ջրոյ օրինակաւսակառու հեղեալ, և կամ հողոյ խորտակմամբ փշրեալ :

Գ. Արդ չև իմ կշտամբանքս ըստ ձայնին Յորայ ի մարդկանէ իցեն, այլ յամենատես աշաց վերին հրամանիդ, մտեալ ընդ խղճիս տագնապ երկիւդիս, սոսկմամբ սասանեալ յամենայն կարծեաց. ապաւինիմ և արդ անձամբ բեկելով ի յոյսդ հաստատութեան կենդանի անեղծ. զի ողորմութեամբ նայեցեալ ի յիս իբր ի պարտաւոր կորրստեան պատժոց, առաջի բարերարութեան երկնայնոյդ յանդիման եղեալ ապաձեռն անթոշակութեամբ, զքոյդ երախստիս անպատում փառաց բերելով ընդ իս' յուշ քեզ արկանեմ, որ ոչ մոռացմամբ զբաղեալ նիրհես, և ոչ թարթափմամբ աշաց ընդմիջեալ' զհեծութիւն կրից անտեսես : Վերացն յինէն, աղաչեմ զքեզ, խաչիւդ լուսոյ զիսեղդ վտանկիս, հոգարկութեամբ տրտմութեանդ' զտարակուսելի տիսրութիւնս, փշանիւթ

պատկաւն՝ զբողբոջ մեղացս, զարկուածով գա-
հին՝ զհարուած մահուս, ապտակին յիշմամբ՝
զկարիս ամօթոյս, թշնամանօք թքոյն՝ զանգոս-
նելի զարշութիւնս, լեղւոյն ճաշակմամբ՝ զհոգ-
ւոյս դառնութիւն։ Մհաքո են այս ամենայն բա-
րութիւնք անբոլանդակելիք՝ Աստուծոյ միոյ մի-
ածին որդի. առ որովք զչարութիւնս իմ յիշատա-
կեալ՝ զամենօրինեալ անուն քո կարդամ բարձր
աղաղակաւ խմանալեացս պաղատանօք։ Տես ի
խոստովանութիւն զզման պարտութեան ամա-
չեցելոյս, և տուր ողորմութիւն որդւոյս սատակ-
ման մահուն անմահի, զի ի բազմութեան իմոցս
մեղաց՝ վերստին կրկնեալ նովին աճեցմամբ
առաւելութեամբ՝ քո ողորմութիւնդ աւետարա-
նեսցի, հոչակեալ հնչմամբ ահաւորութեան
յերկին և յերկրի։ Եւ քեզընդ Հօր Հոգւովդ սըր-
բով փառք յաւիտեանս. ամէն։

ԲԱՆ Ա.Ը.

Վերսիմ յաւելուած կրկին հնծուրեամ.

Ա. Բազ արդ որպէս երբեմն յայլընթերցուածի
որ ի սկզբնաւորականացն կարգի՝ զմեղանացն
զխաւարային ծնունդս զխաւորացն օրինացն
մարմնականացն անդամոց գրեցի, յորոց տիրե-
ցայ ժառանգս մահու, նոյնպէս և յայսմ սահման
ընտրութեան բանի զլուսածնելոցն զազատա-

բարն օրէնս հոգւոյն կենաց որ ի տէր Յիսուս' յիշատակեցից նուազս յոքունց, իբր յանքաւ բազմութեանց ծովու կաթիլ մի առեալ :

Բ. Քանզի են արդարեւ կայսերականք ոմանք ի բարձրութեանն զահի բազմեալք, թոշակաւն շնորհաց լցեալք և հարստացեալք : Թագաւորն և սիրեցեալք իւր, արքայն և պատուաւորք իւր, պսակեալն և խշանականք իւր, բարեհոչակեալն և հնչմունք իւր, յաղթողականն և փողք իւր, զօրաւորն և մարտիկք իւր, զովեցեալն և փառք իւր, փեսայն և պարաւորք իւր, դշխոյն և օրիորդք իւր, փեսաւէրն և հանդերձանք իւր, ազատութիւնն և շնորհք իւր, այցելութիւնն և ձեռն իւր, խոստումն և քաւութիւն իւր, պահպանութիւնն և աջ իւր, պարզեւն և զարդ իւր, նշանն կենաց և ամրութիւն իւր, կնիքն և նկարագիր իւր, ամպն և հովանի իւր, արուեստն և հրաշք իւր, հոգին և անեղծութիւն իւր, բանն և կատարած իւր, ուխտադրութիւնն և լրումն իւր, զօրութիւնն և հրամանք իւր, լուացարանն և սքանչելիք իւր, մանանայն և անապականութիւն իւր, վէմն կենդանի և վտակք իւր, սիւնն հրոյ և ճառագայթ իւր, որոտումն և ազդմունք իւր, յոյսն վերին և փրկութիւն իւր, ծառն օրինութեան և պտուղք իւր, բարունակն և բարութիւնք իւր : Եւ զի մի զբնաւն ասելով յամենայ-

ԸՒՅ վրիպեցայց, իբր յարեզակնէ այլայլեալ
աչաց տկարութիւն, ի շատն ասել լրեցից և ի
սակաւն ժամանեցից, բաւականացեալ ամենա-
պիկար կարիւ :

Դ. Բայց աւաղ յաւէտ աստանօր թշուառացե-
լում եղկելի անձինս, քանզի կարգ բանիս բերէ
ինձ խառնելընդ ձայն աւետեացս բողոք գումիս.
վասն զի ընդ այսոսիկ առընթեր սորին զայ
արդարութիւնն և կշիռքն, վճիռն և հատուց-
մունքն, քննութիւնն և լոյսն, յանդիմանու-
թիւնն և ղամբարքն, մերկութիւնն և պատկա-
ռանքն, յայտնութիւնն և ամօթն, ամբիծն և
վաստակքն, թիւրեալն և պատիժքն :

Դ. Դարձեալ վերստին աշխար կրկին եղկելոյս,
քանզի զայ հասանէ առ. հասկ հասակիս անհնա-
րին բարկութեամբ մանգաղն առ հունձսն, դա-
տաւորն առ ատեանն, հզօրն առ բեմն, սպառ-
նացեալն առ կորուստն, բազուկն առ դատա-
տանն, զաւազան խրատուն առ հարուածն,
սպառազինութիւնն առ նախանձն, հովիւն առ
ընտրութիւնն : Քանզի բանն զոր խօսեցար ընդ
իս, նա դատի զդատապարտեալս ի վերջնումն
աւուր հատուցմանն : Այլ կանխեա, բարեգութ,
նախընծայ քաղցրութեամբ առ նուաղ նեծու-
թիւն վարանական երկիւղիս. և զօրութիւն
ընձեռեա ձեռամբդ օրինութեան ի յետին տագ-

Յապիս առաջինդ քո օգնութեամբ մխիթարել,
քժկել, քաւել և կենազործել։ Եւ քեզ փառք
յամենայնի յաւիտեանս յաւիտենից, ամէն։

ԲԱՆ 1Թ.

Պետրոսին յաւեղուած կրկին նեծութեան.

Ա. Եւ քանզի զկերպարանն առաջին լքի ի
վնասակարին թելաղրութենէ իմովս ծուլու-
թեամբ կորուսեալ ի սպառ, ցուցից արդայժմուս
զինոյն յիս տեսակ. ողորմելի հեծութեամբ թախ-
ծեալ ի հոգի, անաշառ խայտառականօք հրա-
պարակաւ ի յեկեղեցիս բազմութեան ազգաց
վերապատմեցից բարձր ձայնիւ, բարբառով մե-
ծաւ աղաղակելով։

Բ. Մատեանս շնչական բարդեալ ի յինքեան
ներքոյ և արտաքոյ ողըս և վայս և ձայնս, ըստ
տումարի տեսլեանն եզեկիէլի, քաղաքս անպա-
տուար և անմահարձան, յարկս ունայն ի
դռնափակաց ամրութեանց, աղս տեսակաւ՝ այլ
ոչհամեղութեամբ, զուրս աղտաղտին անախոր-
ժելի ծարաւեաց արբման, զետինս անօգուստ
հերկազործութեան, սահմանս լքեալ հեղեղա-
վայրս կնիւնոյ, խոպանացեալ և տատառկաբեր
անդաստանս, աստուածախնամերկիրս անձնա-
ւոր՝ որ բանսարկուին պատրանաց մշակեցայ,
իւղընծիւղ փայտս պտղակորոյս, հատանելի

ծառս ունայնաբոյս, կրկնամեռ խօսուն տունկս
անցոյս, ամենաշէջ ճրագարանս անլոյս : Արդ
վերստին առ սոյն քերելով զայս նմանութիւն
աւաղականաց, բազմօք կրկնեցից . որ ամօ-
թոյն դառն պատուհաս պահեալ կայ հիգոյս,
կրնումն ատամանց և անկէտ լալումն աչաց
եղիկելոյս, հայրական ցատումն անսպութելի՝
դառնութեան որդւոյս, ապականութիւն աննո-
րոգելի՝ մեղուցեալ մարմնոյս, նոր կշտամբու-
թիւն գտողիս չարեաց՝ ախտացեալ հոգւոյս,
տարտամ տագնապի տարակուսանաց ելից գե-
րելոյս, զոր երկնային զօրքն մատուցանեն
թշուառացելոյս, ի խրձունս որոմանցն վկայե-
լով՝ վտանգեցելոյս, ի ձայն ահարկու զանբժըշ-
կութիւնն ազդել լրելոյս :

Գ. Ահա արդարեւ երգս կատակերգութեան
ջնարահար պոռնիի, յածեալ և կոծեալքաջ հըն-
չեցուցեալ ողբս ողորմելիս և զկծեցուցիչս, ըստ
առակաւոր բանին նօայեայ՝ որ ի պատգամին
Տիւրոսի : Զի թէ նա զդիպուածն փոքր անցից
ապառնեացն ի մօտոյ իմն տպաւորեալ, բողո-
քէր դիմակս դիմակս կերպից կերպից աւաղա-
կանաց՝ ըստ կոծողացն կաքաւելոյ, իսկառ իս որ-
չափս և որպիսիս ձայնս մրմնջեցից վհատեցու-
ցիչս, որ գալստեանն տեառն սպասեալ առ անց
գրիպանաց, մնացի անպատրաստ և անհանդեր-

ձելի : Արդ եթէ զդատաստանացն ահաւորութիւն կրկնեցից, բազմացուցից ինձ աշխար. ապա եթէ զփորձն իսկութեամբ ցուցից, յաճախէ ինձ երկիւղ. իսկ եթէ զկերպարանացն տեսիլ զըեցից, առաւելուն ինձ հատուցմունք, զի կանխաւ նկատեալ զսոյնս և ոչ անազան ապաշաւեցի : Այլ ինայեան յիս, զթան, մարդասէր, հզօր, բարերար, ամենապարզեւ Քրիստոս թագաւոր, օրինեալ յաւիտեանս, ամէն :

ԲԱՆ Խ.

Վերսիմ յաւելուած կրկիմ հեծուրեան .

Ա. ԱՄԵՆԱԿՅՈՒ. Աստուած բարերար ստեղծիչ բոլորից՝ լրւր հառաջանաց ձայնիս վտագի, և յերկիւղէ տազնապի ապագայիցն կարծեաց փրկեան կարող զօրութեամբ զերծեալ ի պարտեաց. քանզի բաւական ես յամենայնի առամենայն հնարս զօրանալ անքաւ մեծութեամբ և իմաստութեամբ անսահմանելեաւ :

Բ. Եւ քանզի ուշիւ մտացս տեսեալ ի հեռուստ զհանդերցելոցն հանդէս ահաւորափայլ նկատեմ ինձէն աստանօր կանխաւ զտիւն լուսոյ, սրբոցն յուսոյ, զօրն խաւարի պատժապարտիս պատուհասի. ուստի ոչ զօրէ ոք յէիցս առ պատսպարան փախստեան . ոչ անդունդք խորոց, ոչ վիհք վիից, ոչ բարձրութիւնք լե-

րանց, ոչ անձաւք քարանց, ոչ կարծրութիւնք արձանաց, ոչ ծերպք ծակաց, ոչ փապարք փոսից, ոչ սորք հեղեղաց, ոչ բաւիղք խորշից, ոչ շտեմարանք յարկաց, ոչ ծածկութիւնք սենեկաց, ոչ եմակք հովտաց, ոչ ծործորք դժուարաց, ոչ վերադրութիւնք բլրոց, ոչ արձակմունք զնչոց, ոչ անբաւութիւնք ծովուց, ոչ սահանք յորձանաց, ոչ հեռաւութիւնք եզերաց, ոչ ողբմունք ձայնից, ոչ, հեղեղք արտասուաց, ոչ տատանմունք մատանց, ոչ համբարձմունք ձեռաց, ոչ պաղատանք շրթանց :

Գ. Սյաոցիկ սաստկութեանց մասանց անձնողոպրելեաց դու ես, տէր Քրիստոս, հնարք և դադարք դիւրութեան և անդորրութեան փըրկութեան ամենամեղս հոգւոյ. արդ հայեա ի յանզերծ վատնկիցս շրջադրութիւն՝ միայնդ քաղցր առ ամենեսեան : Խզեա սուսերաւ յաղթական կենազէն խաչիդ զցանցս վարմիս, որ յամենայն կայից պաշարեն ի մահ զգերիս, և հան ի յանդորր զոտս սասանեալ թիւք ընթացողիս : Բժշկեա զնրատապ ջերմնական տոնչորումն մղձկեալ սրտիս, մերժեա զդիւային չարահնարութեանս շշուկ քո պարտաւորիս, հալածեա զյուսահատ անձկութեան հոգւոյս մթութիւն չարի կենակցիս, ցրուեա զծիսա-

մած թանձրութիւն բռնութեան մեղացս երեւոյթ մտելոյս ի յիս , կորո՞ զզազիր թխատիպ կրիցս ապականութեանս կարիս : Նորոգեա ըզ պատկեր լուսոյ պաշտեցեալ փառաց մեծութեան անուան հզօրիդ յոզիս , զօրացն զշնորհիդ փայլումն ի գեղ դիմացս և ի կերպարան տեսութեան մտացս հողեղինիս , յարմար յերիւր մամբ կացն յարդարեալ՝ որ զքոյդ բերէ նկատումն՝ նշուլազարդ մաքրութեամբ զտեալ զմուայլս մեղաւորիս , աստուածային կենդանի անեղծ երկնաւոր լուսով քո ծածկեալ յօրինակս երիս : Զի դու միայն ես օրհնեալ ընդ հօր ի գովեստ Հոգւոյդ սրբոյ յաւիտեանս յաւիտեցից . ամէն :

ԲԱՆ ԽԱ.

Վերսին յաւերուած կրկին հեծուրեամ .

Ա. Որդի Սատուծոյ կենդանւոյ օրհնեալ յամենայնի , Հօրդ ահաւորի անքննին ծնունդ , որ տկարանայ առ ի քէն և ոչ ինչ : Որ ի ծագել անստուեր նշուկից ողորմութեան քոյ փառաց , հալին մեղք , հալածին դեւք , ջնջին յանցանք , խզին կապանք , խորտակին շղթայք , կենդաննին մահացեալք , բժշկին հարուածք , ողջանան վէրք , բառնին ապականութիւնք , տեղի տան տիսրութիւնք , նահանջին հեծութիւնք ,

փախնու խաւարն, մեկնի մէզն, մերժի մառախուղն, փարատի մռայլն, սպառի աղջամուղջն, վերանայ մռւթն, զնայ գիշերն, տարազրի տազնապն, չքանան չարիքն, հալածին յուսահատութիւնքն, և թագաւորէ ձեռն քո ամենակար, քաւիչդ ամենայնի :

Բ. Որ ոչ եկիր կորուսանել զմարդկան ոզիս, այլ կեցուցանել . թող ինձ զանթիւ չարիսն իմ բազում ողորմութեամբդ, զի դու միայն ես յերկնի անճառ, և յերկրի անզնին, ի տարր գոյի . և յեզրս ծագաց աշխարհի, սկիզբն ամենայնի և յամենայնի ամենայն լրմամբ, օրհնեալ ի բարձունս, և քեզ ընդ Հօր և Հոգւոյդ սրբոյ փառք յաւիտեանս . ամէն :

ԲԱՆ ԽԲ.

Վերսիմ յաւելուսած կրկին հեծութեամ.

Ա. Տէր Աստուած զթութեան, փրկութեան և ողորմութեան, քաւութեան և նորոգութեան, բժշկութեան և առողջութեան, լուսաւորութեան և կենդանութեան, յարութեան և անմահութեան, յիշեա զիս յորժամ զայցես արքայութեամբ քո' ահաւոր, հզօր, բարերար և ամենաստեղծ, կենդանի, գովեալ, ամենակատար, մերձ ի հեծութիւն համայն եղելոց : Ընդ խաչեցելոյն ընդ քեզ պաղատիմ, որ ոչ ըմբռնեալ

վասն քո և ոչ կապեցեալ, ոչ կախեալ և ոչ
բեւեռեալ, ոչ կոփեալ յանուն մեծիդ և ոչ
անարգեալ, ոչ լվեալ և ոչ նշկահեալ, ոչ խոր-
տակեալ և ոչ մահացեալ, և արդայութեանն
արդարոց մասին անձկալեաց լուսոյ արժանի
ցուցեալ, իրաւամբք ուխտի երդմնականաւ ա-
մենիւն ազդեալ զանփոփոխութիւն բարեացն
ուռելոց, փառաւորեցեր առ յոյս փրկութեան
ի սպառ լրելոյս :

բ. Օրհնեալ օրհնեալ և դարձեալ օրհնեալ, և
զիս ընկալեալ նովին հաւատովք, կանգնեան
ի կործանմանէս, բարերար. բժշկեան ի հիւան-
դութեանցս ախտից, ողորմած. յեզերաց մահուս
դարձն զիս ի կեանս, կենդանութիւն. քո եմ և
ես, կեցն ընդ նմին, ապաւինութիւն. անձամբ
մեռելոյս կենդանական ջունչ ընծայեցն, յարու-
թիւն, կեանք, անմահութիւն, անպակաս բա-
րութիւն, անսպառ շնորհ, անփոփոխ ներողու-
թիւն, աջ ամենազօր, ձեռն ամենիշխան, մատն
ամենամերձ : Կամեաց տէր և փրկեցայց, ակ-
նարկեան միայն զթութեամբ և արդարացայց,
ասան բանիւ և վաղվաղակի անարատ գտայց,
մոռացիր զթիւս չարեացն և անդստին համար-
ձակեցայց, առատաձեռնեան՝ և արդէն ի քեզ
իսկ պատուաստեցայց. փառաւորեալդ յամե-
նայնի յաւիտեանս. ամէն :

ԲԱՆ ԽԳ.

Վերսին յաւեղուած կրկին հեծուրեան.

Ա. ՅԺԿԱԿԱՆ կրթականութեան ամենափորձ հեարաւութեամբ պատճառ կենաց անախտականաց, թագաւոր զօրաւոր երկնաւոր՝ տէր Յիսուս Քրիստոս, Սուտուած ամենեցուն, իմանալեաց և տեսականաց. ահա դու ի յիս ըստ մարգարէին՝ որ ընդ ասելոյն՝ նոր կցորդութեան. առ որ բարեգարդ դաշամբ այս բանի ընդ քեզ միութեան, լուսաւորեցայց կրկին ողջացեալ շնչով և մարմնով ամենայնիւ կարող և անվանելի :

Բ. Որ ոչ կարօտանաս սպեղանեաց առ պատրաստութիւն պատանաց հոգեկան վիրաց, ոչ ժամանակի, ոչ միջնորդի, ոչ աւուրց երկարաձգութեան, ոչ փոփոխս մատուցանելոյ, ոչ հատման, ոչ խարման, ոչ սրագործութեան, ըստ երկրաւորս դեղատուութեան. առ որս միշտ է վրիպութիւն և ամենասխալ տարակուսութիւն։ Այլ քեզ արարչիդ հոգւոց և մարմնոց ամենայն ինչ լուսաւորեալ է, ամենայն ինչ առաջի է, ամենայն ինչ զրեալ է, ամենայն ինչ դիւրին է, համայնք հնարաւոր է, իմաստն զլսաւորեալ է, խոստումն լցեալ է, կամելն կատարեալ է, քո կտակն աւետարան է, քո վճիռն

ազատութիւն է, քո մատեանն շնորհ է : Ոչ փակեալ ես ընդ օրինօք, ոչ պարունակեալ ես ընդ կանոնաւ, ոչ արգելեալ ընդ նուազութեամբ, ոչ խոնարհեալ ընդ հնազանդութեամբ, ոչ պարագրեալ ընդ փոքրկութեամբ . ոչ չափեալ ես ընդ սահմանաւ, ոչ վրիպեալ ի բարկութենէ, ոչ այլայլեալ ինչ ի ցամանէ, ոչ սխալեալ ի խստութենէ, ոչ ամփոխեալ ի խոռվութենէ, ոչ դղրդեալ յանգիտութենէ, ոչ փոփիխեալյոդորմութենէ, ոչ պակասեալ ի բարձրութենէ, ոչ լքեալ յայցելութենէ, ոչ տկարացեալ ի փրկութենէ : Դու սկիզբն և լրումն ամենայնի, և ի քէն է ամենայն . և քեզ փառք և երկըրպազութիւն յաւիտեանս . ամէն :

ԲԱՆ ԽԴ.

Վերսին յաւերուած կրկին հեծութիւն .

Ա. Ա.ՍՏՈՒԱԾ անսահման, ծնունդ Աստուծոյ հարազատ անթարգմանելի, արարիչ բնաւին եղելոց, Քրիստոս թագաւոր, լոյս ի խաւարի սրտից մթացելոց, ընդ մեզ լրմամբ և ընդ առաքչիդ իսկութեամբ, մերայնովս զքոյինսդ ծանուցանող հրաշապէս : Հայր քո օրհնեալ երկնաւոր անձառ՝ որ առաքեացդ զքեզ ի վերուստ, ում փառակիցդ ես արարչութեամբ, այնքան հոգացաւ փրկութեան իմոյ տարագրեալ գերւոյ,

մինչև զքեզ իսկ մատնեաց մարդկան։ Իսկ դու
կարող գոլով ի վեր քան զվիշտս, զտնտեսու-
թեանն աւարտեալ խորհուրդ՝ հաճեցար ընդ
պարտեցելումս զմահուն ճաշակել բաժակ ան-
թերի մարդկութեամբ և անպակաս աստուածու-
թեամբ։ Եւ Հոգիդ սուրբ կենդանարար՝ որպէս
քո՛ և Հօր քոյ իսկակից, և համապատիւ էու-
թեամբ ծնողիդ և ծնիցելոյդ։ Մի Երրորդութիւն
կատարեալ ի դիմաց երից անորոշելի հատուա-
ծոց, անսկիզբ և անժամանակ, բնափին բա-
րերար, համայն կենդանարար, բոլորից խաղա-
ղարար, ստեղծիչ գոյից և յօրինիչ ամենից,
անքակութեամբ և միով բնութեամբ փառա-
ւորեալ։

Բ. Իսկ եթէ Հայրն զթած երկնաւոր հզօր՝ մին
յէութենէ՛ վասն մահապարտիս յանցանաց մա-
տոյց զմիայնակ ծնունդդ յանքննին ծոցոյն, ոչ
անխայեալ յմրդիդ ի համապատիւդ և ի սի-
րելիդ, այլ կամաւ նուիրեաց մահու չարչա-
րողացն զինու, ըստ մարզարէութեանն Զաքա-
րիայ, վասն զի զարթնուլ սրոյն ի վերայ հո-
վուին, և հարկանիլ նոյն ինքն հօտապետին, և
ցրուիլ ոչխարացն հօտին, որպէս օրինակն
նուրբ նախազրին և ուխտադրութիւն խորանին
և նուիրումն արեան սպանդին և առակ խոր-
հըրդոյ աբրահամեան պատարագին, զփրկու-

թիւն թշուառացելոյս ի կամաց կեցուցչիդ յառաջագոյն նկարագրէք. և արդ հիմ տրտմիս անձն իմ կործանեալ՝ ոչ յԱստուածուստ հնարաւորութեանց, այլ ի քումդ ինքնազործ հակամիտութեանց. կամ ընդէք զիս խոռվես՝ յուսահատութեամբ սատանայականաւ զմիտս հարեալ, յուսա յԱստուած, խոստովան լեր նմա, և նա հոգայ վասն քո, ըստ դաւթեան սաղմոսին, և այլ մարգարէի կենսախրախոյսն բանի :

Գ. Խոկ յեղանակ խնամարկելոյ հաստողին ի վեր է քան զսահման կշռութեան մտաց հրեշտակաց և երկրականաց. և եթէ բիւրս կրկնեսցի, ոչ լինի չափեալ. քանզի անբովանդակելոյն և բարերարելն է անձառելի: Նա զի ոմն օրինեալ զոմն օրինաբանեալ յերրորդական համագոյութենէն առաքեաց. խոկ նա ի հաճութիւն կամաց առաքչին մեռաւ. և միւսն ահաւոր՝ ի յերկուցն հաւանութիւն՝ մեծաջան բաղձանօք մաղթէ: Խոկ համարաւոյ միակամութեանն ցուցակ՝ առ ի զնոյն բարի ներգործել, որպէս հոգին կենդանւոյն և բանն բանականին, պայծառութիւն փառացն և կերպարան էութեանն: Առ կեանսն փոյթ, առ ողորմութիւնն սթափ, առ ձեռնկալութիւնն պատրաստ, առ փրկութիւնն կազմ, առ առատութիւնն յորդ, առ յաճախութիւնն զեղուն, առ անբաւութիւնն լի, առ աննը-

ւազութիւնն փարթամ, առ երկայնմտութիւնն
ճոխ, առ անհասութիւնն բարձրեալ. մի Երրոր-
դութիւն կատարեալ ի յանձանց երից, օրինեալ
յաւիտեանս. ամէն:

ԲԱՆ ԽԵ.

Վերսին յաւեղուած կրկին հեծուրեան.

Ա. Եւ արդ յոյս բարեաց տնկեալ ի սրտի՝ անձն
իմ կործանեալ, և գոտեաւն հաւատոց պնդեալ
զերիկամանցդ երկակի մասունս՝ զկրկնապըդ-
տոր խորհրդոցդ ացանկականիդ գործարան,
խոստովան լեր բարերարին Աստուծոյ՝ զմտա-
ցըդ իբրև զգործոց, զխորհրդոցդ իբրև զլրու-
թեանց, զանտեսիցն իբրև զյայտնեցելոց, զսր-
տիդ ծածկութեանցդ իբրև զբարբառումն ձայնից,
զակնարկութեանցդ իբրև զարդիւնականաց մե-
ղանաց, զազդել շրթանցդ իբրև ի զլուխ ելելոց
չարեաց, զոտիցդ հետոց իբրև զպատուիրանաւն
Աստուծոյ վազողաց, զձեռացդ ձգումն առ ցա-
սումն իբրև ի հեղումն արեան զործողի, զծի-
ծաղելն բնաւին իբրև զկամաւորական լքումն
շնորհի, զերդմնականն՝ որ թէ ի հանդէպս թէ
ի տարադէպս՝ իբր զգործակցութիւն խաբողին,
զամբարտաւանութիւնն իբր զնին կործանիչ
նախաստեղծին բարձրութեան, զսրտին նեղու-
թիւն իբրև զթերութիւն հաւատոց, զմեղկու-

թիւնն իբրև զպարտութիւն զօրաւորին պնդութեան, զտրտունցն առ վտանգս կրիցն՝ իբր զուրացութիւն ուխտին որ առ տէրն, զապարասանութիւնն իբր զթոռն իմն անզթութեանն, զամբարհաւաճութիւնն իբր ոչէիւք առ վեհսն զոռոզութիւն, զնպարտութիւնն իբր զկամակորհարազատ զտողին չարեաց. զակամայիցն ընդ կամաւորացն, զբոնացելոցն ընդ հաւանականացն, զեկամտիցն ընդ բնաւորականացն, զանօրէնութիւնն ընդ ապաստուածութեանն, զփոքունսն ընդ սաստկագունիցն, զնուազունսն ընդ յոլովիցն, զանձառիցն իմոց իբր զճառելեաց զիտողին, զանզրելոց վնասուցն իբր զնըկարելոց տեսողին իյարձան մազնեստիս վիմի, զթեթևագունիցն առ խտիր մտաց իբր զստուարծանրութիւն բեռանց. զխնդիր չափոյ ծածկելոցն իբր զճշդով պահանջումն սատերն սակի իբերանոյ կիտին կորիւնի չորեքդրամեան կըշռութեամբն, զանդնդականացն զործոց իբր իյականցս Աստուծոյ արագ ժամանելոց : Զայսոսիկ յաճախեա կուտեա կրկին յանձնառութեամբ, վերստին պատմեալ աստանօր մեծաւ հեծութեամբ զչեոցն իբր զեղելոց, ընծայեալ Աստուծոյ զպարտութիւն վանեցեալ անձինդ. զի ընկալցիս ի փոխատուէն զշնորհօք թողութիւն պարտուց մեղաւորին, զոր տէրն արդա-

բացոյց և հրաշափառապէս հոչակեաց, ամենապատիկ ներբողիւ կրկնեալ զգովեստ զղմանն քան զպարսաւանս մեղացն :

Բ. Բարդեա և դիզեա անձինդ մեղապարտի բամբասանս յոքունս զքոյսն խոհերս բազմամասնեայս, անձն իմ կշտամբեալ յոքնախթանդ բանիւ. զչարութիւնն, զանօրէնութիւնն, զվրիպութիւնն, զառ իմարտին հանդիսէ փախուստ, զպարտութիւնն, զմոլեզնութիւնն, զամբարըշտութիւնն, զապշութիւնն, զթմբըութիւնն, զքունն արթնական, զառ ի յընթացսն զնիրհումնն, զխորհուրդն օտարոտի, զբանիցն նանրութիւնն, զզազրութեանն հաճութիւնն, զյամենալն ի նմին, զփափազելն Աստուծոյ ատելեացն, զաներկիւդութիւնն, զանսաստութիւնն, զանհարթութիւնն, զթերութիւնն, զթիւրութիւնն, զլուծութիւնն, զճշդութիւնն, զանկապ արձակումնն, զծիծաղականսն, զվրնջողականսն, զկատակերգականսն, զզայթազդականսն, զպատրողականսն, զանդէպ քաջութիւնսն, զանյարմար մարտսն, զառանց օրինի արիութիւնսըն, զխեղդմունս հոգւոյն, զտատանողականսն զերկչոտութիւնս, զբազմաստեղնեան ճիւղսն զբանետականս, զանպատկառ փարաքմունսն, զգժտութիւնսն, զգժմնութիւնսն, զանդատատելութիւնսն, զմարմաջմունսն դիւրըմբըու-

Յողականս, զփոքունցն զանկշութիւնս, ըգ-
խոստմանցն դրժողութիւնս, զովստիցն մոռա-
ցութիւնս, զնմանեացն այլակերպութիւն, զկեղ-
ծեացն քողարկութիւն, զփառամոլութեանն
մորոսութիւն, զյօնիցն յաւակնութիւն, զապի-
րատութիւնսն, զինքնասիրութիւնսն, զնախա-
գահիցն տենչութիւն, զհատուցանելն եղեռնա-
կանացն, զնոցինսն զանշահ աղճատանսն,
զվայրապար բերմունսն, զընթացակցութիւնսն
խորամանկութեան բանսարկուին, զբանին
սերմնակաթութիւն, զվաճառումն կենացն ընդ
զնոց սատակմանն, զկորուստ աւանդիցն, զհայ-
րենեացն ծախս, զկապարանն ձգողական, զփո-
կով լծոյ երնջոց անխզելի ըմբռնմամբ զանօրե-
նութիւնս, զյարաթաթաւ տղմաբնակութիւնս,
զլքումն լաւացն, զընդաթրութիւնս անկար-
ծիցն, զկնի դարձին առ նոյնդարձ տաժանական,
զնորոգ մոտացն, զօտար խորհրդոցն, զանկայուն
կամացն, զհաշման հազագին, զէութիւն շնչոյն,
զեւսն քան զսահման կանոնացն դրութեան' զիշ-
խանականին զամենասփին բաձարձակութիւն,
և զոր չէ ճառելի և կամ զրելի և կամ պատմելի
և կամ յերեսս դիմաց բերելի :

Գ. Եւ արդ զիարդ բժշկեսցիս, անձն իմ եղկելի,
ի յայսքանեաց տիգաց խոցոտեալ, բարձեալ թո-
ղեալ այր մի տարագիր անողանալի, ըստ

մարգարէին. քանզի մի ի վերագրելոցդ բաւականապէս զօրէ սատակման, թող թէ այսքան դասք սպանողաց դժնէից դահճաց շուրջ պաշարողաց : Մանաւանդ զի ոչ այսու եւեթ նմանագրութեամբ կշռի տարացոյց տարժանեցելոյս, այլ զոր օրինակ անթիւ բազմութիւն կայտառաց կարճաց խայթողականաց՝ ի ստորին մասունս ծայրից տտնոցն զօրհասական թոյնս բերելոց, և յաման մաշկեղէն արկեալ ամփոփէ զելիցն շաւիդ կապարանին շրջափակութեամբ, ցուցանի արտաքուստ բարիոք, իսկ ի ներքուստ համբարք չարի և պահեստ կորսուեան և կոյտ կոկծման և զործոնեալը սատակման և մշակք մահու : Արդ այսոքիկ են ամբարեալքն քո անօրէնութեան տաժանեաց թշուառաքիրտն թոշակք, անձն իմ պարտական կրկին սատակման. որ կամաւորաբար ընկալար ի քեզ, զոր թշնամին սերմանեաց ի վերայ ցորենոյն՝ յազարակի աշխարհիս. ով այր անմաքուր ամբարիշտ և ծոյլ, բնաւին ատեցեալ, սիրողդ մտացդ ախորժմամբ զլցեալսն ամենայն անառակութեամբ, և զոր առաքեալ ցուցանէ զթիւս բանիցն սարսափելեացն կշտամբողաց, աստուստ սկսեալ մինչև ի կատար կանոնի այնը պայմանը, և որ հասեալ են, ասէ, յԱստուծոյ իրաւանցն վերայ, եթէ որք զայսպիսիսն զործեն և կամ կամակից

Են, արժանի են մահու : Արդ ես ինձեն զիս ինքըն պարտ վարկայ կրկին հատուցման կորրստեան սատակման ի մահ դատապարտութեան . այլ անխայեան յիս ողորմութեամբ բարեգութ, կենդանի, հզօր, կամարար, կարող, հնարաւոր, օրհնեալ յաւիտեանս . ամէն :

ԲԱՆ ԽԶ.

Վերսին յաւելուած կրկին հեծուրեան .

Ա. Աբդ վրիպեալս ես յաւէտ ամենապատիճ, միշտ դժնեայ վայրենաբարոյ անձամբ անձին մահու կշտամբիչ, արածողս զերամակս զազիրս վայրազատունս խոզից արօտականաց գարշութեան մեղաց նախատ վարձկանութեանց, հովիւս տածողական զհօրանս ուլուցն ամայաբնակաց ի վրանս հովուացն, ըստ երգոյն երգոց առ իս առակին. որ ոչ իսկ ծանեայ զիս երբէք զիտել, թէ յով և յոյր պատկեր և վասն ոյր գոյացայ :

Բ. Սհա ի յոտս տանողականս կրողաց երկուց միակցորդ խորհրդականաց, ըստ ձեւոյ հրեշտակի կառուցար, իբր ի թոփիս թեւոց կրկնաբարձ բազկաց վերատանողաց յաշխարհն հայրենական հայել, ով յիմար, զիարդ քեզէն կորացար յերկիր, զատեացս միշտ հոգացեալ դիպուածս, ընդ ցիուս անապատականս համարեցար : Իբր զճրագ բազմաբերանեան իյաշտա-

նակի մարմնիդ հաստեցաւ զլխոյդ բոլորութիւն, զի և այսու իյօրինակէն շնորհէ մի օտարասցիս զԱստուած տեսանել, և զմնացականացն իմաստասիրել : Բանականութեանն յարգանօք կրկին ճոխացար, զի զյաղթանակ բարեմասնութեանն որ առ քեզ եղեն՝ անարգել լեզուով խօսեսցիս : Ձեռինդ հաստմամբ յարմարոստեան մատանցդ շառաւիդօք՝ զգործնականացն տնօրինել զտընտեսութիւն, իբր կցորդ համացեղութեամբ ամենաբաշխ աջոյն Աստուծոյ՝ աստուած կոչեցար : Երից հարիւրոց և տասանց վեցից յօդիւք շաղկապեցար, յարեալ ի քեզ ընդ նոսին ի նոյն և պատշաճական մասունս չափոց ազդողականաց հինգ զգայութեանց, զի մի և երեւելիդ նիւթականութիւն քումդ տեսութեան՝ մտացդ դիտման անդատ եղիցի . զի ոմանք ստուարք են և զօրաւորք, և այլք փոքրունք են և պիտանիք, կէսք կարծրակերտք և ազդողականք, են և գողտրականք և պատուականազոյնք, դարձեալ կարեւորք և պատկառելիք : Խսկ թարգմանութիւնք սոցին տեսութեան ի քեզ են Ըկարեալ իբր յարձանի անջնջականի անձն իմ եղկելի . որպէս զի և տարր ժամանակաց և շարունակ հետեւման աւուրցն առ պսակ ամին, իբր կանոնաւ իւիք սահմանեալ մասամբքդ՝ անսխալ և անայլալելի պահեսցի :

Դ. Դարձեալ այլ օրինակ հոգեւորական, որ
զսիրոյն յօդուած շաղկապէ ի մի առ եկեղեցի,
քև խորհրդածի. իբր զի առանց ընաւից զու-
գամասնութեան կապակցել լծով հաւանակա-
նաւ զվեհն ընդ փոքուն, վնասեալ է հաստուա-
ծոյն անարատութիւն յանուն Քրիստոսի ժողո-
վելոցն որպէս ի հատումն և ի նուազութիւն
միոյ յանդամոցս անարգացս պատուաստելոցս
ի մարմնի, կրծատեալ իմն է յօրինուած կազ-
մութեան մարմնոյդ քում սենեկի զգայականի,
և շրջեալ է ընտանութիւն պատկերին յա-
նարգ փոփոխութիւն : Եւ արդ այսպիսեօք, և
ևս բազմօք անզուգական հրաշակերտութեամբ
եղական պատկեր Աստուծոյ՝ կշտամբեալ ի ըս-
պառ ոգի իմ գերի. և թէպէտ յառաջին նմա-
նութենէն կողոպտեալ զտար պատուիրանին
յանցաւորութեամբ ի դրախտին կենաց, այլ աւա-
զանին լրւազարդ շնորհիւն զիոգւյն փչումն
առեալ, և նմանութիւն ես կերպարանին . և
արդ ընդէր կորուսեր զփառսն երկնաւորս, իբր
նախաստեղծն երբեմն զվիճակն երկրաւոր յԱ-
դին դարաստանի. ընդէր փակեցեր քեզէն քեզ
զերկին, զվերելիցն դուռն աղխեցեր . ընդէր
խառնեցեր ընդ շրոյն մաքրութեան զախտ ար-
տասուացդ տարծանութեան. ընդէր զլուացեալ
զձորձ վերարկուին գարշելի գործովք զազրա-

ցուցեր. հիմ զեղեալ հանդերձին մեղաց պատմուճան անառակ վարուք քեզ արկեր. ընդէր զտանողացդ ոտից սրբութիւն ճանապարհաւն ժանդից աղտեղեր. ընդէր կրկնեցեր իրաւադատին զուխտազանցութիւն հին պատուիրանին. ընդէր մերժեցար ի պաղոյն շնորհաց՝ իբր զԱղամ ի ծառոյն կենաց. ընդէր նենգեցեր քեզէն քո կամաւ զանստուեր յուսոյն յարակայութիւն. ընդէր պատկառանք անհամարձակելիք քոյին դիմացդ նպաստեցեր. ընդէր զինեցար ընդդէմ քո ներհակ, ով ընդունարան խելազարութեան. ընդէր որսացար ի ծուղակ մահու՝ թողեալ զարհետն վստահութեան. ընդէր կարթիւ պատրանաց ածար հաղորդդ մարմնոյ կենդանարարին : Այլ վերսատին յուսացեալ ի նա կարդա նմա ապաւէն և լրյո քաւիչ նորոգիչ փրկիչ կեցուցիչ և կենդանարար, ողորմած խնամող մաղասէր և անոխակալ բազմագութ, օրինեալ յաւախտեանս. ամէն :

ԲԱՆ ԽԵ.

Վերսին յաւելուած կրկին հեծուրեան.

Ա. Եթ արդ զինչ զոյ ասել ամաչեցելոյս յերեսաց մեծիդ ահաւորութենէ, բայց եթէ համրանալ և հող ի բերան եղեալ լոել ի սրտի, ըստ մարզարէութեանն խրատու, ահա ի բարւոյն

կարկառեալ ի յոյս : Խոկ եթէ զփականս շարժողութեան շրթանցս բացից, բոնադատեցից խօսել կամեցեալ, դարձեալ զնոյն ձայն կրկնակական եղերերգութեան լալեաց բազմութեան խէթ մտացս յառաջադրէ :

բ. Եւ արդ ողբակից մեծ մեղաւորին անօրինելոյ կամաւ առ իմահ զնորին գոչումն երկրորդեցից և ես ընդ նմին. մեղայ տէր մեղայ, և անօրէնութեանց իմոց ինձէն վկայեմ : Հիւսեալ ընդ նմին զբանս յիսներորդի սաղմոսին, անթիւս զբեմ զպարտուցս սակ անձինս մեղանաց՝ քան զիւղ երկրի հողմահոս փոշւոյ ընդ օդս ամենայն տարածեցելոյ :

գ. Մեղայ յերկինս և առաջի քո, ընդ անառակ որդւոյն պատկառեցելոյ հայրենի զթոյդ վերըստին դարձեալ թախանձ արկանեմ. զողորմելին ձայն աղերսանաց արտօսրածին ողբովք գոչման ի տիսուր դէմս մատուցեալ առաջի քոյ տարածանեմ, Հայր զթութեանց, Աստուած բոլորից, չեմ արժանի կոչիլ և ոչ բնաւին առ այս անուանիլ, ոչ միայն որդի, այլ և անպիտան ապաբան վարձկան : Ընկանալ զսովեալս տարագրական, պարտական վնասուց. և զցաւ քաղցոյս լլկանաց Շեղոյս նուաղեցելոյս՝ կենաց քո հացիւդ բժըշկեացնս : Լեր ընդ առաջ քո ողորմութեամբդ ի սկզբնաւորս ապաւինութեան. զգեցն, զթած

և անոխակալ, անօրինեալս մեղապարտի զնա-
խակապուտ հանդերձին ծածկոյթ . աւանդուկո-
րոյս ձեռացս աղտեղեալ մեղօք՝ զկեփիք մատան-
ւոյն համարձակութեան ամենառատ կամօք
մատուցեն . զգարշապարացս թշուառութիւն
մերկութեան ոտիցս՝ պատսպարութեամբ աւե-
տարանական ամրավերարկու օդիցս կօշկաց
ի յօձին թիւնից միշտ ամրացուցեն : Զգուարակդ
պարարակի եզինդ երկնայնոյ, որ է միածին
Արդիդ քո օրինեալ, իսկապէս մարդասիրու-
թեամբ՝ կարօտելոյս բարեաց նուիրեա . որ մա-
տուցեալ միշտ և անպակաս մնայ ի լրութեան,
յարակայ զենեալ ի սպանդարանի անթիւ սե-
ղանոց անսպառութեամբ, բոլոր յամենեսին և
բնաւ յամենայնում, էութեամբ յերկինս և իս-
կութեամբ ի ստորինս, անեռուազ մարդկու-
թեամբ և անթերի աստուածութեամբ . Փշրեալ
և բաշխի ի մասունս անհատս, զի զհամայնն
հաւաքեսցէ առ ի նոյն մարմին իւրումն զլսոյ .
քեզ փառք ընդ նմին, Հայր ողորմութեան,
յաւիտեանս . ամէն :

ԲԱՆ ԽԸ.

Վերսին յաւելուած կրկին հեծուրեան .

Ա. ԲԱՐՁՐԵԱԼ, հզօր, անսկիզբն, անեղ, անբո-
վանդակելի, աննիրելի ակնդ նկատող, ծնող

անքնին փառաց միածնիդ. իրաւացուցես զիմս
ողը մութիւն հերքեցելոյս ընդունելութեան առ
երկնայինս և առ երկրաւորս : Տօնեա զկեալս
կորուսելոյս վերնականացն պարերգութեամբ,
աւետարանեա բանիւդ օրհնութեան զկենդա-
նութիւն իմ մահացելոյս, զբարեբաստութիւն
կամացդ յայտնեա, զովեալ բոլորից գոյից եղե-
լոց, ստացիր անուն քեզ անձառ և ինձ թշուա-
ռիս նորոգ փրկութիւն, կորուցես զգիր մուր-
հակի մեղուցելոյս ամբաստանութեան, զվճիռ
հոգւոյս մահու ջրեսցես կայլակօք արեան Արդ-
ւոյդ սիրելոյ, վատահութիւն փրկութեան բա-
րեաց արեամբ Քրիստոսի քո նկարեսցես, ցոյց
զսքանչելիս քո բարեզթութեանդ ի ճաշ հարսա-
նեաց քում հարազատի : Մի փակեսցես դիմելոյս
առ քեզ զառազաստ սրահի կենացդ յարկի, մի
տրոհեսցես ի բազմականացդ և ի բարեացդ քո
զրկեսցես, մի պահեսցես ի գանձարանիդ զնիւ-
թեալ իմ պարտուցս անօրէնութիւն, մի կըն-
քեսցես ի քսակ բարեացդ զզազրութեանց իմոց
զարշութիւն, մի երկարս ինձ զվէր մեղաց
ի յախտալից մարմնիս ծածկեսցես, մի զփտու-
թիւն նեխութեան ցաւոցս ինձ տնկակից մահու
մնացուսցես, այլբարձ բանիւդոյդ ողը մութեան
զժանտութիւնն ապականարար, որպէս զի զա-
տեալ ի հիւծմանց ախտից՝ առողջութեանն պա-

տրաստեցայց. հնարաւորեա, զթութեանցդիայր, մեծ խոցուածոյս զօրեղ սպեղանիս, կարեւոր կործանմանս՝ բարի այցելութիւնս : Զի քո եմ, տէր ոգեսէր, թէ և առ մի նուագ բիւրս մեղիցեմ, բայց ոչ զրեցայց համայն մեղուցեալ, տուփչ կենաց իմոց բարերար, ի շնորհ պարզեւաց կենաց քոց ապաւինեալ. զի ճանաչելդ զքեզ բովանդակ արդարութիւն է, և զիտել զգօրութիւնդ քո՝ արմատ անմահութեան, որպէս և կանխաւ իսկ զրեաց իմաստունն. և դարձեալ՝ տիրելդ քո, ասէ, ամենեցուն, խնայել տայ քեզ յամենայն. և դարձեալ՝ մօտ է քեզ յորժամ և կամիս կարող գտանել :

Բ. Այս Սողոմոնի յուսոյ աղերսանք իմոյս առեալ տիպ. քանզի ոչ այլ ոք բազմամեղ որ քան զնա ինձ զուգաշաւիդ. երբեմն որդի, ապա ատելի. երբեմն միջնորդ խաղաղութեան Աստուծոյ ժողովրդեանն, և յետոյ խտրոց որոշման բազում խռովութեան. երբեմն օրէնք կենաց կացեալ, և յետոյ մուրհակ մահու հաստատեալ. զերկնաւորին պաշտօն ընդունեալ, և զօտարին անուն ծանուցեալ : Անպատճառ օցտող, անկարօտ զրկող, անսովելի գող, զրգեալ տրտընջող, փափկացեալ փախտական, սեղանանենգ սարտուցեալ, անպատախանի վնասապարտ, քաղցրասնոյց հայրոյիչ, զաւակ հայրատեաց,

կտակարանացն մատնիչ, Մովսեսի չարախոս, մոռացող երախտեացն, իմաստուն սխալական ամենագէտ յանցաւոր, ամօթապարտ զդշացեալ, տարակուսեալ աշխատող, աղաչաւոր կռապաշտեալ, յամրային դարձաւոր, կաղակարծ ընկալեալ, կասկածաւոր հաշտութիւն, յապայս յիշատակ, յերկբայս փրկութիւն, չաւտալի զիւտ, իմասնէ մնացուած, խարդաւանեալ զերի, կիսակտուր պրծեալ, կամաւոր անձնամատն, տմարդի յղբացեալ, բազմավրէպ հանճարեղ : Ի յընթացս բանից երկեակ որոշմանց՝ ամենայն ուրեք բանս արկեալ ողբոց և ձաղանաց, մեծ պարսաւ և փոքր գովեստ՝ իբր ի վերայ ինքնազրաւ կորստականի, երգիծանութիւն խառնեալ ընդ աշխար . բան նորաթելաղիր բարգաւաճութեան ամենայն հասակի, և խոտորումն նորին ի շրթունս բնաւից թառանչ թախծութեան ողորմելիս իմն ազդեալ :

Գ. Զարմանամ վհատիմ տարակուսեալ ապշութեամբ. զի թէ նա այնքան զթեաց, ինձ զինչ պատահեսցէ. զիարդ անկաւ ամբարձեալն, զիարդ սասանեցաւ հաստատեալն, զիարդ կործանեցաւ կառուցեալն, իբր օտարացաւ ծանուցեալն, զիարդ զակատեցաւ զաւակն ընտրութեան, զիարդ սրացաւ մերձաւորն,

զիարդ աղօտացաւ փայլեցեալն, զիարդ պատան-
դեցաւ ազատեալն, զիարդ անօրինեցաւ ուսու-
ցիչն, զիարդ նուաղեցաւ հոչակեալն, զիարդ
անարգեցաւ փառաւորն, զիարդ փոքրկացաւ
մեծատունն, զիարդ ամբարշտեցաւ բարեպաշ-
տըն, զիարդ ամբարհաւաճեցաւ ընտրողն,
զիարդ ունայնացաւ պատարունն, զիարդ կըտ-
րեաց զուխտն որ ընդ բարձրելոյն : Պատկա-
ռեմ ասել, թէ և ընդ սանդարամետականին
կապեցաւ. զի կայր նորա և կոոց, ուստի սէրն
ընդ պատկերաց, վասն Էր կամքն ընդ խորա-
նաց. զիարդ ոչ յիշեցաւ յանդիմանութիւնն Սա-
մուէլի առ Սաւուղ եղեալ, հմայք, ասէ, մեղք են,
և ցաւս և աշխատութիւն ածէ թերափ ի վերայ.
զիարդ ոչ հայրենի յանդիմանութիւնն, կուռք,
ասէ, հեթանոսաց դեք և անշունչք են, և նման
նոցա լիցին պաշտօնեայք նոցա : Տէր միայն
ածէր զնոսա, Մովսէս նախազրեալ յառաջա-
ձայն ձաղանօք սաստիկս իմն ամբաստանէ. ոչ
էր ընդ նոսա, ասէ, աստուածս օտարոտիս, զոր
ոչ ձանաչէին հարք նոցա : Ո՞ւր է մահամա-
տոյց այլազնեայ արձանն Փազովրայ, ուր տգեղն
և անպանծալին սիդոնացւոց իգական ամենանը-
զով ձուլածոյն, ուր կանացի կերպին անգրելին
խայտառակութիւն զազիր տեսակին, որով
ամօթոյ մարգարէքն զանասնօրէն դիմեցումն

անխտրաբար յանուն չարութեան անժումկալ
դիւին անաստուածաբար ձօնեալ մոլէին։ Տարաւ
զէութիւն բարեբաստութեանն՝ որ զնախնին որ-
սաց ի կորուստ, յաղթեաց մեծութիւնն իմաս-
տիցն առաւելութեան, զերեաց գոռոզութիւնն,
յիմարեցոյց Փափկութիւնն, վանեաց արծաթն
ծառայեցուցիչ, յոզի դատեցաւ զայըն տօնելի
հին զէնն կործանողին, ի զրկացն Աստուծոյ հա-
նեալ՝ ի յոտս ստամբակին զթեցոյց, մեռոյց մեղ-
կութիւնն, թմբքեցոյց ծուլութիւնն, արբեցոյց
շուայտութիւնն : Ո՞վ դիւրապատիր մարմին
երկրածին, որնվք ձայնարկութեամբք զքեզ
աւաղեցից. քանզի ոչ տիրապէս առ նա հան-
դիպի ընդդիմաբանութիւնս, այլ ամենից սխա-
լողաց՝ կամաւ վրիպելոց. վասն զի նովաւ է իմա-
նալ, թէ անիրաւ է պարծել յիմաստս մարմնոյ,
եթէ ոչ Աստուծով դատեալ ընտրեսցի. որ
զի թէ առ այս պայմանի յիմար ոք իցէ, և
ի հաստչին կամս յուսասցի, ոչ ևս ի նորայոց
անտի ինչ կրեսցէ :

Դ. Այլ քանզի սաստիկս և քստմնելիս ունի
Սողոմոն զդարձին իւրոյ յիշատակարան ինք-
նապարսաւն կշտամբութեամբ, իբր մեռեալ
իսկապէս համայն աշխարհիս անձնասիրու-
թեան. զոր եթէ զիսկն ոք նկատեսցէ, Ունայնու-
թեամբքն է իմանալի. այլ և ի մատեանս քահա-

նայիցն և ի գիրս Աքիայ սիլոնացւոյ, յորում
զփոյթն իւրում ընթացիցն արտասուելիս իմն
յեղանակէ. զուր ջան, անօգուտ վաստակ,
անմիտ հետեւումն, անշահ արշաւանք, անկա-
յուն երկը, օտարին խմասոք, ոչնչից հոլովք,
բամբասելի բերք, անյարմար վարկածք, սնոտի
սերմանիք, աւազափուլ շինուածք, պակա-
նացուստացուածք, քամահանաց տաժանմունք,
ինքնամարտ կոխւ, ընդ ոգւոյ իւրում դատ,
ընդունայնաթոպ քիրտն, վնասակար փափաք,
կորստական շաւիդ, վրիպակ ճանապարհ,
կործանական կրթութիւնք, մոլորապատիր
վարժութիւնք, հանապազասխալ տեսութիւն,
ակնայայրատ պչըռութիւն, պոռնկակերպ կեր-
պարան, ախատբորբոք Ծիւթ, դժնէատեսիլ
գոյն, յոքնատխուր գեղ, յոլովամեղծ ծուխ, շոգի
ցնդելի, վաճառ մերձ ի յառ, տաղաւար քակ-
տելի, ընդվայր աղաղակ, անպատճառաւոր
ծաղը, արհամարհելի ասպարէզ, անձնավա-
ճառ զիր, սատակաչական ելք, անաստուած
մտածմունք, ստայօդ ճառ, զայրացուցանող
զրոյցք, եպերանաց խծրիծ, խելագարութեան
խնդիր, ամօթանաց ցոյցք, խայտանուականաց
յայտնութիւնք, առակ ապառնեացն, ապաշա-
ւանաց զործ, ըմպահկանաց պատմութիւն,
հեղգացելոց օրինակ, խորխորատ ծածուկ, որս

խաւարային, մահագուշակ վիճ, անյատակելի
անդունդք, ուղեկցութիւն սպանողաց, յիմա-
րութեան բարբանջմունք, դարանակալաց վայր,
խարխուլ յարկ, շինուած սասանեալ, կա-
մուրջ խախտեցեալ, երեւոյթ փախչելի, խա-
ըող շողոքորթ, անոպայ մատնիչ, ընդդէմ
բարձրելոյն հակառակութիւն։ Զայս ամենայն
մասունս բանից խոստովանական կանոնա-
դրութիւն, ի սիրտս բնաւից նախասերմանեաց
ժողովոյս կանոնադիր դարձելոց զղման. որ-
պէս զի մի պարծեսցի ոք ի մարդկանէ բամ-
բասաւորօք զինուորեալ նետիւք՝ զանձն և
զընկերն խոցոտելով. քանզի կուապարիշտ է
քողով ծածկեալն, որ զկերպարանս միայն
ունի, և զոչ ախորժելիս ստեղծչին կատարէ։

Եւ արդ նա՛ որ ոչ այնքան մեղաւ՝ որքան
զղացաւ, մի ի սպառ պախարակեսցի, այլ յի-
շեսցի այրն այն ի բարի, իբրև զիմելոց, յորժամ
հոգւովն էջ յայցելութիւն աստուածութեամբն
անբաժանելեաւ՝ կենազործել զանդ խոստովա-
նեալսն. զոր մեռեալքն ահա կենդանեացս
անտարակոյս բերին աւետիս։ Ընդ որում
մաղթեալ իմ պարտաւորի՝ իմաստութեանն ոչ
ժամանելոյ, ի մեղանացն մասն կարգեալ,
բարեբանեալ մեծիդ պաղատիմ. լից զնուազդ

իմ բանագրութիւն. ի յերջանկին հանճարեղութիւն. Եիւթեսցին Եերկայիս հայցմունք ի բարգաւաճին յարգաւորութիւն՝ ի գերաշխարան արքային աղերս. այցելութիւն խնդրոցս դիցի. քո ընտրեցեալ վեհ արքայորդւոյն, զոր միածնիդ օրինակեցեր : Յարեանն կցորդութենէ զքո փառակիցդ ճաշակեցաք. տուր փրկութիւն քոյոյ ծառային, ամենահնար, զօրեղ, ահաւոր, ի ստեղծողիդ փառս աճեցուցեալ զանքաւելի մեղացն ջնջումն : Յիշատակաւ խորհրդոց բարեաց՝ ընդ ողորմեալսն նորոգեսցես . որ ամենահամ ախորժանաշակ բազմապաճոյն առակազրութեամբ զաստուածութիւնդ քո քարոզեալ ի մատեան լրւազարդ կտակի, եկեղեցւոյ ընծայեաց հետս բարութեան՝ խոստովանութեամբ մատչել առ քեզ, Հայր : Քանզի ոչ հեռի յողորմութենէ առ այս ցոյց բանի է իմանալի, թէ անյուսութեանն կաթուած չէր անկեալ ի յեռանդն սրտին ըղձից, որ զճեալ զդմանն փոքր ինչ կասեաց :

2. Արդ ի յուշ բերեալ զոր ի քեզ անճառելի բարեմասնութիւնք, զգթութիւն քո ողջունեսցես. որով զկոշկոճեալն ի բազում դարուց՝ բամբասանաց քարաձզութեամբ, երանութեան վերարժանացն . որ յոքնահոսան արտասուաց ելիւք զմէջ յատակի յարկին հեղեղեալ ապա-

բանիցն իւր խրախնանութեան՝ սաստկակըս-
կիծն ապաշաւանօք, հօրն կրիցն գերազան-
ցեաց ողորմելի ոգւյն հեծութեամբ. զոր ի
յաչաց բանիդ քո արտօսր՝ առ որ մերովս
ի յիւրն ախտակրեաց, երկայնամիտդ ներողու-
թեամբ միացուցեալ խառնեսցես, զթած. և զան-
յարմարն առ նա կարծեցեալ զսաղմոսին բա-
րեբանութիւն, ի փառս էակցի Որդւոյդ կնքե-
լով նովաւ կեցուցցես զնա քաղցրութեամբ ընդ
աղքատս ժողովրդոց : Զայս պուետիկոս ոմն
բարեշնորհ՝ արգահատէր ընդ Սողոմոնի, ամե-
նայնիւ վարձս վարկուցեալ համակցորդ զուգա-
ձայնութեամբ՝ իբր կենդանեօք նովաւ ընդ նմին
վասն նորին աղերսել առ քեզ, զոր յաւելուած
կարգիդ տնտեսէ : Քանզի և օստացւոյն ի
նմանէ ստեղծեալն բազմահրաշաւորն մարգա-
րէանառն պատմազրութիւն աստուածութեանն
արդարացուցիչ՝ զԱղոմոնն ողորմեալ կարգէ.
որ զի անպարսաւ է աղօթելն, քան չարաբանելն
վասն նորին :

Է. Զոր և ես մաղթեմ մեծ վստահութեամբ
նմանակից այսր հեծութեան՝ և զիմս ընդ նմին
ընծայել չոչումն. զի թէ կորուցցես զմեզ դա-
տեալըստ գործոց, ոչ պակասին փառք քո, զի
իրաւամբք քո ճանաչիս. իսկ եթէ գոցես, այն-
քան բարձրանաս, որքան մեծութեանդ քում

վայել է. քանզի յաւէտ օրհնաբանելի ես դու
երկրորդաւա՝ ողորմածութեամբ, քան նախա-
հրաման սաստկութեամբն : Դարձիր, Տէր,
դարձիր քաղցրութեամբ ի խնամս գթութեան՝
ձրի և ամենառատ պարզեօք սիրոյ՝ մխիթարել
յաւէտ զտրտմեալքս համաշաւիդ տագնապաւ
տապոյ տոչորման անբժշկականի : Զեռն եղեալ
փրկութեան նորոգեսցես վերստին, քաւեալ և
պատսպարեալ ի մեղսակործանութակմանէ:
Եւ քեզ միայնոյ սկզբանդ և անսկզբանդ, ընդ
սկզբնաւորիդ սկզբանց՝ սուրբ Երրորդութեանդ
և միում աստուածութեանդ փառք և իշխանու-
թիւն յաւիտեանս յաւիտենից. ամեն :

ԲԱՆ ԽԹ.

Վերսիա յաւելուած կրկին հեծուրեան .

Ա. Եւ արդ մի տիրեսցեն անօրէնութիւնք
քում պատկերիս կայսերականի արքայութեանդ
վերնում, Աստուած բոլորից լուսոյ, մի կապ-
տեսցէ գոռոզն ապստամբ զզարդ փշմանդ
շնորհի ի քո ստեղծեալս կերպէ, մի թագաւո-
րեսցէ մեղքն խափանեալ՝ մարմնոյս մահացուի
առ ի զրաւել զիս ի նոյն : Զիք իմ թագաւոր առ
իշխել շնչոյս բաց ի քէն, Քրիստոս, որ անբունա-
դատ հնազանդեցուցանես լծոյն քաղցրութեան,
որ բառնաս զկարիս մեղաց ամենակատարդ բա-

Եիւ, որ արեամբդ քո ստացար և մարմնովդ կերակրեցեր. որ կարգեալ սահմանեցեր ուխտ կենաց անփոխաղրելի, որ յոզի քո կնքեալ կըցորդ քեզ գրելով, հօր քում մատուցեր ժառանգակցապէս. որ յանուն զենման միշտ յիշատակաւ քո չարչարանաց առ նոյն բարերար աղօթել համարձակեցեր, ստեղծիչ ամենից և կեանք: Դու ես Աստուած ամենայն հոգւոց, որ մեծացուցեր զայս տուրս շնորհաց քան զամենայն գործոց քո հրաշ. ոչ զերկինս իւրովքն զարդուք և հրեշտակացն պայծառութեամբք, ոչ զերկիրս և զմարդկութիւնս և որ առ սոսա են զարմանութիւնք, ոչ զահնան լայնութեան ծովու և որ ի նմա են եղելութիւնք, ոչ զանդունդս աղխիւքն հանդերձ և որ ի նմա են անբաւութիւնք, ոչ բարձրացար յօրինմամբ այսքանեօք վեհիւք որչափ առ իմս կարեկցութիւն, յասելն քո սուրբ մարգարէիւն՝ քաղցրութեանց յուսոյ բարութիւն, ով է Աստուած իբրև զիս կարող թողով միշտ զմենդս և ջնջել զանօրէնութիւնս : Ահա արդ խնկեալ են բանք քո, ողորմած, և խոստովանեալ բարերարութիւնք, փառաւորեալ խորք խորհրդոցդ, և երկրպագեալ զեղմունք շնորհացդ :

Բ. Արդարե ոչ ոք բաւէ յէիցս թարգմանել խոսիւք նիւթական լեզուի ի մասանց այտի

քումդ զթութեանց զոր առ իս ցուցեր, յօրինիչ, քանզի և մեծ իսկ է զօրութիւն՝ զհնացեալն անդրէն նորոգել ըստ առաջնումն պայծառութեան, քան յանգոյից ստեղծագործել։ Եւ զի ոչ է քո տկարութիւն, որ զօրութիւնդ ես ամենայնի, առ որ բան քո միայն ազդեալ՝ զլրութիւն գործոցն զիսաւորէ, ահա յարիցես փառաւոր լինել, բարեգործ, ի ստացուածս այս կըրկին անյուսալի փրկութեանս. զի իրաւամբք ուխտի բարձրասցի՝ հաստատուն եղեալ մեծապէս օրհնաբան աւետեաց քո ձայն ի քաւելոյդ շնորհ ծանուցեալ, ողորմութեան լուսվդ ուղերձեալ, քան ի ճանապարհ ստեղծանելոյն։ Զի առ մինն արարիչ միայն ճանաչիս, իսկ առ միւն՛ առաջնով կոչմամբն և երախտաւոր. ընդ կերպացուցանելոյն և քաւիչ, ընդ նորոգելոյն և բարերար, ընդ հաստելոյն և ողորմած, ընդ կազմելոյն և հնարաւոր, ընդ յօրինելոյն և հեզ, ընդ նկարելոյն ամենազօր, ընդ առաջնորդելոյն և լոյս, ընդ տածելոյն հովիւ, ընդ դարմանելոյն խնամիչ, ընդ ողջ պահելոյն բժիշկ, ընդ ձեռնկալութեանն զօրավար, ընդ անպարտութեանն թագաւոր, ընդ արարչութեանն քաղցր, ընդ ամենատուր պարզեացն առատ, ընդ միշտ անսալոյն ներող, ընդ ոչ բարկանալոյն անօխակալ, ընդ կարեացս

վշտակցելոյ ծածկագիտ, ընդ յանձանձելոյ զթոցն ապաւէն, ընդ գերունակ գորովոյն Աստուած, ընդ անսպառ բարութեանն օրհնեալ յամենայնի :

Գ. Սրդ որպէս ստեղծեր մինչ ոչն իսկ էի, և ծանուցար ինձ զոյացուցիչ, և այժմ զիոզի մաղթողիս մարմնոյս տաղաւարաւ յարդարեա անդրէն վերստին յանարատութիւն մաքուր սրբութեան նախնի լինելութեանն. զի բազմացի առաւել աճեցուն եղեալ յանախ տւչութիւն անսահմանելի քոյդ սքանչելեաց նորոգ ներկայիս, քան զանցելոց հնոցն ստուերականաց : Եւ ընդ ճառելոյս զթիւս մեղացս՝ որքան մտացս թես ընթանայ զանբերելիսն յիշատակել, արդարացայց յանուն քո հզօր, և ի պատմելս ինձէն զանձին իմոյ բիծ, և դու թողցես զամբարշտութիւն բազում մեղանաց խոստովանելոյս, հզօր, ծածկատես, ամենափրկիչ. զի մի ծայրագոյն լրութեամբ աւետեացս, դարձեալ նախնումն կարօտացայց՝ երանելով սաղմոսիւն զշնորհօք փրկեալսն մկրտութեամբն. և փշովք մեղաց յոզի խոցուտեալ, ձեռն քո մխեսցի յիս առաւելապէս այժմէն վերստին, ծանրս առնելով զբեռն պարտեացս քան զքաղցրութիւն պարզեացդ. այլ ազատեա զիս օրհնաբանեալ Հոգւովդ սրբով, աղաչեմ զքեզ' Տէր ամենայնի,

յօրինաց մեղացն և մահու : Քաւ լիցի, թէ
անկցի ընդ տկարութեամբ սահմանաւ ճշմար-
տութեանդ ծագումն իբրև զգրոյն օրինակ .
քանզի ուր քաւութիւն է թագաւորեալ՝ վառա-
րեալ են մեղք, և իխրախոյս կենդանի բանիդ՝
ոչ է յուսահատութիւն, և ամբարձեալ քոյոցդ
շնորհաց' հալածեալ են պարտիքն, և մերձ գո-
լով ձեռինդ Սատուծոյ՝ ոչ զոյ անհնարութիւն,
այլ ամեննիֆ լուսաւորութիւն, բովանդակապէս
զօրութիւն, անպարտելի կարողութիւն : Քո է
փրկութիւն, կենդանութիւն, նորոգութիւն,
ողորմութիւն, միանգամայն և քաղցրութիւն,
արքայութիւն, անեղծութիւն և փառք յաւի-
տեանս. ամէն :

ԲԱՆ Ծ.

Վերսին յաւելուած կրկին ննջուրհան .

ս. ԱՅԼ արդ, քանզի որպէս ոչ է առանց Քրիս-
տոսի Սատուծոյ ոգւոց փրկութիւն, և ոչ առանց
տեսման աչաց' առ լոյս զուարճութիւն, և կամ
առանց արուսելին նշուկից արևու երբէք քաղ-
ցրութիւն, այսպէս և ոչ առանց խոստովանու-
թեան ծածկութից և ստգուանաց անձին՝ քա-
ւութիւն : Զի զինչ օգուտ քեզ է մաքրութիւնդ,
եթէ ընդ փարիսեցւոյն դատեսցիս, և կամ զինչ
վնասեսցեն զիս պարտիքս, եթէ ընդ մաքսաւո-

թին զովեցայց . և կամ ուր ասի պարսաւեալ
մարզարէն Յովէլ Երիցս կը կնելով զանձինն
եղկութիւն , և կամ զի՞ գուցէ սրբոյն դատաստան ,
առ իյիշատակ աւուրն մեծի , և կամ իբր ար-
դեօք անմաքուր իմասցի շրթամբք Եսայի՝ հե-
ռին ի գործոց տանն Խօրայէլի , և զիարդ Աս-
տուած պարտաւոր պաշտի աղամեան մարմ-
նովն՝ իմոյս կարեկցեալ յանցաւորապէս առ հայր
աղօթել , և կամ յորս թարգմանի առած առա-
կին , թէ սիրտ իմաստնոյն ի տան սգոյ , և սիրտ
անմտին ի տան ուրախութեան : Զի որ զսխալելն
Աղամայ անձին իւրում ոչ զրեսցէ , և զմեղս
ամենից ինքեան ոչ համարեսցի , իբր Երջանիկն
արքայից զիարցն , կորոյս զիւրն արդարութիւն՝
որպէս անախտակիր գոյ բնութեանս , և ոչ բեր-
կրի սիրտ առ զուարթութիւն Երեսաց աւետեօք
յուսոյն , ըստ ասացելոյն , եթէ ոչ յառաքելոյն
Քրիստոսի ուսեալ՝ ամենայնիւ ահա ըստ Աս-
տուծոյ տրտմեսցի :

Բ. Արդ ըղձալի է ինձ յաւէտ աստանօր
խրատն հին նորոգ ընկալեալ՝ հոգեւոր հանձա-
րեղին , զոր Տէրն իսկ Երկրորդեաց , Երթալ
նստել ոչ յառաջին բարձին հպարտից ընդ ամ-
բարշտացն նանքախորհուրդ ժողովելոց , ուստի
Դաւիթ և Երեմիա ուխտիւ կանոնի սահման
հաստատեալ հրաժարեցուցին , այլ ընդ զդա-

ցեալսն սրտիւ պատկառեալսն մեղօք' և ի դատաստանաց մեծին պակուցեալահիւհատուցմանն , յետնոցն հաւասարեալ աստէն ի յերկրի կամաւ խոնարհութեան , ուստի բարձրեալն Աստուած պարարեալ բերկրի . որովընդ նախադասեալսն ի բազմականսն երանութեան համարձակեցայց , թէ ես և թէ նա հետևեալ սովիմք : Առ որ զերծեալի բամբասանաց բանի մարզարէին , որ ի վէսս ոմանս ակնարկի . մի յիս , ասէ , մերձենար . մաքուր եմ , և ով զիս տեսանիցէ : Այլ զանկշիուն խոնարհութիւն երջանկին Դաւթի ինձ նպաստ առեալ ասելընդ նմին , ես իբրև զանասուն համարեցայ հերքեալ ի զգայութենէ , և հասին չարիք ինձ շուրջանակի . և նեխեցան և փտեցան վերք իմ ի յանզգամիս անբժշկութիւն . և զայլոց ոմանց ընտրելոց ի յասորեստանի՝ զկամաւորն կշտամբութիւն մեղապարտութեան անձանցն անարատից . ընդ որս և զեզրի մեծի քահանայի զասելն' ես ինձէն առեալ բարբառիմ , թէ և ոչ զերեսս բաւական իցեմ համբառնալ ի վեր առ քեզ Աստուած :

Գ. Արդ ես ճշգրիտ պատկեր ամենայն երկրի՝ զիմս խառնեալ ընդ նոցին պարտիս , և ի նոցայոցն զառ իս դառնութիւն կրկին առաւելեալ , նոքօք հեծեծեցից . թէպէտ և չէ ինչ պիտոյ գարշութեան գունոյ՝ դարձեալ տգեղու-

թիւն : Ահա արդ մեղայ, զի անմտութեամբ գործեցի զոչ հաճոյսն քո բազմօք սխալեալ յանցաւորութեամբք, նայեա յիս, գթած, որպէս երբեմն յուրացութեանն ըմբռեալ Պետրոս, զի յոյժ ունայնացայ: Լուսաւորեա ինձ զողորմութեանդ քո ճառագայթ, ամենեսին բարերարութիւն: զի ընկալեալ զօրհնութիւն քո, Տէր, արդարացայց կեցից և մաքուր եղէց յանստեղծիցն քո իմոց լվողաց : Զութիմ համարձակութիւն զմեղապարտ ձեռինս հաստուած առ քեզտարածանել, մինչև մատուսցես զօրհնեալդ քո զաջ ի նորոգութիւն դատապարտելոյս: Արդ յաղթեա վերստին իմումս յամառութեան քոյին հեզութեամբդ առ իս ժամանեալ մարդասիրապէս. և զամենայնն յամենայնի ամենայնիւ քո կարողութեամբդ՝ զառաջին չարիսն միջնովքն և վերջնականօքն թող ինձ, հնարաւոր անհասից Քրիստոս թագաւոր լուսոյն արդարոց :

Դ. Զեմ արժանի յիշել զանուն քո օրհնեալ, զի վնասակար եմ բարեգործիդ մահու հարուածոց՝ առ կնիքն, առ շնորհն, առ փչումն, առ պարգևն, առ աւանդն, առ ձիրն, առ անունն, առ որդէգրութիւնն, առ պատիւն արքայական, առ պատկերն, առ դրոշմն, առ օծումն, առ ճոխութիւնին, առ համարձակութիւնն, առ ընտանութիւնն, առ կեանսն, առ լրյսն, առ

Երանութիւնն , առ յոյսն , առ փառսն , առ
անխոնարհելի բարձրութիւնն , առ պատկն ան-
կապտելի , առ խոստմունսն ծածկեցելոցն , որ
քե , տէր Քրիստոս , բազմօք աւետարանեցաւ
ինձ յամառելոյս իժիս և քարքիս՝ ունկնախից և
լսելափակ անլուր ականջացս . որ միշտ յառաւե-
լութեան քումդ բարութեան յոքնապատիկ
յաւէտ քան զսոյն չարիքն իմ յաճախեալ , ի ըս-
պառ կործանեցին , մերժեալ ի կենաց ընդ մահ
կապեցին , ծառայ կարգեալ ապականութեան :
Եւ արդ դու միայն իրաւակշիռ և ճշմարտադատ
բարերար՝ օրինեալդ ի գթութեան , մեղայ քեզ
անօրինեցայ անիրաւեցայ . վասն որոյ և եղծայ ,
զեղծայ , յանցեայ , ամբարշտեցայ . և ոչ լուայ
խոստովանեալ և երկրպագեալ գովեալ քո բա-
նիդ , որ դու իսկ երևեցար անճառելեաւ քո
սիրովդ , զոր զրելն իսկ մեծ է , և նշանակելն
սարսափելի : Քեզ արդարութիւն և փառս և
մշտնջենաւոր գովութիւն , և ինձ պատկառեցե-
լոյս ի քէն , խնամակալ , քաւութիւն և ողորմու-
թիւն և բժշկութիւն , օգնութիւն և պահպանու-
թիւն սրտի և ոգոյ , բարեբանեալդ յամենայնի
յաւիտեանս . ամէն :

ԲԱՆ ԾԱ.

Վերսիմ յաւելուած կրկին հեծութեան.

Ա. ԵՒ արդ առ Երկրածին ոք պաղատեցայց
այրս մահացու ամենապատիր Եթէ, ընդունայն
է աղաղակելն . առ մահկանացնւ բանական
Եթէ, սուտ իցէ փրկութիւնն առ յուսոյն վատա-
հութիւն. առ մարդ ոք եղծական Եթէ, ընդ տը-
կարութեան բանին և նանիր է զօրութիւնն. առ
իշխանս Երկրաւոր գահից Եթէ, անցաւոր է ընդ
ինքեանս և իւրեանցն բարութիւն. առ եղբայր
ոք հարազատ Եթէ, կարօտ է կամելոյն առ ան-
ձինն անդորրութիւն . առ հայրն իմ Երկրաւոր
Եթէ, պակասեալ են խնամականքն ընդ աւուրց
նուազութեան. առ մայրն իմ որ Երկնեաց Եթէ,
կասեցան զթութիւնքն ընդ նահանջել կենդա-
նութեանն. առ թագաւորութիւնս աշխարհի
արդեօք, որք զմահացուցանելն միշտ արուես-
տաւորեն՝ քան զկենազործելն. այլ առ քեզ բան-
րերար Աստուած օրհնեալի բարձունս, որ կեն-
դանի ես և զկենդանութիւն տաս ամենայնի,
որ և յետ վախճանին զօրես անեղծապէս նո-
րոգել:

Բ. Որ Եթէ փախնումք ի քէն, դու զկնի ըն-
թանաս. Եթէ տկարանամք, զօրացուցանես. Եթէ
վրիպիմք, շաւիդ դիւրութեան ուղղես. Եթէ

պատկառիմք, քաջալերես. Եթէ ախտանամք յանձն և ի մարմին, բժշկես. Եթէ զարշանամք մեղօք, մաքրես. Եթէ ստեմք, քո ճշմարտութեամբդ արդարացուցանես. Եթէ յանդունդս Եերքինս սուզեալ գլորիցիմք, յերկինս ցուցանես. Եթէ ի կամաց մերոց ոչ դառնամք, դու դարձուցանես. Եթէ մեղանչեմք, ողբաս. Եթէ արդարանամք, ժպտիս. Եթէ օտարանամք, սգաս. Եթէ մերձենամք, տօնես. Եթէ տամք, ընդունիս. Եթէ յամրանամք, երկայնամտես. Եթէ մեք ժխտեմք, դու առատապէս շնորհեալ ընձեռես. Եթէ լքանիմք, տրտմիս. Եթէ արիանամք, ինդաս :

Գ. Որպէս հարիւրորդ երկրորդ սաղմոսն օրհնաբան հրաշաւորական՝ զվիատելոյս զսիրտ սփոփէ, և մեծ յոյս կենաց աւետարանէ առ փրկութեանն հանդէս, որ յաղթականն է դիւաց և տարակոյս բանսարկուին, որ իբր զլաչին տէրունի նշան բարեբախտ պանծալին սքանչելափառ, անխոնարհելի բարձրութեամբ լուսոյ և անպարտելի վերնոյն զօրութեամբ կանգնեալ է ախոյեան անվանական և անշարժական ամենայնիւ յաւիտենական ընդդէմ անքարի բարուց բռնութեանն Բելիարայ, որ ունի յինքեան գանձս հոգեւոր օգտից զիտողաց մտաց ընծայեալս զպարտումն մահու և զլուծումն մեղաց,

և յոյս կրկինս յերկուս յաւիտեանս, և զնորդումն խոստման անեղծութեան արդարոցն, կանոնս բարեհրաւէրս և կենդանատուրս զըրեալս հոգւովն Աստուծոյ. որպէս ամենայն իսկ երգ սաղմոսացն մաքուր սրտից է տեսանելի կտակ կենաց մարդկան նկարեալ :

Դ. Զի թէ ինախնումն տկար կերպարանն զայս աւետիս և վստահութիւն ընդգոգեալ ունեք՝ կործանման մահու նախաժաման մեծ աւետադիր և կեանս երկնակրօնս վերնակենցաղս միշտ անճառելիս, և այն՝ ջնջական զիրն և յեղանակաւոր օրինակն, և պաշտօնն դատապարտիչ վհատութեան յանցաւորացն, և խափանելի կրտակն երկրային, և տկար հաշտարարութիւն միջնորդացն, և թերութիւն բանից մադթողացն։ Որ զի թէ Մանասէի փրկութիւնն խոստովանելի է, անդուստ վկայեալյետ այնքանեաց մեղանաց անքժշկականաց. որ արեամբն արդարոց ելից զնուիրեալն մեծի թագաւորին հրաշանուն քաղաք հայրենի, ըստ մարգարեագիր անսուտ պատմութեանն. որ և զմեծն իսկ տեսանողաց բազմերախտիս ձեռնկալութեան խնամողօրէնն պաշտպանութեան նախնակերտ յարկին տեսչութեան, մանկավարժ ինքեան և նախնի, մեքենայիւ մահու սղոցեաց, ի յերկուս մասունս խզեալ՝ դժնդակ տանջանօք մաշեաց, իբր խոր-

հըրդով ապստամբութեան զյուսոյն փրկանակ
կտրեալ : Առ որով զչար յաւելուածն մոլեզնա-
կան՝ զքրէական վերնամարտութիւն ի բարձ-
րեալն յանդգնութիւն . քանզի ոչ պատկառեաց
երբէք զստեղծողին պատիւ և զանուն յիւրա-
բընակ խորանէն մերժել, հալածեալ զԱստուծոյ
հոգին, Բելիարայ զանձն դաւանեաց : Քանզի
զնոյն տաճար տիրական խնկարկութեան հաս-
տողին սահման՝ հոչակաւորն երկրի տեսարան՝
զսարսափելին ազանց սրբարան, ուր տեսիլը
հրեշտակականք և Աստուածային հրամանք
յաղթողականք՝ լուսաւորապէս յայտնութեամբ
ազդեալ երևէին, զայն վայր երկնանման ահա-
ւոր սքանչելատես՝ Քեանայ ումեմն քառաղի-
մակի նախանձարկու պատկերի աւերածոյն
անապատի, պաշտօնետեղ զարշելի և դիւանեն-
ճեր զոհարան պատրաստեալ կազմեաց : Զըր-
կեալ զարքայն երկնաւոր իյարքայականն կս-
յից, զամենահարուստն՝ ունայն ի ստացուածոց
իւրոց, զտանուտէրն՝ անհանգիստ և թափա-
ռական տատանեալ, Բէեղզերուղայ ձեղուննկա-
րեալ, և զանունն ահեղ վտարանդի արարեալ.
զերի տարեալ զաւանդ զովելոյն, ողբալի զողոր-
մածին մասն նուազեցուցեալ. աղուեսուն փոքրու
ապարանք զսրահն լուսոյ կարգեալ, և բնաւից
ունողին և ոչ գլխոյն տաղաւար յիւրայոցն

Եղեալ, հատեալ զցանկ հզօրին, բախտից հմայից զսեղանն մեծախորհուրդ արեանն սրսկման երևեցուցեալ: Լայնեալ հետս բազումս ընթացելոց ի գայթակղութիւն, հովիւ կորստեան հօտին սատակման, մոլորութեան բուռն վարդապետ, և այն՝ գիտութեամբ կրօնիցն օրինաց, հայր ունելով զմեծն Եզեկիա զնմանակիցն Դաւթի:

Ե. Այնքան ստացեալ գտմունս չարեաց, որ և զԱստուծոյ պատիւն՝ որ զարքայութեան փառս ընծայեաց նմա, հայհոյեալ և թշնամանեալ, և զաղօթկերացն բազմութիւն սուսերաւ մահու խողխողեալ: Էնտանի դաւաճան, մերձաւոր վատնիչ, հարազատ սատակիչ, կցորդակից սպանող: Առ Աստուած ոչ գոյր դառնալ, զի ուրացեալ էր զնա. զԱքրահամ ոչ էր յիշել, զի խորթացեալ էր ի նմանէ. Խսահակաւ ոչ էր աղօթել, զի նզովեալ էր ի նմանէ. Խօրայէլիւ ոչ էր պարծել, զի տարագիր էր անուան կոչմանն մեծախորհուրդն շնորհի. զդավթեան երգն ոչ էր նուագել, զի կշտամբիչ էր նորին. ի քաւարանն ոչ էր մերձենալ, զի պղծեալ էր զնա. ի տապանին աստուածագիծ ոչ էր ապաւինել, զի ընդ գարշութեան ձուլածուին էր փոխանակեալ, առ Մովսէս ոչ էր կարդալ, զի անքաւելի էր պարտիքն որ առ նա. առ Ահարոն ոչ գոյր աղաչել,

զի վնասապարտ էր առ նա . առ մերձաւոր մար-
զարէիցն գրւեղ ոչ էր դիմել , զի սպանող էր
նոցա : Եւ նորա քաւութիւն մեղաց , և արքա-
յութիւն թագաւորութեան վերստին պարզեւալ
տուաւ , զի քեզ , բարերար , բազմացուցես
կարգեսցես գովեստս անձառս և անլոելիս
ի յազգս տոհմից և ի դարս ժամանակաց , և
զդուոն յուսոյն մտից անփակելի պահեսցես ի
փառս քոյդ բարձրութեան և ի փրկութիւն
դատապարտելոյս , անմահութեանց պարզեւաց
տուիչ Քրիստոս , գովեալ յաւիտեանս . ամէն :

ԲԱՆ ԾԲ.

Վերսին յաւելուած կրկին հեծուրեան .

Ա. Օրչնեաւ . տիրաբար ի քումդ էութեան , ան-
սահմանելի և անփոխաղըելի խսկապէս բարի ,
պաշտօն խնկելի և երջանկութիւն խոստովա-
նելի ամենայն երկրի , երկայն յուսոյ ամենապա-
տրաստ տեսութիւն , զթած ողորմած , որ ոչ
պահես ոխս բազմութեան ամաց մեղանաց զըթ-
թել մի ական , որ հրաշաւորս զարմանալիս
գեր քան զամենայն ազինս նախնեացն անսահ-
ման առաւելութեամբ կրկին ընդ միոյ հաճեցար
հեղուկ զողորմութեան վերնահոս վտակս ամե-
նախնկաւորս իշնորհաբաշխութեանս նորում :
Եւ զանդուստ զմուտս լուսարանի պատուհանին

անձկութեան նշուղիցն աղօտականաց, չափով
զիտութեանցն ըստ Սողոմոնի, և իւր իսկ նմին
և ինձ ընդ նորին բացեր ընդարձակեցեր թշուա-
ռացելումս զառագաստն անջրպետարան ելիցն
ողորմութեան՝ ձրի պարզեացն Աստուածակա-
նաց. զոր ընդ մէջ իմն մասնաւորօք աւետաւոր
յիշատակաց և ի հնումն զայսր տպաւորութիւն
օրինակաւ նկարագրէր, զդարձարուքն առ իս
և ես դառնամ առ ձեզ. և յորժամ դարձիս և
հառաջեսցես, յայնժամ կեցցես : Նա զի և զաղ-
ջամդին սեռութիւն գունոյն փոխարկել ի ձեան
պայծառութիւն, և զարանցնարեամբ ներկելոցն
յեղանակել ի պատահումն զեղման, ըստ Եսա-
յեայ և Զաքարիայ, և ի մէջ բարկութեան դար-
ձեալ զոյգ զողորմութիւն. քանզի անապատա-
նալ քաղաքացն Խօրայէլի և դարձեալ բնակիլ,
և ճանապարհացն ամայի լինել ի չգոյէ մարդ-
կան և անդրէն հետեւիլ, և լքանիլ ի սովոյն ոգ-
ւով և դարձեալ զօրանալ ձեռամբ, և զնալ Աս-
տուծոյ ի տեղի իւր զայրացմամբ և դառնալ
ողորմութեամբ, ըստ ներողութեան զելսն, և
ի մէջ սաստիցն սպառնալեացն կրկին պաշտպա-
նութիւն, և ի սրտին խռովութեան յուզումն
խնամոց զթութեան :

բ. Այս մարգարէիցն ձայն խնկելի, որ զօրի-
նեալի քո գալստեան զազատարդ հրաման

կանխաւ ազդէին, և զոր չէ բանիւ նիւթեղէն լեզուի ընդ թիւ արկանել վասն անբաւութեան. փոքունք են և նուազունք օրինակք և նմանութիւնք, հինք և ժամանակաւորք առ աւետեացդ քո յայտնութիւն և խաչիդ փրկագործութիւն : Որ յամենայն վայրի կառուցեր զխորանն վկայութեան արեան քո ուստի, որք մեծաբարբառ միշտ աղաղակեն քան զդատակնիք մահուն Հաբելի զյաղթանակ բարեաց քումդ հանդիսի, կեանս կրկինս և անմահականս շնորհաց, մկրտութեան, յարութեան, նորոգութեան, առ քեզ ընտանութեան, ընդ Հոգւոյդ սրբոյ միութեան, քաւութեան, ազատութեան, լուսաւորութեան, մշտնջենաւոր մաքրութեան, խկապէս երանութեան, ընդ վերնայնոցն կցորդութեան՝ անկապուտ փառաց, ի շրթունս մեր ձայնիւ բարձրելոյն հաշտեցուցիչ բանից աղաչանք : Եւ զոր ահաւորն է ասել, կարգեմ աստանօր յիշատակեղեալ մեծիդ երախտեաց, աստուած իսկ լինել ընտրութեամբ շնորհին, և ընդ հաստողիդ միանալ տէրունի մարմնոյդ ճաշակմամբ, և ընդ լուսոյդ կենաց խառնութեամբ զոր կատարումն երջանիկ խոստմանն, ըստ Պօղոսի բանին, ոչ ունէր օրէնք : Այլ դու, փրկութիւն, եկիր հայրենիդ քո հարստութեամբ, արարեր և կատարեցեր զյուսոյն յերկարաձգութիւն, որ առ քեզ

պահեալ անհամառօտելի , քաւիչ ամենայնի : Եւ քեզ փառք ընդ Հօր քում ի գովեստ բարեբանութեան Հոգւոյդ քո սրբոյ, յաւիտեանս յաւիտենից . ամէն :

ԲԱՆ ԾԳ.

Վերսին յաւեղուած կրկին հեծուրեան .

Ա. Տէր զօրութեանց , բոլորից գոյից թագաւոր , օրհնաբանեալ ողորմութիւն , Աստուած ամենեցուն , որ յաղթես սահմանի լայնատարած ընդարձակութեան , ամենայն անբաւութեանց դու ես որբանութիւն . մինչ զի կարծրն քեզ հոսանուտ է , և լոյծն քեզ պնդակազմ , և չիք քո իր անհնարաւորական , յաղթող զօրութիւն ահեղ . հուրն ցող իմն է զովական , և անձրեն բոց կիզանողական : Զքարն բաւես ցուցանել կերպարան ազդման , և զբանպկանն դնես անխօս և անշունչ արձան : Զպարտաւորն ողոքեալ պատուական առնես , և զկարծեցեալն մաքուր՝ իրաւամբք քննեալ դատիս : Զմատուցեալն ի մահ՝ բերկրութեամբ բարեաց արձակես , և զամաշեցեալն՝ զուարթ տեսութեամբ օծեալ դարձուցանես : Կանգնես զմատնեալն հաղբից գլորման , և զասանեալն՝ ի վստահութիւն վիմիդ հաստատես : Զախտացեալն բազմահառաչ՝ երջանիկ կարգես , և զյառաջատեալն

դարձեալ անդրէն իյետս նահանջես : Եւ յորժամ
սպառին առ ի մէնջ բարիքն, զառաւել զարմա-
նալիսն յայնժամ ներգործես . քանզի վասն քո
զիտես թողուլ զմեղս և ջնջել զանօրէնութիւնս,
և քաւիչ լինել անիրաւութեանց և զմեղս մեր
ոչ յիշատակել, ըստ Նսայեայ և Նրեմիայ :

Բ. Այլ առ շնորհ նորոգ փրկութեանս բազմօք
գոհաբանութեամբ հետևեալ, ի յաճախութիւնն
անբաւիցն լրեալ առ սմին իսկոյն կարկեցայ .
քանզի կրկնեալ զլուսոյդ անսպառ բարիսդ, որ
ի քէն առ իմ յամառս թշուառութիւն, քոյին
աղերսիւ առ քեզ մաղթեցից, յարմարեալ դար-
ձեալ ի նիւթս բանիս զտառ ողբերգութեան այսք
մատենի . լցից թախծութեամբք և հեծեծանօք :
Այլ առեալ խառնեցից ի տուողիդ հաճութիւն՝
ընդ ցաւոցն զդեղն, ընդ վհատութեանն զիրա-
խոյսն, ընդ յուսահատութեանն զյիշատակդ
անուան հաստողիդ, ընդ տիսրութեանս զափո-
փանսդ, ընդ իմումս դառնութեան զքաղցրու-
թիւն կենարարիդ, ընդ պատիժ օրինին զշնորհն,
ընդ պարտս անիծիցն զազատարար օրինու-
թիւնդ, ընդ մարմնոյ մահուն զամենայնիւ նորո-
գութիւնդ :

Գ. Հաւատամ հզօրիդ բանի, ուստի վկայեմ .
լուր լրութեան սրտիս, տէր Յիսուս, որ հնչումն
է առ քեզ մեծութեան ձայնի երկար գոչելոյ :

Որ մարմնակից և պատկերակից մեր եղեալ,
քահանայապետապէս անօրինակդ զօրինակին
խորտակեալ զլուծ, ընդ զենման մահու անաս-
նոցն՝ բարեբանեալ մարմնոյդ նուիրմամբ ան-
մահապէս միշտ մատուցանիս, և աննուազա-
բար քաւութիւն շնորհիս, ոչ սակաւամեղիցն
միայն, այլ և որոց հատեալ է ակնկալութիւն.առ
ելս կենաց: Զի որքան զօրէ մարմնոց անդամոց
առ մեղս կենդանութիւն, թէ և բիւրուց ամաց
ունիցի յերկարաձգութիւն, յորժամ Աստուածդ
բոլորեցուն վասն սորին կամաւ և յօժարութեամբ
զենումն ընկալեալ, մահու համբերես բաշխեալ
ի քաւութիւն: Զի ոչ եթէ մաքրութեանդ աղբիւր
պարտական գոյ մահու յօր ըստ օրէ կատարիլն,
այլ կամօք քովք Հոգւոյդ գործակցութեամբ՝
ի հաճութիւն Հօր և ի մեր հաշտութիւն ցանկ
մատուցանիս: Խոկ եթէ ամենիցդ Աստուած
անքնին՝ իմովս վասն իմ առ իմ փրկութիւն,
ի դէմս իմ, իբր թէ ընդ քոյդ էութեան ես իցեմ
մարմնով պարունակողիդ կցորդ միացեալ. և
դու, բարեբար, յաղագս իմ իյիմս կերպի փո-
խանակեալ ընդ իմում պարտեաց, և մահ ըն-
կալեալ անպարտդ զմահապարտիս վնասուց
պատուհաս, և իյիմ անուն յանցաւորապէս,
որպէս թէ կամաւ ընդ քեզ ես կրիցեմ, բազումս
մեռեալ և մնաս կենդանի. ոչ ուրացողացն

ձեռօք, այլ դաւանողացն հաւատովք աստուածապէս նուիրեալ և ի մասունս անհատս բաշխեալ:

Դ. Ասէր ոմն ողոքաւոր՝ չաւատալեացն պաշտօնատար . մեծ ինձ և անկշռելի առ սմին դատէր անյարմարագիր անձին յուսաղիր, Հաւատամ զփառս և զերջանկութիւն, քան թէ մարտիրոսութեամբ իսկ՝ թող թէ ուղղութեամբ իմս թշուառութեան յանցաւոր մարմինս վախճանընդունել: Իսկ զանձառութիւն խորհրդոյս այսուղիտեցի, դաւանէր իսկոյն, որ զի և մաքրոցն անձինք առանց նուիրման այսք յիշատակի չեն իսկապէս կատարեալք ի սպառ, եթէ ոչ ընդայս հրաշակերտութիւն մեծութեան հոգւով խառնեացին: Ապա թէ մեղաւորիս մասին կրկին մատուցար բաժին ասելով՝ յուսայր, իբրև այն թէ ես ինքն եղեր ճշմարտիւ, գրաւեալ զիմս դաժանութիւն ընդքումհամեղութեան, պատարագեալ քոյինանիւթզանգուածոյ նշխարաւդկենաց լուսոյ: Այսու ամենայնիւ ի վերնատանն նախանուէր բարեշնորհութեան՝ անհնարաւոր ախտիցն ճարակ՝ զմարմին և զարիւն իւր բաշխեաց ի քաւութիւն, ի վեր կարծեցուցանեէր քան զնահատակի վկայեցելոյ արեամբ կատարմամբ. յուսոյս օրինակ յարգաւորութեամբ զրել զիս ի փառս, այսմ փրկանօք հաւատալի երևեցուցա-

ներ, քան թէ քաւելոյ և ողորմելոյ և շնորհելոյ, որչափ աստուածականիդ առ մարդ զօրութիւն, և տիրական աստուածախառն մարմնոյն կամաւրական նուիրումն առ անասնական սպանդին մատուցումն, և անմահն առ մահկանացուս, լրյսն ահաւոր առ սոսուերայինս, յաւիտենականն քան զանցաւորս, բարձրեալն քան զերկրաւորս, անստեղծն քան զեղականս, բարին իսկութեամբ քան զթիւրեալս ընութեամբ, մանաւանդ զի իւր է կամելն և իւր կենազործելն, օրինութեանն առիթ քան զանիծիցս պատճառ :

Ե. Սրդ տոնւր խոցելոյս ի սիրտ և յոգի, աղաչեմ գթած, զառ ի յերկնուստ ընծայեալ զղեղդ կենաց. մատիր քաղցրութեամբ առ ախտացեալս մեղօք, քաւեա ի պարտեաց՝ ամենակատար քաւականութիւն : Իսկ առ ի յինէն այս է ճշմարիտ և անխաքելի կերպարան քանի, որ զի հաստիչդ ամենից ի սուրբս ընակես, և ըստ տարագու սերմանն և հնձելն է իրաւացի, ըստ ճշմարիտ բանին Պօղոսի, և աչացաւացն ի տապարեւու ոչ է զօրութիւն : Այլ դու, բարերար հաստիչ յոչէից, յարգես յաւետ իսկապէս համայն և զդաւանելն զքեզ՝ քաւական առ կենդանութիւն. և ոչ ես ընդսահմանաւ փակեալօրինի, այլ յաղթես՝ մանաւանդ թէ խզես զկապ կանոնի, և դու միայն մնաս պայման աւետեաց համօրէն

յանցաւորաց տարակուսելոց : Եւ քեզ ընդ Հօր Հոգւովդ սրբով փառք և իշխանութիւն յաւիտեանս . ամէն :

ԲԱՆ ԾԴ.

Կերոսին յաւեղուած կրկին հեծուրեամ .

Ա. Եւ արդ յամենայնի առ ամենայն ակնկալութիւն քո է ողորմութիւն, սկզբնալոյսդ աչաց տեսանելեաց և սրտի իմաստից թիսուս . քո է բարերարութիւն , կեանք և անմահութիւն : Դարձ առ իս գթութեամբ, և հանդերձեսցես դառնալինձ առ քեզ կրկին բերկրութեամբ . զի առանց քոց կամաց ոչ ունիմ լինել նորոգ փոփոխեալ . և եթէ ոչ կամք քո գթասցին, ոչ զօրեմ փրկիլ մահու պարտականս . և եթէ ոչ կառավարդ յարդարեսցես պատրաստել ինձ հետս ճանապարհի՝ որ առ քեզ բերէ, վիր է ինձ խորոց յաջմէ և յահեկէ :

Բ. Ահա ոչ պարծիմ ամենայն իրօք նախատեալս, ոչ պանծամ դսրովեալս, ոչ խրոխտանամ լրեալս, ոչ մեծաբանեմ պապանձեալս, ոչ ըմբոստանամ ձաղեալս, ոչ երջանկանամ եղկելիս, ոչ արդարանամ ամբարիշտս : Զի ոչ երբէք հարթ ընթանայ երիվար առանց սանձակալի, և ոչ նաւ համբառնայ հանդէպ առանց ուղղչի, և ոչ արօր կշիռ ինչ գործէ առանց մահակալի,

և ոչ Երկուորբեակք լծոցն ի ճահ ճեմեսցին առանց
եզրղի, ոչ ամպ վերաչուէ առանց հողմոյ, ոչ
աստեղք ցնդին և կամ գումարին առանց ժամա-
նակին, ոչ արեգակն փոխաբերեալ շրջանակի
առանց տարրական օդոյ, և ոչ ես նոքօք հան-
դերձ առանց բարեզործիոդ հրամանաց ակնար-
կութեան: Զի քու միայն ես տուիչ կենաց բանա-
կանաց և խնամիչ կարգաց հոլովման արարածոց,
և ի քէն է ինձ փրկութիւն, ըստ սաղմոսողին.
և դու ձայնես բարբառ խնդալից աւետեաց
հնչման յականցս լսելութեան ամենայն հասակի,
Եկայք ի հանգիստ իմ բնաւին աշխատեալք՝ և
ես մաքրեցից զձեզ ի պարտեաց: Խսկ զինչ օգուտ
ի լուացմանէն, եթէ կրկնակի զազրացայց. և
կամ որ օգուտ ի ճաշակմանէն, եթէ զեհենին
մատնեցայց: Եւ կամ զիարդ յԱբրահամ պարծե-
ցայց խորթացեալս ի գործոց նորին, որդիս գար-
շութեան հօր ամուլիացւոյ, և մօր քետացւոյ
կամ քանանացւոյ, ըստ մարգարեին ոք առ իս
յանկաւոր ձայնի. Ժառանգս մերժելի եթովպացի
և ոչ սենեկին Սառայի, ըստ տեսանողին առ իս
առածի, եղբայրս Շամբնի և կամ Գոմորայ,
համբակս անլուաց և անաղելի՛ խակակութ պոր-
տոյն խակութեան Ռողայ և Ռղողիբայ, ըստ Եղե-
կիէլի կրկնանախատն կշտամբութեան:

Գ. Եւ քանզի ի ծուփս բազմավտանգս ալէտանց

հողմոյ սաստկապէս զզուեալ ուժգին լկանօք
ի սպառ տագնապմամբ ի ծովին, փոխեալ ընկե-
ցեալ ի վտակն վայրենական ողողիչ. առ որս
զմատունս ձեռացս այսր անդր տարաբերեալ,
իբր ի հոսանաց բոնութեանց գարնանազայր
զետոց, արտաձգեալ յակամայ ընթացս ողոր-
մագին գլորման, ջրակուլ ոգեսպառ պղտորար-
բութեամբ, դաժանահոտ սկախառն մամռար-
մատ խառնախոփի մահաբեր երկամբք վանեալ,
ըստ որոց յուղիսիցն հեղեղիցին հեղձուցեալ :
Սյուռ առակաւ և ես եղեկելիս՝ խօսին և ոչ իմա-
նամ, գոչեն և ոչ ինչ լսեմ, բարբառին և ոչ
զարթնանամ, հնչեն և ոչ փոխադրիմ, փողեն
և ոչ գումարիմ, վիրաւորիմ և ոչ ևս զզամ,
կռոցն գարշութեան նմանեալ թափուր յազդ-
մանէ բարեաց իմաստից : Արդարեւ չար առա-
ւելյաւէտ խսկապէս քան զօրինակդ ճշմարտու-
թիւնս, ատելի և մեղադրելի և ատենին Քրիս-
տոսի արժանապէս մատնելի :

Դ. Եւ քանզի անդառնալի ուղւոյն յիշատակ
աստեացս պարտեաց զայս կտակ թողի որոց
ընթեռնուն, իմովս բանիւ առ Աստուած կար-
դալ հանապազորդութեամբ, այս կացցէ սահ-
ման յանձնառական խոստովանութեան մշտըն-
շենաւոր ձայնարկու առաջի քո, ամենակալ.
զոր գիրդ ընդ մարմնոյս և բանդ ընդ հոգւոյս

զանսամանելիդ միշտ թախանձեսցէ, իբր յանեղծական մաղթողէ ընկալեալ աղերս ի յիմոյս ձայնէ, բարեգութ, մարդասէր, օրհնեալ յաւիտեանս, ամէն :

ԲԱՆ ՇԵ.

Վերսիա յաւեղուած կրկին հեծութեան.

Ա. Ե՞ս վասն զի սլացեալ ոգւոյս թեօք ի թիւս անքաւից ծննդոց մարդկան եղի ի կշիռս իմանալեացս մտաց, ոչ զտի զոք համեմատ ինձ պարտաւոր. և առ այս զդաւթեան սաղմոսին զբանն ի յերգ ինձ առի դառն կշտամբութեան գաւազանաւոր գործավար. ով յարիցէ ընդ իս ի չարիս հաւասարելյանօրէնութիւնս : Եւ քանզի այս ըստ սմին մասին կնքեցաւ և ճշմարտեցաւ առ այրս մահու, և ես վկայեմ կրկին հաստատեալ. առ այսր իրաւունս զրեմ' ինձ միայնոյ զեղծանիլ ի սպառ, քան իմովս բանիւ բազմաց տարագրիլ. թերևս սովիմբ առ այսու արդեօք և ինձ շնորհնեսցես, շնորհնողիս զպարտիս իմոցն :

Բ. Եւ արդ զինչ քեզ աղերս հաճոյական ի յայսմ և ի սոյն, և ծուխս անուշից ընդունելի խնկոց մատուցից, զնվեալ թագաւոր երկնաւոր Քրիստոս, եթէ ոչ զառ ի յինէն անիծեալսն օրինել մաղթեմ, զկապեալսն արձակել, ազատել

զդատապարտեալսն, բարեգործել զնզովեալսն, պսակել զթշնամանեալսն, սփոփել զտրամեցեալսն, դարմանել զխորտակեալսն, խնամել զսարտուցեալսն, պատսպարել զնենգեալսն, զվիրաւորեալսն ի մարմին՝ յոգի բժշկել: Եթէ օրհնութեան բանիւ առ ոք մատուցայ, լուիցես. իսկ եթէ անիծիւք, մի հայեսցիս ընդունել, զըթած: Ես տառապեալս ամենաթշուառ ի վերջին սպասաւորութեան մաղթանաց այսր մատենի ի բովանդակ մտաց շնորհեցի իմոցն՝ փակեալ առ ի քէն զանիծիցն դժնդակ ըղձիցն չարաշուք ձայն. և դժնէից նենգողացն իմոց՝ ընդ բարիսն ի բոլոր սրտէ հաշտութեան արգահատեցի, վասն որոց և ծունը պաղատանաց կրկնեցի. որչափ դու ինձ ահա յայց ելեալ առաւել ողորմեսցիս ըստ քոյդ մեծութեան, գնվեալ խնամակալ, կեանքդ՝ մահացուիս, հզօրդ՝ տկարիս, ամենակարդ՝ վարանելոյս, իմաստութեանդ աղբիւք՝ յիմարիս և թմբրեցելոյս: Քանզի յաւէտ սխալեալ անկայ իբրև զողողակ մթային ոչ ընդելական ի հաղբս մահու անզգայապէս, չիմացայ զկորուստըն, չզիտացի զօրոգայթն, չտեսի զըմբռնող որսոյն ծածուկ մեքենայս, չկարծեցի զխաբումն կերպարանաց կեղծաւոր վարմին, չնկատեցի զգայթագորութիւնն շուրջանակի, չշօշափեցի զպատանդիչ զցանցարկ կարթին, ժամանեցին

ինձ չարիք, և ես ոչ կարացի ճանաչել, ըստ
սաղմոսողին :

Գ. Քանզի և որպէս իմաստակի ումեմն ար-
տաքնոյ բարւոք թուեցաւ, չար ասել զմահ առ
չիմանալոյն պատճառի, և ես վկայեմ իմովս
բանիւ. քանզի իբր զանզգայ պաճարս անանոց
մեռանիմք և ոչ զարհութիմք, կորնչիմք և ոչ
հիանամք, թաղեցեալ ինիմք և ոչ խոնարհիմք,
տարագրիմք և ոչ տագնապիմք, եղծանիմք և ոչ
զղանամք, մաշիմք և ոչ մտառեմք, պակասիմք
և ոչ պատրաստիմք, զնամք և ոչ զգուշանամք,
զերիմք և ոչ ևս զգամք : Իսկ հանգիստ ասել
Երջանկին Յորայ զվախճան մարդոյ, և ես խոս-
տովանիմ զսոյն ընդսրբոյն, եթէ ոչ ունեի զբեռն
աշխատութեան մահացու գործոց ստանձնեալ :
Մանաւանդ զի որոգայթն գաղտնի և հնարադիրն
աներեւակի, տարր ժամանակիս յանէից, ան-
ցեալն անյայտ և ապառնին կարծողական, ես
անհամբեր և բնութիւն թերահաւատ, ոտք ան-
հաստատք և միտք ցնդեալք, կիրք հարկաւորք
և բարք անժուժկապք, մարմին մեղսամակարդ
և յօժարութիւն երկրասէք, դիմամարտութիւն
տնկակից և խոռնութիւն ներհակական, բնա-
կութիւն կաւեղէն և անձրեք ուժգնակիք, կա-
րիք անթռելիք և պատահարք ամենագրաւք,
միտք չարախնամք և տենչմունքբարիատեացք,

կեանք առօրեայք և զմբաղք սակաւաւորք, խաբմունք յիմարութեան և խաղափիք տղայականք, աշխատութիւնք ընդունայնք և վայելմունք երազականք, համբարք ոչնչից և պահեստք հողմոց, նմանութիւնք ստուերաց և կերպարանք ծիծաղելիք : Քանզի իբրև եկն եհաս պատուիրանն, ըստ պօղոսեան բանին, անպատրաստ գտեալ զիս ինքեան, մեղքն կենդանացան յանդիմանեալ յարդարութեանցն և ես մահացայ կենացն և կենդանացայ կորըստեանն :

Դ. Գողացան օտարք, չարին գումարք, զըստացուածս սրտիս իմաստից, ըստ զրոյն կանխաբանութեան. որով եկն եհաս խկոյն աստանօր իմաստութեան ինձ նուազանալ, ըստ առակողին, և առաւելով ոչ բարւոյ ցանկութիւն : Ոչ յառեցի զակն ոգւոյս ի զլուխն իմ կենաց Քրիստոս, որով ընդուղիդն հետևեցայց : Քանզի կամելով ուժգինս ընթանալ՝ ընկլայ սաստկապէս, յանչափն ձգտիլ՝ իմոյն ոչ հասի, ի մեծագոյնն ամբառնալ՝ աստուստ զլորեցայ, յերկնայն ուղւոյն անդնդոց մատնեցայ, իզզուշանալն առաւել՝ յաւէտ վնասեցայ, յանարատն պահիլ՝ մանք խորտակեցայ, կարծելով ընդ ահեակն մրցիլ՝ յաջն զթեցի, ի զերկըրդն խուզել՝ զնախին կորուսի, ի խնդիր սակաւուն՝ ի կարեռ-

բացն զրկեցայ, իյովստին պահել՝ դաշինն դըր-
ժեցի, առ սովորութեանն կտրիլ՝ կորուսիչս
զտի, ի փոքունցն փախուցեալ՝ մեծամեծացն
մատնեցայ, զոր ես ինքն ինձէն ստեղծեալ՝ չա-
րաչար դատախազ անձին կարգեցի : Յորոց
փրկել զմատնեալ գերիս դու միայն զօրեսցես,
կենաց մատուցեալ զընծայեալս մահու զիոզիս .
զի դու միայն, տէր Յիսուս, ճանաչիս բարերար,
անսահման փառօք ընդ Հօր և Հոգւոյդ սրբոյ
օրինեալ յաւիտեանս յաւիտենից . ամէն :

ԲԱՆ ԾԶ.

Վերսին յաւելուած կրկին հեծուրեան .

Ա. Իսկ զառիթսն մահու դիպուածս դժոխար-
մատ ծառոյս դառնութեան պտուղք, ընտանիք
թշնամիք, հարազատք հակառակք, և որդիք
դաւաճանողք ստորագրեցելովք մասամբքդ նը-
շանակեցից՝ գրեալ յանուանէ, որ են այսոքիկ :

Բ. Սիրտս նանրախորուրդ, բերանս չարախու,
ակնս յայրատատես, ականջս վրիպալուր, ձեռնս
մահաձիգ, երիկամունքս անփորձ, ոտնս մոլո-
րաշափիդ, ընթացքս աներկիւդ, հետք խոտոր-
նակ, շունչք ծխախառն, գնացք խաւարային,
գոյութիւն լերդի վիմական, խորհուրդ ծորեալ,
կամք անկայուն, չար անփոփոխ, բարեմաս-
նութիւն սասանեալ, անձն տարագիր, աւանդ

վաճառեալ : Գազան վիրաւոր, թոշուն նետահար, փախստական քարավէժ, ըմբոնեցեալ վնասապարտ, աւազակ ծովակուր : Զինուոր նենգաւոր, մարտիկ անպատրաստ, սպառազէն անժուժկալ, մշակ հեղգացեալ : Աղօթական անխրախոյս, բեմական ստորեաքարշ, քահանայ անկնդրուկ, օրինական աննուէր : Դպիր կշտամբեալ, իմաստակ խելազար, ճարտասան անձոռնի : Կերպ անպատկառ, դէմք անամօթ, երեսք լպրշեալ, գոյն անհամբոյր, տիպ տըմարդի, զեղ ծանակեալ : Խորտիկ խանգարեալ, ճաշակ գարշեցեալ, այգի գաղձնաւոր, որթ որդնահար, պարտէզ փշաբեր, հասկ ուտճահալ, մեղր ի մկանց ճարակեալ, անպատսպար անկեալ : Սնապարծ յուսահատ, անհամոզելի նզով, անհաշտական բաժանեալ, ունայնաբան շաղակրատ, պաճարամիտ գոռոզ, անասնօրէն ապիրատ, դժոխային ազահ, աներասան յանդուգն : Մոլեգնութիւն անաստուած, ձեռնաձրգութիւն սպանող, տատասկացան երկրագործ, երջանկութիւն եղկելի, մեծութիւն վատթարեալ, վայելչութիւն անշքեալ, կարողութիւն տկարացեալ բարձրութիւն խոնարհեալ, փառաւրութիւն ընդոտնեալ, պատուիրանազանցութիւն յարակայ, սխալսնք ինքնակամ : Մատակարար կամակոր, խորհրդակից նենգաւոր,

բարեկամ հատուածեալ, հազարապետ գողամիտ, մերձաւոր կծծի, բաշխող ժլատ, վերատեսուչ կարկամ, ոգի անախտակիր, իղձք անսէր, բարք ատեցող, աղիք անզթականք, գնացք անխոհեմ, աներևոյթք վնասեալք, ծածուկք անիծեալք, դիպուածք թշնամանեալք : Վաճառական վատնիչ, շահարար շուայտեալ, պաշտօնեայ արբեցող, գանձուց ոստիկան երկմիտ, պատգամաւոր բանսարկու, դռնապան քնէած, աղքատ հպարտ, մեծատուն ծխտող : Դիւանապետ անօրէն, պահապան մատնիչ, բնակակից չարախօս, սուրհանդակ անժաման, թղթաբեր պարտաւոր, առաքեալ խոռվարար, միջնորդ անիմատ : Արքայ արտալած, թագաւոր թարմատար, կայսր ոգէկործան, իշխան տիրադաւ, զօրավար զրկող, դատաւոր ակնառու, ոամիկ ինքնազործ : Նախատողի ծաղը, սիրելոյ աշխար, բանազրի դսրով, յանդիմանչի դատախազութիւն : Քանզի և ի վեհագունիցդ կոչմանց էր ուրեք արդեօք զի էի, իսկ ի վատթարականացդ մասանց եկն երբեմն եհաս զի եղէ : Արդ այսքան վնասակարութիւնք խարդախութեանց յաճախագունից, յորոց յոմանց խաբեցայ իբրև զիմար, և յոմանց տիրեցայ իբրև զոկար, կամաւ մատնեալ զիս ինքն մահու :

Գ. Արդ զնիս ի վերագրելոցդ մասանց քեզ ատե-

լեաց և իմ կորուչաց ի սպաս պաշտաման քեզ
ընծայեցից . զմրպիսիս ապականութեամբ պա-
րագրեալս ամենասուրբդ քո մեծութեան հան-
դէպ կացուցից , և կամ որքանեօք երկայնմտու-
թեամբք համբերեսցես այսքանեաց պարտուց ,
որքան ներես , որպէս լուսցես , զիարդ իսկ ան-
սայցես , իբր ոչ մատնեսցես հարուածոց զանից
զարժանիս սատակման մահու : Արդ այսոցիկ
աննշոյլ մթութեանց հոգւոց խաւարի ողորմու-
թեամբ լուսոյ քոյ պատահեսցես բժշկել քաւել և
կենագործել , զօրեղութիւն անվթարելի . և քեզ
փառք յամենայնի . ամէն :

ԲԱՆ ԾԷ.

Վերսին յաւելուած կրկին հեծութեան .

Ա. Քրիստոս Աստուած անաւոր , մե-
ծութեան տեսակ , անքնին բարձրութեան
պատկեր , անսահման զօրութիւն , կերպարան
փրկութեան լուսոյ , պաշտպան կենաց , դուռն
արքայութեան վերնում հանգստեանն , ճանա-
պարհ հանդարտութեան , ապահնութիւն նորոգ
և անտխրական երանութեան , ամենակալինք-
նիշխանութիւն բոլոր Էականութեան , օրինու-
թեան կոչումն , աւետեաց ձայն , բերկրութեան
բարբառ , անմահութեան դեղ , որդի անձառ
Աստուծոյ միոյ : Որ ինձ անհնարին է , քեզ դիւրին

է. որ ինձ անհասն է, քեզ սահմանեալ է. որ ինձ անանցն է, քեզ հպաւոր է. որ եղկելոյս ինձ ծածկեցեալն է, քումդ երանութեան մերձաւոր է. որ ինձ անկարելին է, քեզ կատարեալ է. որ ինձ անկշռելին է, քումդ անճառութեան չափեալ է. որ ինձ յուսահատութեանն է, քեզ սփոփանաց է. որ ինձ անբժշկականն է, քեզ անվըտանգելի է. որ ինձ հեծութեանն է, քեզ խնդութեան է. որ ինձ ծանունք են, քեզ թեթևագոյնք են. որ ինձ եղծեալն է, քումդ զօրեղութեան զրեցեալ է. որ ինձ կորուսեալն է, քեզ ըմբռնեալ է. որ ինձ անճառն է, քեզ համարեալ է. որ ինձ մռայլն է, քեզ ճառագայթ է. որ ինձ անթիւն է, օրհնեալդ քում ձեռին բովանդակեալ է. որ ինձ սոսկալին է, քեզ հեղտալի է. որ ինձ փախչելին է, քեզ վանելի է. որ ինձ անմատոյցն է, քեզ դիւրահերքելի է. որ ինձ մահաբերն է, քումդ էականութեան զօրութեան ընդ ոչգոյսն համարեալ է :

թ. Այլ դու, ողորմած Աստուած բոլորից տէր Յիսուս Քրիստոս. և այսմ զօրես առ ելիցն հնար' եթէ զթասցիս. վասն անուան փառաց մեծութեան Հօր քոյ օրհնելոյ, վասն կամաց գթութեան Ոգւոյդ քոյ սրբոյ, տես ի տաժանաւորս կրից յանդիմանական յայտնութիւն, և ի խորոց սրտի ինքնամատոյց դատախազութիւն.

նայեա ի բնութեանս ամենապատաղ իակութիւն , և պարզեա բժշկութիւն վիրացս և հնարաւորութիւն կորստեանս , զերծումն բազմամասնեայ մահուս և շատիդ կենաց ապականելոյս , նորոգութիւն եղծմանս և մուտք յուսոյ ամբարշտելոյս : Եթէ ես զաննմանն ինձ կամս ցուցի , որչափ առաւել դու զբնաւորականսդ քո զընտանի բարերարութիւնսդ . Եթէ ի փշոց պտուղ ընծայեցաւ քաղցրութեան , որչափ առաւել ի ծառոյդ կենաց ճաշակ անմահութեան . Եթէ ես իմոց ատելեաց ողորմութիւն մաղթեցի , դու քոյոյս զիարդ ոչ կրկին մատուսցես , հզօր , յաննուազդ առատութենէ :

Գ. Արդ տես ի քոյդ մեծութիւն , բարձրեալ , նայեցեալ ի յիմս փոքրկութիւն . ընկալ զսակաւ խոստովանութիւնս անհամար մեղացս , որ զբնաւն համայն տեսանես . և որպէս զՎիմին զթել ոչ զրեցեր , և զաւազոյս փոքրու սասանել մի համարեսցիս . և իբրև զԴաւթին ընդ մեղայն ասել իսկոյն անցուցեր զպատիժ պարտուցն , և առ իմ ձայնիս հեծութիւն զնոյն զործեացես երկայնմըտութիւն . որ տաս ամենեցուն առատապէս անաշառութեամբ որպէս յաղթող բարի բազմիմաստ , և ոչ նախատես զյետնեալ ստրուկս որպէս ողորմած և ամենաստեղծ . ստացիր վերըստին և մի կորուսաներ զբուժեալս արեամբ քո

և զբուծեալս ստեամբ քո, զթած: Զի քո է փըր-
կութիւն, և ի քէն է քաւութիւն, և քեզ վայել է
փառք յամենայնի յաւիտեանս, ամէն:

ԲԱՆ ԾՂ.

Վերսիմ յաւեղուած կրկիմ հեծուրեամ.

Ա. Օրչեալ տէր Յիսուս ընդ Հօր, ի կամս հա-
ճութեան Հոգւոյդ քոյ սրբոյ, և օրհնեալք ամե-
նայն առ ի յօրհնելոյդ օրհնեցան. օրհնեալ միայն
Որդի օրհնելոյ. Չիք իմ թագաւոր իշխեցող շնչոյս
բաց ի քէն, Քրիստոս: Այս է օրհնութիւն Յակո-
բայ, ասէ Եսայի, յորժամ բարձից զմեղս նորա:

Բ. Արդ ողորմեաց ինձ, Տէր բարեգութ, ըստ
Եախնիդ քո սովորութեան, և օրնիեա զանօթս
քո բանական, ըստ ձայնին Դաւթի և ըստ Մով-
սեսի. զի բանիւդ քո Փրկութեան ժամանեալ
հասից քաւութեան օրհնեալ առ ի քէն: Աստուա-
ծապէս ինձ հրաշագործեաւ, ողորմած արքայ
Երկնաւոր, որպէս անկելոցն ի բազմաժամանա-
կեայ մահճացն Խշտիս, ժողովելոցն ի սրահին
Բեթհեղդայ: Յորոց մի էր և կրկին թերահաւատն
Երից տասանց և ութի միոյ ամօք ախտացեալ
յօդիցն լուծմամբ, որում ոչ անխայեցեր զբժշ-
կութեանն ձեռնառութիւն, իբր զիտելով զան-
քոյժ չարութիւնն՝ որ Եիւթեացն քեզ յաւուր
մատնութեան դառն զիշերին տիրամարտու-

թեան երախտաւորիդ, մեծիդ և բարերարիդ։
Որ թէպէտ և կանխաւ իմն զզուշացուցեր, թէ
մի մեղանչեր, զի մի կրկնեսցին կրկին քեզ չա-
րիք, ոչինչ վերջացաւ լինել ձեռներէց սկզբնա-
ւոր անհամբուրելի դատողացն զքեզ ի խաչին։
Եւ դու այնպիսւոյ անյարիք ջատուկ մահու
ծնգեցեալ չարաշուք առն ողորմեցար, անճառ
բարութիւն, սխրալի մարդասիրութիւն, սար-
սափելի ներողութիւն, սոսկալի երկայնմտու-
թիւն, անբաւելի քաղցրութիւն, փառատրելի
հեզութիւն։ Որ միշտ յաղթիս ի զթութենէ և ոչ
թշնամանիս, պարտիս յողորմութենէ և ոչ պար-
սաւիս, բռնադատիս ի մարդասիրութենէ և ոչ
անգոսնիս, հարկիս ի բարութենէ և ոչ հայհոյիս,
ստիպիս իսիրոյ և ոչ բամբասիս։ Պաղատիս
դարձին իմ առ քեզ և ոչ ձանձրանաս, արագես
զկնի ապերասանիս և ոչ լքանիս, ձայնես չլսո-
ղիս և ոչ սրտմտիս, փութաս մեղկելոյս և ոչ
խափանիս։ Առ չարս ես բարի, առ ամենա-
պարտս ես ներող, առ մեղաւորս ես քաւիչ, առ
խաւարեալս ես լոյս, առ մահացեալս ես կեանք։
Գ. Այս են զիրք ամենայն հոգեշունչ օգտակա-
րութեան, որ յաճախս ծնանին երկնաւոր պը-
տուղս անճառս և զարմանալիս։ Ասա և ինձ
թշուառացելումս, օրհնեալ ամենապարզե, արի
առ զմահիճս խշտացդ մեղաց ի վայր կործան-

մանդ, և հետևեալ ժամանեայ յանդորր հանգիստ
անաշխատ կենաց : Խզեսցես ամենակարող սու-
սերաւ բանիդ հրամանի զերիզապնդեալ մահազ-
գեստս պարփակութիւն դժոխազնեայ կապա-
նացս, և ըյծ ինձ զհանգոյցս խեղդողականս
ոգեպահանջ սաստկութեանս, առաքելով զար-
ժանաւորս մահու յազատութիւնն վերին անանց
ըերկրութեանն, կենսաբեր և աստուածային քո
բանիւդ : Մի տակաւ տակաւ ազդեսցես, և մի
օր ի յօր յերկարաձգեսցես, զի մի ստուար ծան-
ըութիւն բեռանցս մեղաց տիրեսցէ թիկանցս
ազդերաց, և կործանեալ զիս կորացուսցէ հայել
ի դժոխս, և ուժգնակի գոռող բռնութեամբ ան-
պարապ հոգեւորական զինուն արարեալ՝ մահու
ծառայեցուսցէ : Այլ օգնեան ինձ, բարի վշտակից
հեծութեան կարեացս մահու երկանց, առեալ
յինէն զփայտ սատակմանն, որպէս երբեմն յու-
սոյ պահակին . որով կառուսցես զվայելչականն
յաղթանակի արի զօրութեանն, պնդապէս հա-
ւատով յուսոյն կարծրութեան ընդ քեզ բեկուել
անսայթաքելի : Եւ քեզ ընդ Հօր Հոգւովդ սրբով
փառք և իշխանութիւն յաւիտեանս . ամէն :

ԲԱՆ ԾԹ.

Վերսիա յաւելուած կրկին հեծութեան .

Ա. ՀԱՆՍՏԱՄ և վկայեմ մտաց զիտութեամբ՝
ի քէն ազդեցեալ ոգլոյս իմաստիւ ուշիւ տես-
ման, զի ըղձալի են քեզ, բարերար, աղաչանք
մեղաւորաց՝ քան զիսնդրուածս արդարոց։ Զի
մինն զպարտութիւն անձինն յայտնեալ՝ շնորհիդ
քո սպասէ, առ որ ծանուցեալ զբնութեանս չափ,
և մեծ կշտամբիչ աստէն համբարձեալ ինքնո-
գոր մարտակից նմին իսկ ինքեան և դառն դըս-
րովիչ և ծածկատես դատախազ։ Իսկ միւսն
յարդիւնս բարեացն իւրոց նայելով, յանձին հա-
րեալ ձեռն վստահութեան, մոռանայ զսահման
ընութեանն, և պարզեաց քան ողորմութեան
դիտեալ ակն ունի։ Վասն որոյ առ մինն անթիւ
են ստեղծուածք ճառից, որ զողորմութեանցդ
քո փողովբարբառոյ ազդէ։ իսկ առ միւսն լրեալ
են քոյդ, անքնին ահաւոր և ամենախնամ, ամա-
չեմ ասել՝ թէ և երկրաւորիս գործոց պատմու-
թիւն զքոյդ յառաջեալ։ Արդ արի Տէր, և մի զօ-
րասցի քան զքոյդ աջ հողեղինի։ մի կշռեսցին
ողորմութիւնք քո ընդ ջանից մարդկան։

Բ. Եւ արդ առողջքն անդամօք անկարօտք են
բժշկութեան, և տեսանողականքն աչօք չունին
պէտս առանորդի, և փաթամքն ընչիւք ոչ

դեզերին առ դուքս լիոցն , և ամենայնիւ յղփացեալքն ոչ սպասեն փշրանաց սեղանոյ հացի , և սուրբքն վարուք ապէնիազ են ողորմութեան : Եւ արդ ինձ գթասցիս ողորմել , բարձրեալ երկնաւոր հզօր , ամենատխուր վարանեցելոյս : Քանզի թէ էի իբրև զՅոք , ասէի զանձն իմ իբրև զնա արդար և անարատ . թէ էի իբրև զՄովսէս , ասէի վստահութեամբ զնորայսն , ծանիցէ Տէր զայնոսիկ որ իւրն են . թէ էի իբրև զԹափիթ , ասէի' արարի զիրաւունս և զարդարութիւն , և դարձեալ զմեծն քան զբնութիւն մարմնոյ , զմեղս թէ տեսանէի ի սրտի իմում , մի լուփցէ ինձ Տէր : Թէ էի իբրև զԵղիա , ասէի զանձն իմ այր Աստուծոյ . թէ էի իբրև զԵրեմիա , զքոյդ ճշմարտութիւն յանձն օրինակէի . թէ էի իբրև զԵզեկիա , պարծէի զբարւոքն և զիրաւացին՝ զնացի առաջի քո արդարութեամբ . թէ էի իբրև զՊօղոս , ասէի զիս բնակարան ազդարան և ընդունարան Աստուծոյ բանին : Այլ ես անօրէնս ի մէջ զիտութեան օրինացն , ոչ միայն չունիմ զանձն իմ քեզ ընծայել յարգանօք բանից իբրև զնոսա և զբնաւին չարս որպէս զայնոսիկ առաջի քո յիշատակել , այլ և ոչ զամենուատ գոյից զբարեհոչակեալ անունդ հզօր ամբարշտեալս լեզուով գովել : Խսկ դու առ ամենայն հնարս զօրաւոր՝ մատո՞ ինձ ոգի

փրկութեան, աջ պաշտպանութեան, ձեռն այցելութեան, հրաման բարութեան, լոյս ողորմութեան, բան նորոգութեան, պատճառ քաւութեան, գաւազան կենաց օգնութեան : Զիդու ես յոյս ապաւինութեան, տէր Յիսուս Քրիստոս, օրհնեալ ընդ Հօր Հոգւովդ սրբով յաւիտեանս յաւիտենից . ամէն :

ԲԱՆ Կ.

Վերսին յաւելուած կրկին հեծուրեան.

Ա. Եւ արդ որպէս զի ոչ վայելէ օրհնաբանութիւն ի բերան մեղաւորի՝ ի ճշմարիտն առակէ կանխաւ իսկ ուսայ, զիանը յաւելից կրկնել զնոյն գովութիւն աղաչաւորս բազմապատկառ, որ հանապազ ընդունիմ անէծս ի սաղմոսին բարեբաստութեան : Զի թըր երգեցից ինձ վըտանգս և արձանացուցից նախատինս, և ի մերկութեանս զըկի փուշս ընդ շուշանաց ժողովեցից : Զիանը ընդ Դաւթի համարձակեցայց ասել, թէ զատամունս մեղաւորաց փշրեսցես. զիանը դարձեալ, թէ մի անօրէնք բնակեսցեն առաջի աչաց քոց. զիանը, թէ դատ արա ինձ Տէր ըստ արդարութեան քո, ըստ անբժութեան իմոյ որ յիս . զիանը, թէ կատարեսցին չարիք ի վերայ մեղաւորաց . զիանը, թէ խորտակեսցին բազուկք մեղաւորի և չարի, և զայլն

որ զկնի . զիարդ , թէ տեղասցէ ի վերայ մեղաւորաց որոգայթ հուր և ծծումք . զիարդ , թէ սատակէ Տէր զշրթունս նենգաւորս և զլեզուս մեծաբանս . զիարդ , թէ փորձեցեր զսիրտ իմ և ոչ գտեր անիրաւութիւն . զիարդ զյաջորդն սմին , թէ ես պահեցի զմանապարհս խիստս . զիարդ զեսն , թէ ես արդարութեամբ երևեցայց երեսաց քոց . զիարդ , թէ և ես եղէց անբիծ ընդ նմա . զիարդ զմիւսն , թէ հատուսցէ ինձ Տէր ըստ արդարութեան իմում և ըստ սրբութեան ձեռաց իմոց . զիարդ անձամբ ինձէն զստութիւն իմ ծանակեցից՝ ասել ընդ սրբոյն , թէ լուացայց սրբութեամբ զձեռս իմ . զիարդ ի մէջ նանրութեան զամբարշտացն աթոռս բամբասեցից . զիարդ զերջանկին պարծանս թշուառացելումս կերպաւորեցից , թէ դատ արա ինձ Տէր՝ զի ես յանբժութեան իմում զնացի . զիարդ օտարս ի բարեաց՝ զիտողիդ զաղտնեաց արգահատեցից թէ մի համարիր ընդ ամբարիշտս զանձն իմ . զիարդ ես ինքն գոլով զայլս անիծեցից , թէ տուր նոցա Տէր զզործս նոցա , և ի կարգ բանիցն համարձակեցայց :

բ . Քանզի թէ զյետինս բանիցն առաջնովքն աստանօր եղից , կրկին ծանրանան ինձ ցաւք և յաճախեսցեն դառնութիւնք : Բայց ի շեղեցելոցն արտասուաց՝ դոյզն մի չափեալ , բաւա-

կանացայց հանապազորդեան յանդիմանութեամբ սաղմոսարանին ընտանի ձայնիւն, որ զպարտաւորեալս միշտ կշտամբէ . առ որս և սպառուած քառասներորդի իններորդի հատուածի բանի յանդիմանողի զիս զարշեցուցեալ, հանապազ խայտառակէ . խցեալ զբերանս ի փառաբանութենէ, եղկելի զանձն իմ ցուցանէ, աստուածային ձայնիւն դատախազեալ, յակնկալութենէ կենաց լքանէ, միանգամայն և վիրզս մահու ինձ իբր ի պատճշէ առաքէ : Քանզի թէ չար է անէծս առնուլ յօտարէ, ապա անձամբ զանձն անիծանել կրկին չարաչար . իսկ եթէ չառնուլ նախատինք ի մերձաւորաց օրէնք են ; ապա ի տեսողէն հայել զայսոսիկ, կրից արեան տաժանմունք, վիշտք աղէտից և խէթք մտաց : Բայց թէ առ խոնարհութեան անձին իւրում մատնեսցի, ջնեալ և կշտամբեալ անիծիւք ի լեզուէ իւրմէ, ի խոստովանեալ և յամենիշխան շրթանց բերանոյ վերնոյն օրհնեսցի . զի ճշգրտեալ թարգմանեաց զդարձն իւր առ նա՝ զիետս կենաց ոչ լքանելով . սահմանաւոսիրոյ զպարտեացն արմատ կրճատեաց, ոչ տիրեալ ի խարդաւանաց չարաբանողաց, ոչխարհութին Քրիստոսի գտաւ բժշկեալ՝ դիմելով ի յաղն ըուժիչ աղեացն արկածից : Բայց ևս անբանկան բարոյից է՝ ասուն կենդանեաց ի մէջ

դալարոց ծաղկածին վայրից կենաձիր բանից
թմբը ութեամբ մտաց իյարօս մահու ճարակել:

Գ. Եւ արդ քանզի իմ է առակս վերջին
կշտամբողական, և առ իս ակնարկէ զդի-
պուածոցն չար պատահմունս, որ ինձէն անձին
նիւթեցի միշտ զեղմունս կիզանողականս հրոյ
տոչորման, հոսեալի յերկնուստ զգոյիւ գագա-
թանս իմաստնարանի բազմակիս : Քանզի
զիարդ ի յարդիւնս ինձ օգտից սաղմոսն եկեսցէ,
յորժամ անպտուղ ի բազմերգութենէն լինիցիմ,
ոչ նուագել հոգւով, ըստ թելադրելոյն Պողոսի :
Զիարդ ընդ մարգարէին ևս զտէրունին խառ-
նեցից մեծս մեղաւորաց՝ նկունս պիտանեաց,
ասել ընդ սրբոյն, թէ ի բաց կացէք յինէն
ամենեքեան որ գործէք զանօրէնութիւն . զիարդ
ոչ ունելով ի բազմացն պատուիրանաց կատա-
րեալ՝ շնորհին և օրինին՝ բարբառեցայց զեր-
ջանկին, որ նախ ինքն արար զոր մեզ կանո-
նեաց, թէ քանզի ծառայս քո պահեցի զայս, և
որ զիետն գան ասացեալքն . զիարդ թափուրս
ի լրութենէ իմաստից կենաց ընդ երկիւղածս
Տեառն օրհնեցից . զիարդ ընդ մեծին մաղթանաց
զիմս յօդեցից, թէ զմին խնդրեցի ի Տեառնէ՝
զտեսիլ վայելչութեան նորա և զիրամանատա-
րութիւն տաճարի նորա . զիարդ ի հրաժարելին
ինձ ձեռնամխեցից, յորժամ լսեմ, թէ ուղղոց

լայել է օրհնութիւն. զիարդ շրթամբք իմովք
զանձն իմ անփծից՝ ասելով զկնի յոլովից
առեալն, թէ երեսք Տետոն ի վերայ չարագոր-
ծաց՝ սատակելզիշատակս նոցա յերկրէ. զիարդ
զմիւսն դարձեալ, թէ չարք վաղվաղակի սա-
տակեսցին. զիարդ զկերպարանացն իմ նմա-
նութիւն, թէ բազուկք ամբարշտաց խորտա-
կեսցին. զիարդ սատակման ինձ պաղատեցայց,
թէ ահա մեղաւորք կորիցեն. զիարդ զբազմայա-
ծեան լեզուս ի յօրհնեալն բան մխեցից, թէ
ասացի պահել զճանապարհն իմ, զի մի մեղայց
լեզուաւ իմով. զիարդ Փշովք մեղաց հեղձեալս
զանարատին պարծեցայց, թէ այլ զիս յանքծու-
թեան իմում ընկալար. զիարդ ես մեղաւոր և
կրկին պատժաւոր զիանգունակիցսն դսրովեցից
ապրել ի նոցունց, թէ ի մարդոյ մեղաւորէ նեն-
գաւորէ փրկեա զիս Աստուած :

Դ. Զիարդ իբր ոչ կռապաշտեալ անպատկա-
ռապէս պերճացայց ունայն պանծանօք ասել
ընդ Դաւթի, միթէ մոռացեալ իցէ մեր զանուն
Աստուծոյ, կամ ձգեալ զձեռս ի մաղթանս օտար
աստուածոց. քանզի որ ի մեղս գարշութեան խո-
նարհնեսցի, առաջի կայ նորին կառուցեալառեալ
ի պաշտօն յաւսնականացն ախտարծարծիցն
պոռնկապատիր պատկերացն կերպարան՝ Աս-
տարտայ և Քամովսայ և Մեղքոմայ արուար-

ձանի և Թարահատայ թարմատարի, ընդ զազրու-
տեացն կանացեաց՝ իշանդամիցն պատկառանք
անվերարկու ծանակութիւնք : Ի՞բր ոչ պատկա-
ռեցից սովիմբ ասել ընդ նահատակին, որ զայս
դիմագրաւութիւն առ բարին ունէր միշտ, թէ
վասն քոյ մեռանիմք զօրհանապազ, և որ ի
կարգին է սորին սաղմոս : Ի՞բր յիմարս յարս
և վատթարս ասել ժպրհիմ, թէ բերան իմ պատ-
մեսցէ զիմաստութիւն և սիրտս զնանձար . Իբր
մարդելոյզ կերպարանաւոր՝ զմարդահաճոյիցն
ոսկերս ցրուել մաղթեցից . Իբր զկրկին երկրոր-
դեալսն մեծանունն բարութիւնս, թէ հաճոյ եղէց
առաջի Տեառն յերկրին կենդանեաց : Զիարդ
ունողս անբաւից մեղաց զարդարոյն առեալ
կարդացից, թէ ոչ մեղք իմ և ոչ յանցանք,
առանց մեղաց ընթացայ և ուղիղ եղէ . զիարդ
զիս ինքն մատնեցից կորստեան յասելս զայս
բան, թէ մի ողորմիր գործողացն զանօրէնու-
թիւն . զիարդ, թէ որպէս հալի մոմառաջի հրոյ,
այնպէս և մեղաւորք յերեսաց Աստուծոյ .
զիարդ զրգեալս ապականացու փափկութեամբ՝
սահմանեցից զաննմանն ինձ բան, թէ խոնար-
հեցուցի պահօք զանձն իմ, և զազգակիցն նորին
ընդ նոյն . թէ ես ի նեղել նոցա քուրձ զգենուի,
և իբրև զգաւոր և զտրտում խոնարհ առնէի :
Ո՞րպէս հանդարտեցից զնմանեացն իմ պատիժ

միշտ յիշատակել, թէ սակայն մրուր բարկութեանն Աստուծոյ ոչ սպառեացի, և արբցեն ի նմանէ ամենայն մեղաւորք երկրի. իբրև զեսն առ սմին, թէ զամենայն եղջիւրս մեղաւորաց փշրեսցես: Զիարդ զապերախտութիւնն Յակոբայ ի ճառ առեալ հենգնեցից, որ ընդ ստուերին զժշմարտութիւնն ընկալեալ, մոռացայ ընդ նոսին նոցին թերութեամբ զերախտիսն Քրիստոսի աստուածայնովքն արուեստիւք խաչին փրկանօք, քան նոքա զզօրավարութիւնն Մոլսեսի ցպոյն սքանչելեօք, որ զօրինակն նկարագրէր տէրուեական տնտեսութեանն : Զիարդ զյարուցելոցն ի վերայ դիւաց զաղէտոցուցից, իբր նոքա զօտարացեղից խուժադուժ ազգացն ասելով, թէ արկին զդիակունս բարեացն որ ի մեզ՝ կուր վնասակարացն թոչնոց, այս է՛ այսոցն օդայնոց. որպէս զանկեալ զսերմն բանին ի ճանապարհին, և զմիաբանեալ զկամս ընդ չարին՝ սուրբ անուանեցից, իբրև զնմանակիցն առ ի նոյն շաւիդ չարին պատերազմի՛ գուպար զազանամարտ մտացս օցտելոց զորես զօրացուցի գործակցեալ հնարից բանսարկուին : Եւ ոչ ունիմ աղերսել, թէ մի լռեր և մի դադարեր, Աստուած, և խորհեցան ի վերայ սրբոց քոց և ասացին, զոր ի կարգէ սաղմոսիս է աղօթել: Քանզի յոյժ պատեհագոյն է առ-

նուլ զայսոսիկ ի վերայ բռնութեան մոլեկան
դիւաց միշտ ճակատելոց առ ներկայիս խռո-
վութիւն , և ընդ նոսին նոցին մշակաց :

Ե. Յորոց դու, աէք Քրիստոս, Որդի բար-
ձրեալ մեծիդ Աստուծոյ , պահեսցես և ամրա-
ցուացես երկնային զօրուդ շրջափակութեամբ
յամենայն ընթացից խաբողին հողմոց խաչիւդ
լուսոյ զմեզ պաշտպանեալ . որ զի թէ գտցին
յիս անօրէնութիւնք բազմօրինակք , այլ ոչ
հայհոյութիւնք : Որ ոչ հանգեար ի կորուստ
նմանեացն իմոց ամբարշտելոց , այլ ամենա-
գորով թախանձմամբ ընդ եղծման ջրողողն
զազրագործաց կրկին վշտացար , տաղտկալի
զմահու նոցա դիպուածն քեզ գրեցեր , ասելով
զզարմանալիսն լսողաց բան , ածեալ զմտաւ ոչ
ևս յաւելից անիծանել զերկիր վասն գործոց
մարդկան : Եւ մխիթարիս մեծ իմն պարարեալ
ընդ կեանս անմաքրից և պարտաւորաց սա-
տակման . որ երբեմն առակաւ դդմենւոյն
զանխայելն ի կործանելիսն ցուցեր , ողորմած ,
և առ այլ ումեմն նեղեցար սաստիկ վտանգեալ
ընդ յամբանալ անձրեսին առ ուրացողացն դար-
ման : Անձառելիս ցուցեր բարութեան տեսակս
յիշատակաց տօնելիս՝ ի վերջին աւուրս . քե
ի ձեռն առաքելոցն քոց՝ ողջոյնս հասարակաց
անհամբուրիցն հեռաւորաց քաղցրաճաշակս

հրամայեցեր : Ահա և յիս ցողեան կենդանի գհայ-
րենի զթութեանցդ զսէր , զի և ես փրկեցայց
քաւեալ ամենառատ քո այցելութեամբդ : Եւ քեզ
ընդ Հօր Հոգւովդ սրբով փառք յաւիտեանս .
ամէն :

ԲԱՆ ԿՍ.

Վերսին յաւելուած կրկին հեծուրեան .

Ա. Եւ ընդէր է ինձ բնաւն որ ի սաղմոսին այն-
պիսեաց բանիցն ի կիր արկանել , որ ի նախա-
տինս միանգամայն և ի նզովս ինձ յարակային ,
հանապազ երգել իմովս տաւզօք : Քանզի զիարդ
արդեօք զշուք երջանկին ինձ դատապարտելոյս
նմանեցուցից՝ ասելով ընդ նմին , թէ ոչ մերձե-
ցաւ առ իս թիւրեալն սրտիւ : Զիարդ զկարգա-
դրութիւնս տանցն իյայսմանէ զկնի թուելոցն
զարհուրեցուցչաց ընդակից կայից կանոնաց
օրինաւորին՝ զինուորին և թագաւորին և մարմ-
նական հրամանատուին , որք և երկնայնոցն
են համբուրելիք ասելով , ոչ յուսահատ եղէց
ի կենաց պատմողս աւետեացս և նորոյս աշա-
կերտ անմասն յամենուստ բարեկարգութեանց :
Զիարդ ըստ իրաւախորհ արդարոյն , ընդդէմ
մեղաւորացն մահու զինեցայց առակաւ առաւո-
տին և սկիզբն արթնութեանն միշտ պատրաս-
տական լինելոյ , որ և ոչ զանդամս մարմնոյս

զանեալ խրատեցի : Զիարդ մասնակցեալ մեծին
արութեան սատակեցից ի քաղաքի Տեառն զա-
օրինեալսն, որ և ոչ զբուսեալ բիծս հոգւոյս
իմոյ մեռուցի : Զիարդ ստեցից գրողին չև յայտ-
նելոցն, թէ զմոխիք որպէս հաց կերայ . զիարդ,
որ ոչ միացուցի յիմոցս կրից կաթիլ մի պղտոր
ընդ յատակ արտօսք աղբերց երգողին՝ ասեմ ընդ
նմին, թէ զրմպելիս իմ արտասուօք խառնեցի ,
և արտասուօք իմովք զանկողինս իմ թացի :
Զնըս ինձ զրեցից մեղօք մահացեալս, յորժամ
սիրողն Աստուծոյ ի բոլոր սրտէ զյանցմունս
նախնեացն իւր վարկանիցի, թէ մեղաք մեք ընդ
հարս մեր՝ անօրինեցաք և յանցեաք, և որ
ի վախճանն յանզի սաղմոն իրաւամբք առ իս,
քան առ Խորայէլ : Որովք յարգեցայց դասիլ ընդ
բարիսն, յորժամ մարդկային հնարից այս զեղ
պատուեցա՛ որ ոչ յիս գտաւ, ի գարշութենէ
կերակրոց իմահ սովեցեալք և յաճախութենէ
ճգանց ի հոգւոց նուաղեալք, ըստ խորութեան
ինքնօրէն կրօնից հրէից և հեթանոսաց : Զիարդ
արդարութիւն իմ մնայ յափտեանս, զոր ոչ
բնաւ իսկ կատարեցի :

բ. Եւ զի մի տաղտկացայց յամեալ ի բանիս,
ի համառօտել զսոյն փութացայց : Զինչ ունիմ
ասել ի տեղի բանիցն՝ զոր աստուածաշունչ
ձայնն նուազեաց օրհներգոյն Դաւթի, թէ բոլո-

բով սրտիւ իմով խնդրեցի զքեզ. զիարդ ընդ
սմին զմեծն քան զայս, թէ յամենայն ճանա-
պարհէ չարացարգելի զոտս իմ. իբր ընդ եղեալս
և զայն մատուցից, թէ ի սրտի իմում թաքուցի
զբանս քո, որպէս զի մի մեղայց քեզ : Ա՞րպէս
զբւնայնութեանցս իբր զլրութեանց ճառեցից
ընդ պարս մաքրոց, թէ ի պատուիրանաց քոց
իմացեալ, ատեցի զամենայն ճանապարհս չա-
րաց : Զիարդ զիեզոյն ճշմարտութիւն իմում ստու-
թեանս մշտնջենական երդմնահարութիւն կար-
գեցից՝ ուխտեալ ընդ հաւատարմին, երդուայ
զոր հաստատեցի պահել զդատաստանս արդա-
րութեան քոյ : Զիարդ ինձ հրեշտակ մահազոյժ
անհրաժեշտ վճռի՝ զբանին պատզամ կրկնեցից,
թէ հեռի է ի մեղաւորաց փրկութիւն : Զիարդ
չարս իսկապէս՝ զբարեացն գրեցից՝ որք ի
Տեառնէ առնուն զնոյն հատուցումն՝ զայս տուն
յեղյեղել, թէ բարի առնէ Տէր ուղղոց սրտից :
Զիարդ զիամառօտն փոխատրութիւն անաչա-
ռութեան՝ վրիպեցելոյս ինձ սահմանեցից, թէ
զթիւրեալսն յափշտակութեամբ տանի ընդ այ-
նոսիկ, որ գործեն զանօրէնութիւն : Զիարդ
զաստուածազգեստին պանծանս ամաչեցելոյս
ինձ պատուաստեցից՝ ասել զնորայսն, թէ Տէր՝
ոչ բարձրացաւ սիրտ իմ և ոչ զբօսան աչք իմ, և
որ յետ սորին պատմին ասացեալքն : Զիարդ

զանձառն քան զմարմին քան՝ ի ցոյցս առից
քաջալերութեան վհատելոց ես զանձ գեհենին,
ասել ընդ օծեալն Աստուծոյ հոգւովն, թէ յառա-
ջագոյն տեսեր, զի ոչ զոյ նենգութիւն ի լեզուի
իմում, ի սկզբնաւորն նախաձայնեալ սաղմոսիս
մինչև ի լրումն աւարտման քանիս : Զիարդ
դասակցութեան դժնէից մարդոց համաբան
այրս մահու և որդիս սատակման քարբառիմ
զբարեշնորհին, ոչ ահա զատելիս քո Տէր ատե-
ցի, և զմեացուածն սորին կարգի : Զիարդ մե-
ծաւն վստահութեամբ տօնելի վեհին, անձն իմ և
դու աշխար աշխարհի, զանդատ քո ոգի յառաջ
ընծայեալ՝ մեծացուցանես ընդ պսակելոյն, թէ
փորձեան զիս Տէր և տես, թէ իցեն անօրէնու-
թիւնք իձեռս իմ, և զյաւելուածն որ զիետ սորին :
Զիարդ ես գոլով' և յայլոց աղօթեմ ապրել՝ յու-
սացելոցն յԱստուած ձայնակցեալ, պահեան զիս
Տէր ի ձեռաց մեղաւորի և իմարդոյչարէ : Զիարդ
համբարձայց ընդ փառաւորեալն մաղթել Աս-
տուծոյ, թէ դու ես յոյս և բաժին իմ յերկրին
կենդանեաց : Զիարդ իբր հանդիսացեալ ընդ
ճգնաւորին՝ զմրցանակն յաղթանակի թագաւո-
րին մատուցանելով՝ զառաւելեալն քան զօրի-
նակ աղերս աղօթից, թէ ինձ սպասեսցեն ար-
դարք քո մինչև հատուցես ինձ :
Ք. Բարեբանեալ է և այս իմաստ հոգեոր և

տէրունի գործոյն նմանի , որ զփորձիչն պատկառեցոյց , յորժամ զամենայն արհամարիցէ և զսկզբնապատճառն եղելոց միայն ընտրիցէ ասելով , թէ երանի ժողովրդեան , որոյ տէր Աստուած է նոցա : Մեծ է և այս բարձրութիւն շնորհի և զգուշական համարձակութիւն լցեալ երանութեամբ , թէ սուրբք քո օրհնեսցեն զքեզ : Բղձալի է և այս ընտանութիւն մերձաւորական հոգեոր հաղորդութեան՝ յԱստուած յուսալ և ի նոյն արձանանալ բանիւ սաղմոսին բերկրեալ , թէ զկամս երկիւղածաց իւրոց առնէ Տէր . և զկարգ բանին կատարէ , մինչև զողբալին և զգուարձալին ազդեսցէ , թէ պահէ Տէր զամենեսեան որ սիրեն զնա , և զամենայն մեղաւորս սատակէ Տէր . ի զլուխս լրման զրոց նուազարանաց սաղմոսիս՝ իբր թէ զօրինակն իսկ եցոյց վերջին հատուցման արդարոց և մեղաւորաց : Զուգակցորդք են միմենանց և զկնի երգեցեալքս . զի թէ ընդունի զհեզս Տէր և խոնարհ առնէ զամբարտաւանս մինչև յերկիր , ապա ինձ որքան եղկութիւնք կան առաջի . իսկ եթէ հաճի Տէր ընդ ժողովուրդ սուրբ և բարձր առնէ զհեզս ի փրկութեան , ապա հերքեալս ի բարեմասնութեանց ես ուր հաստատեցայց . իսկ եթէ օրհնելի է Աստուած ի սուրբս նորա տիրապէս , ապա օտարս ես ի մաքրութեանց ընդ որս դասեցայց .

իսկ եթէ ի կանխերզիցն մերձ այսր եղից յիշատակարան ինձ կշտամբութեան, թէ սիրեցէք զժէք սուրբք նորա, զի ստուգութիւն խնդրէ Տէք՝ և կրկին հատուցանէ ամբարտաւանիցն, ապա յորում գնդի ես զտայց զերեալս ի զաղտնեաց գտողին չարեաց : Քանզի զոր օրինակ տատանին տազնապաւ տերևնք տնկոց եղևին ծառոց շարժեալք ի հողմոց ուժգին բախելոց հոսեալք ի խոնարհ, այնպէս ջանացաւ ջարդել զընթացից իմոց վերարձակութեան քաջաբեր ուղէջս՝ զյարմարեալս ձեռամբ անեղ մշակիդ : Զոր հաստատեսցնս արմատացուցեալ վերստին դարձեալ նոր պտղաւորութեամբ անապականաւ, յանդաստան կենաց խնամոց քոց կամացդ՝ ամենապարզե թագաւոր Քրիստոս, օրինեալ յաւիտեանս . ամէն :

ԲԱՆ ԿԲ.

Վերսին յաւերուած կրկին հեծութեան .

Ա. ԱՅԼ արդ ընդէք ոչ ի վերազրեցեալն սաղմոս նախաճառական և յայլ մարգարէիցն մասն ինչ յօդեցից : Քանզի զինչ վայելումն իցէ կերակրոյն, եթէ անզգայեալ ցաւովք ուտիցեմ . և կամ զ՞որ շահ սաղմոսն ունիցի, եթէ ոչ ի միտ առնուցում : Քանզի նզովեմ զիս ինքն ի նոսին և ոչ իմանամ, լրացեալ լինիմ և ոչ պայծառա-

նամ, արեւու ծագեալ և ոչ լուսաւորիմ, մեղը
ճաշակեմ և ոչ քաղցրանամ, ռետնիւ լնանիմ և
ոչ բժշկիմ, միշտ կանխեմ ի նոյն և դատարկ
երեխիմ, հանապազ ձաղիմ և ոչ երբէք խրա-
տիմ, ողոքիմ դարձեալ և ոչ զգաստանամ:

Բ. Արդարև մեղք և անօրէնութիւնք իմ յիս,
և ես մաշիմ ի նոսին, ըստ մարգարէին որ ի դի-
մաց պարտաւորացն բանի և տէրունական
առակին հին տկոցն և նոր գինույն։ Վասն զի
թէ սատակին անօրէնք և մեղաւորք ի միասին,
ըստ Եսայեայ ձայնին, ապա և ինձ դժնէիս նոյն
բաժին հանդերձեալ պահի։ Քանզի ասեմ զսաղ-
մոսն, թէ հատուցանէ այնոցիկ՝ որ առաւել
առնեն զամբարտաւանութիւն, և կցորդեմ
սմին զընթերցուածն, թէ օր Տեառն ի վերայ
հպարտից և ամբարտաւանից, ասեմ, թէ օտար
եղեն մեղաւորք ի մօրէ, և որ ինչ կարգ սորին
ցուցանէ. յարեմ առ սմին, թէ կործանեսցին
անօրէնք երկրի, և անբարիշտն բարձցի յեր-
կրէ, և անիրաւք մերժեսցին ի նմանէ։ Ողբք
ինձ կարդացէք առ ձայնն, թէ զոր օրինակ
վառի եղէզն ի կածականց հրոյ, այնպէս այրես-
ցին մեղաւորք ի բորբոքեալ բոցոյն. լացէք առ
սաղմոսն, թէ արկցես ի վերայ նոցա կայծակունս
հրոյ. աշխարս պատմեցէք ի բանս աստուածեան
վճոին մարգարէիւն ազդեցեալ, թէ ոչ կամիցիք

լսել ինձ, սուր կերիցէ զձեզ. կոծեցարուք առ
սաղմոսն, թէ մահ հովուեսցէ զնոսա. աղի ար-
տասուս ողորմ հառաջմամբ ընդ հեծութիւնս իմ
յարմարեցէք, յորժամ բարձրեալն ընդ իսրայէլի
և ինձ ասասցէ բանիւ սաղմոսին, թէ ժողովուրդ
իմ ոչ լուաւ ձայնի իմում. աւաղ կարդացէք
թշուառացելոյս, յորժամ այլ մարգարէ զնոյն
դիցէ, վայ նոցա զի վազեցին զինև : Բարբառ
փողեցէք ի սիրտ մղձկեալ նոր աղաղակի, յոր-
ժամ տեսանողն Աստուծով ամաչեցուցեալ զիս
կշտամբեսցէ ընդ ապարասան տանն Յակոբայ,
տեսէք արհամարհոտք՝ զարմացարուք և եղ-
ծարուք :

Գ. Այլ դարձուցես և ամփոփեսցէս զբարձրա-
ցեալ զսուր բարկութեան ահաւորիդ սպառնա-
լեաց ի սարտուցելոյս յերեսաց մեծիդ, և
խնամովք աջոյդ բարեբաշխութեան առ իս ժա-
մանեալ օծումն կենաց պարզեատրեսցէս քո ա-
ղաչողիս : Եւ քեզ փառք յերկինս ի բարձունս, և
ի մահացուաց յերկիր ի խոնարհ, ի սահմանս
բոլոր ազանց և յամենայն յաւիտեանս. ամէն :

ԲՈՆ ԿՊ.

Պետսին յաւելուած կրկին հնծուրեան.

Ա. Բարերսը և բազմագութ, մարդասէք և եր-
կայնամիտ միայն թագաւոր, ընդ Հօր քում

պատուեալ և օրհնաբանեալ Տէր ամենայնի,
Որդի Աստուծոյ կենդանւոյ. անպատճառդ միշտ
իմում կորստեան, որ ամենեին անփորձ ես
ի չարեաց, որ ոչ կամիս զման մեղաւորի,
որ փրկութիւն են ի քոց կամաց ընծայեցեալ,
որ դարձուցանես զմբրիկ մեղաց ի յօդ քաւու-
թեան, որ զիուր բարկութեան յանձրե փոխար-
կես : Որ զյետնեալ զկինն ի բարեաց՝ կրկնակի
գոյիւ նահանջեր երկեակ ընութիւն ի նոյն ար-
ձանի, ոչ իսկապէս ընդ անպարտսն, և ոչ հա-
մայն ընդ պատժաւորսն : Որ զլուծութիւն
ծովուն սահանաց իբր զկարկառս քարանց կա-
ռուցեալ յեղանակեցեր . որ զկարծրանիւթ
վէմն անապատին ի վիժակս վտակաց հոսեալ
բղիւեցեր : Որ զՅորդանանու ջրոյն սրաշարժ վայ-
րեկութիւն՝ հրաշաւոր անդրադարձութեամբ
ի յետնորդս հեթանոսաց լուացումն աւազանին
ի թիկունս առաքեցեր : Որ զպատուաստեալ
պարիսպ երիքովի, յօրինակ կործանման բըռ-
նութեանն սատանայի իբր զթեթևութիւն յարդի
ցնդեցեր . որ զվեասակար ջուր նորին ի յառակ
այլայլութեան առ ի բարին փոխարկութեան՝
քանանցւոցն փրկութեան խորհրդական
աղիւն համեմեալ անուշեցեր : Որ զՄեռային
դառնութիւն, իբր զմտաց անհաւանութիւն,
կենացն փայտիւ ի քեզ յարմարեալ պիտանի

արարեր : Որ զառեալն ի գետոյն ի գծագրութիւն
անսահմանդ .քո հրամանի անորակիդ գունակու-
թեան՝ ի նոր երանգ բոսորային մածեր արիւն
ի ցամաքի : Որ զանկենդան ցուպ զաւազանին,
ի կերպառութիւն առ ի զքոյդ մերովս նկարա-
գրիլ, այլ և յօտարազնիցն ընտրութիւն, ի տիպն
ապաթոյն կերպիւ վիշապի նմանեալցուցեր : Որ
զերջանիկ ձեռն աջոյն Մովսեսի, ի ցոյցս տեսու-
թեան ապագայիցս հրաշից մարդեղութեանդ
քո, բարձրեալ, և քև ախտաւոր մարմնոյս մա-
քուր լինելոյ անփոփոխ փոխատրութեամբ՝
կրկին գուշակեցեր : Որ յայսքանեացս շրջա-
դրութիւն բարեխնամապէս արուեստիւ սիրոյ
զանակնեալն գիւտ մեղաւորաց կորստականաց
նշանակեցեր :

բ. Օրհնեալ ամենագութ, որ բուսուցանես
յերկրէ դալարի զմեռեալն յանշնչականէն, որ
զանշարժն իբր զընթացող կառավարես, որ յա-
նարգ արգանդէ կոչես քեզ պատկերակիրս, որ
տաս պատանեկաց աղօրիս ըմբոշխնելիս, որ
յայտս մաքուրս հերս ընծայես, որ զսաղարթ
սեռութեան վարսից ի ձեան կերպարան զար-
մանագործես, ցուցեալ՝ թէ առ ամենայն սահ-
ման հեռաւորական յաղթող ես, հզօր . որ փո-
փոխես զշրթունս բնաւորականս, ըստ բանին
Յոբայ, ի կամս հաւատարիմս : Որ սասանես

զերկիր և զսիւս նորին ի հիմանց, Եշանակեալ
հաստուածին գոյիւ՝ թէ դու միայն մնաս ան-
կորնչելի. որ հոլովես զտարերս իբրև զանցա-
ւորս, և դարձեալ ի նոյնն կապես իբրև զյարա-
կայս, յայտ արարեալ՝ թէ և առ մեղաց բազ-
մութիւն դիւրապէս ունել կամ թողուլ դոյնպէս
զօրաւոր իցես: Որ զարուսեկին անզգայ Էու-
թիւն իբր երասանաւ իմն դաստիարակես, երե-
ւեցուցեալ այնր իրի կերպիւ, թէ զբնութեանս
չար դիմեցումն յորժամ և կամիս հանդարտ
առնիցես: Որ զանքարբառ բոլորակ լուսնին
կարգես ունայնս և պատարունս, լուսաւորեալ
զպատճառն առ աւետիս տեսողաց՝ թէ ի նուա-
զութենէ բարեաց զպարտաւորս մարմին դու
ածես ի լրութիւն առաջնաստեղծ հարստու-
թեանն: Որ զպատկերս անխօս աստեղաց իբր
զդասակս դոյզն հօտից տրոհես և ժողովես,
յոյս իմն կենաց առ այս խորհրդաբերեալ, քաղ-
ցրահայեաց տեսութիւն, թէ և անաղաջաւորաց
լեզուաց կարողապէս բաւես ողորմել: Որ ի մէջ
մահու և կենաց շաւիդ վստահութեան ուղղես
ի ծովու, վկայութիւն եղեալ հաւաստի, թէ և
յանկասկածաւորն վայրի քև պաշտպանիմք
անզայթագղելի. որ իբր զջուր կաթսայից ի
հրոյ եռացեալ, որպէս զմեղաց մըրիկ պղտորեալ
բանիւ կամաց քոց խափուցանես: Որ հայիս:

յերկիր և տատանես զսա , զի անբանիւն զմտաւորս զգաստացուցանես . որ իբր զակատ մի անձուկ նաւի ի վերայ շարժութեան ալեաց՝ զանբաւ թանձրութիւն գետնոյս դղրդես , որով ծանուցեալինինիս ամենիցհաստուածոց՝ թէ իցես աներկբայելի , որ ի բան քո զօրեղ հիմնացեալ ունիս զամենայն : Որ սերմանես զարտաշնչացեալ մարմինս յերկրի , և զնոյն անկորուստ պահեալ կրկին կենդանածնես , որ ապականացուս աւանդեալ՝ անեղծս ստանաս , որ ընդ մահացու նիւթոյս՝ զնշխարդ կենաց խառնես , որ հրամանաւ ակնարկութեան ի խուն վայրկենի կազմեցեր՝ պատրաստ կացուցեր զանզարդութիւն ամենից եղանակաց : Քո է զօրութիւն և կարողութիւն , որ շրջանակես զժամանակս ամաց հոլովման աւուրցյալնմանութիւն բարեպատեն տեսողութեան . որ կարդաս զանմուռչսն իբրև զկենդանիս . որ ազդես միայն , և նոքաընթանան , որ միայն հենուս անկանես անձառ արուեստիւ հնարագիտութեան մէզ և առաւոտ : Որ յետ նախակարգ յօրինուածոյն առաջնաստեղծ լինելութեան , արարեր զփառաւորեալսն մեծամեծս հրաշակերտիցն հանդիսից . ըստ զրոյն երջանկութեան կանխահիացն զարմացման , այլ իմն զոյացութիւն տօնելի տեսակի անեղծ աշխարհագործութեան ևս քան

զսոյն ի մարդանալը քո, որոց ոչ գոյ թիւ :

գ. Որ ահա զվեասն մեր քեզ զբեցեր, որ զարդարութիւնն քո մեզ շնորհեցեր, որ ընդ քեզ կրեցեր զիաշտութեանն մերում փրկանակ, որ ոչ երբէք լքանիս յողորմութենէ, դարձն զամբարշտեալս ի պաշտօն բարի երկիւղի, զթմբրեալս ի զգաստութիւն արթնութեան սրտի, զանմաքուրս ի սրբութիւն պայծառութեան կերպարանի, զբազմաբիծս յանձնութիւն հանդարտական սուրբ պատկերի, զբեկեալս յողջութիւն՝ որ ի դիպմանց ոչ խորտակի, զբացեալս ի խնդութիւն զուարթութեան անտիբելի, զյուսահատեալս ի սէր միաւորիչ անքակտելի, զամաշեցեալս ի վստահութիւն հաստատութեան անշարժելի, զխաւարեալս ի լոյս երանութեան անմեկնելի, զմահու զերեալս ի կեանս՝ որ ընդեղծմամբ ոչ անկանի: Զի փառաւորեսցի անուն քո, Յիսուս, խոստովանեալ յամենայնի ընդՀօր և ընդՀոգւոյդ սրբոյ ի բարձունս երկնի և իստորես երկրի և իբնակիչս նոցա, յաւիտեանս յաւիտենից. ամէն:

ԲԱՆ ԿԴ.

Վերսին յաւերուած կրկին հեծուրեան.

ս. Եւ արդ առ ամենայն բան յամենայնի ուղիղ ես, Աստուած, իրաւամբք դատիս, արդա-

ըութեամբ կշռես ճշմարտութեամբ չափես, օրհնութեամբ հետևեիս, բարւոք ընթանաս, ստուգութիւն սիրես, յստակութիւն կամիս, լուսաւորութիւն համբուրես, փորձիւ յանդիմանես, երկայնմտութեամբ քննես. ոչ ունիս նենգութիւն և ոչ գոռոզութիւն, այլ ամենեւին հեզութիւն, հանդարտութիւն և ողորմութիւն։

Բ. Արդարացար վերին իմաստութիւն անայլայլական Հօրդ հանձարոյ՝ կրկին վկայեալ անզեղջ գովեստիւ յորդեզրելոցն շնորհօք. ըստ բանին սրբութեան՝ որ աւետարանաւն կենաց ի քէն ընկալաք. որ ոչ ի կոծելն ողբացի, և ոչ ի փողելն կաքաւեցի։ Ասացեր անօրինիս՝ թէ մի անօրինիր, և ես ի նոյն չարիս պնդեցայ. մեղաւորիս՝ թէ մի ամբառնար եղջիւր ի բարձունս, և ես զընդդէմսն քեզ գործեցի, և ոչ զգացի երբէք զառածեալս, թէ ի ձեռին քո են եղջիւրք արքայութեան հպարտից ամբարձելոց, խոնարհեցուցանել և բարձրացուցանել, ըստ Ամբակումայ, Դաւթի և Զաքարիայ։ Օրհնութիւն ինձ կամեցար, ողորմած, և ես անիծեալս՝ մեծ տարագրութեամբխոտորեցայյարժանին ինձ մասն. սիրեցի բարկութիւն և ոչ բարութիւն, շօշափեցի ըստ զրոյն զիսաւար և ոչ զլոյս, կենդանի ձայնիդ քո, զթած, ապառումս պատասխանեցի։ Զորդնն անմահ ասացեր բանիւ նսայեայ, և

զիուրն անշէջ և զկշտամբութիւնն անվախճան
և զտեղին յաւիտենից և զօրինակ նմին սոսկալի,
և ես ոչ իմացայ ըստ սաղմոսողին և ոչ մտա-
ռեցի, այլ ի մռայլ մտաւորական կուրութեան
գնացի : Ցուցեր մարգարէիւն, թէ զօրհնութիւն
ստացի որ զօրէնս դնէ, և ես համառօտել զնոյն
փութացայ : Արձան հոգևոր վիմի գրեալ մա-
տամբ քո, տէք Ցիսուս Քրիստոս, զԴաւիթ իւ-
րովքն բանիւք կանգնեցեր, ասելովն ինքեան
ընտրութեամբն առ սոյն, թէ պահեցի զօրէնս
քո յամենայն ժամ, յաւիտեան, անդրադարձու-
թեամբ բանին միջնորդեալ զկրկին հաստատու-
թիւնն, թէ և յաւիտեանս յաւիտենից . ընդ որս
և զսորին նմանիս պարծանաց առ իմս խրախոյս,
և ոչ զկծեցայ . ճեպեցայ ի տունս Բահաղու
և ոչ Աստուծոյ . ի յերկուս հետս երկմտութեան
կրկին կաղացի կասեալ ի բարեաց, ըստ երգի-
ծանելոյն Հեղիու : Ունիմ զՄովսէս իւրովքն օրի-
նակօք եկեալ ի մեռելոց, և զտառս մարգարէիցն
գրեալ ի յոգի, և զմատեանս առաքելոցն ընդ
մտացս մատն յեռեալ, և զծէրդ հասարակաց
կտակաւն աւետեաց յարուցեալ ի թաղմանէ
անթիւ ննջեցելովք, և անհաւատագոյն քան
զնունակուն եղբայրակցութիւնս այնը մեծատան,
որ է առակ իմն յարմարական, նմանեալ զգա-
յականացն մասանց անողորմիցն յղփացելոց,

մնացի իբրև զսալ դարբնաց անոստ' յամառեալ քարացեալ սրտիւ, որպէս օրինակն է Շենիարայ, և ոչ ապաշխարեցի:

Գ. Այլ ազդեա վերստին առ սոյն կերպարան լքեալ կրկին ողորմութիւն՝ բարի, անաւոր, մարդասէր, խնամակալ, կենդանի, սուրբ, լուսաւոր և անվախճան թագաւոր, գօրութեամբ պանծալի խաչիդ խորհրդոյ, ի կարծրացեալս մեղօք անքեր անդաստան, երիկամանցս յիմարութեան և անպտուղ սրտիս լքութեան. զի առեալ նապաստ օժանդակութեան ի գթութեեէ կամաց ամենակալիդ, որոտասցէ բղխեսցէ հոգիս, ընծայեալ աչաց վշտագնեցելոյս վտակս արտասուաց արբուցանողաց ինձ ի փրկութիւն և իմաքրութիւն, և քեզ ի հաճութիւն ընդունելութեան, ամենապարզև Տէրդ բոլորից, փառաւորեալդ յաւիտենից. ամէն:

ԲԱՆ ԿԵ.

Վերսին յաւերուած կրկին ննծութեան.

Ա. Եւ արդ ես նախնիս ամբարշտաց, զլուխս մեղաւորաց, պետս անիրաւաց, առաջինս պարտաւորաց, պատկերս յանցաւորաց, ատտիկեցիս ըստ վատթարութեան՝ այլ ոչ ըստ բարեբաստութեան, ահա զանձառիցն իմոց նառեցի, զպատկառելիսն խայտառակեցի, զգաղտնիսն

հրապարակեցի, զծածուկսն յայտնեցի, զթագուցեալսն ցուցի, զամփոփեալսն տարածեցի, զդառնութեանս մաղձ ժայթքեցի, զգործակցութիւն չարին մատնեցի, զամբարեալ թարախ վիրիս քամեցի, զխորս պարտեաց իմոց ծանուցի, զպատրուակն կեղծեաց առի, զքող տգեղութեանն վերացուցի, զամօթալեացն զգեստ մերկացուցի, զգարշելիսն յանդիմանեցի, զմրուրն մահու փսխեցի, զպալարս հոգւոյս խածուածոց քահանայապետիդ Քրիստոսի բացի : Յանձինս վտանգ ոչ անխայեցի, մարմնոյս սիրոյ ոչ աչառեցի, զարմատն հնութեան տեսիլարարի, ընութեանս կարեաց ոչ ողորմեցայ, զմիաբանութեանն կապ խզեցի, զդղեակ սրտիս քանդեցի, ընդ կամացս որսոյ իբր ընդ դարանակալի մահու կրուեցայ, զպահեստ անյատիցն արտաքս հանի, զմթերիցն գանձ՝ մեծին գուշակեցի, զդատախազն դատաւորին հանդէպ կացուցի, զապառնեացն զփորձ այժմէն իսկ գտի, զդաշն կործանողին կտրեցի, զուխտն խաբողին ցրուեցի, զկատարած մարտին յաղթութեան ի քեզ տէր Յիսուս ապաստանեցի, զպատերազմին խումբ զրգուեցի, զդիմաղրութիւն դիմեցմանն բանիդ Աստուծոյ յուսացայ, զխաւարասիրացն փաղանդ լուսեղինացն զինուց սաղրեցի :

բ. Եւ արդ, ստեղծիչդ ամենայն եղելոց Քրիստոս որդի բարձրեալդ Աստուծոյ, զաստէն դըսքովեալս յայսպիսեաց բանից և գհարուածեալս յայսքանեաց գանից մի կշտամբեսցես կրկնակի դատել ի մեծի աւուրն: Ահա, հզօր անքնին անձառ բարերար թագաւոր անմահ, առ այս կերպ պատկառանաց ինքնապարսաւս խոնարհութեան, որ ինձէն զանձն մեծաւ ձաղանօք յոգի դատեցի, լից նուազօք այսր մատենի անարգանօք ամօթոյ զղէմսն սատանայի, և զերեսս կերպի պատկառեցելոյս նշանաւ խաչիդ զօրացն: Միասցի կնիքդ լուսոյ ի գեղ տեսակիս, ամրութեանդ նշան հաստատեսցի ի տիպ դիտակիս, երեակ կենացդ փայտի ձևացի ի պատկեր այտիս, արուեստդ հրաշից ի ճակատիս շուրջ նշանակեսցի: Մի այլայլեսցի յինէն դրոշմդ լուսապանոյն, մի բարձցի ի տեսանելեացս բբաց ճաճանչդ օրհնութեան, մի մերժեսցի ի զիխոյս առհաւատչեայդ վստահութեան, մի սասանեսցի ի բերանոյս ամրութեան սեմոց՝ փառք տեսանգրութեանդ: Պահպանակդ երկրպագելի ի զգայարան սրտիս միասցի, չորիցս նիւթոց իմոյս գոյութեան քառաթևիդ նշոյլ ազդեսցէ, ձեռինս կարկառման փրկչիդ իշխանութիւն օժանդակեսցէ, մատուցման հաստուածոյ մատինս՝ խորհրդարանդ համարձակութեան բարե-

գործեսցէ : Ի մեկնելս իմում մի հեռասցի սրբութիւնդ , մի լքցի պատիւս ի պատիլն պարտաւորիս , մի մերժեսցի ի յոգւյս անդաւաճանելիդ փրկութիւն , մի ջնջեսցին գիծք կենդանատուիդ ի քո գրեցեալս շնչոյ , մի եղծցի նկարումն արեան զօրութեան ի տիրատիպ խորանէս , ընդ իս բնակեսցէ յիմում գերեզմանին . ի ծորել մարմնոյս թշուառի՝ օծումն շնորհիդ առ իս պահեսցի , ի նորոգութեանն աւուր սովու հանդիպեցայց փառաց փեսայիդ , ի քոյոց այտի ծանուցայց , քոյովքդ վաստակօք պճնեցայց , երախտեօք մեծիդ յարգեցայց , աւազանին զգեստիւ պերճացայց՝ քաւեալ ողորմութեամբ : Մատո՛ , բարեզութ , զվերարկուդ անապականութեան տաժանեցեալս մեջօք մարմնոյս , մի յարիցէ ընդ քոյս՝ բանսարկուին , հնացուցիչ հոգւոյս վատնեսցի , խաւարաբնակացն պատիրք մի ընդ իս վերերևեսցին : Օրինեսցի անուամբ քո , զըթած , վիհն իմ հանգստեան , ողորմութեամբ քո լցցի գուբն իմ գերութեան , ընդարձակեսցի քև ինձ տեղին թշուառութեան , անդնըր եղիցի , խնամող , ինձ բանտն բարկութեան , սնուսցէ զիս առ յաճումն արգանդն մթութեան , յուսով քո շտեմարանեսցէ զիս յարկն այն անձկութեան , ձեռամբ քո պահեցայց ի խշտին տարտամութեան , թեօք քո ընկալայց ի տունն տազնապի ,

դու, գնվեալ, ընդիս իսենեակն վտանգի : Աւաղս
ինձ աստանօր ի թիւս հազարաց, զի երբեմն էի
վերնային և այժմ անդնդային, երբեմն տօնելի
և այժմ աշխարելի :

Գ. Այլ և արդ կրկին դու օրհնեալ ի բոլորից
գոյից յերկնայնոց և ի ստորնայնոց և ի սանդա-
րամետականաց մեռելոց, անպարտականդ այս
տարագրութեան : Ես վրիպեցայ, ես օտարա-
ցայ, ես յիմարեցայ, պարտեցայ և խոտան
գտայ. ես լքայ, կամեցայ և կործանեցայ. ես
մոլորեցայ. ես մատնեցայ, ես մերժեցայ, ես
խորթացայ, գերեցայ և զայթակղեցայ. ես նզո-
վեցայ, ես թշուառացայ, արբեցայ և վատթա-
րացայ. ես ընկլուզայ, ես խաբեցայ, ես անօրի-
նեցայ, ես ապականեցայ, մահացայ և ի սպառ
եղծայ. չիք քո առ այս ինչ մասն չարի, որ ես
միայն անփոփոխ բարի : Արդ կամք քո յիս և
խաւարն ինձ ճառագայթ. ճրագ յուսոյ քո անդ,
և զիշերն վաղորդոյն. մարմնոյ քո հաղորդեալ,
և յամօթոյն կարծեաց ապրեալ : Իսկ ես ոչ
զրեմ զանձն իմ կենդանի վասն անփախչելի
վախճանին, դարձեալ զիս ոչ վարկանիմ կո-
րուսեալ վասն աներկեան նորոգմանն : Որ և
փակեալ համարիմ ինձ զելս կենացդ վասն ան-
քաւելեացն պարտեաց, դարձեալ բացեալ ինձ
զդրախտն՝ վասն փրկութեանն աւետեաց .

քանզի ոչ այնքան վհատութեանն գոյժ տագ-
նապէ, որչափ փրկութեանդ քաջալերեալ ձեռն
կարկառէ: Արդ տոնւր, Տէր, տոնւր ողորմութիւն,
առ ամենայն ձայն գոհաբանեալ, օրինեալ յա-
ւիտեանս. ամէն :

ԲԱՆ ԿԶ.

Եկեղեցի յաւելուած կրկին հեծութեան .

Ա. Արդ որ ոք և առցէ զայս դեղ մաղթանաց
այսր մասենի պարկեշտականի պաղատել սո-
վաւ, եթէ ի մեղաւորաց իցէ մատուցեալն, եղէց
և ես իմովս բանիւ կցորդեալ նմա. իսկ եթէ
յարդարոց գուցէ յատաջեալն, գտայց և ես սո-
վիմք ընդ նմին ողորմեալ նովաւ : Ապա թէ
երջանկասցի այնպիսին ինքեամբ' ինձ միայնոյ
գրեալ զեղկութիւնն, և ես ինձէն վկայեմ այս-
միկ : Բայց յիշեսցէ նա զՅողոմն և զբանս նորա
զիոզեշութչս, թէ ով ոք վատահասցի սիրո
սուրբ ունել, և կամ ով պարծեսցի մաքուր լի-
ւել ի մեղաց, և զի ոչ յարեաւ մարդ երկրածին
ազատեալ ի պատասխանեաց . և ոչ ընտիր՝
ինքնարշաւ վազիւքն, և ոչ' թէ և ի թռիչս
ամբարձման թևոց ըերիցի, առ որ զգոյշ լինիցի
կրկին երկուցեալ ի վիմին իսկ հաստատու-
թեան՝ ուսեալ ի Պօղոսէ, գուցէ անկեալ ի յեր-
կիր՝ սահմանողի այսմ կանոնի իրաւադատի

կշռեալ նմանեսցի : Այլ առցէ զայս կշտամբութիւն մաքուրն նիւթ պսակաց, առ ի չիջանել անընտրողաբար յանձեռնհասն բարձրութենէ . և պատժապարտն՝ առիթ ազատութեան, որով ամբարձեալ ի կործանմանէ հոգևորական մահուն՝ ապրեսցի յուսով : Խոկ ինձ եղիցի պատգամս այս բանի արձան փորագրեալ ամենեւին անեղծանելի, որ փոխանակ իմոյ եղկելւոյս անձին մահացուի՝ անդադար հնչմամբ հեծութեան լալոյ առանց լրելոյ միշտ աղաղակէ . լիցի և ոսկերացս քակտեցելոց ի հողապատեան շիրիմ վերարկուին՝ անմոռնչ ձայնիւ զայս խոստովանել . հասցէ և մարմնոյս ի հող լուծելոյ՝ բարբառով իմն անազդելեաւ ծածկատեսիդ զսոյն պաղատել :

Բ. Տէր գթութեանց, աղբիւր ողորմութեանց, պարզեւք բարութեանց, Որդին բարձրելոյ տէր Յիսուս Քրիստոս, ողորմեա, խնայեա, մարդասիրեա, նայեա ի վտանգս, ակնարկեա ի բեկութիւնս, խոնարհեաց ի թշուառութիւնս, տես ի տարակոյս անձեռնհաս տագնապիս, հասիր հաղորդել կորստականս կարեաց : Շօշափեա քժշկապէս զամենաթշուառ ախտաւորութիւնս, ունկն մատուսցնս քաղցրութեամբ ողորմագին հեծութեանս, լուր ի խորոցն անդնդոց մահուն գերեզմանի անմռնչելի հառաջմանս,

մոցէ յականցս ամենալուր լսելեացդ ձայն պաղատանաց վատնեալ անդամոցս : Եւ վասն զի գրաւական կենդանութեանս անապական է , անփոփոխ լիցի և սիրոյդ քո գթութիւն . կցորդ լնր հեզութեամբ տաժանաւորս տկարութեան : Մեռեալ պատկերիս մի ոիսս պահեսցես , ընդ անշունչ կերպարանիս մի ի դատ քննութեան մոցես , մահու տանջեցելոյս մի հարուածս յաւելցես , ընդ բեկեալ խեցեղէն անօթոյս մի ուժգնութեամբ մարտիցես , վճռաւ կոշկոնելոյս մի բարկութիւն կրկնեսցես , կործանեալ շինուածոյս մի պատուհաս մատուսցես , շանս սպանելոյ մի քարինս արձակեսցես , լուոյս ջախչախելոյ մի սաստիկս որոտասցես , հողոյս անպատուելոյ մի իբր ամբարհաւաճի ուժգինս մռնչեսցես : Զմոխիրս մերժելի մի ի դատ ընտրութեան կոչեսցես , զփոշիս ցնդելի մի իբր զքո դիմամարտ զացես , զտիղմս տաղտկալի մի իբր զոսոխ վարկանիցիս , զզարշութիւնս անզոսնելի մի իբր զբռամարտիկ վանեսցես , զխեթս ի բաց ընկենլի մի նիւթգեհենին պահեսցես , զայսքանեաց բազմապատիկ բանից կշտամբեալս մի վերստին յանդիմանեսցես :

Գ. Այս ամենաթշուառ և խաւարարգել շիրմին են ահա սրտաբեկ և յոքնաթախիծ արգահատութիւնք . հաստատեսցէ օրհնեալդ քո բան

անփոփոխական լինել, ըստ սրտի արգահատելոյս. քանզի և այժմ մինչ կենդանեօքս խօսիմ մեռեալ եմ անհասիդ. որպէս ի կորուստ մահուն սատակման՝ ամենազօրիդ հրամանի անեղծ եմ հաւատովքս : Արդ աղաչեմ զքեզ, տէր Յիսուս Քրիստոս, հայեաց յիս ողորմութեամբ, և մի թողացուսցես լինել տնակից ինձ Բելիարայ. և զմահազեկոյց տապանին ազդումն անկենդանաւորն թնդման թշուառն թաղման՝ աղաղակ ձայնի հառաջման լալեաց քեզ հաշտեցուցչաց՝ յարգեսցես լսել, միայն բարեգործ, հոգեսէր, հզօր, մարդասէր, և հոգիդ քո բարի բնակեսցէ ընդ իս՝ լոյս առնելով ինձ ի խաւարին: Մնասցեն ընդ իս կենարար քո կրից պաշտեցեալ մասունք, զի իբր զաւանդ գանձու զիս պահեալ ի քեզ, կենաց նորոգման ընծայեցուսցեն. օճառք անվատնելի զինուց ինձ պատկանեսցին, ընդ իս յարակայեալ քարինք պարսից հոգեսոր հնարից՝ զշարին հալածել զգունդ : Մարտն որ առ իս, քե Տէր, վանեսցի . զի եթէ յարիցէ ի վերայ իմ պատերազմել, տեսեալ զքաղաքն ունայն ի զօրաց և զազդողականացն զործի ապաձայն, զքեզ Տէր ունիմ մշտնշենաւոր և աննիրելի պահապան :

Դ. Զի եթէ այժմ իսկ կանխաւ արագեալ յառաջ քան զօրն կատարածի, և անշատիդ արգե-

լան ինձ պատրաստեսցէ, առաքեմ զաղօթսն տէ-
րունականս նմին գան մահու. եթէ ի վայր զիս
հնարի կործանել, զծնրադրութիւն արարչին.
եթէ ի մոխիր երկրի թաւալել ձեռն բերիցէ,
երեսացն Աստուծոյ ի նոյն մածուցումն զնա
հերքեսցէ. եթէ վաստակս ինձ ցաւոց նիւթեսցէ,
քրտունքն յուռթի արեամքն զանգեալ փրկչին
աշխարհի զնա խուեսցէ. եթէ յընթացից բարեաց
զշունչս իմ պատանդեսցէ, կապանք ամենաս-
տեղծին զիս արձակեսցէ. եթէ յուրացութիւն
պարզեաց լրւոյն բռնադատեսցէ, հայիոյու-
թեանն համբերութիւն յաստուածամարտիցն՝
զնոսին ընդ նոյն կարկեսցէ. եթէ հարուածս նե-
տից գաղտնաձիգ զինուց ինձ արձակեսցէ,
կարթհնարից աղեղան փառաց հօրն կապարճից
նմին պատահեսցէ: եթէ քողով լրւոյ խաւա-
րականի մտանել ընդ աչս անամօթեսցի, կըռ-
փումն զիսոյն ձորձով պատեցեալ լրմանն ամե-
նից զնա տանջեսցէ. եթէ մոլեսցի զվստահութիւն
ձեռինս կապել, եղէզն մատուցեալ ի յաջ գոյա-
ցուցչին զնա չարչարեալ ըմբերանեսցէ. եթէ
ձաղանօք այպանման զիս կատակեսցէ, տանելն
ծաղու ամենազօրին զնա հենգնեսցէ: եթէ բըժ-
ժանօք ինչ յուռթից կախարդել խորամանկեսցէ,
ապտակն դիմաց հզօրին Աստուծոյ զնա սաստ-
կապէս ամաշեցուսցէ. եթէ ի մուտս զիշերային

մթութեան խաւարաւ խաբէութեան լինեալ
մարտիցէ, ի ճառագայթից լուսոյ երևման քո,
Տէր, խայտառակեսցի. Եթէ ի միջօրէական տա-
պոյ փորձութեանցն արեգակնակէզ վատնիչ
խորշակին զիս ի յարմատոց խախտել կարծիցէ,
ի զօրութենէ նշանիդ լուսոյ խլեալ զօսացի :
Եթէ ի փշմանն շնորհէ ունայն զիս առնել հնա-
րաւորեսցի, թուքն զոր ընկալաւ Տէրն քրովքէից
ընդ մեղաւորիս՝ զնա պատկառեցուսցէ : Եթէ
ժանիք խածողք ինձ ցուցանիցէ, լուութիւն երկ-
նաւորին բերանոյ զնա պապանձեցուսցէ. Եթէ
խածմունս աղուականս հոգւոյս ազդեսցէ, բևե-
ռացն հարմունք հաստողին բնաւից զնա կսկը-
ծեցուսցէ : Եթէ յընթացս անիրաւութեանց խոր-
հըրդոց զիս մոլորեցուսցէ, սևեռք ոտից անհա-
սանելոյն զնա կապեսցէ . Եթէ հրապոյրս ինձ
դժնեայս արբուսցէ, քացախն ընդ լեղւոյն խառ-
նեալ ի յարբումն բարերարին զնա դառնացուս-
ցէ : Եթէ առաջին ճաշակմամբ փայտին զիս
գտցէ, սոսկալի խորհրդով խաչին ըմբռեալ ի
սպառ պարտաւորեսցի . Եթէ ընդվզել ընդդէմ
հնազանդութեան Տեառն հրամանի զանձն իմ
ուսուսցէ, բերումն պարանոցի անսահմանելոյն
զնա կործանեսցէ. Եթէ ի մահ սատակման զիս
վանեալ վիրաւորեսցէ, ստուար տէզ զինու
մխելոյն ի կող ստեղծչին Աղամայ զնա հերձես-

ցէ. Եթէ Երկամբք վշտաց դժոխականաց զիս
պարփակեսցէ, պատաճացն կտաւ էից ունողին
զնա ըմբռնեսցէ. Եթէ յատակս մահու հայել զիս
խարդախեսցէ, բնակել կենդանւոյն ի վկմն մա-
հու զնա մեռուսցէ. Եթէ խնդասցէ ընդ մարդկօ-
րէնա իմ գայթակղութիւն, կրկին կորասցի կար-
կամեալ կամաւ, յորժամ անմահն Աստուած
յարուցեալ փառօք ընդ իւր նորոգեաց զբնաւ
մահացեալս : Եթէ ընդ լուծանել փոքր կապա-
նաց հազարամէից բերկրեսցի, դողասցի կրկ-
նեալ վերստին իսկոյն ընդ վերջին շղթայս ան-
զերծ տագնապին ըմբռնման սաստկագունի
յանվախճան տանջանարանին : Եթէ ընդ առա-
ջին հարուածն դժուարեսցի, գոյժ կորստեան
յետնում սատակմանն անշէջ զեհենին, որ
պատրաստեալն է նորա և նորին հրեշտակաց,
նմա պատմեսցի, որ յաւուրն մեծի մեծին
ատենի :

Ե. Իսկ ինձ ապաւինելոյս ի քեզ, տէր Յիսուս,
միայն թագաւոր ինքնակալ զօրեղ, արարիչ
երկնիւ և երկրի և ամենայն զարդուն որ ի նմա,
որ գալստեանդ քոյ ակն ունիմ և ողորմութեան
փրկչիդ սպասեալյուսամ. ի յոտս քո անկանիմ,
և զգարշապարիդ հետս համբռւրեմ, զպարտու-
թիւնս խոստովանիմ և զմեղանս հրապարակեմ,
կշտամբանաց քարամբք կոծիմ և հառաչանօք

սրտիս տապանամ, ի խէթ խղճիս խոցոտիմ և
բոցով շնչոյս ճենճերիմ, աղի ցողով արտա-
սուացս այրիմ և երիկամանցս ազդմամբ կիզա-
նիմ, յուսակտուր օղով՝ ցամաքիմ և դառնա-
շունչ հողմով շիշանիմ, թախանձանաց բանիւս
երերիմ և կողկողազին հեծութեամբ դողամ,
տաժանելի կրիւք տուայտիմ և տագնապաւ
հոգւոյս տատանիմ, ի կոծ մըրկաց ծփիմ և ի
բախմանէ ալեաց սասանիմ, ի լրութենէ համբա-
ւոյն ոարսեմ և յիշատակաւ ահին կորնչիմ,
կերպարանօք ատենին հալիմ և սպառնալեօք
մեծիդ մեռանիմ, լուր բանգմազութ, քաւիչ,
մարդասէր և երկայնամիտ, քաղցրութիւն ան-
ճառ, օր բարի և տիւ տենչալի : Քանզի կարող
ես յամենայնի և առ ելս շնչոյս իմոյ՝ փրկու-
թեան մեծի . և քեզ ընդ Հօր Հոգւովդ սրբով
փառք յաւիտեանս . ամէն :

ԲԱՆ ԿԵ.

Պետսին յաւերւած կրկին հեծութեամ.

Ա. ԲԱՅՅ քանզի յոյժ արդար է բան իրաւանցն
Քրիստոսի Աստուծոյ առ իս՝ քան առ սկզբնա-
հայրն չարեաց սատանայ, զի վասն նորա յայն
սակս յայտնեցաւ, զի լուծցէ զգործս նորին . և
վասն իմ՝ զի գինացեալ պատկերս նորոգեսցէ.
առեալ զկերպարանիս բոլոր էութիւն կերպին

իսկութեան մեծին Աստուծոյ՝ միացոյց ինքեան
անշուշտ խառնութեամբ : Նորա ոչ են շնորհեալ
ի բազմացն , և ինձ զբովանդակն ենեղ առատու-
թեամբ . վասն նորա ոչ երբէք չարչարեալ , և
վասն իմ հանապազ պատարագի . նա անհաղորդ
է կենացն , և ես միշտ վայելեմ ի փրկութեանն .
նա վանեալ է խաչիւն , և ես զօրացեալ նշա-
նաւն . նա հերքեալ ի լուսոյն , և ես միացեալ
ընդ փառացն . նորա ոչ խոստացաւ հանգիստ
և յերկրի , և ինձ զերկինս սեպհականեաց .
զնորայն կտրեաց զառհաւատչեայ , և զիմն
առանց խզելոյ յարակայեաց . զնա յերամակս
խոզիցն արգել , և զիս ինքն զօրացաւ . զնա
կարճաց օրինակեաց , և զիս ճառագայթ նշա-
նակեաց . զնա սողնոց նմանեցոյց , և զիս
իւրովն անուամբ կնքեաց :

բ. Իսկ ես զերախտիսն Աստուծոյ լքի զայսքա-
նեաց բարեաց արարողի , և չարին զկնի միտե-
ցայ՝ հայել ընդ նմին յատակս դժոխոց , ահա
անարժանս բարեաց , անձիրս երախտեաց ,
անընդունակս սիրոյ , տոռամբք մեղաց ձգեալս ,
յերիկամունս խորոց խոցեալս , քանցեալ ծառս
արմաւենւոյ , զինիս յեղաշրջեալ , ցորեանս հե-
ղեղեալ , մուրհակս ջրեալ , վճիռս պատառեալ ,
կնիքս այլակերպեալ , նմանութիւնս փոխեալ ,
արկանելիքս կիզեալ , ըմպանակս կորուսեալ ,

Եաւս ընկղմեալ, մարգարիտս մանրեալ, ակնս
պատուական սուզեալ, տունկս զուացեալ, նե-
ցուկս խորտակեալ, փայտս ամենեին փտեալ,
մանրագորս աղաւաղեալ, յարկս տապալեալ,
խորանս խարխալեալ, բոյսս արմատաքի խը-
լեալ, ձէթս հեղեալ ի գուեհս աղբեաց, կաթնս
հոսեալ ի կոյտս մոխրոց, այրս մահու ի յարեաց
գնդից: Քանզի միշտ խրատեալընդ երուսաղէմի
առակաւ նաբելոնի ի մարգարէիցն ձայնից անձն
իմ աղբալի, և ոչ ինչ խրատեցեալ. որ աստին
անգոսնեալ եմ և անդէն խայտառակեալ, աստ
դսրովեալ և անդ կշտամբեալ, աստ ձաղեալ և
անդ նախատեալ, աստ թշնամանեալ և անդ
յանդիմանեալ, աստուստ ապշեալ և անդանօր
լրեալ: Աստ հեծումն և անդ հառաչանք, աստ
կարծիս և անդ կառարած, աստ խէթ և անդ
հասուցումն, աստ արկածք և անդ հանդէսք
դատաստանի, ուր ոչ է բան իրաւանց և ոչ
ձայն պաղատանաց. ոչ թիւք աւուրց և ոչ ելք
ժամանակաց, ոչ ուղք յուսոյ և ոչ դրունք
ողորմութեանց, ոչ աջ պաշտպանութեան և ոչ
ձեռն այցելութեան :

Դ. Այլ դու ապահնութիւն, դու ինքն փրկու-
թիւն, դու այցելութիւն, դու և քաւութիւն, դու
երանութիւն, քև բժշկութիւն, քո ողորմութիւն,
միայն հզօր, կենդանի, անձառ, տէր Յիսուս

Քրիստոս բարերար Աստուած. օրհնեալ, օրհ-
նեալ և դարձեալ օրհնեալ, ընդ Հոգւոյդքո սըր-
բոյ յաւէտ բարձրացեալ ի փառս հայրենի իս-
կութեան մեծիդ յաւիտեանս յաւիտենից. ամէն :

ԲԱՆ ԿԸ.

Աերսին յաւեղուած կրկին մեծուրեան .

Ա. Եւ արդ ի յիշատակ ահարկութեան վերա-
գրեցելոցդ՝ որք յաստուածուսդ են սպառնալիք
ինձ ժամանեցեալք, զիարդ դադարեցայց ի նո-
րոգ ողբերգութեանց, և կամ որպէս զցամա-
քումն առցէ հեղեղք արտասուացս : Զի եթէ զչո-
րեքվտակեան առաջս գետոցդ յորդահոսան ծա-
ւալմանցդ, որ զեղեմ և զերկիր առ հասարակ
ոռոգանեն՝ լիապէս բաւականութեամբ բաշ-
խեալ ամենայնի, և զբղխումն ելից իւրեանց առ
աչս իմ եղեալ, զանձինս մեղաց սաստկութեան
զբոց զովացուցանել ոչ բաւականացին : Եւ
կամ մարգարէին սրբոյ ըղձականութիւն կրկին
ինձ լցցի գլուխս ջուրց բազմութիւն, և ճրագա-
րան տեսութեանց կերպիս՝ աղբերց կայլակ-
մունք, զբեկման ոգւոցս չափել զվտանգ ոչ
ձեռնարկեսցեն . և ոչ եղերականք ջայլից հա-
մօրէն բանահիւսից կանանց լալականաց ի սիրտ
և յոգի վիրաւորելոց՝ զաղէտ վտանգիս ի յերգ
արկանել և կամ ի նուազս ձայնից բերել :

Բ. Իմ է օրն լինելութեան նզովեալ, և ոչ Յու-
բայ կամ Երեմիայ. քանզի տօնելի է օրն նոցա,
զորոց մի ի նոցանէ ոչ արժէ աշխարհ, և ոչ
տարագրելի. ապա ուրեմն զիս նկատ եղեալզոչ
արժանիս լուսոյ և կամ միոյ մասնաւոր բարւոյ,
զիանդիպումն աւուրն անհիծին՝ յորում ես գտայ
կորստեան որդիս և մահու դրացիս, մշակս մե-
ղաց և արբանեակս անօրէնութեանց։ Որ ոչ
կացի յուխտին կենաց զոր դու սահմանեցեր,
Աստուած բարերար. ոչ զնացի ի քո պատուի-
րանն կենդանական անմահացուցիչ. ոչ վաս-
տակեցի ի հունձս արմտեացն, որով ի մուտս
ձեանն աւուրցն խռովութեան կերակրել պատ-
րաստեցայց. ոչ կառուցի ամրութիւն որմոց և
ոչ ձեղուն յարկաց ձգեցի. որով ի շնչմանէ
մըրկաց օղոց պահեցայց. ոչ համբարեցի նըշ-
խարս պաշարաց ի յուղին անեզրական, որով
զտագնաապ սովոյն իմ բժշկեցից. ոչ հանդերձա-
ւորեցի քեզ աղերս աղօթից, որով առաջի քո
կալ համարձակեցայց. ոչ կազմեցի թոշակ փրր-
կութեան վարուց մաքրութեան, որ զնորոգու-
թիւն ինձ երաշխաւորէ. ոչ ետու զընտրութեան
հաշիւն ի կենցաղոյս ճանապարհի՝ իմոյ մատ-
նըշին, զի ի դատաւորին ձեռանէ աստէն իսկ
փրծայց. ոչ լրութեամբ ձեռին օրինութեան
մատեայ յանդիման, որով օրէնսդրին մասնա-

կից գտայց սրբեցեալ: Ոչ դիմաց ետու զգուշութիւն և ոչ թիկանց պատսպարութիւն, ոչ աջոյս իմ զինուորութիւն և ոչ ահեկիս պարածածկութիւն, որով ի պատերազմիս վտանգէ զերծայց, զերիվարս ոչ զգեցուցի զրահիւք, և ոչ զմարտիկս սպառազինութեամբ, որով զճակատն յարդարեցից: Զկանուխն ոչ կապտեցի պտուղ, և անազանին ոչ ժամանեցի, և ահա տարակուսիմ ունայն ի բարեաց. մաքրութեան ծաղիկ ոչ ունիմ և ոչ իւղ ողորմութեան, և զիշերոյն մռայլ աննշոյլ. ի նիրհումն մահու ննջեալ եմ, և տագնապ կոչողին փողոյ ստիպէ. զզարդ հարսանեացն կրկին մերկացայ, և զձեթ վարուցն վերստին լքի, և դուռն մտին հարսանեաց աւասիկ փակի:

Գ. Եւ արդ զիանը առից մխիթարութիւն այս քանեաց վշտաց, և կամ ընդ որքանեաց տարակուսանաց խաւարի՝ լրտաւորութիւն յուսոյ կենաց խառնեցից, և կամ ուր արդեօք զզարշապարս ոտին կառուցից, և կամ յո՞ր վստահութիւն զաչս իմ յառեցից, և զինչ անդորրութիւն ծփանացս նկատեցից, և կամ յո՞ր ըղձական դիւրութիւն ձեռն համբարձից: Զի եթէ ի ձեղուն բարձրութեան երկնի, անտի անձրևեաց հուրն Սողոմայ, որպէս ասացեալ է. իսկ եթէ յատակ խորութեան երկրի, սա երաց զկոկորդն ըմբըն-

հանդերձ ջրակարծ կարկտիւն և ապականագործ եղեմամբն. որ առ աչաց տեսիլ ապազէնք և նուաստագոյնք, բայց ի յակնարկելն Աստուծոյ յաւէտ գոռողաբար ուժգնութեամբ հարին հանին վանեցին զիպարտն ամբարհաւաճութիւն Փարաւոնի բունութեանն բուռն գաւազանին՝ յաղթող վիճակաւ. որ են կերպարանք թաքուցելոցն կրից լկողաց անձնականացն աներևութիւն եզիպտացւոցն անօրէնութեանց՝ յոզի և ի մահ տանջողաց՝ գաղտնի վնասողաց :

Գ. Այլ դու ամենազօր արարիչ բնաւից Տէրդ բոլորից, ի յատելիսն հանդիսացիր հերքելզնոսա. և ինձ ողորմեան կրկին զթութեամբ ձեռն մատուցեալ փրկութեան տարակուսեցեալ կոշկոնեալ վարանեալ ի մահ պարտելոյս: Զի դու միայն ճանաչիս Աստուած փառաւորեալ միշտ ընդ Հօր Հոգւովդ սրբով յափառեանս յափառենից. ամէն:

ԲԱՆ ԿԹ.

Պերսիա յաւելուած կրկին և նժորեան .

Ա. Եթ արդ, վասն զի ի ձեռն մեծիդ և ամենահար արուեստաւորիդ իմս եղանութեան տեառն և Աստուծոյ՝ իբր ի քրայս ընտրութեան փութոյ քոյ սիրոյ հանապազ եռամ և ոչ երբէք պարզիմ, միշտ խառնիմ զուզիլ և ոչ ևս միա-

հանդերձ ջրակարծ կարկտիւն և ապականագործ եղեմամբն. որ առ աչաց տեսիլ ապազէնք և նուաստագոյնք, բայց ի յակնարկելն Աստուծոյ յաւէտ գոռողաբար ուժգնութեամբ հարին հանին վանեցին զիպարտն ամբարհաւաճութիւն Փարաւոնի բունութեանն բուռն գաւազանին՝ յաղթող վիճակաւ. որ են կերպարանք թաքուցելոցն կրից լկողաց անձնականացն աներևութիւն եզիպտացւոցն անօրէնութեանց՝ յոզի և ի մահ տանջողաց՝ գաղտնի վնասողաց :

Գ. Այլ դու ամենազօր արարիչ բնաւից Տէրդ բոլորից, ի յատելիսն հանդիսացիր հերքելզնոսա. և ինձ ողորմեան կրկին զթութեամբ ձեռն մատուցեալ փրկութեան տարակուսեցեալ կոշկոնեալ վարանեալ ի մահ պարտելոյս: Զի դու միայն ճանաչիս Աստուած փառաւորեալ միշտ ընդ Հօր Հոգւովդ սրբով յափառեանս յափառենից. ամէն:

ԲԱՆ ԿԹ.

Պերսիա յաւելուած կրկին և նժորեան .

Ա. Եթ արդ, վասն զի ի ձեռն մեծիդ և ամենահար արուեստաւորիդ իմս եղանութեան տեառն և Աստուծոյ՝ իբր ի քրայս ընտրութեան փութոյ քոյ սիրոյ հանապազ եռամ և ոչ երբէք պարզիմ, միշտ խառնիմ զուզիլ և ոչ ևս միա-

նամ. ահա զուր՝ արծաթագործդ երկնաւոր իմ
ճարտարապետ, ի սնուտիս վաստակեալ առ իս
աշխատիս, ըստ մարզարէին յայտնի առակի,
և չարութիւնս իմ ոչ հալեցաւ. զոր ինձէն մո-
լեալ չարաչար՝ իբր զիսելագար դիւաբախ իմն
ողորմելի յանդենեալ անկարգս խօսիմ՝ զիմս
զպարտիսս աճեցուցանել, քան հաշտութեան
հնարս ինձ այսու կազմել: Եւ զի մի անընդել
դիպուած և անկիրթ պատահումն և անհաւա-
սար հանդիպումն՝ պատրաստութիւնք հան-
դերձելոց տանջանարանացն ինձ երևեսցին,
ամենեւին անմոռաց պահեաց աստատին իյիմում
մարմնի նշխար մնացուածոց նախնումն անի-
ծիցն. զոր ի փոքուէ տարրէ անարգէ զմեծն է
ուսանել:

Բ. Քանզի խաղալն ինքնարերական զիւտք
որովայնի՝ բուտոտք ճապուկք շարժողականք և
ազգի ազգիք, որդունք աղեաց գաղտնակուրք,
խաղաւարտք հրակայծակք և բիծք բոցակիծք
և անիծք անկերպաւորք և երամակք ոմանք
քրտնածինք զազրաթորմիք կոկծեցուցիչք և
մարմաջողականք: Ասպատակք այլոց վայրե-
նեաց, ըստ նմանութեան դիւաց զիշերամար-
տից և մեկնազէն բարբարոս զնդից խաւարա-
սիրաց, և զազանութեամբ քանասար զայլոց
արաբացւոց, կորակոր զնացիւքն, արջնաթոյը

գունովն, կրկնապարոյք կռածագ կտցաւն, որ զօրէն ունի խայթոցաց կարմի, իբր դրժնիկ փշովք խոցուեալ ծծեն ձգեն զարեանն խոնաւութիւն, և յանկողինս մահմաց հանգըստեանն վաստակս կրից ցուցանեն; Եւ կարկառեալ ուրուք ձեռն՝ հատուցանել զհատուցումն նոցա նոցին, վաղվաղակի զգան զվեաս վտանգին՝ զոր ազդեն մարմնոյն. և անդէն խկոյն լերկամարմին փոքր հասակաւն իբր թևօք իմն թռիչս արձակեն, և ըստ մարախի ձևոյ ոստուտեալ այսր անդր տարաքերին. և ըստ բազմապատիր նենգութեան բարոյից դաւող աղուեսուց՝ խորամանկեալ խուսափեն ի պատուածս բազում ելից, զի յերկիւդէ մահուն ապրեսցին: Եւ այնքան չքոտի և անքատ անձամբքն ոչ միայն զուամիկսն և զիսունիմաղաննըս, այլ և զթագաւորս հզօրս և ահազինս փախուցանեն հանեն տարագրեն ի դստիկոն յարկի ապարանիցն բարձրութեան, և կամ ի բացի բնակեցուցանեն. քաջք արանց արեաց, որք իշխեցին ամբոխից և տիրեցին ժողովրդոց և առին զքաղաքս ազգաց, զպարտութիւն իւրեանց զօրաւոր ձեռինն ինքեանք վկայեն, թէ քանզի ոչ կարացաք ի դիմի հարկանել վեհիցն բռնութեան, վասն այնորիկ խոյս տուեալ հասաք յայս տեղի:

Գ. Եւ զինչ է ինձ զփոքունց և զանկածից ծաղրականաց ոմանց գոյութեանց ի կիր արկանել, որք զօրեղ և անհերքելի ջատագովք են սատուածութեանն՝ յիշատակել ինձ զիանդերձեալսն, որք ի մարմնոյս անօրինելոյ ընծային պտուղք դառնութեան։ Ընդ որս և եկամուտ սատակչականացն ախտից գիւտք, և կերչացն կոյտք անողոքելիք. յորոց չէ զերծանել, քան թէ հարկաւ մարմնոյն վտանգի զապագայիցն սոքօք իմաստափել, և ոչ տեղի է գտանել ապաստանի՝ ֆախստեամբ անկանել առ նոսա. այլ առանց կամաց քումդ ակնարկութեան և մարդկային կարք և հնարք վրիպեցան։ Խոկ դու, բարերար, զամենայն ունիս բաւականապէս զկենացն հնար՝ եթէ կամեսցիս փրկել, նորոգել, քաւել, բժշկել և կենագործել. և քեզ փառք յամենայնի յաւիտեանս յաւիտենից. ամէն :

ԲԱՆ Հ.

Վերսին յաւերուած կրկին հեծուրեան.

Ա. Եւ քանզի համբարձեալ զընթացս բանիս ի փոքունց աստի երկրայնոց չհամարելոց ընդ գոյս եղելոց՝ ի մեծագունիցն տեսակս, ասացից զունելի հանդէս իրաւանց ահաւորին անաշառութեան։ Որ զի թէ մերձաւորագոյնք իցեն

Աստուծոյ իբրև զնախածանօթ հայրապետութիւնսն, և կամ մաքրագոյնք որպէս մարգարէսն, կամ անբժագոյնք իբրև զառաքեալսն, կամ ընտրելագոյնք որպէս մարտիրոսսն, եթէ ոչ դու մարդասիրեսցես աննուազ բարիդ և անփոփոխ խնամակալութիւնդ և անպակաս ողորմութիւնդ, ընդունայն է ինձ փրկութիւնն առ ի նոցանէ :

Բ. Զի եթէ առ նոյն ինքն Աքրահամ ձայն արձակիցեմ, իբր ողորմագին առակ ընչեղին ինձ վաղապետէ, ի տապոյ անտի պապակեալ, կաթի միոյ ջրոյ ոչ բաւականանայ. քազի և նա փակեալ է ընդ կարեօք հասարակաց անհնարութեան : Իսկ եթէ առ Մովսէս, և նա զգածեալ է տկարութեամբ, որ ոչ զօրեաց առնն փրկութեան, որ զհայթայթանաց կրկուտն ի պահպանութեանն աւուր ժողովէր : Իսկ եթէ առ Ահարոն, և նա ինքնին իսկ կարօտացաւ մաղթողի : Իսկ եթէ առ Դաւիթ, ի մէջ բարեացն առաւելութեան ստգտեալ է և նա : Իսկ եթէ առ Նոյ և Յոր և Դանիէլ, զայս Եղեկիէլ մարգարէ մեկնեաց յանուանէ իսկ յիշատակեալ զնոսա, և զայն ընդ նոսին իբր ի դիմաց Աստուծոյ ազդեալ, կենդանի եմ ես ասէ Տէր, թէ ոչ ապրեցուսցեն զուստերս և զդստերս իւրեանց ի բարկութենէն որ հասանիցէ, բայց եթէ ինքեանք

միայն ապրեսցին : Խոկ եթէ առ Պետրոս վկան
հաւատոյ, ի քումդ խնամոց խուն մի խիթա-
ցեալ և նա ընդ կրիւք իմն գրաւեցաւ : Թողում
ասել զբազմացն զումարութիւն խոնարհեալ առ
կարիս կարիս, թէ և յաւէտ երջանիկք իցեն.
ընդ որս և Յովասու ոմն մարգարէի ի մէջ
աստուածառաքն սպասաւորութեան մարդկօ-
րէնն զայդակղութիւն մնայ յուրզից անթարգ-
մանելի , թէ և ի դէմս իմն մեկնութեան ձևա-
կերպեսցի :

Գ. Եւ քանզի չափեալ սահմանեցաւ զօրու-
թիւն փրկութեան մարդկան, և ցուցան նոքա
ողորմեալք բարերարիդ և զօրացեալք ամենա-
կալիդ, կոչեցեալք պաշտպանողիդ և քաւե-
ցեալք հնարաւորիդ, շնորհեալք ազատեցուցչիդ
և բժշկեալք անախտականիդ, կենազործեալք
անապականիդ և լուսաւորեալք նորոգողիդ,
այսուհետեւ զիտացեալ զսակն որքանութեանց
հողածին ընութեանս, որք միսիթար են օրինա-
կաւն նմանաբարհարազատապէս վհատութեան
յուսահատելոց, ահա առ քեզ դիմեցից՝ որդին
Աստուծոյ կենդանւոյ Քրիստոս օրինեալ յամե-
նայնի : Մանաւանդ զառակն ազգակից այսմ
մաղթանաց աստանօր յիշեալ, զվերազրելոցդ
բան վերստին արդարացուցանէ. բարի է, ըստ
իմաստնոյ ումեմն երջանկի, անկանել ի ձեռս

Տեառն, և մի ի ձեռս մարդկան. զի որպէս մեծութիւն նորա, և ողորմութիւն նորին : Եւ այս բան թէ և զԴաւթին իմն գծագրէր, որ զերեք մասնեան հարուածն աստուածեան առաջի եղեալ՝ ընտրեաց ինքնին կամաւորաբար զդատակնիք մահուն սատակման՝ իբր զկենդանի Քրիստոսի հաւատոցն յաճախութեամբ, քան զերկուսն ևս այլ փոքրկուսն՝ որք տանցենն և ոչ ողորմին. սակայն և իմս օրինակութիւն բանիս պատկերի ճարակեցելոյ հնարս կենաց կորուսեալս անձին՝ ոչ է այլայլեալ յարմարութենէ. զի ոչ եթէ զիրկեալսն նուաստացուցանմ ի մատենի այսր ողբերգութեան՝ առանց որոց ոչ է մատչել առ. Տէր, այլ զիրկողին անուն պսակեմ, և զշնորհ նորին առ ամենեսին բարեհոչակեմ, և զբաւին բարձունսն ի թռիչս վարուց խոստովանիմ բանիս պայմանաւ յաւէտ կարօտեալ ողորմութեանն դեղոյ :

Դ. Ահա դու կեանք, դու ֆրկութիւն, դու բժշկութիւն, դու անմահութիւն, դու երանութիւն, դու լուսաւորութիւն. արա ինձ անզորը ի մեղացս աշխատութեանց, զի և քեզ լիցի հանգիստ ի մշտադատս հեծութեանց՝ ձանձրացուցիչս թախանձանաց. որ ոչ այլ իւիք, քան թէ փրկութեամբ մարդկան պարարիս, օրինեալ յաւիտեանս, ամէն :

ԲԱՆ ՀԱ.

Վերսին յաւելուած կրկին հեծութեամ.

Ա. Եւ քանզի երջանիկքն և փառաւորեալք
սրբոցն պարք, յորոց ոմանք դոյզն ինչ գթեցին
և յաճախագոյնս հաստատեցան, փոքունս սա-
սանեցան, և մեծագոյն վառմամբ նշուլից հոգ-
ւոյն մաքրութեամբ լուսաւորեցան. յորոց մինն
զզանգուածոյն յայտնէ զիասարակաստեղծն
տկարութիւն, իսկ միւսն զզերազանցն քան
զբնութեանն օրէնս, վարս և առաքինութիւնս
հրեշտակականս : Եւ արդ նոքա որ օրհնեալքն
են յամէնիշխան բերանոյ աստուածութեան հօրն
Քրիստոսի, ընտրեալքն տօնեալքն խնկեալքն և
բարեբանեալքն, իբրև զանդամս Քրիստոսի
պաշտեցեալք, և իբրև զօթեվանս Հոգւոյն սրբոյ
յարդարեալք, յորս չիք ինչ նշմարանք և կամ
զիւտք խաւարի, այլ ամեննեին անկեղծութիւն
և լուսաւոր արդարութիւն, և որքան մարթ է
զմարդն Աստուծոյ՝ Աստուծոյ նմանեցուցանել :
Երեսք պարզք և անպատկառելիք, կրօնք բար-
ձունք և անխոնարհելիք, կեանք զզաստք և
անստգտանելիք, պաշտօն առ Աստուած կարծը
և անփոխարկելի, ընթացք արիականք և ան-
կասելիք, ճշմարտութիւն միատարր և անցըն-
դելի, դիմագրաւութիւն զօրեղ և անհերքելի,

տեսաւորութիւն պայծառ և անապշելի, իմաստասիրութիւն վերնական և անկոխելի, պատկեր մաքուր և անաղարտելի : Զորոց կերպարանս և զյիշատակս անուանցն աղաչել Աստուած իսկ վարդապետեաց, և նոքօք հաճութիւն ի մէջ խոռվութեան արարչիդ բանլուսաւորեաց :

Բանն պանձալիք հաօսեցուցիք Աստուծոյ :

Բ. Այլ ես անպիտանս յամենայնի, և որքան բան զօրէ պարսաւեալս, որ մինչ դեռ արթունս եմ՝ Եիրհեմ, մինչ դեռ զգաստ երևիմ՝ թմբրիմ, ի բարեպաշտելս իմում գայթակղիմ, մինչ դեռ աղօթեմս՝ և վրիպիմ, ի յընթանալս իմում և կասիմ, յարդարանալս իմ և մեղանչեմ, ի խաղաղանալս իմում ամփոխիմ, մինչ դեռ արշաւեմս՝ առ իյետոյսն հակամիտեմ, ի չուելն իմում ընդ կրունկն դառնամ : Ընդ լուսոյն մասին և խաւար յարեմ, ընդ քաղցրութեանն ճաշակ՝ օշինդր խառնեմ, ընդ կուղս բարեացն՝ չարիս հիւսեմ, ընդ կանգնելն և կրկին գլորիմ : Ծաղկիմ և ոչ պտղաբերիմ, ասեմ և ոչ առնեմ, խոստանամ և ոչ կատարեմ, ուխտեմ և ոչ վճարեմ, կարկառեմ և անդրէն ամփոփեմ, ցուցանեմ և ոչ ընծայեմ, մերձեցուցանեմ և ոչ մատուցանեմ : Ի ճարակել խոցուածոյս անդրէն վիրաւո-

բիմ, ի հաջտեցուցանելն՝ վերստին խռովեմ, զուր հանդիսանամ և իրաւամբք պարտաւորիմ, գրիմ և խկոյն եղծանիմ, նաւեմ և ի գիծն թռւ լանամ, սկսանիմ և ի հանգիստն ոչ ժամանեմ : Կարգիմ և դարձեալ սասանիմ, լեանիմ և կըրկին հեղում, շարունակիմ աստ' և անդ ի ստորես հոսիմ, բարդիմ և անդէն տոչորիմ : Հիմն արկանեմ և ոչ գլխաւորեմ, սակաւ վաստակիմ և բիւրս վատնեմ, դոյզն գանձեմ և անթիւս սպառեմ, զայս խրատեմ և ես ինքն անփորձ եմ, միշտ ուսանիմ և երբէք ի ճշմարտութիւն գիտութեան ոչ հասանեմ : Զշիցեալ չարիսն նոյնչափ արծարծեմ, սուր ինչ քաջալերիմ և առաւելապէս լքանիմ, լարիմ և խկ և խկ առ նմին մեղկիմ, զայս կարկատեմ և զայն պատառեմ, խլեմ զեղիճն և տատասկ տնկեմ : Էնդ ամբառնալն և այսրէն քերիմ, մտեմ ի բոյնն աղաւնի և անտուստ ազուաւ երսնեմ, զամ սակաւ մի սպիտակ և սրանամ դառնամ քնաւին սկացեալ, առեմ զիս քեզ դաւանել և սպանողին նուիրիմ, ընդ յանդիման ինելն և թիկունս դարձուցանեմ : Մաքրիմ և այլ մրճուտիմ, լուանիմ և նովին զագրանամ, կերպարանիմ զիւթին և գործք զթաւուղայն կատարեմ, շրթամբք ճշմարտեմ և ստեմ երիկամամբք, աջովս մատակարարեմ և ահեակ կողմամբս աւերեմ : Էնդ

Երկրագործութեան ցըրենոյն որոմն սերմանեմ,
ի բարձրագոյն իմաստիցն ի վայր իշեալ ես ինքն
գտանիմ: Հրեշտականամյերես և ի խորհուրդա-
դիւանամ, ի յոտս հաստատիմ և ի միտս տատա-
նիմ, սուտ ձեւանամ և իրօք խոտորիմ, կեղծա-
ւորիմ արդար և արդեամբք ամբարշտեմ:
Դասիմ ի պարս հեզոց և ընդ այսս կաքաւեմ,
ի մարդկանէ գովիմ և ի տեսողէդ պարօաւիմ,
ի հողածնելցո երանիմ և յորդւոցն լրւոյ աւա-
դիմ, հաճոյանամ յետին ռամկին և թագաւորիդ
մեծի յաչաց ելանեմ: Զատեանն դատաւորին
թողեալ, խառնակրօնիցն աղերսեմ. հերքեալ ի
վեհիցն, սոսկականացն սպրդիմ. մարմնովս
արտաքուստ պճնիմ, և անձամբս երփնիւ
ճային ճանաչիմ, հպաւորիմ դաշն հաստատել,
և ուխտակորոյս արտաքս մերժիմ: Այսօր մա-
քուր հոգեկիր և վաղիւ մոլի խելազար, զտէ-
րունի պատուէրն լքեալ, թելադրութեան օձին
հետեւիմ. արիանամ զօրապէս, և վատթարա-
գոյնս ընկրկիմ. զծանրութիւն աւուրն բառնամ
և ի ժամ վարձուն անմասն ելանեմ. ի բացուստ
ճոռումս խօսիմ, և ի պատասխանատուութեանն
պահու պապանձեալ կարկիմ. ի յելս արեւուն
հարուստ երեխիմ, և ընդ երեկս ունայն դեզերիմ:
Ի յաթոռս ծերոց բազմեալ, և խելայեղից կցոր-
դիմ. Ենջեմ խեթիւ, և արհաւրօք զարհուրեալ

զարթնում : Զանդաստանս կամացս չարաշարս հերկեմ, փոյթ խնամով իշարիս, միշտ անառակ որդիս, անդարձ տարագրեալս անզղական զառածեալս, անմխիթար տրտմեալս, ինքնագրաւ գերեալս, մահու և ապականութեան ծառայեալս, անողոքելի տանջեալս, անփրկելի մատնեցեալս, անպատուաստելի հատուածեալս, անարծարծելի շիջուցեալս, անկազդուրելի խորտակեալս, անհանդերծելի կործանեալս : Եւ եթէ պարտ է զսաստիկն աստանօր ասել անօրինեալս անձին նախատինս, ահա զրեմ զրեմ և ոչ անխայեմ զխուիւս նիւթեալ գեհենին : Ստացուածս նախանձու նորոյս Աղամայ երկնայնոյ, որպէս և Կայէնն առաջին հնոյն և հողեղինին . որ ունիմ զբնաւն աստուատ ի յանձին զնշանակ ամբաստանութեանս, ոչ զշնչոյս տուրեառութիւն, այլ զբանիցս կշտամբութիւն :

Գ. Եւ արդ ուր իցեն փրկութիւնքն, ուր սկզբնահայրն հաւատոց ի յուսահատութեանն վայրի զանգթութեանն իմ չարիս կրկնէ, մեծն մարգարէից քարամբը բանից կոշկոմէ, արին բարեփառ աշտէին նիզակաւ ի մահ սատակէ, պատկեր ճշմարտին ընդ Աքարու համայնիւ ջնջէ, աստուածարեալն վեհից՝ յարագողացն վրիժուց մատնէ, մարգարէածին տեսանողն՝ ընդ ամաղեկացւոյն առաջի Տեառն

սպանանէ, նախանձաւորն Աստուծոյ երկինա-
տեղաց բոցովն վատնէ, ստուերին լրումն և Շո-
րոյս սկիզբն՝ հեծանոցին ընտրութեամբ հոսէ,
պետն առաքելոց ընդ Սափիրայի իկենաց զրաւէ,
զարմանալին քննութեամբ հոգւոյն՝ բուրումն
ինձ մահու ընդ կենացն քարոզ խառնէ : Արդ
անաշառք և ինձ կաճառք երջանկացն, և
ուժգնութեան հրամանի վերեոյն արի սպառա-
զէնք. ընդ հրեշտակացն և մարդիկ, ընդ տիե-
զերաց երկրի և տարերք, ընդ անզգայիցն և
շարժողականք, որովք դատեալ միշտ լինիմ
տուժիւք լվկանաց յօրինակ և յիշատակ սոսկա-
լեացն ապագայից. իբր հողմով փոթորկի ալեաց
յաւէտ մրբկեալ կենացս վստահութիւն, մնայ
անկայուն ի հաստատութեանց : Զոր եթէ ոք
իմաստութեամբ ի քննին առեալ խուզեսցէ
զլուղակացն բազմատեսիլ զանազանութիւն ըզ-
մանունս փոքրունս ընդ մեծամեծացն դասեալ,
որ առանց թուոյ և քանակութեան համարոյ
թինդս առեալ անբաւ երամոց եռան զեռան
սլանան ի մարմնիս ծովու, վկայեսցէ և հաս-
տատեսցէ ճշմարիտ լինել զասացելոցս բանա-
զրութիւն :

Դ. Այլ դու ինքն օրնաբանեալ անմահ թագա-
ւոր բարի երկնաւոր մարդասէր Քրիստոս, Աս-
տուծոյ կենդանւոյ միածին որդի, հզօր բար-

ձրեալ անքնին անճառ քաւիչ ահաւոր, սաստեա
ի ձմեռն ամբոխեալ ալեաց ոգւոյս ծփանաց,
արձանացն զծաւալս մոլեզին շարժման սրտիս
խոռվութեան, ընդոտնեան ի սանձս կապոյ երա-
սանաց ըմբռնման զցնղեալ մտացս վայրազու-
թիւն : Եղիցի խաղաղութիւն հրամանաւ մեծիդ
ամենավարան բքոյս սասանման, սատակեա
խափանեան զբազմագլխեան անդամս ուրուա-
կանս գաղտնեաց ամօթոյս երկրակենցաղս հի-
նից : Գրեսցէս աղօթս մշտամառոյցս զայս նո-
րընծայ տառ ողորմաղերս թախծազին ձայնի
ողբերգարկութեան այսր մատենի . հան ի խորոց
մահուս անդնդոց չքնաղ ապրեցեալ ընդ մար-
գարեին փրկելոյ . ընկալ զխոստովանութիւն
անձնադատ բանիս ի հոտ անուշից . շնորհեան
մխիթար դառնութեան վշտաց ուժգին հեծու-
թեան յուտահատելոյս : Եւ քեզ ընդ Հօր Հոգլովդ
սրբով փառք պատիւ և իշխանութիւն յաւի-
տեանս. ամէն :

ԲԱՆ ՀՅ.

Վերսին յաւելուած կրկին հեծութեան .

Ա. ԱՅԼ ահա ձեզ ասեմ, ով եկեղեցիք միանձանց
և աշակերտութիւնք կրօնաստանաց, որք մեր-
կամարմին մատանցդ ձեռօք առ անկնկալու-
թիւն յուտոյն պարզեաց բարեացն անբաւից

Տեառն զինուորեալք , որոց զայս սեղան հաՅ-
դերձանաց խորտկաց բանից ընծայեցուցի , ըն-
կալարո՞ւք զայս աւանդութիւն խոստովանու-
թեան իշխուած փրկութեան հոգւոց : Ծաներո՞ւք
սովորմբ զմարմնոյս պարտութիւն , յիշեցէք
զմարգարէականն ընդ առաքելականին առեալ
մեզ ի խրատ , զի մի պարծեսցի ամենայն մար-
մին առաջի Աստուծոյ , և զոչ ոք է արդարն և
ոչ մի : Զտէրունականն մի մոռանայք , ի կա-
տարածն իսկ պատուիրանին գոգչիք զձեզ ծա-
ռայս անպիտանս . մի եղիցի լինել ձեզ որսք
խաբողին . զգուշացարո՞ւք և զրոյն , թէ կերա-
կուրք նորա ընտիրքն : Քանզի և ես իսկ , որ
զայս նուազութիւն մասնաւոր պտղոյ ձեզ ջամ-
բեցուցի , վկայեալ զանձնէ կամաւորական ըստ-
զրտանք բիւր բամբասանաց անքշշկական մե-
դանաց , ի սկզբնահայրն սկսեալ մինչև ի
սպառումն ծննդոց նորա՝ կամայականն յանձ-
նառութեամբ հաստեցի եղի զիս ամենայնիդ
պարտական չարեաց :

Բ. Լուայ յումեմնէ ոչ պարտաւորէ , և ոչ
հաճեցայ , ի յասելն նորա անյարմարապէս առ
այն , որոյ առաջի ոչ է արդարանալ մարմնոյ
երկրածնի , թէ ոչ երբէք շնացայ , ոչ պոռնկե-
ցայ և ոչ զաշխարհիս ինչ համբուրեցի ճաշակս
մահու : Այլ ոչ ընդհատ ինչ յանօրէնութենէ .

թողցէ նմա տէր Աստուած զայսոսիկ. թէ և
ճշմարտիւ իսկ գրեցաւ, ոչ ընթացաւ, որքան
թէ գթեաց, իյասել զանյարմարսն ի դիմաց ժո-
ղովրդեանն իսրայէլի բանիւ Զաքարիայ, օրի-
նեալ Տէր, և մեծացաք. որ է փարիսեցւոյն
ձայնի կերպարան : Բայց ես քանզի գիտողին
Աստուծոյ մատնեալ եմ դատաստանի, որ զկիրս
աներևութիցն մտաց ի կշիռս եղեալ համարի
դատել զիս նոքօք ամենիրաւ հատուցմամբք,
ոչ կերպարանեցայց տեսողին, ոչ կեղծաւորե-
ցայց քննողին, ոչ ստեցից զոչ գործեցեալսն
նկատողին, ոչ խարեւութեամբ ընդ միտ ինչ
մտից մեծին, ոչ ի տեսիլ բարւոյ ցոփութեան
զշարս քողարկեցից, ոչ ի պատկեր ընտանի
զապիկարս երբէք յարգեցից, ոչ խենեշացայց
ի զարդ օտարոտի, ոչ պանեցայց այլով պայծա-
ռութեամբ, ոչ պաճուճանս յարմարեցից տղե-
ղութեանս զեղոյ : Ոչ ոք մեղաւոր իբրև զիս,
ոչ ոք անօրէն, ոչ ոք ամբարիշտ, ոչ ոք անի-
րաւ, ոչ ոք չարազործ, ոչ ոք վրիպեալ, ոչ ոք
սխալեալ, ոչ ոք մոլեզնեալ, ոչ ոք խարդա-
խեալ, ոչ ոք շաղախեալ, ոչ ոք ամաչեցեալ,
ոչ ոք դատապարտեալ, ես միայն եմ և այլ ոչ
ոք, ես ամենայնն և յիս ամենեցուն : Ոչ հեթա-
նոսք, զի ոչ գիտէին . ոչ հրեայք, քանզի կու-
րացան. ոչ տգէտք և խառնիճաղանջք, քանզի

յիմարք էին իմաստից : Պետ վարժից կոչեցայ յանձինս դատախազ . ռաբբի ռաբբի անուանեցայ, և զգովեստն առ Աստուած եղծի . բարի ասացայ առ Եղիութեանն ժառանգութիւն . սուրբ վկայեցայ ի մարդկանէ, որ եմ անմաքուր առաջի Աստուծոյ . արդար դաւանեցայ ամենայն իրօք ամբարիշտս . հեղտացայ ի գովեստ մարդկան, զի ծաղը Եղից յատենին Քրիստոսի . յաւազանէ կոչեցայ Արթուն, և ես ի քուն մահու նեցեցի . ի փրկութեանն աւուր Հսկող յորդորջեցայ, բայց զզգաստութեան աչս կափուցի : Ահա դատաստան, ահա յանդիմանութիւն, ահա նոր կշտամբանք և հին դատապարտութիւն, ահա ամօթ դիմաց և տազնապ հոգւոյ, ահա խնդիրք փոքրունց և կշիռք մեծամեծաց :

Գ. Այլ դու միայն տէր Աստուած մարդասէր, անոխակալ և Երկայնամիտ, համարեաց մեղապարտս անձին ընդ վերջին պարտաւորութեան աւուրն ահաւորի զայս կոկծեցուցանող ինքնաբանական նախատինս : Մի լուայց ի քէն զայսոսիկ, գթած, փոխանակ զի ես ինձէն անձինս զրեցի : Արդ բարձես և վերացուցես զպահ պարտաւորութեան կանոնիս ընդ քեզ կապելոյս տենչանօք հոգւոյս : Հան զնախատինս պատկառանաց խայտառակութեանս, ծածկեան աջովկ կարողութեան զտվեղ տեսակ մարմնոյս

մերկութեան, մատու հանգստեան զթոպեալս
ուժգին մեղացս բեռամբք, կարգեան ինձ սահ-
ման հետոց բարութեան առ ելս կենացդ, պա-
հեա յիշտակ ինձ ողորմութեան և զկնի մահու
կեանք ամենեին, օրհնեալ յերկինս և զովեալ
յերկրի, բարեբանեալ միշտ յամենայնի՛ յաւի-
տեանս յաւիտենից . ամէն :

ԲԱՆ ՀՊ.

Կերսին յաւեղուած կրկին հեծութեան .

Ա. ԹՍ.ԳՄ.ԽՈՐ բարձրեալ հզօր ահաւոր, օրհ-
նեալդ միայն տէք Յիսուս Քրիստոս, քո է փո-
խարկել յանակնկալս կենաց յուսահատութեան
զսատակիչ անէծս առ կեցուցանող օրհնու-
թիւնս, զպարսաւանս վհատութեան առ զուար-
թացուցիչ զովութիւն, ընդ ամօթոյն՝ համար-
ձակութիւն, ընդ պատկառանացն՝ պատիւ,
ընդ տարագրութեանն՝ յոյս բարութեան, ընդ
բաժանմանն ակնկալութիւն միութեան, ընդ
սպառնականացն բանից՝ ողոքական սփո-
փանս, ընդ մի անզամ դատապարտութեանն
կրկին ազատութիւն :

Բ. Ողորմեան, Տէք, մահու մեղապարտիս յա-
ւուր արձակման շնչոյս կենդանութեան, մինչ
աչացս ողորմագին հայեցուածս ի բարձունս
կողկողիցի, զբազմարկածեան ուղւոյն զանզերծ

ընթացիցն զանփախչելին ճանապարհ յաչս բերելով մտացս տեսմամբ ամենայնիւ վտանգեալ . և ի յերդ բնակութեան յարկիս նկատեալ յելիցն շաւիդ , թշուառացեալ կիսամեռութեամբ , դիմօք այլայլութեան , տատանմամբ մատանցս , կարկամ հառաչմամբ , նուադ հեծութեամբ , նրբական ձայնիւ , յոզի թախծութեան յոքնամասնեայ տարակրւսանաց՝ ի խորոցս աներեւութից զգործեցելոցս ողբարով հառաչեմ : Կարող ես , բարեգութ , և անդ հրաշագործել յաւէտ զօրեղութեամբ ասելով , թէ ողջ եղիշիր յոգւոյդ խորտակմանէ , և կամ թողեալ լիցին քեզ մեղանք քո , կամ թէ երթ ի խաղաղութիւն սրբեալ ի մեղաց : Եւ զոր յայնմ ժամու ոչ ժամանեցից պաղատել , այսօր ընկալցիս մարդասիրապէս , ով երկայնամիտ բազմազնորհ ամենակեցոյց : Յորժամ , որ այժմս բանապաճոյն խրոխտաձայն սիզացող բարձրապարանոց , անկեալ դնիմ դի անկենդան , կարկեալ ի խօսից , կաշկանդեալ ձեռօք , լքեալ անդամօք , խփեալ շրթամբք , կափուցեալ աչօք , տախտակ անշարժուն , կոճող կիսայրեաց , արձան անզգայ , պատկեր անբարբառ , գոյութիւն անջունչ , ողորմելի տեսիլ , աշխարելի կերպարան , ողբալի օրինակ , եղկելի դէմք , արտասուելի նմանութիւն , լուեցեալ լեզու , ցամաքեալ խոտ թօթափեալ ծաղիկ , ծո-

բեալ գեղ, շիշեալ դամբար, դատարկ կոկորդ, խոպանացեալ սիրտ, աղխեալ ազդարան, ըսպառեալ աղբիւր, թալկացեալ մարմին, ժողխեալ որովայն, քակտեալ տաղաւար, կոտորեալ ոստք, բաժանեալ յօդք, հատեալ ծառ, սղոցեալ արմատ, թողեալ տուն, հնձեալ արտ, ստորախուզեալ բոյս, օտարացեալ բարեկամ, մոռացեալ պահեստ, թաղեալ գարշութիւն, մերժեալ ատելի, բարձեալ խէթ, անարգեալ կմախք, և իբր զանպիտան առ ոտն կոխեալ: Կարօտեալ այլոց մաղթանաց, որք զհաւատոց թշուառիս ճայնիւ նուազեալ աղերս հառաչման, ցողով արտասուաց բարերարիդ զթութեան ի բարձունս տարածանեն: Զառ քեզ դարձն յեղանակեն արգահատելով, զոր օրհնեմ. զնշան խաչիդ փրկութեան, զոր երկրպագեմ. զյարութեանն ճշմարտութիւն, որում հաւատամ. զիառացդ քո յայտնութիւն, զոր փառաւորեմ. զդատաստանիդ ահաւորութիւն, զոր խոստովանիմ. զբանիցդ յանդիմանութիւն, յորմէ զարհուրիմ. զհոգւոյդ սրբոյ ինձ ուղեկցութիւն, զոր պաշտեմ. զօմանդ տեառնագրութիւն, զոր և համբուրեմ. զթագաւորեն ընդ քեզ, տէր Ցիսուս, որում պաղատիմ: Արդ լքաւ մերժեցաւ բարձաւ տրոհեցաւ փախեաւ սրացաւ տեղի ետ կցորդութիւն զուգութեան կենցաղոյս կենդա-

նութեան, և յոյսդոր ի քէն պարզե՞ մնացական
և անջնջական յիշատակարան պահեցաւ :

Գ. Տես ողորմութեամբ ի տարակուսանս վը-
տանգելոյս միայն բարեգութ փառաւորեալ որ-
դի Աստուծոյ, քաւելքժկել կենազործել պաշտ-
պանել նորոգել նկարել կանգնել հաստատել,
վերստին ստեղծագործել յերջանիկն անարա-
տութիւն, քո է կարողութիւն, քո է փրկութիւն,
քո ողորմութիւն. չիք քո անկարութիւն, այլ
ամենեւին զօրութիւն, բարձրութիւն, իշխա-
նութիւն, անվախճան թագաւորութիւն, իս-
կութիւն, ինքնութիւն, ամենատեղի բացարձա-
կութիւն, բարերարութիւն, լուսաւորութիւն,
փառաւորեալ տիրապէս, անպակաս և անյա-
ւելուած, խնկեալ խորհրդով անթարզմանելեաւ
յերբորդութեանդ սրբում, գոհաբանեալ յաւէտ
և ևս առ սմին ի նոյն պաշտօն հաւասարութեան
միապատիւ զուգականութեան, երէկ և այսօր
և յաւիտենից յաւիտեանս. ամէն :

ԲՈՆ ՀԴ.

Վերսին յաւելուած կրկին հեծութեան .

Ա. Արքուն երկնաւոր, Տէր բոլորեցուն, առ
ամենայն բան յամենայնի միշտ երկայնամիտ,
Աստուծոյ կենդանոյ անքնին Ռոդի: Սիա անդ
է ողորմելն իսկապէս, յորում հատաւ ակնկա-

լութիւն վաստակոյն. անդ է բարեգործելն, յորում տեսութիւն իմաստիցն խափանեցաւ. յայնմ ժամու է մարդասիրելն, յորում տկարութեանն վտանգ պաշարեալ տիրեաց ներքոյ և արտաքոյ. անդանօր է բժշկութիւն աստուածային քոյ ձեռինդ, յորժամ բնաւ անդամոցն տեղի ետ կենդանութիւնն. այն վայր է այցելութեան, յորում ելք հնարից ոչ գոյ. այն է քո մեծութիւն, յորժամ զյուսահատութեան վերն ողջացուցանես. այն է հարազատ քումդ ազգակցութեան, եթէ յանակնկալն ժամու արուեստաւորեսցես փրկութիւն. այն է հանդիսարան քում յաղթանակի, եթէ զիակնկալն մուտս կենաց ի սպառումն շնչոյս բացցես. այն են քո շնորհք վայելչականք, եթէ զչարեացս իմոց մոռացեալ՝ զբարեացդ քո յիշեսցես: Յայսմ ես անխակալ, եթէ ապախտաւորիս ընդ երախտաւորացն խնամարկեսցես. ի սոսին ծանեալ զիտացից՝ եթէ նայեցար ի նուէր բանիս նախնի գթութեամբդ, եթէ զսովորութիւն չարեացս բարձցես:

Բ. Յաղազս այսորիկ հիւսին բանք և եղանակին նուազերգութիւնք, յորժամ տէրն բարի՛ չարն ծառայի զբարեգործացն պարզեեսցէ. որ մինչ իրաւամբք մնասցէ բանտի, նա յարքայական ապարանս զնա հանգուսցէ. մինչ հրաւի-

ըեալ է ի գուբ տղմոյ, նա ի բազմականս ամենապատիկս գահուց գրգեցուցանիցէ. մինչ բրելոյ զաշսն դիտեսցէ, նա ի բարձրութիւն բերկրութեան հայեցուցանիցէ. մինչ ծայրատութեան մատանցն սպասէ, նա մատանի համարձակութեան մատուցանիցէ. մինչ հայի հարուածոց զանից, նա զթոց գիրկս արկանիցէ. մինչ պատրաստեալ յուսայ կորստեան, նա երեելի տեսողաց բազմաց առնիցէ. մինչ ակն ունի սատակման մահու, նա ընդ կենացն և փառս ընծայեցուսցէ, մինչ հատման զիսոյն նայեսցի, նա զեղյն պակաւ պայծառացուցանիցէ: Այս պտուղը օրհնութեան, զթած, սքանչելարմատ քում շառաւիղաց. այս արգասիք կենաց արարչականդ քո հրամանաց. այս իղձը խորհըրդոց խոստովանեալդ քո տենչանաց. այս նշոյք լրւոյ ամենասփիռդ ճառագայթից. այս ախորժութիւն ճաշակաց բարեբանեալդ քո քաղցրութեան:

Գ. Քո միայնոյ են այսոքիկ, Տէր. ի քեն ազդեցաւ գրել ինձ զսոսին. ահա զքոյսդ յատուկ աղերս աղաչեմ, օրինեալ, ի քոյոց այտի պարզեալ շնորհեա. բաց, Տէր, զգանձս քո բարիս, ըստ աղերսանաց առակին: Մի խառնեսցես ի համբարս բարեացդ քոց ի չարեացն իմոց. մի շտեմարանեսցես զատելիսն քո՞ որ են ոխու-

թիւնք և ցասմունք, ընդ սիրելիսն քո՛ որ են
գթութիւնք և ողորմութիւնք. մի պահեսցես
ի ստացուածս քո պաշտելիս զանախորժելիսն
քո՛ որ են մթութիւնք և դաժանութիւնք, և զիմ
վնասելիքն՝ որ են մեղք և թշուառութիւնք։
Մի գրեսցես աջովկ օրհնութեան ի մատենիդ
կենաց զմուրհակ պարտուց իմոցս անիծից, այլ
զանհնարաւորսն ինձհամարեալս՝ մեծացուսցես
կրկին առաւել զանուն քո Տէր ի նոսին, ցուցա-
նել զդոյն ինձ դիւրինս և հեշտականագոյնս։
Նատ են իմ պարտիքս և անդր քան գթիւ, այլ
ոչ այնքան հրաշալիք իբրև զքո զողորմու-
թիւնդ. բազում են մեղանքս, այլ յաւէտ են
նուազեալ առաջի քոյդ ներողութեան. յաճախ
են չարութիւնքս, այլ յաղթական են համայնից,
հզօր ամենակալ, քոյդ մարդասիրութիւն. ինձ
են անհամար իմոյս անձին բիծք, այլ քեզ յոյժ
գրաւեալ են ընդ սահմանաւ։ Ոչ են այնքան
զօրաւորք առ կենդանութիւն զէնք մեղանաց
պատկառեցելոյս պտղաբերութեան, որքան յի-
շատակ մահու կենդանւոյդ առ վանումն կոր-
ծանողին բռնութեան։ Զինչ ազդեսցէ փոքր
խաւար՝ աւուրդ Աստուծոյ, զիանրդ բաւեսցէ
դոյզն ինչ աղջամուղջ՝ մեծիդ ճառագայթից,
զիանրդ համբարձցի կշռեսցի ընդ խաչի քո
կրից՝ խակութիւն հեշտութեան մարմնոյս տկա-

բութեան։ Զինչ երևեսցի յաչս ամենակալիդ քոյ
առատութեան՝ կոյտք մեղանաց ամենայն տիե-
զերաց. ահա կոշտ մի հողոյ դիւրափիսրելի ի
կարծրութենէ բախման վանեցեալ, իբր զպըդ-
պըջականձրեսոյ բազմազեղ հոսմամբ քո կամացդ
չքացեալ պայթեալ անդստին։ Զինչ պիտոյ են
քում զօրութեանդ ամենահնարդ կարողութեան
ժամանակաց առաւելութիւն առ յանցուածոց
իմոց քաւութիւն. ոչ քթթել մի ական, ոչ
խուն մի տեսութիւն ածանցական, ոչ սակաւ
մի նայեցուած փայլական, ոչ կիսամասնեայ
յամրութիւն, ոչ փութացելոց ոտից յեղեղումն,
ոչ յելից բարձրութենէ միոյ կանգնոյ կաթի ան-
կելոյ, ոչ զիծ մի չափոյ մտաց հետևեցելոյ, ոչ
նշուղից արագութիւն, ոչ շնչոյ տուրեւառու-
թիւն, ոչինչ յայսմ յանգոյ և յանտպաւորական
նմանութենէ անձև օրինակաց յաւէտ' անկայից՝
այնքան առժամայնք կամ հարևանցիկք, որքան
եղծմունք, ցնդմունք և հալմունք մեղացս սառ-
նամանեաց պահեստի՝ քումդ զօրութեան, Աս-
տուած ամենայնի տէր Յիսուս Քրիստոս, Որդի
անքնին կենդանւոյդ Աստուծոյ։ Որ տաս պար-
գևես արև քաղցրութեան՝ չարաց ընդ բարիս, և
անձրեսերկաքանչիւրոցն անաչառապէս. կըշ-
ռես սահմանես իրաւամբք և զվտանցս կրիցն
հաւասարաբար. որոց մեծ է հանգիստն առ

ակնկալութիւն պարզեին, փոքր խթանաւ փորձութեան զսակաւութիւն պարտուցն աստեն վճարես. իսկ որ զերկիք ընտրեցին, ներես ողորմութեամբ, տալով և սոցա դարման ընդ նոցա' միշտ առ քեզ դարձին սպասես : Եւ քեզ փառք ամենազօրիդ առ պմենայն հրաշագործութիւն բարեխնամող երկայնմտութեան, օրինեալ յաւիտեանս. ամէն :

ԲԱՆ ՀԵ.

Վերսիմ յաւելուած կրկին նեծուրեամ.

Ա. Են արդ ընկղմեալ զմայլեալ և ի սպառ ծածկեալ ի յանձառութենէ առաւելութեան բազմամասնեայ յաճախութեան մեծիդ երախտեաց, որ ամենառատ լրմամբ աննուազելեաւ յաջմէ և յահեկէ' ի դիմաց և ի թիկանց համբարեալ կան անբաւութիւնք :

Դարձեալ առ նմին կրկնապատիկ եւերուղութիւն աստուածային նոգումին աղյօցնալ, յու ինչ յառամելցն սահմաննցաւ աւանդութիւն՝ առ ամենայն լուսաւորութիւն նկազիցւոյ դաւանութեան մեկնապէս եղեալ ասանօր: Եւ որ առ անհնչական նիւթելէն ցուցանի երանաւոր կերպարութիւն աննառելի:

Բ. Մատուցանեմ ընծայեմ դարձեալ աստանօր աւանդ գովեստի դաւանման ճշմարտականի : Զի որպէս երբեմն հերձուածականին չարափառութեամբ ամենապատիրն խաբէութեամբ նենգողին կարթիւն հատուածեալի բաց հերքե-

ցայ՝ Ելեալի դրախտէն. արդ միաւորականաւս
այսու ուղիղ անքծութեամբ ի յաւանդ իսկապէս
շնորհի անդրէն միւս անգամ համբարձեալ
սովիմբ՝ ի թռիչս թևոցն լուսոյ ահա յերկինս
ժամանեցից հետևեալ:

Գ. Այլ քանզի յարգանդէն՝ յորում յղացայ
հոգևոր երկամբք ծնիցեալ, զմեծ և զերջանիկ
դշխոյ անարատ՝ ամենից կուսից իսկուհի՝
զպանծալի մայրն իմ գովելի պարտ է կանոնաւ
սահմանի բանի արձանագրել յայսմ մատենի,
զի ծանիցի ցուցցի և այլոց ևս ապագայիցն
ազգաց պատմեսցի որքանութիւն փառաց խնկե-
լոյն, արժանապէս պաշտմամբ պատուեալ իբր
մաքուր մարմին, ընդ զիսոյ մարդեղութեան
բանին Աստուծոյ, ի յիշատակ ճառիս հաւատոյ
Նրբորդութեանն դաւանութեան: Եւ արդ ի
յայս օրինակ հոգենկար պատկերի բանի, որ
զիսորանէս լուսոյ յարմարի, ընկալ զիս, զթած
օրինեալ, քաւեցեալ և սրբեալ ի սմին: Հան սո-
վաւ ի հոգւոյս զնախատինս մեղացս, անմեղս և
անքիծս ընդ հոգանեաւ սորին բազմեցն, յաւել
զտկարս ի տունն Դաւթի, և անդուստ փոխեալ
ի տունդ Աստուծոյ, ըստ մարզարէին ձայնի՝ որ
ի քեզ Յիսուս ակնարկի: Մի տուկ զմտիցն, և
մի անօգուտ զելիցն հետևութիւն արացես.
մի զհաւատոյս ջերմութիւն ցուրտ համարես-

ցիս, և մի զհամբոյք ողջունիս անկարգ ինչ վարկանիցիս, մի զպաշտօնե ապաշնորհ գրեսցես և մի զերկը պագութիւնն անխորհուրդ լքցես. մի անպտուղ լիցի տեսականութիւն պատկերին, և մի աննշոյլ կերպարանին սքանչելութիւն, մի անհուր ողջակիզին սպանդ մեռցի, և մի պատարագ ուխտի այս ճառի արտաքոյ ցրեսցի. մի ճաշակդ լուսոյ ինձ մահու լիցի, և մի բաժակքո կողիցդ արեան ի դատապարտութիւն եղիցի:

Դ. Աղաչեմ զքեզ, տէր Յիսուս միդ յէռութենէդ, որով զգիտութիւն Հօր քոյ և Հոգւոյդ սրբոյ ճաշակեալ ծանեաք. քանզի ի քէն իսկ վարդապետեալ զամենապարգև կարգս եկեղեցւոյ, և ի սմին աղօթանուէր լուսարան կենաց փրկութեան բարեաց, տարածեալ զսիրտս ձեռաց համբարձմամբ զայս կնդրուկ բանի բնակողիդ ի սմա տիրողիդ բնաւից երեքսրբենիդ մատուցեալ յաւէծ ընծայեցուցանեմք այսու բարբառով բարեշնորհութեան :

Առ որ ի Նիկիայն սահմանեցաւ բան, այլ իմն խորհրդածուրիւն աստուածային աւանդուրեան :

Ե. Փառաւորեմք վերաձայնեալ նուազօք օրհնութեան երգոց ի հաւատ պաշտաման բանի զբարեհրաման պատճառն եղելոց զերրորդութիւնն անսկիզբն՝ անհամեմատ բարձրութեամբ անհասական խորհրդոց և անըմբոնելի իմաս-

տից, անզննելի զգայութեանց և անբերելի եղելոց, քանակութիւն վերնականն երկնի և անսահման ներքնային խորոց, լրութիւն սպառմանց և նախադրութիւն սկզբանց. մի յերից անշփոթ կերպից, և երիս' ի միոյ անհատուածելի իսկութեանց, իվեր քան զմտաց անարգելութիւն յարաձգեալ ամենայն ուրեք բովանդակ:
Անփոփոխ բարի, անսասանելի ուղղութիւն, անխառն կերպարան սիրոյ, մեծութիւն անյաջորդ, բարձրութիւն անխոնարհելի, անվատնելի տեսականութիւն, բարերարութիւն աննուազելի, կամք կայուն, հրաման կենդանի, ակնարկութիւն փրկչական, երանութիւն ճշմարիտ, ակնկալութիւն հաւաստի, խոստումն անստելի, աւանդ արգասաւոր, ստոյգ աւետիս, վերամբարձութիւն անձեռնարկելի :

Զ. Մի հայր միանոյ Արդւոյ՝ միական հոգւովց պատուեալ, ամենահարուստ բարութեամբ ամենելին ունայն ի չարէ, օրհնաձայն գոհաբանութեամբ անքնին ներբռողիւ գովեալ:

Է. Մին բարձրեալ ահաւոր անուն՝ համապատիւն կցորդութեանց անպատումն ազգականութեանց, եռալրուսեանն զուգակցութեանց, անյաւելուածն լրականութեանց ինքնիշխան կամաւորութեամբ պատուասիրեալ առ Հայրն հանգունատիպ՝ գործակցութեամբ Հոգւոյն սրբութեան

խոնարհեալ իջեալ ի յերկնից, աննուազ զոլով
ընտանի փառացն, հաճեցաւ մտանել յարգանդ
մայրենի Աստուածածին կուսին մաքրութեան.
յորում աճեցոյց զբոյս օրինութեան ի լուսա-
սահման անդաստանին անարատութեան. ընդ
ամենակատարն էութեան համասնեալ յանան-
ջըրպետ միականութիւն, թափանցական խառ-
նութեամբ յաստուածութեանն ոգի բաղկացոյց
զգոյութիւն շնչոյս հրաշապէս : Որով անըս-
տամբակելի երասանաւ սանձաց կրթութեան
զստահակութիւնս իմ հանդարտեցոյց. և կամաւ
ընծայեալ խաչին՝ ամբարձաւ ծաղիկն պտղոյն
կենաց ի ծայրս լրութեան անմահականն տնկոյ.
իման վիրաւորեցաւ աստուածութեանն անընդ-
միջելի ի մերասերն մարմնոյ, որով կենսացոյց
զգործին պարտեաց, արարչութեանն խկու-
թեան ի նմին յաւէտ անբաժանօրէն ընդ նիւթա-
կան մարմնոյն վշտացեալ : Իջեալ ի վայրս խս-
ւարային դժոխոց, ենան զկապուտն իւրաստեղծ
ի կապանաց օցտողին . և իբր ի նիրհմանէ քնոյ
զարթուցեալ, յինքն նահանջեալ զդիմեցումն
մահու, կանգնեցաւ կենդանացաւ աստուածա-
պէս՝ ելեալ ի յերկրէ հացն կենաց և հովիւն հօտից
բանաւորականաց : Հաւատարիմ եղեւ յաշխար-
հի, և երևեցեալ նոյնութեամբ ամենեին ան-
նուազելի, որպէս եկն համայն, և համբարձաւ

բովանդակ. բազմեցաւ նստաւ ի գերունակն զա-
հոյս նախնականին պարզութեան արարչական
փառաւորութեամբ : Զոր խոստովանիմք Ս.ս-
տուած բարերար և Տէր բալորից, որ դատի զա-
մենայն երկիր արդար ընտրութեամբ յաւուրն
մեծի . որ ինքն է սկիզբն և ինքն կատարած, նոյն
առաջին և նոյն առյօտպայ . անպակաս բովան-
դակութեամբ թագաւորեալ ի լոյս անմատոյց :

Է. Օրհնաբանեմք ընդ Հօր և Արդւոյ և զանբա-
ժանելի բղխումն նոցին փառակից Հոգւոյն աէ-
րութեան . որ ստեղծ զբնաւս և կենդանածնէ
զամենայն , որ անդատին իսկ ի բնէ համապար-
փակ մթութեան աշխարհակալն միզի շրջէր
նկարէր և կերպարանէր ամէնունակ ջուրբքն
անբաւութեան երկրատարածն ծովու ի կատա-
րումն արդեան խորհրդոյս՝ զսուրբ աւազանն
լուսոյ : Նախ արար և այժմ գործէ, գոյացոյց և
միշտ կատարէ արուեստս սքանչելիս, նախա-
տեսութիւնս սրբասնելոց, ազդմունս աստուա-
ծօրէնս , զօրութիւնս զարմանաւորս, մարգա-
րէս, առաքեալս, վարդապետս վարժողս կըր-
թութեան հանձարոյ : Զարբարարն մատուցման
արեանն Քրիստոսի յարդարեաց, քաւութիւնս
անձանց, առողջութիւնս մարմնոց, ըստ նմա-
նութեան Քրիստոսի ողորմութեամբ հրամա-
յեաց : Մկրտեաց և գեր քան զջուր ի նքեան

միայն բաւականութեամբ նորոգեաց լուսաւորեաց . հանապազ նովին բարեգործութեամբ զօրանայ : Վկայեաց միաժնին աստուածութեանն ի հոսանսն Յորդանանու , օրինակաւ տեսութեան ամպոյ ցուցաւ ձայնիւ Հօր ի Երինն թափօրական : Ի նոյն տիպ նմանութեան հովանի եղև յակորեան տոհմին ի յելսն եգիպտոսի . յուղէզնացութիւն զօրավարութեանն Մովսեսի՝ հողմով սաստկութեան զՓարաւոն ընկղմեաց : Քահանայս կատարագործէ, իմաստունս կազմէ, թագաւորս զօրացուցանէ, քաւութիւնս ընձեռէ, կեանս շնորհէ մահացելոց ի նորոգութիւն յարութեանն : Նոյն ինքն է օծումն մարդացելոյն Աստուծոյ . մշտնջենաւոր հաւասարութեամբ ընդ Հօր երկրպագեալ՝ ի պատիւ մեծութեան Որդւոյ, անսահման փառաւորութեամբ օրինեալ յափտեանս . ամէն :

Նորին ասացեալ ի խորհուրդ սրբոյ եկեղեցւոյ, ընդդէմ պիղծ աղանդաւորացն բննդրակեցւոց, նոր մանիկեցւոց :

Թ. Դաւանեմք ի հաւատ ուղիղ և անխոտոր նակ անքծութեան համբուրիւ շրթանց ողջունեալ զկառուցեալս խորան յանշնչական արձանաց՝ աստուածային ընակութեան եկեղեցւոյս շինուածոյ . որ գերազանց գտաւ և երկնի ամենազարդ բարձրութեամբ, որ ի նոցին իսկ յառագելականացն դասուց հիմնեցաւ, յաշակերտաց

վերնոյն խնկեցաւ, իսպասաւորաց Բանին պաշտեցաւ : Սկիզբն առեալ կենացս այս զանձու ի վերնայարկն սրահէ, խորհրդակատարն վայրէ, զոր Հոգին Աստուծոյ լցոյց, փայլեցուցեալ ի նմազօրութիւն յաւուր մեծի Պենտակոստէին . Եախ զտունն բարետեսիլ յօրինակ սրբութեան կատարման շնորհի այսր եկեղեցւոյ կանխամեծար առաւելութեան, յորում ապա և ի նմին բնակչացն տուաւ լուսանորոգ բարեփառութիւն : Ուստի արիւն հզօրին Աստուծոյ բաշխեալ մատուցանի՝ յաւէտքան զՀաբելին մահու գուժարկու, մեծաւ բարբառով ձայնի բերկըռութեան կենդանութիւն անմահութեան ի սմա ազդելով : Քանզի ոչ է կար զօրութեան ուրուք ընդ երկնաւ յանդիման արեգական ի սպասաւորութիւն խորհրդոյ այսր ահաւորութեան ձեռնարկել, եթէ ոչ ընդ թեաք սորին պահեսցի . նա զի ոչ երկնիւք բաւականանայ այս նուէր տէրունի մարմնոյ, եթէ ոչ զայս ձեղուն օրինութեան ծածկոյթ ունիցի . վասն զի մահու անիծիւք ներքի այր ըստ օրինին, որ արտաքոյ խորանի այս վկայութեան զաստուածային պատարագն մատուցանէ . մանաւանդ զի պարտաւոր արեան կոչեսցի, որ ոչ զանձինն օրինակ արիւն յայս նուիրան ընծայեցուսցէ : Մի ի սմա լուացումն ի մահն Քրիստոսի, զի մի յանգէտս անարգեալ

աստուածութիւնն՝ ի ծանուցելումն զնախնին կրեսցէ. մի ձեռնադրութիւն ի պատիւ օծութեան լուսոյն, զի մի յանքծութիւնն խաբէութիւն խառնեսցի. մի և շնորհօք քան թէ ապաշխարութեամբ քաւութիւն, զի մի ճշմարտութիւնն կերպարանօք խորամանկեսցի. մի յընտրութիւնն ապառնի՛ հաւատ, զի մի սպառնալիք հատուցմանն զրոյց ինչ օտար համբաւոյ գրեսցի. մի երկաքանչիւրոց գոյութեանց մերոց իրաւամբք կշտամբութիւն, զի մի կիսամասնեայ առ մարդն ներքին և առ արտաքին՝ չարի և կամ բարւոյ փոխատրութիւնն կարծիցի յանման զօրութիւն արքայական որդեգրութեանն, զի ընդելութեամբ երկրայնովս առաւելութիւն վերենումն թագաւորութեան յայտնապէս ճշմարտեսցի. մի յոյս կենդանութեան առ անեղծութիւնն սրբոց, աներկեանութիւն խոստացելոցն ի միտս ունկնդրացն ծանուցեալ հաւատասցի :

Ժ. Այս դշիսոյ պաշտելի անշնչական եկեղեցի տույ կեանս և մահու իշխէ, ըստ օրինակիր աղամեան պտղոյն յարմարապէս ճաշակելի. զերազանց քան զբանական յանշնչութեանն հրաշագործէ. մինչ զի կատարումն ընձեռէ և նորոգ հաստատէ, վերստին նկարեալ ի մեզ զկերպարանն փառաց լուսոյ : Գրեալ ևս է

տեսակ մեծութեան վերնումն կամարին սկզբ-
նաւոր յառաջակառոյց քան զբնակիչս հոգեղի-
նացն ի նմա զօրութեանց : Նոր իմն ընծայէ
թոփիչս մարմնոց ընդ թեթևութիւնս հոգւոց ,
պատուականին հարստութեամբ զանարգն յար-
գաւորեալ : Ոչ ինքնակիր մեղօք զազրանայ ,
եթէ ոչ ի մարդոց չարաց և կամ յանհաւատից
կոխիցի : Տիպ իմն է զարմանաւոր յաղթող
իմաստից մերս տեսութեանց . անքանն ի բա-
նաւորէն կառուցեալ , նմին օժանդակեալ իբր
վեհագոյնն յաւէտ նուաստի : Մեծ է քան զմարդ ,
որքան ընտրելոյն Մովսեսի ցուպն յաղթողա-
կան . առաւել քան զբանաւոր , որքան զԱհա-
րուցն զաւազանն խորհրդական ծաղկեցեալ .
զերազանց քան զմտաւոր , որչափ զեղիաս և
զեղիսէոս գետահերձ մաշկեակն սքանչելահրաշ
փայլեալ արուեստիւ : Օգնութիւն պարզեէ
կրկին ամենակատար սրբասնեալ ձեռաց մաք-
րաբար , քան թէ զինապէս . մարմին նիւթական
քարի և հողոյ , զոյակից հարազատ զգայակա-
նաց և սրբոց : Իբր զվկմն անմահ կենդանի ի
կործանումն է և ի կանգնումն . որպէս զդատա-
ւորն ամենից հոգւոց հանդիսանայ հրաշապէս
ազդմամբ յանէծս և յօրհնութիւնս . իբրև տե-
սող աներեւութից զոմն հրապարակէ և զոմն
տածէ . առ ինքն կոչէ յանուանէ իբր զտիրող

հրամանատար էիցս : Իբր զլեառն յաւիտենական անհարուածելի է ի դիմամարտից . ըմբռնէ զիոգեռորս իբր զհնարադրութիւն մեծին արւեստի . անմեղս և անվրիպութիւնս ըստ Քրիստոսի հետոցն ընթանայ, բարձր ճոխութեամբ անպատկառաբար համարձակապէս զօրէն գովելոյ զլուխ ամբառնայ :

Ժ. Այնքան մեծ ունի սրբութիւն, մինչ զի զրոս ըստ պատկերի Աստուծոյ եղեն, կանոնաւ խորէ : Յետ յոգունց ընտրութեանց փորձից թէ համարձակեսցի մարդ ոք սխալեալ ի գաւիթս նորին մտանել՝ ոչ պղծի, այլ ընդ անպատրաստիցն թերութեանց դժուարի . ոչ նզովի, այլ տեղի տայ ոչ զիտողացն զշնորհին զչափ . ոչ լքանի ինքեամբ պարտաւոր իւրովն գտեալ, այլ ի մերոց գործոց խրթնանայ. ոչ թողացուցանէ երկիցս մատչել յըմբռնումն ոտիցն կենդանատուաց, ըստ տիրական անճառ խորհրդոյն. ոչ կրկին յաւուր զնոյն ցուցանէ, զի մի անընտրաբար նուիրանն խայտառակեսցի : Վշտակցէ կարեաց զօրապէս իբր անախտակիր ապականութեանց որ ի մեզ շարժմանց, առանց բարբառոյ տիրապէս հրամանաւ դատի :

ԺԲ. Նա զի և տապան իմն է մարքրական, կրկին երջանկական, ի հեղձմանէ կենցաղոյս ալեաց պահապան . ոչ բազմօք անբանիւք գա-

զանաց դասուք և սակաւ մարդկամբ, այլ ընդ
երկրայնոցս և զվերինսն յինքն հաւաքէ. ոչ
յալիս խոռվութեան բերի, այլ ի բարձրութիւնն
երկնի համբառնայ: Իբր զաշակերտիրահանգեալ
Հոգւոյն Աստուծոյ փախչի ի նենգութենէ. ոչ ի
բողոք մահու մարմնոյ հարուածոց, այլ ի կե-
նացն աւետիս ըմբռնեալ ածէ. ոչ Նոյիւ ձեռն
արկեալ գործի, այլ հաստողին հրամանաւ շինի.
ոչ Մովսէս ընդ Բեսելիկէ, այլ միածինն Աստու-
ծոյ Հոգւովն սրբով զսա հանդերձէ. ոչ յարա-
շարժ հանապազափոխ, այլ մշտակառոյց հի-
մամբ անսասաննելեաւ զսա հաստատէ: Դարձեալ
իբր զտապանակն անխօս փայտեղէն մածեալ
տախտակօք առանց զզայութեան տեսողակա-
նաց մեզ առաջնորդէ. որպէս կերպարան ան-
քանակ եին յառաջ հետևեալ՝ ի հանդերձանս
լուսոյն կենաց տեղի պատրաստէ: Ընդ Ոզիկի
անտուստ սատակէ, եթէ ոչ խաչապէս յոզի
բերիցի. սպանանէ վատնեալ վաղվաղակի առ-
ժամայն, եթէ անասնայինն լծակցութեամբ եր-
կրասիրաբար գետնակոխ սայլիւք՝ իբր զանօթ
ինչ ձեռնազնին բարձեալ տանիցի: Ոչ լեզուաւ
մարմնոյ, այլ բանիւ հրեշտակաց խօսի. ոչ
ունկան գոյականութիւն, և արագապէս մտա-
ռեալ լսէ. ոչ ձայն կերպաւորական բարբառոյ,
և զպատգամս գործոցն Յիսուսի համօրէն ազանց

պատմեալ հոչակէ. ոչ խաղալեաց շարժականութիւն, և աստուածայնով իմն կենդանութեան հագագաւ ազդէ : Ոչ ոսկերաց և զլաց յօդուած, և երկուք հազարօք կանգնօք լայնութեամբ՝ իբր զգունդն անհամար բարձրեալն Աստուծոյ զկենդանական զօրուն գումարտակ հերքայական վառեալ ամբոխին, և այժմ ընդ նոսին իբր զանմաքուրս ի սրբութենէ՛ զոմանս ախտիւ մեղանաց ջեռեալս հատուածեալ յինքենէ հեռի, ուղեկցէ ապրեցելոցն ի տաժանաւոր աղիւսարկութեանցն : Նոյն իսկ էութիւնն Աստուծոյ մարմին եղելոյ՝ անուամբ այս վիմի նշանակեցաւ, պատառմամբ կողին զբնաւս արբուցեալ : Ոչ արեան երակաց ընթացք, այլ լուսոյ վերնոյն շառափղք թափանցանց միութեամբ զոյն կենդանացուցեալ նորոգ պաշտպանէ . ոչ Սողոմոն կամ Զորաբարէլ մահկանացուաց ոստիկանութիւն, այլ ամենից ունողին իմաստ զագծագրէ . ոչ աննուիրական հասարակածաշակ իւղով առ ի Յակոբայ պարարի, այլ ահաւորին արեամբ և փառօք մեծին օծանի : Ոչ տուն երկրային նիւթոյ՝ քան թէ մարմին երկնային լուսոյ Աստուծոյ զսրին որդիս կնքեալ ձեռնադրէ . ոչ կենցաղոյս յերկրէ յղացմունս, այլ արքայութեանն երկնից ժառանգս կրթէ . զ'ի ծոց իւր զրգեալն զոգոյն Աքրահամու ընծայե-

ցուցանէ : Փեսայ հարսնութեան սորա Որդին
Սստուծոյ կենդանւոյ , օրիորդք խնձոյից սորին
հայրապետացն գումարք : Սոյն ինքն մոռացումն
առնէ այսակիր բարձանցն կուամոլութեան , զի
զերկնայնոյն Սստուծոյ ունի զծանօթութիւն .
օտարութիւն է ամենայնիւ դիցն դրօշելոց , զի ի
համօրէն քարինս սորա Քրիստոս երկրպագի .
քակտումն է յայտնապէս ուրուական ըղձիցն
անտառաց , զի ի բնաւից մայրից աշխարհի նմա-
նութեամբ կենացն փայտի ի սմա Տէրն նուիրի .
խորտակումն է համայն դիւապատիր յուռթիցն
արձանաց , զի քարն գովեալ կարկենան ակամբք
և վիմօք կենդանեօք այսրէն հաստատի :

ՃԳ. Այս յարկ չքնաղ և աստուածընկալ
ազատ է միանգամայն ի յամենուստ ծառայու-
թենէ , ոչ օրինակ վերնոյն Սիոնի , քան թէ ճըշ-
մարտութիւն նմին ճանաչի . ոչ կուապաշտու-
թեանն կապաւ բագին և կամ լծով օրինին տեղի
պարտաւորութեան , այլ տէրունի բարերարու-
թեանն պարզեարան ի մէնջ համբուրի : Ոչ սա-
սանի երբէք յայլ իմն կերպարան ձևոյ փոխար-
կեալ , այլ ի նոյն շուրջ փառաց մեծապէս
ընդարձակի . սոյն ինքն և երկին երկնի յերկրի
լուսապայծառ կերպիւ հոչակի : Որպէս չէ
առանց հօրն Քրիստոսի , և ոչ առանց այսր մօր
արգանդի յոգի կատարիլ : Անտուն շրջի անբո-

փանդակելին, եթէ ոչ ի սմին տան տաղաւարեսցի . ոչ ունի տեղի զիսոյն հանգստեան Տէրն բոլորից, եթէ ոչ ի յայս կայարան կենաց մտեալ ազանիցի : Քան ի կամար վերնայինն երկնի՝ ի յայս հիւթաւոր բնակութիւն առաւել պարծի . անբաւութիւն աստուածեան լուսոյն, որպէս զդէմս մարզարէին և զօրինակս սորին ծածկեցին, որպէս փախեան ի փառաց երեսաց նորին, և նմանութեան սորուն՝ որ ի տաճարին՝ ոչ հանդարտեցին, ի տօն հանդիսի մեծի գովեստի, և ի բանականացս դասուց խմբեալ նուազի . աստ օրհնի կրկին բաղձանօք, քան ի դրախտն վայելչական :

ԺԴ. Այս մայր հոգևոր երկնաւոր լուսաւոր, քան թէ երկրաւոր շնչաւոր մարմնաւոր, զիս զգուեաց որդի . կաթն ստեանց սորա արիւնն Քրիստոսի : Եթէ Աստուածածնին իսկ պատկեր զսոյն ոք գրեսցէ, ոչ անօրինի : Իբր զնշան խաչին փրկութեան զօրութիւնս զարմանազանս և արուեստս բազմօրինակս կատարեալ հրաշագործէ . բեմ ահաւորին ատենի՝ ի սմա հաստատեալ տեսանի . սովաւ խորթաբարոյիցն հերձուածողաց մոլեզնաճառ բերանք կարկին : Ունի և քարինս իմն իմանալիս և բանաւորականս, որով զգազանամիտս անմաքուրս բացուատ ի բաց հալածեալ տարագրէ : Ծնանի և

աստուածս ոմանս եղականս՝ պատկերս մաքուրս միոյն Աստուծոյ Քրիստոսի : Ունի և զդիրն իւր ընդ արևելս՝ ի տեղի խոստման բնակութեանն մերոյ առաջնոյ . ձեռամբ իմն ցուցանէ յայտնապէս զգալստեանն Աստուծոյ շափող, զփայլականն առակ տիրական ի դէմս բերեալ մեզ վարդապէտէ, զփրկութիւնն իյելից անտի ծագման արուսեկին քրիստոսեան երևմանն ի վերջնում աւուրն արարածոց երկրի թարգմանէ : Ցաւս հալածէ, ախտաժէտս բժշկէ, դիւաց բոնութեանց զօրէ : Արգանդ որովայնի սորին աւազանն կենդանարար . ի պար հարսանեաց սորա դասք առաքելոցն : Այնքան ճոխացաւ բարգաւաճեալ երանութեամբ, մինչ զի նոյն ինքն փրկչին անուամբ վայելչապէս յորջորջեցաւ . տիրամօրն լուսոյ կոչմամբ ի մերձաւորաց միածնին ձայնեալ կնքեցաւ : Ծփելոց մեղաւորաց նաւահանգիստ հանդարտութեան, խրախնանարան վերնոցն դասուց, բժշկարան անսխալելի տարակուսեալ պարտաւորաց, Երբորդութիւնն անպատում ի սմա փառաւորի օրհնեալ յամենայնի :

ԺԵ. Խոկ Եթէ ոք ձեռն չարութեան ի վերինն արքայութիւն յանդգնարար համբառնայցէ, և զիւտ ինչ մարմնաւոր և կամ հնարք մարդկային և կամ արուեստ երկրակենցաղ զսահ-

մանեալ աւանդութիւնս առ ձեռակերտս եկեղեցի վարկանիցի, և ոչ պարզե առաւել կենաց և ակնկալութիւն աստուածային և Հոգւոյն սրբոյ յայտնեալ լուսանորոգ նախազրութիւն, և երախտեաց բարձրելոյն ամենատուր լիականութիւն, և կամաց արարողին խնկաւորեալ խորհրդարան, և առաքելոց ձեռինն աջոյ բարեհանձար հիմնարկութիւն, և միանգամայն ասել՝ դուռն երկնից և քաղաք Աստուծոյ կենդանւոյ և մայր կենդանեաց ազատ ի պարտեաց և ճշգրիտ տեսակ կերպի երեակիս բանականի, իմանալին՝ խորհուրդ հոգւոյս, և շօշափելին՝ պատկեր մարմնոյս, և սրբութեանցն անդ անձառից գերազանցեալ նոր սրբութիւն, և քրիստոսեանն նշանաւ պայծառապարծ պսակեցեալ, զայնպիսի ոչ խոստովանողսն մերժէ յերեսաց իւրոց Հայրն ամենակալ ի ձեռն Բանին իւրոյ եակցի. բարձեալ ի նմանէ և զաւանդ շնորհի Հոգւոյն փառակցի, փակեսցէ զդուռն կենացս այս առազաստի յանդիման նորին։ Իսկ մեք զորս զրեցաք՝ սմին և վկայեմք, հաւատացեալ որում կարգեցաքս, յանուն և ի փառս ամենակալ նրբորդութեանն և միում աստուածութեանն, յաւիտեանս յաւիտենից։ •ամէն :

Այս իմ հաւաս յերրորդուրինն, և այս ի մայրն իմ լուսավառ խոսովանեալ դաւանուրին։

ԲԱՆ ՀԶ.

Վերասին յաւելուած կրկիմ հեծուրեամ.

Ա. Աստուած ողոքմած, բազմազութ, հզօր,
ահաւոր, մարդասէր, օրհնեալ, կենդանի, ան-
ճառ, որ ոչ ելանէ երբէք ըստ բան քո իր ան-
ձեռնարկելի, որ և մտաց է անհնարաւոր. քո
է հատուցանել պտուղ քաղցրութեան ընդ փշոց
խատութեան, սկզբնահայրդ այսմ նորոգ և զար-
մանաւոր կանոնաց կենաց, քանզի բարի առնել
ատելւոյն և աղօթս ի վերայ հալածչին, և փըր-
կութիւն հայցել խոցողին, և ոպանողին Եե-
րումն խնդրել ի քէն ընծայեցաւ պտուղս այս
հրաշից. որոյ քաղցրութիւնն անճառ է քան
զօրինակ և բարեբանեալ կամաց քոց ախորժելիք
և գովեալ շրթանց քոց ճաշակելիք. հոգի երե-
սաց և զօրութիւն գեղոյ մերոյ տէր Քրիստոս
օրհնեալ ի բարձունս : Այլ մարդք երկրածինք
և ամենավրեպք՝ և բարեմատոյց ձեռաց չարիս
դարձուցին. իսկ դու լոյս և տուփչ լուսոյ՝ ոչ
լսես անէծս, ոչ ախորժես չար, ոչ կամիս կո-
րուստ, ոչ ըղձանաս մահ, ոչ յուզիս ի խռովու-
թենէ, ոչ տիրիս ի ցասմանէ, ոչ հարկիս ի բար-
կութենէ, ոչ մթանաս ի սիրոյ, ոչ այլապիս ի
գթութենէ, ոչ փոփոխիս ի բարութենէ, ոչ թի-
կանց շրջումն և ոչ երեսաց անդրադարձութիւն,

այլ ամեննին լրւաւորութիւն և նկատումն փրկութեան :

բ. Եթէ քաւեսցես, կարող ես. Եթէ բժշկես, զօրաւոր ես. Եթէ կենդանացուցանես, բաւական ես. Եթէ շնորհես, առատ ես. Եթէ ողացուցանես, հնարաւոր ես. Եթէ պարզես, ամենալի ես. Եթէ արդարացուցանես, ամենարւեստ ես. Եթէ միտիթարես, ամենիշխան ես. Եթէ նորոգես, ամենակալ ես. Եթէ հրաշագործեսցես, ամենաթագաւոր ես. Եթէ վերստին հաստատես, արարիչ ես. Եթէ կրկին գոյացուցանես, Աստուած ես. Եթէ հոգաս ընդ մեր, ամենատէր ես. Եթէ կորզես ի մեղաց, այցելու ես. Եթէ չարժանեացս ընձեռես, օրինեալ ես. Եթէ յորսողէն զերծուսցես, փրկիչ ես. Եթէ զեղցես ի քոյոցդ ի մեզ, հարուստ ես. Եթէ նախքան ի մէնջ խնդրելն զու կարկառեսցես, անկարուտ ես. Եթէ լայնես նեղութեանս, անդորրիչ ես. Եթէ զվերջացեալս կոչես, խնամակալ ես. Եթէ զսասանեալս հաստատես, վէմ ես. թէ պասքելրյս արբուցանիցես, աղըիւր ես. թէ զծածկեալսն երևեցուցանես, լոյս ես. թէ զօդտակարսն իմ ծանուցանես, բարի ես. թէ ըզբիծսն անտես առնիցես, երկայնամիտ ես. թէ ընդ փոքրուս ի դատ ոչ մտանիցես, բարձրեալ ես. թէ ծառայիս ձեռն մատուսցես, ստացող ես,

թէ աջովկդ քո պաշտպանեսցես, յանձանձիչ ես.
թէ վհատելոյս դարման մատուսցես, կերակրիչ
ես. թէ զանգէտս պարարեսցես, վարդապետ
ես. թէ զղիմեալս առ քեզ ընկալցիս, ապա-
ւէն ես :

Գ. Եւ արդ քո են այսոքիկ, Տէր ողորմութեան,
ոչ միայն զրեալ, այլ կատարեալ և զիսաւո-
րեալ, նախնի նահատակդ համբերութեան
վկայից, որ վասն իմոյ փրկութեան հանդիսա-
ցար զօրապէս յասպարիսի ճակատուն, զի
կակղեսցես զկարծր բռնութիւն մարմնոյս գո-
ռոզութեան վարժմամբ կրթութեան չարչարա-
նացն վտանգի. և յանպարտակիրդ մարմին
չափեալ զբնութեանս մերում զտածանականն
տազնապ տումի, զի զգթութիւնդ որ առ մեզ՝
արդեամբք ցուցցես ի քեզ օրինակեալ, օրհնեալ
յափտեանս. ամէն :

ԲԱՆ ՀԵ.

Վերսին յաւերուած կրկին հեծուրեան .

Ա. Եկ քանզի օր է օրինաբանեալ և լուսանո-
րոգ կշռութեան երկուց ընտրութեանց արարա-
ծոցս սասանութեանց' յեղանակելոյ յայլ իմն
էութիւն երկնակենցաղ անփոխադրելի, ամ-
բարձելոցն խոնարհութեան և կործանելոցս
վերբերութեան, սարսափելի ուրբաթու մեծի

պասերիս, յորում եկն եհաս ժամ բարեպատեն գրել ինձ զայս նուագ ձայնի հեծութեան գուարճախառն երկիւղիւ, ահա ըղձալի համարիմ ասել աստանօր իքոյոց այտի՝ զոր ընդ իմ կրեցեր, Աստուած ըոլորից :

Բ. Կացեր յատենի քում ստեղծուածոյն իմովս կերպիւ, ոչ խօսեցար տուփչդ բանի, ոչ բարբառեցար հաստիչդ լեզուի, ոչ ձայն արձակեցեր սասանիչդ երկրի, ոչ մոնչեցեր ամենազդեցիկ փողդ մեծութեան, ոչ երախտեօք նոցին ըմբերանեցեր, ոչ մատնեցեր ամօթոյ զմատնիչսն զքեզ տանջանց մահու, ոչ ի կապելն զքեզ դիմադարձեցեր և ոչ յապտակելն դժուարեցար, ոչ ի թքնուլն թշնամանեցեր և ոչ ընդ կոփիելն երբէք խռովեցար, ոչ ընդ կատակելն սրտմտեցար և ոչ ընդ խաղ արկանելն երեսս փոխեցեր : Մերկացուցին զզգեստ պատմումանին իբրև ի տկարէ, և դարձեալ ազուցին իբր անփրկանաւոր ըմբըռնեցելոյ : Եթէ ոչ էր արբեալ կրկնակի քացախ զանզեալ ընդ լեղւոյ, ոչ էր հեղեալ մաղձն իմ մթերեալ նախնի դառնութեանն . ճաշակեաց վհատութեամբ և արգել անդէն տարակուսանօք, առին մոլեզնաբար և դարձեալ մատուցին անպատկառապէս : Դանիւ հարուածոց յետին անարգութեան ի մէջ խառնիճաղանջն

ամբոխի դատապարտեցին, ծունը կրկնեցին
նախատանաց և պսակ եղին արհամարհու-
թեան :

Գ. Աչ ետուն հանգիստ կենդանարարիդ, եթէ
ոչ զգործի մահուն կրել քեզ պատրաստեցին.
ընկալար իբր երկայնամիտ, առեր իբրև զիեզ,
բարձեր որպէս համբերող, ըստանձնեալ իբր
զպարտական զփայտն վշտաց. որպէս զծաղիկ
շուշանաց հովտաց՝ ուսով բերեալ զզէնն կենաց,
զի յարհաւրաց զիշերայնոց զիւրակերտս զահա-
ւրակս մարմնեղէն զոյութեանս պահպանեսցէ
ի դատապարտութեանն վայրի իբր ի խրախնան
խնջոյից : Հանին արտաքս իբր զողջակէզ, կա-
խեցին իբր զխոյն Սարեկայ ձգեալ զերջերացն,
տարածեցին ի սեղան խաչին իբր զպատարագ,
ըսեռեցին որպէս չարագործ, պնդեցին իբր
զապատամբ, զխաղաղութիւնդ երկնաւոր իբր
զաւազակ, զանկապուտ մեծութիւնդ իբր զտա-
ռապեալ, զառ. ի քրովքէից պաշտեցեալդ իբր
զքամահեալ, զսահմանդ կենաց իբր զարժանա-
ւոր սատակման մահու, զաւետարանիս նկարիչ
իբր զհայհոյիչ օրինին, զթէր և զկատարումն
մարգարէից իբր զհամառօտիչ զքեցելոցն, զճա-
ռագայթդ փառաց և զկնիք անքնին խորհրդոցդ
Հօր՝ իբր զներիակ ծնողիդ կամաց, զօրհնեալդ
իսկապէս իբր զտարագրեալ, զկապոյ օրինին

լուծիչդ իբր զայր ի նզովս գրեալ, զհուրդ ծախիչ իբր զհերքեալ իմն կալանաւոր, զահաւորդ երկնի և երկրի իբր զհաւաստի պատժաւոր, զի լոյս անմատոյց ծածկեալդ իբր զհողածին ըմբռնեալ :

Գ. Ո՞վ քաղցրութիւնդ և երկայնամիտ բարերարութիւնդ ողորմածիդ զթութեան, որ վասն ապախտաւոր և անօրինեալ ծառայիս Տէրդ բոլորից զայս ամենայն կամաւորապէս և հաւանողական հաճութեամբ՝ կատարեալ մարմնոյդ միութեամբ ի քեզ ընկալար, և մինչև ի քնարան շիրմին տապանի անպակաս ի լրութենէ ամբողջ նոյնութեան Աստուած անքննին՝ զնոյն կրեալ նախատինս անձառ համբերութեան, յարեար կենդանի ինքնիշխան բարձրութեամբ լուսոյ, աննուազ մարմնով և անթերի աստուածութեամբ : Օրինեալ փառօք, գովեալ զթութեամբ, բարեբանեալ միշտ ողորմութեամբ, յափտեանս յաւիտենից . ամէն :

ԲԱՆ ՀՅ.

Վերսին յաւերուած կրկին հեծուրեան.

Ա. ԵՒ արդ անկեալ յերեսս հողանիւթ կերպիւս, ի վայր խոնարհեալ ծնրադրական երկրապագութեամբ զբարեգործիդ ողորմածութեան զկենդանարար ոտս համբուրեմ, զայս

օրինակ մաղթանաց մեծիդ ընծայեցուցեալ։
Բ. Աղաչեմ զքեզ, միայն խնամակալ, մարդասէր, զթած, կեցուցիչ, հզօր, այցելու, պաշտպան, մի ունայնասցի վաստակն աշխատութեան փրկականդ կրից մարդացելոյդ վասն իմ Աստուծոյ, մի սոսկ եղիցի քրտանցն կաթուած խառնեցեալ արեամբ ի մատնութեանն աւուր զիշերին. մի լիցի ստուերացեալ լուսոյդ երախտիս, զոր ձրի և առանց փրկանաց թշուառացելումս ինձ պարզեցեր. մի ջնջեսցին շնորհացդ աւետիս, զոր կողից քոց կայլակք նորոգեցին. մի անջահ եղիցին կրիցդ պտուդք, զոր կարօտութեանս իմում մատուցեր. մի պարծեսցի բանսարկուն վանեալ՝ զքո ստացեալս իւրացուցանել. ահա յաղթեսցես կամօք քո ըղձից չարին, վերստին ապշեսցի մի անզամ զարհուրեալն, կրկին պարտեսցի ի սպառ դատեցեալն. մի անխայեր զազատարարդ քո բան, որ զստեղծեալս քո քեզ ընծայեալ՝ վերստին առ քեզ դարձուցանէ։ Զանձառն արարեր բարերարութիւն յանակնկալ ժամուն յուսահատութեան, յորժամ բնաւ իսկ կտրեալև օտարացեալ էր կենդանութեանն շարժողութիւն. մեռար անմահդ և զմահացեալս նորոգեցեր. եթէ զկանոն համաձեռութեան օրինին փոխեցեր, արդ զդիւրինն և հեղտականն և զես հնարաւորն մի

արգելցես, սկզբնաձիր ողորմածութեան բարեգութ օրհնեալ և երկայնամիտ թագաւոր : Ազդեա բանիւդ ամենազօրաւ, որ զգոյութիւն լուսոյն ստեղծեր ի նախնումն աւուր, և վաղվաղակի փոփոխեալ գտայց ի լաւ անդր . և փոխանակ զի ես ոչ խնդրեցի հետևել լուսոյդ, դու ելցես ինձ յայց՝ ճանագայթ ծագման հայրենի կերպիդ, և կոչեցայց առաջի քո ծառայս վնասապարտ՝ ողորմեալ շնորհեալ առ ի քէն. ոչ է ժամանակ յերկարաձգութեան առ ի ըզպարտսն հասուցանել, ահա շնորհեան ինձ տառապելոյս զերեսս քո՛ լոյսդ ի խաւարի սրտից վիատելոց : Արգելւ կերպեան զընթացմունս ելիցն, որ միշտ զեղուն բարիքն հոսեալ ի յուշոյս իմ տեսութենէ. պահենան ինձ զշնորհ ամենապայծառ զանձուցդ մնացականաց, որով պատուական գտեալ՝ քո անուանեցայց, պաշտպանեալ ի քէն, անսահման բարի :

Գ. Ահա ողորմեան ինձ, զթած, աղաչեմ զքեզ ողորմեան ինձ, հզօր, կրկին ողորմեան : Մի փոխարկեր երկունս ցաւոց ընդ չարեաց իմոց, բարիդ ամեննեին. մի բառար ի վտանգելոյս զառ ի քէն պարզեւալդ շնորհ, մի կապտեր զփչումն ամենօրհնեալդ հոգւոյ, մի լուծաներ զինկեալ զկնիք արքունական պատկերիդ : Մի յայտնեացին փուշք մեղանաց ի սրբութիւնս մտաց.

մի խզեր զկապ միութեան զընդ քեզ սիրոյն պնդութեան, մի մերժեսցես զարուեստ զօրութեան լեզուոյս յարմարութեան, մի պակասեցուցաներ զաջողուած աջոյս առ ի զլուսոյդ մասունս բաշխել : Մի գրեր ի դպրութեան կենաց մատենիդ զմահուն պարտիս, մի պահեր, մի ինձ համարիր, մի յիշեցուցաներ, մի ամաչեցուցաներ, մի նախատեր, մի ոտն հարկաներ, մի արձանացուցաներ զմեղկութեանցն, մի ամբարեր զկորստեանցն, մի իբր ստգտեալ իմց ամբաստաներ : Մի յարուսցես ընդ իս զծառն անիծից, մի արձակեր ի յիսկապաղարդ վնասուցն, մի ընձիւղեր զծաղիկ մեղացս, մի բերցես ընդ առաջ զնամակ պարտուցս, մի արտաքերեր զէութիւն պտղոյն : Մի թուեսցես ի ճիւզս երկրաստեղծ մատանցդ զգիւտս գործոցս. մի մատուցես բանընդդէմ ահեղ զանօրէնութիւնս իմ յիշատակել, մի մատնեսցես իմոցս կամաց զաւանդս հոգւոյս վարել ի գերութեան, մի աստէն զիս փառաւորեր՝ զի անտանօր դատապարտեսցես, մի նուազութեամբ այսր անյաւորի զյաւիտենական բարիսն տուժեր, մի ի սակաւում այսմ ժամանակի զանվախճանելի զիառսն չափեր, մի ընդ հովտիս վշտաց հեծութեան զանախտական զկեանսդ զրաւեր, մի ընդ ստուերի այսր մթութեան զանճառելիդ լոյս

փոխանակեր, մի զերասանակ մտացս լքես՝
ըստ արտուղի հետս հետևել, մի զկամուրջ կեն-
ցաղոյս գրեսցես ինձ հանգստեան բաւականու-
թիւն. մի զհովիտ հանճարոյս ստուերական
պահեր ի հանդերձեալսն ինձ հրապարակել:
Եթէ ամբարես զառանց համարոյ գործոցս իմ
չարիս, մեռայց կենդանւոյն. եթէ շտեմարանես
ի սրտի, աստստին կիզեալ անբոց այրեցայց.
Եթէ քննեսցես զանօրէնութիւնս, առանց յան-
դիման քեզ լինելոյ ի սպառ հալեցայց. եթէ տըն-
կակից ինձ թողցես զմեղսն, ի նոսին վատնեալ
մաշեցայց :

Դ. Ակնարկեա, միշտ զօրեղ ամենակարող,
փախնուլ չարութեանցս որ յիս, զի բարիդ քո
եկեալ փոխանորդեսցէ. հրամայեա, զթած,
խնամակալ, գովեալ, լոյս անշիշանելի, զօրու-
թեամբ անահմանելեաւ, զի նոր հաստատեսցի
գոյութիւն բնութեանս մարմնեղէն յարկի ան
դամոցս. յորում հանգուցեալ անլքանելի քնա-
կեսցես բազմեալ ախորժ տենչանօք՝ միութեամբ
հոգւոյս իմ ընդ քեզ, զապականութիւն մեղացս
մերժեալ ի սպառ՝ յանարատութիւն զիս պա-
տրաստեսցես ամենակեցոյց թագաւոր անմահ
տէր թիսուս Քրիստոս, օրհնեալ յաւիտեանս.
ամէն :

ԲԱՆ ՀԹ.

Վերսին յաւելուած կրկին հեծութեան.

Ա. ՅԵՇԵՍ. ՏԷՐ, ՏԷՐ գթութեանց, սիրողդ իրաւանց, Աստուած ճշմարիտ, նայեա վերստին ի բնութեանս կերպարան միշտ սխալական. զննեա ինձ դարձեալ զամէնընթաց տարածմունս ելից արեանս շարժողութեան. բժշկապէս մատիր տեսանել, զի մարդ եմ հաստատեալ մոօք խակութեան թերի խորհրդոց յայն ինչ, զոր դու իսկ վկայեցեր տեսողդ ոչէից՝ միայն դու անմասն ստութեան խաւարի : Ապա իրաւունս է գրել ինձ ընդ մեղուցեալսն մարդկօրէն վրիպանաց սխալմամբ պարտեալ կրկին իբր զերկրածին մահացու մարմին, քան բանիդ քում սուտ երևել. քանզի արդարեւ գիտակ իսկ ես, թէ չար է արարն և ընդաբոյս չարութիւնն մեր, և ոչ փոփոխին խորհուրդը մեր յաւիտեան, ըստ նոգեհանճար իմաստնոյն կանխազեկոյց առակի :

Բ. ԹԵՇԽԱԳՆ զսաստկութիւն տանջանացն, որ պատրաստեալս մնայ ինձ՝ արկանել զորդիս զեհենին զարդ մահուն յաւիտենականի. բարձ զամօթոյս պարտիս, որ պահեալ է յայտնեալ թշուառականիս յետին ատենին յանդիմանութեան : Խրատ խաղաղութեան յառաջապարգև

ողորմութեամբ քո ընծայեցն . զի մի անտանելիքն ահաւորութեան իցոյցս ինձ եկեալ կերպարանեսցին , անյոյս ապշութիւն ընդ կենաց զղման առաջի կարգեալ , դատաստանն ահաւոր , անկաշառ և անխաքելի դատաւորն , ամօթն սոսկալի , կշտամբանքն սարսափելի , յանդիմանութիւնն անփախչելի , տագնապն անձողոպրելի , պակուցումնն անխրախուսելի , դողումնն անվճարելի , լալումնն անսփոփելի , կրծումն ատամանցն անքշկելի . ապականութիւնն անողջանալի , անէծքն սարսափելի ասուածային քո բանիդ . փակումն զթոյն և արգելումն ողորմութեանն : Որ ընդ գալարելն երկնի և ընդ երկրի զղբելն ընդ կարծրութիւն յատակիս , ըստ կուտակելոյ կոհակաց խռովութեան ծովուիբը փախստեան կերպ ցուցանելով , մի զմիոյ հետո խափանեն կասեալ յերկոցունց . և տատանեալ սասանեալ լայնատարած գետնոյս թանձրութեան ի հիմանց անտի , ընդ ուժգնակի բախման թնդելոյ ներքնային խորոց հարթէ զերինս , և հալեալ հրդեհին ընութիւնք վիմաց և ամենայն տարերաց զոյից . այլայլին երկինք յանեղծ փոփոխութիւն , և յեղանակին արարածք տարերօք իւրովք ինորոգ նմանութիւն : Ծածկութիւնք զործոցս հրապարակին և աներևոյթք կրից մեր յայտնին . վարք կրօնից

ներգործեցելոց ի մարմինս մեր Ըկարին. թագաւորն երկնից յատենի նստի, վճիռ հատուցմանն ի ձեռին իւրում: Ահա վայ ինձ եօթնիցս անզամ կրկինեղկութեամբ, ըստ չափոյ կշռութեան այսը համարոյ, որ զանքաւութիւնս թուոց պարագրէ: Զինչ գործեցից ողբալիս հոգի յայնմ մեծի աւուր վտանգի. քանզի սաստիկ է յիշատակն իսկ յառաջեալ քան զիանդիպումնն. զոր ոմն մարգարէ զօրինակին նմանութիւն ի դէմս բերելով, զմեպ տագնապի անզերծ փախստեանն նշանակէ ասելովն. զոր օրինակ եթէ փախնուցու ոք ի ձեռաց առիւծու և պատահեսցէ նմա արջ, և փախնուցու յերեսաց արջոյն և մտանիցէ ի տուն և յեցուսցէ զմեռն իւր ի յորմ, և խածանիցէ զնա օձ. և դարձեալ կրկին սաստկացուցանէ առ նոյն կերպարան իրի զտեսիլն քստմելի. ոչ ապաքէն, ասէ, խաւար է օր Տեառն, օր խաւարոյ և մթոյ, օր ամպոյ և մառախղոյ:

Գ. Յորժամ հրեշտակն պահպանողական կենակից հզօր ոստիկան իրաւամբք ամբաստանեսցէ, և հատուցանողն ահաւոր արդարութեամբ յանդիմանեսցէ, սպասաւորք թագաւորին առանց խնայելոյ խուճապեն, զոմանս ի կեանս հրաւիրեն և զոմանս յամօթն դատապարտեն. կիսոց դէմս լցեալս ծաղու ցուցանեն, և ինձ ահարկուս և քստմնելիս երևեցուցանեն,

ոմանց պսակս լուսապաճոյնս մատուցանեն, և այլոց կորուստ մահու բողոքեն. արդարոցն ձայն աւետեաց, և ինձ գոյժ անվախճան վշտաց: Յորժամառ բարիսն՝ մահու յաղթութիւն ի սպառ մեռանի, և ինձ չարագործիս կրկին յարակայի. ուր դրանն բախսէլ ոչ ինչ ազդիցէ, վճար եղեալ գթութեանն առ իս: Յորժամ դպրութիւնք հրաշիցն զարմանալեաց, որ են ծածկեալքն յայժմուցս հասարակաց վարուցն տեսակք մարդկային բնութեանս զործոց. յաղազս որոյ եղեն գոյութիւնք ամենայն էից, յիւրաքանչիւր մարմինս անպակաս դրութեամբ իսկոյն երեին. և խորութիւնք անճառիցն կնքեցելոց յիմաստից աստեացս առաջի աշաց մերոց կերպարանին: Ուր այժմ շահավաճառութիւնք ողբոց և արտասուաց զերկինս զրաւեն, և անդ իբր զապաժաման ընդունայնութիւնք արհամարհնեալք լքանին. հառաչմունք հեծութեան ոչ կանխաւ աստի առաքեալ, չէ երբէք զտանել անդէն. ողորմութիւնք ճշդով սերմանեալ, ոչ պայծառ վառմամբ զնան առաջի: Ուր տապանն նախայանցիցն և կտակարանն տիրանարգիցն և նըշանն ահաւոր այժմուցս՝ յանդիման եղեալ մեծաճայնս դատախազեն. յորում սոսկալի վայրի ոմն զուխտն կցորդութեան հայրենի և ոմն զիսորանն վկայութեան անտեսիցն և ոմն զա-

րիւն մեծին Աստուծոյ ամբաստան իմն իրաւացի առաջի իմ տարածանեն։ Զտանցանարանս բազմապատիկս անձամբ անձին աստեն իսկ պատրաստեցի, զիարդ մխիթարեցայց համառօտեալս յուսոյ. զի եթէ զօրքն լուսոյ՝ դասուք արդարոցն, որ փառաւորեալքն են երանութեամբ, սարսեն դողալով, ոչ բաւեն բերել զահաւոր տեսիլ երեսաց մեծ դատաստանին, ես եղկելիս՝ աւանդակորոյս սատակման որդիս ուր երևեցայց. որ ոչ միայն չեմ պսակելոց, այլ և պատուհասն իմ անտանելի և կորուստն անսպառելի :

Դ. Այլ արագեա, ամենապարզե զօրութիւն անձառ, ձեռն փրկութեան ի կորուստ գերելոյս. զի օգնեալ ի քէն՝ դարձայց միւս անզամ ի դրանց դժոխոց, ամենապատրաստ հանդերձեալ ամենեին անվտանգելի պրծեալ ի պատժոց. աստանօր տեսեալ մտացս իմաստիւ զապազայիցն դիպուածս, բաւականացեալ ի լուր երկիւ դին ի տագնապէ տանցանաց՝ ահին համբաւով, կամօք քո բարեաց զերծեալ ապրեցայց. և մի մատնեցայց կորեանցն առիւծուց, որք խնդրեն ի քէն զիս ի կերակուր՝ ծախել ատամամբքն զազանութեան զի զորովայն մահուն լցուցեալ՝ զաստուստ պարարեալս անդ ձգեալ հալեն, ուր անսպառ պահի մնացուած մթերիցն ի ծա-

խումն յաւետենից : Զի դու միայն բաւես կորզել
ի ժանեաց սատակման ի կեանս և յերանութիւն,
ընաւից ապաւէն թագաւոր լուսոյ տէր Յիսուս
Քրիստոս, օրհնեալ յաւիտեանս . ամէն :

ԲՈՒ Զ.

Վերսին յաւելուած կրկին հեծութեան .

Ա. Եռ արդ ի վերայ այսքանեաց յուսահա-
տութեանց և ահարկու սրտաբեկութեանց ,
պակուցանողական սաստկութեանց անտուա-
ծային բարկութեանց , տագնապեալ ոգւով
թախծութեան խսպառ , աղաչեմ զքեզ սուրբ
Աստուածածին . հրեշտակ ի մարդկանէ , մարմ-
նաւեսիլ քերովքէ , երկնաւոր արքայունի , ան-
խառն իբրև զօդ , մաքուր որպէս լոյս , անշա-
ղախ ըստ նմանութեան պատկերի արուսեկին
բարձրութեան , զերազանց քան զբնակութիւն
անկոխե ին սրբութեանց , երանաւոր խոստմանն
տեղի , նղեմ շնչական , ծառ կենացն անմահից
բոցեղէն սրուն պարունակեալ , ի բարձրեալն
Հօրէ զօրացեալ և հովանացեալ , հանգստեամբ
Հոգւոյն հանդերձեալ և մաքրագործեալ , ընա-
կութեամբ մըրդւոյն յարդարեալ և տաղաւարեալ .
միածինն Հօր և քեզանդրանիկ , որդի քո ծնըն-
դեամբ և տէր արարչութեամբ . ընդ անաղտ
մաքրութեանդ և ամբիծ բարի , ընդ անարատ

սրբութեանդ և խնամակալ բարեխօս։ Ընկալ
զմաղթանս՝ այսր աղերսանաց քում դաւանո-
ղիս, և մատո՞ ընծայեա ընդ սմին խառնեալըգ-
բանն իմ նախնի մեծիդ ներբողի իքոյդ պաղա-
տանս։ հիւսեա միացն զմեղուցելոյս դառն հեծու-
թիւն ընդ քումդ երջանիկ և խնկաւորեալ հայ-
ցուածոց, տո՞ւնկդ կենաց պտղոյն օրհնութեան.
զի իքէն միշտ օգնեալ և բարեգործեալ, և ի
մաքրական քո ծնելութիւնդ ապաւինեալ և լու-
սաւորեալ, կեցից Քրիստոսի որդւոյ քոյ և
Տեառն։

բ. Օժանդակեա թևոցդ աղօթիւք, խոստովա-
նեալ մայրդ կենդանեաց, և ելիցն իմ յերկրէս
հովտէ, առանց լլկանաց հետևել ի կեանս օթե-
վանացդ պատրաստութեան, զի թեթեասցի կա-
տարածնիմինձանքացելոյս, անօրէնութեամբ։
Արասցեստօն ինձ բերկրութեան զօրն իմտագնա-
պի, ողջացուցիչ երկանցն եւայի. բարեխօսեան
խնդրեա աղաչեա, զի ըստ անճառելի մաքրու-
թեանդ և ահա զբանիդ հաւատամ զընդունելու-
թիւն։ Արտասուօք օգնեա վտանգեցելոյս, զո-
վեանդ ի կանայս. ծունք խոնախնեցն առ իմ
հաշտութիւն, ծնողդ Աստուծոյ. ընդ իմում
թշուառիս հոգա, խորան բարձրելոյն. ձեռն
տո՞ւր անկելոյս, տաճար երկնային. փառա-
ւորեա զորդիդ քո իքեզ աստուածօրէն ինձ

հրաշագործել քաւութիւն և ողորմութիւն, աղախին Աստուծոյ և մայր. բացձրասցի պատիւ քո ինև և ցուցցի փրկութիւն իմ քե:

Գ. Եթէ զիս զացես՝ տիրամայր, թէ ինձ ողորմեսցիս՝ սըրբուհի, թէ զկորուսեալս շահեսցիս՝ անարատ, թէ զիարթուցեալս յանձանձեսցես՝ երջանիկ, թէ զամաչեցեալս յառաջ մատուցես՝ բարեշնորհ, թէ յուսանատելոյս ինձ միջնորդեսցես՝ միշտ սուրբ կոյս, թէ զմերժեալս ընտանեցուցես՝ մեծարեալդ Աստուծոյ, թէ յիս ցուցցես զզթածութիւն՝ լուծիչդ անիծից, թէ զծփեալս հաստատեսցես՝ հանգիստ, թէ իխոռվութեանցս յուզմանց փոխեսցես զիս՝ խաղաղարար, թէ փրիպելոյս ինձ հնարաւորեսցես՝ գովեալ, թէ վասն իմ մտցես իհանդէս՝ մահու նահանջիչ, թէ զդառնութիւնս իմ անուշեսցես՝ քաղցրութիւն, թէ զբաժանմանն իմ խտրոց քակտեսցես՝ հաշտութիւն, թէ զանմաքրութիւնս իմբարձցես՝ նղծման ընդոտնիչ, թէ զմատնեալս մահու փրկեսցես՝ կենդանի լոյս, թէ զլալեացս ձայն հատցես՝ բերկրութիւն, թէ զխորտակեալս կազդուրեսցես՝ դեղ կենաց, թէ ի կործանեալս յիս ակնարկեսցես՝ հոգելից, թէ ողորմութեամբ ինձ պատահեսցես՝ կտակ նուիրեալ: Օքինեալդ միայն ի շրթունքս անբիծս լեզուաց երջանկաց. ահա կաթիլմի կաթին քումդ կուսութեան յանձն իմ անձրևեալ՝

կենաց ինձ զօրէ, մայրդ բարձրելոյ տեառն Յիսուսի արարչին երկնի և բնաւին երկրի, զոր անձառապէս ծնար բովանդակ մարմնովն և համայն աստուածութեամբն, որ փառաւորեալն է ընդ Հօր և Հոգւոյն սրբոյ էութեամբ և անքննութեամբ մերոյին բնութեամբս միացելով, ամենայն և յամենայնում, մի յերրորդութենէն. նմա փառք յաւիտենից յաւիտեանս. ամէն :

ԲԱՆ ԶԱ.

Վերսիմ յաւելուած կրկին նեծուրեան.

Ա. Ըստուածածնին մաղթանաց՝ ահա և զվերնոցն անմահ հրեշտակացն լուսակերպից զաղերս հայցուածոց, որ վասն իմ զոչեն առանց լուելոյ հանապազորդեան արգահատութեամբ մաքուր բերանց, ընկալ բարեգութ. որք են բարիք բարեգործեալք ի բարերարէդ անկիրթք չարեաց, հաստեալք յամէնիշխան հրամանաց էիդ, զօրութիւնք հզօրք ակնարկութեան բարձրելոյդ, սուրբք, մաքուրք, անարատք, օրհնեալք, վայելչականք, յաղթողք և անպարտելիք, և ըստ ընթացից տեսութեան մտաց արագունք :

Բ. Որք և պտղակորոյս տնկոյ թզենւոյն եռամեանն ղատարկութեամբ, որ զբնաւ յաւիտեանս պարունակէ ժամանակն՝ զանցեալն ընդ ներ-

կայիս և ընդ ապառնւոյն, յամայր յամրութեամբն յերկարաձգելոյ, յայզի աշխարհիս արմատացելոյ, սին սաղարթիւն պաճուճելոյ՝ զըրկեալ ի պտղոց, որ է ճշգրիտ պատկեր թշուառ մարդկութեանս, սոքա բարեխօսք, հանդերձիչք, այլ և խնամակալք. որ դեզերին հանապազ առ մեզ՝ ընդ մերում կրիցս կարեկցելով, բարեմասնութեանն մեր սպասեն. և յափունականն կենդանութեամբ փրկութեանն մեր աղօթեն՝ զայս բան ասելով, զգործս ձեռաց քոց մի անտես առներ : Քանզի արդարե մեր են այս աղաչանք ի բարերարէդ Աստուծոյ վասն մեր կարգեալ առ նոսա. զի նոքա բանիւ են ստեղծեալ, և մեք ձեռօք ներգործեալ: Որք և գալոց են ընդ Միածնիդ վկայք սոսկալի դատաստանին հատուցման, ճշմարտաբան դատախազք յանցաւորութեան երկրայնոցս, յահաւորին ատենի յայտնիչք իրաւամբք զմատակարարութիւնն որ առ մեզ. որ և անդանօր կարեկցեն ազդեալ հառաչմամբ զմշտանուէրն նուագ ձայնի, ողորմեա՛ դու ստեղծեր, մի կորուսաներ :

Գ. Արդ ընդ գոհաբանութեան ձայնիցն խընդրուածոց անմահականացն վեճից՝ և ի մեր հեծութիւնս հոտոտեսցիս, բնաւից արարիչ, որ յաղթես զթութեամբդ քո վերնոցն և ստորեայ-

նոցս. քանզի քո է բարեբարելի առ մեզ և առ
նոսին : Արդ վասն բարեզարդութեան անախ-
տականացն, հրաշտատեսիլ հրակերպիցն, ան-
շաղախ մաքրոցն, անմեղիցն, բոցանիւթիցն,
հոգեղինացն և անվանելեացն, ամենամեցուն
առաւելութեամբ ի բարձրն ընտրականութիւն
գերափայլ յաճախ զիտութեամբ՝ անցուրա ջեր-
մութեամբ ջեռուցանողք ինքնաբուն տապովն
աստուածսիրութեան ըստ ինքեանց զմերս սառ-
նասեր սրտիցս անբորբոք շիջումն, այրիլ անա-
ղօտ ի մեծախորհուրդ սրբում սեղանիս՝ որ ի
խորանիս, առանց նիրհելոյ և դանդաղանաց
սպասել հրամանաց երանականաց կեցուցիչ
կամաց ամենաստեղծիդ, քրովբեօրէն առաքի-
նութեամբ յաստուած միացեալք անբաժանելի:
Որք երկնաւոր պետութիւնք են մեծք, և զի-
նուրութիւնք անբիծք, ահաւորք, երկնաւորիդ
Աստուծոյ ազատազնեայ պաշտօնեայք, ի յամ-
պոյդ լուսոյ զոյք նշուղից :

Դ. Որովք և ինձ մեղաւորիս հողեղինի մար-
դասիրեսցնս ողորմել, Յիսուս, աղաչանօք
իմոյն հրեշտակի, դարձուցանելով զիս, Տէր,
ի բարիդ քո հետս լուսոյ. զի զաւանդ հոգւոյս
իմ պաշտպանութեան, զոր հաւատացեր նմին
տեսչութեան զընկալեալն ի քէն ի կենցաղ աս-
տեացս՝ ուրախութեամբ սրտիւ յիս բերկըեալ,

անմեղադրելի առ իքէն օրհնեալ՝ խնդալից դիմաց զուարձութեամբ քեզ, արքայ բարձրութեան փառաց անհասից, ի խրախճանս կենդանախումբս բերկրեցելոցն պարուց մատուցեալ ընծայեցուսցէ, գովեալ ողորմած : Եւ քեզ անքընին ընդ Հօր անհնասի՝ թուակցութեամբ Հոգւյդ անճառի վայելէ փառք պատիւ և երկրպագութիւն, յաւիտեանս յաւիտենից . ամէն :

ԲԱՆ ԶԲ.

Վերաժմ յաւելուած կրկին հեծութեամ.

Ա. Տէր Աստուած բարերար, բազմապարզն թագաւոր, կենաց պատսպարան, լուսոյ կերպարան, լայնատարր հանգստարան . որ յաղազս մեղուցելոյս եկեալ մարմնացար, գործեցեր զանպատումսն և հանդերձեցեր զիրաշալիսն, մինչև կատարեցեր զառեցեալն ընդ ամենալիր աստուածութեանդ :

Բ. Արդ վասն առաքելոցն սրբոց յերկնաստեղծ քո ձեռացդ ձեռնաղրելոց և Հոգւովդ սրբով օծելոց, զորոց զգովեստն արժանաւորութեան ըստ իմում կարի՝ առ ի փառս քո, Տէր ամենայնի, յայլում բանի պաշտեցի, և ինձ ողորմեսցիս յիշատակաւ սիրոյ նոցին ընտրութեան : Շաւիդ ինձ ելից նոքօք հանդերձեսցես յերանութիւնն փափաքելի . ձայն բարի հովուութեան նոցին ի

յողջոյն ինձ կենաց քաղցր լուիցի : Մասն կալայց
ի յանեղծութիւն փրկութեան տօնեցեալ յուսոյն՝
ընդ առաջնորդացն կենաց, սկզբնաշնորհիցն
պատուոյս, փառաւորեալն դասուց, գետոցն
բանականաց, աւետարանչացն բարձանց, իշ-
խանացն պանծալեաց, լուսապայծառ թագիւ
պանելոցն, իզարդ անկապուտ զօրութեան շնոր-
հին պայծառացելոց, իւղովն զուարթութեան
տիրական լուսոյն կատարելոց :

Գ. Ընդ աշակերտաց մեծիդ հրամանի բարձ-
րեալդ Աստուծոյ Քրիստոսի՝ և մարտիրոսացն
ընտրելոց նահատակութեամբ, որք մահացու և
վշտաշարչարն մարմնով, վտանգաւոր և ամե-
նակիրն անդամօք, երկրաւորական և հողա-
զանգուածն ընութեամբ մարտուցեալ ընդտարը
զոյից ամենայն նիւթից՝ պսակեցան բարձրացան
և կենդանացան հոգեսկէս . արիաքար ելեալք ի
յերկրէ, ըստ մարգարէին, վկայք ճշմարիտք
ամենափորձն մահու, իմանալեացն անտեսիցն
։ ծածկելոց աներկրայ բարեացն յուսով տեսե-
լոցն աստէն նկատիչք . աշակերտք առաքելոցն
և չարչարակիցք նոցին . որ հաւասարեալ գոր-
ծովք ընդ նոսին, կատարեալ լրմամբ անպակա-
սելեաւ պարեն ի խրախնանս անկէտն երա-
նութեան . որոց հաճոյական և ընդունական
մաղթանօք, արիւնընծայ վաստականուէր քըրտ-

նակնդրուկ աղերսիցն յարգմամբ՝ ընկալ զիս
նորոգ ըստ նոցին մասին անեղծ փրկութեամբ
ի քեզ արձանացեալ :

Դ. Ընդ խաղացեալսն հուրբ և սուսերք արեամբ
ներկելոցն, և ճգնաւորացն սրբոց հարցն միան-
ձանց և քեզ հետեւելոցն, որդի Սատուծոյ,
անպարտելի քաջութեամբ և անպատիր զգաս-
տութեամբ, ընդ դժնեայ գոռոզի մարմնոյս բըռ-
նութեան արիապէս մարտուցեալ, սովիմբ վա-
սեցին զանմարմինն Բելիար . և մշտամարտ
հանդիսիւ յասպարիսի կենցաղոյս առանց զր-
գուանաց ծանրաբեռնութեան ի լայնածաւալ
ծփանաց աշխարհիս ծովուտապանակաւ մարմ-
նոյս թանձրութեան զթեթեռութիւն հոգւոցն
թռուցեալ ի նաւահանգիստն կենաց հասին . և
իբր սիրողք վերնում միմակին առանց յետնոցն
մտածութեան, զթագն յաղթութեան համարձա-
կապէս պայծառ ճոխութեամբ պանեալ իսկա-
պէս ի զլուխ կապեցին . վասն նոցին արժանաւոր
մաղթանաց և նուիրական հայցուածոց և զիս
զմեղաւորս ի պատժականաց ընկալ ընդ նոսին :

Եւ ահա խառնեալ զանմաքուրս բան ընդ
նախագրեալ երջանկացն փառատրական աղեր-
սարկութիւն, որ վասն իմ գոչեն քեզ ի հաճու-
թիւն, և ես ընդ նոսին իբր դառնութիւն եղեալ
ընդ քաղցու, կամ տատասկ ընդ ողորկութեան,

տգեղութիւն ընդ վայելչութեան և տիզմ ընդ
գեղեցկութեան մարզարտի, կամ հող ընդ յատա-
կութեան ոսկեոյ, և կամ քարինս անարզս ընդ
պայծառութեան արծաթոյ, բացասութիւն ընդ
ճշմարտութեան, կամ աւազ ինչ ատամնառու
ընդ կակդութեան զանգուածոյ հացի. արդ լուր,
հզօր, հնարաւոր, գովեալ, զնոցայն վասն իմ և
զիմս ընդ նոսին ի նոցին գովեատ, ի փրկութիւն
իմ և ի փառս քո, ամենագութ, բարերար,
օրինեալ, երկայնամիտ, կարող, անքնին, ան-
ճառ, անեղծ և անտեղծ : Ոչ են պարզեք, քո
են շնորհք. դու սկիզբն և պատճառ բարեաց
ամենայնի : Ոչ ես դատապարտիչ, այլ ազա-
տիչ. ոչ ես կորուսիչ, այլ գտիչ. ոչ ես մահա-
ցուցիչ, այլ կեցուցիչ. ոչ ես տարագրիչ, այլ
ժողովիչ. ոչ ես մատնիչ, այլ ապրեցուցիչ. ոչ
ես ընկդմիչ, այլ վերածիչ. ոչ ես գլորիչ, այլ
կանգնիչ. ոչ ես անիծիչ, այլ օրինիչ. ոչ ես
փրիժառու, այլ շնորհիչ. ոչ ես թշուառացու-
ցիչ, այլ մխիթարիչ : Ոչ եղծանես, այլ զրես,
ոչ սասանես, այլ հաստատես. ոչ ուսն հարկա-
նես, այլ սփոփես. ոչ պատճառս յօդես մահու,
այլ հնարս խնդրես կինաց. ոչ ես ի կամս շար-
ժեալ սատակման, այլ ի փրկութիւն ողորմու-
թեան : Ոչ մոռանաս զայցելութիւն, ոչ լքանես
զբարի, ոչ արգելուս զգթութիւն, ոչ բերես

վճիռ կորստեան , այլ կտակ ազատութեան : Ոչ
թշնամանիս յառատութեանց , ոչ բամբասիս ի
շնորհաց , ոչ հայիոյիս ի պարզեաց , ոչ նախա-
տիս ի ձրի ձրից , ոչ անգոսնիս յերկայնմտու-
թեանց , ոչ եպերիսիներութեանց , ոչ բանսարկիս
ի բարութեանց , ոչ անպատուիս ի քաղցրու-
թեանց , ոչ քամահիս ի հեզութեանց , ոչ առա-
քին այսոցիկ տրտնջմունք , այլ անլոելի գոհա-
բանութիւնք : Բարձ զմեղս իմ , հզօք . լըծ
զանէծս ին , օրհնեալ . քաւեա զպարտիս իմ ,
ողորմած . զնշեա զյանցանս իմ , զթած . մատն
մատն այցելութեան , և անդստին իսկ կատարե-
ցաց . զինչ քեզ , Տէր , քան զսոսին դիւրագոյն ,
և կամ զինչ ինձ պարտաւորիս կարևորագոյն :
Այլ կենդանազրեա , բարեխնամ , քոյինատեղծ
պատկերիս փչումն կրկին ի շունչ նորոգման
լուսաւորութեան մաքրական շնորհի զամենա-
մեղս ոգի պաշտպանեալ :

2. Մի ածեր , ողորմած , ինձ օր տարաժամ ի
համառօտս երբի՝ անթոշակ ապաձեռնութեամբ
ընդ անկատար ուղին հետևել . մի մատուցաներ
բաժակ դառնութեան ի ժամ ծարաւու . մի փա-
կեր , զթած , իմ հանդէպ զյաջողուած հոգևոր
օգտիս , և մի իբր յանկարծադէպ հինից ասպա-
տակ զիշեր մահուն ինձ պատահեսցէ . մի տապ
տօթոյն յանպատրաստ պահուն զարմատս հա-

տեալ զամաքեցուսցէ, և մի լուսնական դիպուածք հասեալ զաղտնեօք վնասեսցեն, մի պահեսցի ինձ սառն մեղացս, և մի հոսանք ուղիսից կենցաղոյս զիս ողողեսցեն : Մի հանգիստն մահըերիցէ, և մի ննջումնն ի սատակումն յառաջեսցէ . մի քունն ինձ կորուստ լիցի , և մի Շիրհումնն ապականութիւն գործեսցէ . մի վախճանն անյարմար ի վերայ իմ արշաւեսցէ , և մի շնչոյս վերարձակութիւն ըմբռնեալ ի խոնարհ լքցի :

Ե. Դու ես Տէր, դու գթած, դու բարերար , դու երկայնամիտ , դու ամենակարող , առ ամենայն բան անհասութեան անձառ զօրաւոր , քաւել փրկել կենազործել լուսաւորել , վերստին հաստատել , ի ժանեաց կերչաց զազանաց և կամ յատամանց վիշապաց ի կեանս կորզել , ի խորոց անդնդոց ի լոյս բերկրութեան ածել , ի հեղձմանէ ծփանաց մեղաց ընդ արդարս երջանկաց փառօք բազմեցուցանել : Ամենայն ոզի քեզ ակրնեկալեալ յուսով սպասէ , կարօտեալ քումդ շնորհաց , եթէ երկնայինք և եթէ երկրաւորք , եթէ անկածն մեղօք և եթէ անբարձեալն արդարութեամբ , եթէ տէր և եթէ ծառայ , եթէ տիկին և եթէ աղախին . և ի ձեռին քո է շունչ կենդանական բոլորեցուն : Եւ քեզ ընդ Հօր և Հոգւոյդ սրբոյ փառօք յաւիտեանս յաւիտենից . ամէն :

ԲԱՆ ԶԳ.

Վերսիմ յաւելուած կրկիմ ննծութեամ.

Ա. ԲԱՐՁՐԵՍԼ. անքնին, զօրութիւն ահեղ, Տէր արարածոց, Թագաւոր Երկնի, ստեղծիչ հրեշտակաց, գոյարան մտաց, հաստիչ հրեղինաց, պետ բարի հոգւոց, աջ ապաւինութեան, անդորրութիւն հանգատեան, տեսարան լուսաւորութեան, պայծառութիւն բերկրութեան, ճանապարհ երանութեան, պատճառ կենդանութեան, առիթ բանաւորութեան, փրկութիւն առանց չարութեան, առաջնորդ խաղաղութեան, պարիսպ ամրութեան, պատուար պահպանութեան, ցանկ բոցոյ մեծի օրինութեան, սահման անոխակալութեան, յիշեա յայսմ ողբերգութեան մատենի բանիս խոստովանութեան և զոր ի մարդկային ազնէ թշնամիս մեր՝ ի բարի, և արա կատարեա նոցին քաւութիւն և ողորմութիւն: Մի բարկասիս նոցա վասն իմ, Տէր, իբրև զսուրբս բամբասողաց՝ առ յաճախ սիրոյդ որ յիս, այլ որպէս զչարս կշտամբողաց և իրաւամբք նախատողաց՝ Եերեա յանցանաց նոցա: Եւ արդ մատուցեալ Երկաքանչիւրոցս առաջի քո, արդարադատ, ոմանք առ մեզ վնասակարագոյնք սակաւուք, թերեւ և յիրաւի բամբասելոցս, և ես առ քեզ, ամենապարզև, անթիւս

և անկշռելիս բազմօրինակ ուխտազանցութիւնս :

Բ. Արդ յիշեա զքո մեծութիւնդ, Տէր, նայեցեալ ի յիմս անարգութիւն . և ընդ խնդրելս իմ ի քէն բարի իմոցն ատելեաց, և դու առ քոյս ըստ քում մեծութեանդ անձառելիս հրաշազործեսկս : Մի սատակեսցես զիմսն խածանողսն, այլ փոփոխեսցես . խլեալ զխոտանս բարս երկրաւորս, զբարիսն արմատացուսցես և յիս և ի նոսին : Մանաւանդ զի դու ըյս ես և յոյս, և ես խաւար և յիմար . դու խկութեամբ բարի զովելի, և ես համայնիւն չար ապիկար . դու Տէր ստորիցս և երկնից, և ես անիշխան շնչոյս և հոգւոյս . դու բարձրեալ ի կարեաց զատեալ, և ես տաժանաւոր և վտանգաւոր . դու ի վեր քան զկիրս երկրիս, և ես կաւ անարգութեան զարշութեան . դու ըստ մարգարէին մնաս յաւիտեան յանբաւ բարձրութեան, և ես միշտ կորընչիմ ըստ նորին բանին . ի քեզ ոչ է մթութիւն կամ նենգութիւն, և ես բաւանդակն իսկ եմ՝ որ զաւանդն իմ ոչ պահեցի : Հան զիս ի բանտէս, արձակեա ի կապանացս, զերծ ի շղթայիցս, փրկեա ի խեղդմանէս, ազատեա ի տագնապէս, քակտեա ի յերկաթիցս, լոյծ ի պաշարմանցս, արտաքսեա յերկմտութեանցս, սփոփեա ի տխրութեանցս, հանգն ի նեղութեանցս, փա-

բատեան ի վշտացս , հանդարտեան ի խռովութեանցս , ապաքինեան ի լայլոյս , մերժեան ի հեծութեանցս , հեռացն ի յողբոցս , կազդուրեան ի կականմանցս : Աստուած ողբրմութեան և պարզեատուքադրութեան , մի զգրաւեալս արեամբ հզօրիդ անտես արարեալընդ վայր կորուսաներ . կանգնեան զհասեալս յափն մահու ի բազմավտանգ հիւանդութենէս :

Գ. Ահա բարդեցան կուտեցան շրջանակը ամացս ընդունայնութեան , յորմէհետէ յայտնեցեալ ցուցայ յոչպէտս երևեալ , իյանդաստանէ մօրն իմոյ սենեկի փուշս դժնկի մեղաց շառաւիդի . մի լինիր ինձ խայթոց խոցոտիչ՝ որպէս անդտոհմին Յուղայի , և կամ զաւակին Եփրեմի : Եւ քանզի բուսուցեալ տնկեցի յոգիս փոխանակ ցորենոյն բարեսերմութեան խոտս խայթողականս ինքնաթոյնս ընդարմացուցիչս , ըստ զրոյն բանի՝ որ երեցն է քան զաւետիսն , զիարդ ոչ կոչեցից զանձն իմ զարշելի անդաստան անիծաբեր փշովք մեղաց հեղձեալ : Ոչ սերմանեցի արդարութիւն , ըստ բանին Ռվանայ , և զիարդ հնձեցից և ժողովեցից զկենաց պտուղն : Անկաւ ստիճք կուսութեան անձինս մաքրութեան , ըստ մարզարէին բանի՝ որ առ Խորայէլ , կարող ես Տէր ի նոյնն հաստատել : Լայնեցի ընդարձակեցի ըստ մոլեկան բարուցն Յուղայի զանկողին կա-

մացս' դիւացն հոմանեաց , ի ձեռս քո է ամփո-
փել դարձեալ ի նոյն զզաստութիւն : Եթէ
մարմնապէսն կցորդութիւն ընդ տեսանողին
անարատ գործեաց զպունիկն , իսկ դու փրկու-
թիւն հոգեպէս միացեալ ի յիս' կրկին մաքրես-
ցես . եթէ արեգակնու այս անկենդան ստեղծեալ
առ ի քէն երկրիս մատակարար , և զկարակումն
մօրից ցամաքէ և զտհաս պտուղս հասուցանէ ,
իսկ ստացողդ ամենից հոգիդ Աստուծոյ որքան
զօրեսցես զտիղմ չարեաց աղտոյ և զթարախ
պղծութեան մեղաց մթերից իսկոյն սպառել :
Վասն այսր կանխաւ իսկ ժամանեցի հայցել առ
ի քէն բարի' ատելեացն իմոց ի կարգ այս բանի ,
զի զներքեալ վնասակարս պարտուց մահու յա-
մենախնամ աչաց հզօրիդ մի մերժեսցես , օրի-
նեալ զթութիւն . արդ կենազործեան զիս զամե-
նամեղս անդամօք մարմնոյս ընդ բնութեան
հոգւոյս խորհել միշտ զքոյսդ : Իսկ բարեգործացն
խնդրել բարիս , բնութեան են օրէնք' անբռնա-
դատ կրիցն յարակցապէս առ սոյն բերումն :
Քանզի արդարեւ առ միդ այդ պատուէր ամենայն
հասակ զօրանայ , իսկ միւսոյդ երկրորդի առաջ-
նովդ խնամով հանդիպել աստուածականիդ է
նմանութիւն . յաղազս այսր իրի նախնի դա-
սոցի զթշնամեացն իմոց աղերսանս քան զերախ-
տաւորացն բարիս :

Դ. Եւ արդ յիշեան զնոսա կրկին ընդ միոյ, որ
ի քո անուն բարձրացեալ զանարժանս զիս ըն-
կալսն . և տուր նոցա, Տէր ամենառատ բարե-
րար և անոխակալ, վարձս արդարոյ և մարզա-
րէի, թէ և ես յաւէս թափուր իցեմ յարժանեաց,
ըստ հաւատոց նոցա և առ յոյս նոցին ակնկա-
լութեան, որ առ պարտաւոր գերիս ողջամիտ
կամօք ակնարկեն, որպէս թէ ի մասանցդ քո
կեցուցչաց ի պահպանարան հոգւոյս ծածկութի
լիով ունիցիմ : Եւ զպատժաւորս անամփոփելի
ի քոց տեսութեանց և յանխաբելի ի յուղիդ կըշ-
ռութեանց՝ քաղցր գթութեամբդ անսահմանե-
լեաւ մերձեցեալ առ իս մաքուր արասցես, ան-
խայտառակելի պահելով ի տիեզերական յանդի-
մանութեանն : Եւ որպէս շուք իմն վայելչական
դնել ախորժեն ինձ անարժանիս սիրելիքն քո
վասն քո, նայեցեալ ի կրօնս զգեստուս բարե-
կերպութեան, չզիտելով զբիծս զաղտնեացն՝
երջանիկ կարդան եղկելոյս և դու հնարաւոր
ամենապարզն օրհնեալ մարդասէր՝ առ բնաւս
ողորմած, վասն ամենաթշուառիս հեծութեան
հաշտեաց ընդ նոսա ըստ հաւատոց նոցա. ըն-
ծայեալ նոցին մատն պարզեեան զանեղծ մեծու-
թիւնդ և զանթառամելի զպակդ յահաւոր
աւուրն յետնում հատուցմանն ամենափորձ
ընտրութեանն :

Ե. Զի դու ես զրաւ փրկութեան մեծութեան
անվատնելի և անծախ գանձուց ստրկիս և սո-
վեցելոյս, իվաճառ վերնային շահուօգութեան՝
բանիւդ որ ի քէն՝ յարգեալ ճոխանամք : Կառն
ինձ սահման ջրոյ հանգստեան . արձանացն,
անփոփիս, պատրաստական վստահութիւն .
կարգեան, օրինաբանեալ, անկեղակարծ յուսոյ
ամրութիւն, տուր, ամենախնամ դու, անաչառ
պաշտպանութիւն, սասանեցելոյս՝ բարեաց ան-
դորրութիւն, տարակուսելոյս՝ լուսոյ ապահի-
նութիւն, աշխարելոյս՝ մեծ երջանկութիւն,
վհատելոյս՝ կենաց օգնութիւն, լքելոյս՝ անզայ-
թագդելի օժանդակութիւն, նահանջելոյս՝ ան-
սայթաք վերընթացութիւն : Զի քո է բնաւդ և
ի քէն է ամենայնդ, և ի ձեռն քո բաշխին հա-
ւաստութիւնք պիտանացուաց համայնից կե-
նաց. և քեզ վայելէ փառք յափտեանս յափտե-
նից. ամէն :

ԲԱՆ ԶԴ.

Վերսին յաւելուած կրկին հեծուրեան .

Ա. Արքս Երկնաւոր, թագաւոր բարձրեալ,
Տէր բոլորից, ամենից ակնկալութիւն, ստեղծող
տեսականաց, հաստիչ իմանալեաց, պատճառ
եղանութեանց, կազմիչ հանդերձելոց, տուիչ
լուսոյ, առիթ առաւօտու, պատրաստիչ վա-

ղորդայնի, երևեցուցիչ երեկորի, տարրիչ խաւարի, արուեստաւոր բարեհնար, իմաստութեան գործօնեայ, քաւարան օրինեալ, հալիչ մեղանաց, հալածիչ զաւոց, քակտիչ դառնութեանց, պահպանարան հանգատեան, հնարք նիրհման, յարմարիչ քնոյ, պարզեկիչ նեշման, շնչոյ յարակարգութիւն, զգայութեան տևողութիւն, ցրիչ ցնորից, յեղանակիչ անըզոց, փոխարկութիւն զարհուրմանց, այլայլութիւն տիսրութեանց, խափանիչ խիթմանց, ընդարձակիչ կարծեաց, համադրութիւն ծփմանց, ահագնութիւն խարդախմանց, հարուածիչ դիւաց, փախուցիչ ախտից, ընկդմիչ գայթագղութեանց :

բ. Պաշտպանեան երկնաստեղծ ձեռամբդ, զօրացն բարձրացեալ քո աջովդ, ամփոփեան ամենակալդ թևօք, ծածկեան աստուածեան խնամօքդ, ամրացն վերակացութեամբ վերնայնոցդ, շուրջանակի պարսպեան գումարտակօքդ անմահից, ի յամենուստ պարփակեան կցորդութեամբ հրեշտակացդ, վանեան զընդդիմամարտն իմ զինուրութեամբ զուարթնոցդ, պատսպարեան ըզսասանեալս' Աստուածածնիդ մաղթանօք, զբանակս անդրանկացդ բարեկարգեան ինձ պահպան : Բաց ընդ աշացս դիմաց և զմտացս իմ տեսանելիս, զզաստ արան ընդ ոգւոցս և զժանրաբեռն կրիցս դանդաղութիւն, վերացն Տէր ի

զգայութեանցս զմածեալս յիմարութիւն . բարձ ,
միայն բարեգործ , զպատրուակիս թանձրու-
թիւն : Ընդ սկզբան բերմանս լուսոյ՝ զողորմու-
թիւն քո ծագեա , ընդ ելից արևուն՝ արդարու-
թեան արեգակնդ ի յանձկութիւն սրտիս մտցէ .
ճառագայթ քո փառացդ ի յիմաստիցս խորհօր-
դանոց ջահնեսցի , խաչիդ տեառնազրութիւն ընդ
շունչս և ընդ մարմինս համասփիուտարածեսցի :
Յանձն առնեմ քեզ յաւուրս զքո յարմարեալ
տաղաւարս պահպանաւ ոգւոյս՝ որ ի սմին : Զի
դու ես Աստուած անքնին , առ ամենեսին բա-
ւական և յամենայնում բովանդակ , օրինեալ
յաւիտեանս . ամէն :

ԲԱՆ ԶԵ.

Վերսին յաւելուած կրկիճ հեծութեամ .

Ա. Իսկ արդ վասն զի արթեականն մեր զուար-
թութիւն քեզ ննջումն իմն է համարեալ , իսկ ի
խոր թմբրութիւն լրելն՝ վասն ուղիղ հաւատոյն
ի քեզ՝ անթարթափ բացութիւն աչաց , ուղղեան
հոգւոյդ քո իմաստութեամբ զյաջողուած ձեռինս
գործոյ ընդ հեծութեան ձայնիս մաղթանաց :
Զօրացն , Տէր , ի հանդէս բարի ճգնաւորական
արի վաստակոյ , կցորդ լնը կարեացս տկարու-
թեան , թեթես կացն զաշխատութեանս այս
սկիզբն . արագեա , միշտ կարող , զյառաջա-

դրեալ ձեռակերտս, դիւրաւորս ընթացն ի յաւարտումն լրմանն : Խվախման իրին բերկրութեամբ զիս հասն, ժաման կացուացես ի հանդիպումն յուսոյն, կցորդ լեր ուղւոյն ճանապարհիս ընթացից, ի թուիչս ամբարձման փութացուացես յօգտակարն, ընդ աշմէ իմ լիցիս ի վտանգի ծանրութեանն, զձայն քո լուն ի յանձկութեանն պահու, ձեռամբ քո կեցն ի կորստեանն ժամու, մատամբ քո ազդեան ի սահմանին անձկութեան, հարթեան զիստրոց ամենաչար խափանմանն, հոգեղինին առաքմամբ ըստ Ամբակումայ ինձ հնարեան, բան ինձ շնորհեան ի յատենի բազմութեան, իմաստութիւն յիս տնկեան ի հանդիպման քննութեան : Ամպով կամաց քոց հովանացիք հրաշապէս, հանդարտեցն փայտիւդ կենաց զծովուս մրրիկ, սանձեան զաստեաց կենցաղոյս պատկեր քոյին հրամանաւդ. քանզի թէ աստ ողորմութիւն քո, Տէր, կամեսցի, այս լուծութիւն կոհակաց կարծր է քան զվէմ. և թէ իցամաքի անտես առնիցես, իբր զանկայուն՝ պընդութիւն յատակիս ի ներքոյ աստի հոսեալ սասանի :

Ք. Արդ ընկան, Յիսուս, զպաղատանացս ձեռնարկութիւն քեզ ի հանութիւն, և արա ինձ զամենակարծն զայթագղութիւն մեծ վստահութիւն : Որպէս ի շրահեղձոյց ամենակործանն

զարու, որք ի հարթ տարածման գետնի առանց
երկիւլի յանհոգս կեին, յողորմութենէդ ամայի
մնացեալ կորուսան, իսկ ընդ հովանաւոր մա-
ծուածով լաստիւն յոգնատատան հիմանն հայ-
թայթանօք յանուն գթածիդ յեցեալ պահեցան.
ընդ որսև զաղաչողն մշտատատան ի նուանան-
գիստն խաղաղութեան մարդասիրապէս պրծեալ
ապրեցն. վարձս ի քոյոցդ ընդ իս բերելով հո-
գևոր շահից, զատորաթերս այս ստուարութիւն
պարտուցս լրեալ բանիդ առակաւ, ի քեզ Տէր
անկայց միացեալ ի սպառ անբաժանելի, օրհ-
նեալ յամենայնի : Եւ կցորդելով այսմ մադթա-
նաց հոգեղենքն ամենամաքուրք ընդ հողեղի-
նացն մարտիրոսաց, որք ջրով և հրով փորձե-
ցան, և յեփից զերծմանն ընդ մեր խնդրեցին, և
մեզ յիշատակ թողին օգնութեան, ասացեն
ընդ մեզ համարանաբար զուգամասնութեամբ՝
եղիցի եղիցի :

ԲԱՆ 22.

Վերսիա յաւելուած կրկին հեծուրեան.

Ա. Ընդ այսր հառաչանաց թախսութեան ող-
բոց ի բազմաց կերպից շարակարգելոց, և ամե-
նից հոգւոց ողորմեան, գովեալ և երկայնամիտ
թագաւոր: Նաև այնոցիկ առաւել որոց հատեալ
է ակնկալութիւն փրկութեան կենաց. որք

Ենցեցին անպատճաստաբար շիջեալ լապտե-
րօք իւղոյն պակասութեան։ Ահա յիշեա, Տէր
իմ զթութեան, և ի յայս ևս պատճառ իրաւունս
ինձ գրեա։ Քանզի թէ և ի փառս ահաւորութեան
սքանչելեաց մեծիդ' հակառակօքնհանդերձեցեր
զկազմած մարդոյս, զոմն ծանը և զոմն թեթև,
զմին զով և զմիւն հրային, զի դիմադրութիւն
ի հակառակացն հարթ պահեցեալ՝ արդար կո-
չեսցուք հաւատարիմ հաւասարութեամբն. և ի
յայսմ ի դատման առաքինութեան վերաբերեալ
ընդ ամբարձելոյն, զխնարհութիւն առ կաւն
դիտման անմոռաց պահեալ՝ պսակ ընկալցուք
ճգնաւորական։ Այլքանզի յայսմ կանոնէուխտի
վրիպեցաք, և անասնաբար սահեցմամբ ըստ
հողոյն զիջման ընդ երկիր մածաք, այլ ոմն ախ-
տիւ և այլ ոմն անզթութեամբ, միւս մասն մո-
լութեամբ ամենաբաղձ կերակրոց իբր գազան
մշտաբոյծ յարակայ կապեալընդ բնութեան։ Խսկ
ի քառիցս ոմն անըմբունելի և անողոքելի սլաց-
մամբ ի բաց ոստուցեալ՝ վայրենապէս ամբար-
տաւանէ. Եթէ ջեռնումքտապով սիրոյնոր ի քեզ՝
Եշխարաւ բոցոյն որ ի մեզ, ցուրտն առընթեր
կենակից նմին զնոյն կասեցուցեալ, բարւոյն
ընդմիջէ. Եթէ օղականաւն հրեշտակայնովն յա-
ռիցիմքի քեզ, ծանրութիւն թանձրու անդրանիկ
նիւթոյս այս հողոյ ի ստորև քարշեալ խափանէ։

Բ. Եւ արդ յամենուստ պարտեալ և ի սպառ
լքեալ՝ իբր զապիկար հաշմեալ հերքեցայ կո-
րեայ վանեցայ, վատնեալ ի բազմաց ի մահ զրա-
ւեցայ. վասնորոյ ի պարզեականէն զրկեցեալ՝
յողորմութեանն կողմ հայիմ, և պատկառեալ
դիմօք համայնից ունողս զբնաւից աղերսաբա-
նեմ զմեռելոցն՝ քեզ կենդանեաց. քանզի կա-
րող ես յաւէտ հնարիւք և կորստականացն
ըստ իս մեռելոցն. ամենայն ինչ քեզ զօրելի
է. նա զի և ընդ անտկար կարելոյդ և կամելդ
է ախորժելի :

Գ. Արդ այսց երկուց բարզաւաճ շնորհաց
նորոգչաց առ միմեանս եկեալ՝ կարելն ընդ
կամելն, բարձեալ եղիցի և յուսահատութեանն
վհատութիւն ազգաց մեղաւորաց. և ժամանեալ
հասցէ աւետեացդ լոյսհոգւոց բժշկութեան քումդ
հրամանի, Տէր ամենայնի, օրհնեալ յաւիտեանս.
ամէն :

ԲԱՆ ԶԵ.

Վերսին յաւելուած կրկին հնծուրեան .

Ա. Եւ արդ քանզի ի գլուխ կատարման հա-
սեալ սակաւամասնեայ կտակի այսր ողբերգու-
թեան, արա, Տէր, վախճան դադարման առնուլ
ընդ այսց բանից մաղթանաց ինքնանախատս
կշտամբութեան և որ յիս կրին չար սովորու-

թիւնք : Որ քեզէն կարգեցեր սահման աւետեաց ակնկալութեան դատապարտելոյս՝ ասելով, ոչ են կամք առաջի Հօր իմոյ եթէ կորնչիցի մի ոք ի փոքրկանց . և դարձեալ, այս են կամք Հօր իմոյ՝ զի զամենեսին ինձ յանձն արարեալսն ոչ կորուսից :

8. Ահա օրհնեալ ես ի գթութեան, բարեբանեալ միշտ ի քաղցրութեան, խոստովանեալ յերկայնմտութեան, ծանուցեալ ի յայցելութեան, քարոզեալ Տէք ի փրկութեան, ներբողեալ դույառատութեան, պատուեցեալ ի պաշտպանութեան, փառաւորեալ ես ի փրկութեան, երկրպագեալ յանբաւ բարձրութեան, պաշտեցեալ ի յանքննութեան, զովեցեալ միայն ի յաղթութեան, վերաձայնեալ ի մեծ զօրութեան, խնկաւորեալ յողորմածութեան, համբուրեցեալ յանձառ հեզութեան ճաշակեցեալ ի խոնարհութեան : Ընդ քեզ և ծնողդ քո երկնաւոր Աստուածդ բոլորից մխիթարութեան . ըստ որում հոգիդ քո սուրբ բարութեան, որ զանկեալ զգրաստ թշնամւոյն և զգայթագլեալ մարդն անբանութեամբ՝ կանոնեցեր ոչ անտես առնել : Որոյ երախտիս հզօրիդ ի յիս և առաքինութիւն մեծիդ ի բարձունս տօնեալ անդադար յանվախնան փառաբանողաց . որովք զայս ձայն աղերսական յարգեալ ընկալցիս մարտիրոսացն պա-

ղատանօք ի հոտ հաճութեան բուրման անուշից։
Եւ այսու փրկանօք հաշտարար բանի՝ զնախ-
նեացն պարտս և զաներեւոյթ վերս միջնովքն
և վերջնովքն մահացուցանողօքն զանձն և ըգ-
մարմին բժշկեա, ամենակարող, զներքինս և
զարտաքինս, զտիպքն և զգիծքն և զխարանս
հարուածոցն. բարձեալ և մաքրեալ դեղովք
ողորմութեանդ զկտեալ խածուածս բազմագու-
նիս, որք գարշելիս ընդ ախորժելեացն քեզ ցու-
ցանեն զէութիւն բնութեանս։

Գ. Եւ եթէ հասից յամս ծերութեան քև առաջ-
նորդեալ արժանիս մահու, մի թողցես զտկա-
րութիւնս, մի անարգեր զալիսն, մի կորացուս-
ցես զկործանեալն, մի զիշուսցես զկըեալն, մի
վայրաբերեր զխոնարհեալն, մի շնչման հողմոյ
մատներ զառկայծեալն, մի ընդ պահկեսցես
զդեղեւեալն, մի անվերարկու առներ զսուու-
ցեալն, մի անդարման լիցի տազնապեալն,
մի առանց տածելոյ յարկն խարխալեալ, մի
անպատիւ պատկերն հնացեալ, մի պարաբու-
թիւնն անհամեալ, մի շուք շնորհին անարգեալ,
մի հնութիւնն քամահեալ, մի նաւ հոգւոյս
ալէկոծեալ, մի երկարութիւն յուսոյնկտրեցեալ,
մի լար շաւեղին խզեալ, մի ուշ իմաստին բար-
ձեալ, մի զոյին կազմած զեղծեալ, մի ամբարձ-
մանն թևք փետտեալ, մի զուարթութիւն զեղոյն

տգեղեալ, մի ճաճանչ նշուլին քաղեալ, մի պատուհանք աշացս փակեալ, մի լուսաւորութիւն նորին խափանեալ, մի պատկերն խօսուն անկեալ։ Ահա աղաչեմ զքեզ, բարեգութ, ամենայն սրբովք պաղատիմ, լուր սոցին ինձ կանխաւ, զի զանազանն մի մոռասցիս։ Դու առաջնորդեցեր ինձ, ըստ սաղմոսողին, և ապրեցուցեր. հան, Տէր, ընդ երգողին՝ և ի կարծեացն կասկածանաց, յորմէ երկնչիմ։ Իսկ ես չեմ արժանի ի քէն և ոչ հասարակական կերակրոյն վարձու, այլ դու կարող ես սովորաբար և առ զլացողս բարեգործել։ Վո են զարմանալիք անճառից բարեաց, միայն հրաշագործ առամենայն երկայնմտութիւն, ընդ Հօր և Հոգւոյդ սրբոյ օրհնեալ հանապազ յաւիտեանս յաւիտենից. ամէն։

ԲԱՆ ԶԲ.

Վերսիմ յաւելուած կրկին հեծութեամ.

Ա. Եկ արդ ջուր կամաց և կաթ արտասուաց' բեկութեամբ հոգւոյս մոացս լրմամբ' խորտակմամբ սրտիս հեղեալ առաջի, զմարզարէին յիշեցուցանեմ զարամաթացւոյն Սամուէլի. զոր առեալ եհեղ ի սկաւառակէ յանդիման քո, ամենատես, առ ժողովրդեանն օրինակութիւն զանձն արկանելոյ խոստովանութեամբ և հնա-

զանդութեամբ կենդանարարդ գարշապարաց :

Բ. Եւ արդ ընկալ զայս հիւտուած բանի աղիո-
ղորմ հեծեծանաց, և հոտոտեսցիս յայս նուէր
բանի անարիւն զոհի, թագաւոր երկնի. և
օրհնեալ սրբեա զտառ մատենի այսր ողբերգու-
թեան, և զրեալ դրոշմեսցես յարձան յաւի-
տեան ընդ հաճոյականացն սպասաւորութիւնս:
Կացցէ առաջի քո մշտնչենաւոր, և յիշատա-
կեսցի ի լսելիսդ քո հանապազ, բարբառեսցի
շրթամբք ընտրելոց քոց, և խոսեսցի բերանովք
հրեշտակաց քոց. տարածեսցի հանդէպ աթոռոյ
քոյ, և ընծայեսցի ի սրահ սրբութեան քոյ.
Խնկեսցի ի տաճար անուան քոյ, և բուրեսցի ի
սեղան փառաց քոց. պահեսցի ի զանձարանի
քում, և համբարեսցի ի ստացուածս քո : Պատ-
մեսցի ի յականջս ազգաց, և քարոզեսցի ի լուր
ժողովրդոց. նկարեսցի ի դրուես իմաստից, և
տպաւորեսցի ի սեամս զգայութեանց. իբր կեն-
դանեօք զիմս պատմեսցէ խոստովանեալ զանօ-
րէնութիւն. և թէպէտ վախճան ընկալայց իբր
զմահացու, այլ յարակայութեամբ բանի այսր
սոփերի զրեցայց կենդանի : Մնասցէ սա անեղծ
ի կամս քո, Տէր, ինձ պատժապարտիս համ-
բարձեալ միշտ անդուլ դատիչ, անաչառ կըշ-
տամբիչ, անպատկառ յանդիմանիչ, անանխա-
յելի դսրովիչ, անողոքելի պարսաւիչ, անհամ-

բոյր ծանակիչ, անմարդասիրելի մատնիչ, անփրկելի տանջիչ, անկաշառ կառափիչ, անխնամելի յայտնիչ, ապառում հրապարակիչ, աշխարհալուր բողոքիչ։ Փողով մեծութեան ազդման առանց լռութեան և կամ դադարման զիմոցս պարտեացս խոստովանեսցի։

Գ. Սոյն գիր իմովս ձայնիւ իբր զիս ընդ իմ աղաղակեսցէ, տարածեսցէ զծածկեալսն, հոչակեսցէ զզաղտնիսն, կականեսցէ զկատարածն, հնչեսցէ զմոռացեալսն, յայտնեսցէ զաներեւոյթսն, բարբառեսցէ զբարուրսն, քարոզեսցէ զխորոցն, պատմեսցէ զմեղացն, մերկացուցէ զանտեսիցն, ցուցցէ զկերպարանս թաքուցելոցն։ Շօշափեսցին սովաւ որսքն, զտցին զայթագղութիւնքն, յանդիմանեսցին անճառքն, քամեսցին չարեացն մնացուածքն։ Եւթագաւորեսցենկեան քըդ շնորհաց ողորմութեանքո, Քրիստոս, ի զանձրս պահեստի ոսկերացն ցամաքելոց. որով իմամանակս կենդանականս սկզբնաւոր լուսոյ մտի զարնայնոյն նորոգման աւուրն պայծառութեան քոյովդ ցողովյոզի ամեցեալ այսու ֆրկութեամբ անմահականաւ, և անցամաքելի վերամբարձութեամբ շառաւիղս ձգեալ իմանալեացն բարեաց՝ դարձեալ դալարացայց և կրկին ծաղկեցայց ըստ քոյինաշունչ զբոյն յուսադրութեան։ Եւ քեզ միայնոյ ֆրկողի և Հոգւոյդ քում Հօր

իսկակցի, միասնական տէրութեանդ և ան-
ձառ Երբորդութեանդ խորհրդական գովեստիւ
փառք և Երկրպագութիւն յաւիտեանս. ամէն.

ԲԱՆ ԶԹ.

Վերսին յաւերուած կրկին նեծուրեան.

Ա. ԱՍՏՈՒԽ և Տէր, կեանք և արարիչ, ողոր
մած, զթած, լոյս, Երկայնամիտ, անոխակալ,
մարդասէր, ամենագութ, պարզեատու, Փրկիչ,
օրինեալ, գովեալ, բարեբանեալ: Դարան ամրու-
թեան, պատսպարան վստահութեան, առանց
նենգութեան բարի, առանց խաւարի ճառա-
գայթ, քաւիչ մեղաց, ողջացուցիչ վիրաց, ան-
հասանելեաց հնարք, անմատչելեաց հպաւոր,
անյուսութեան ելք, անուն քո խոստովանեալ
Աստուծոյ որդի. և Հօր քո ընդ քեզ հզօրի և
ահաւորի, և Հոգւոյդ ամենակալի և ընդ քեզ
Երկրպագելոյ՝ փառք և պաշտօն գոհաբանու-
թեան յաւիտեանս. ամէն :

ԲԱՆ Դ.

Վերսին յաւերուած կրկին նեծուրեան.

Ա. ԲԱՐԵԲԱՆԵԱԼ Աստուած Երկնաւոր, միայն
արարիչ, Տէր ամենակալ, մեծութիւն ահեղ,
զթութիւն օրինաբանելի, ողորմութիւն խոստո-
վանելի, բարերարութիւն Երկրպագելի, խնա-

մակալութիւն պաշտելի, մարդասիրութիւն տօնելի, պահպանութիւն խնկելի, բարձրեալ անքնին, մերձաւոր կամարար, ապաւէն անկասկածելի, մխիթար սրտից, փարատիչ վըշտաց, ապաքինիչ ցաւոց, սպառումն վհատութեանց, բարձումն պարտեաց, փոփարկիչ կարեաց, կարգաւորիչ կրից, յարմարիչ բանից, սանձարկուեզուի, շրջադրութիւն շնչոյ, կացուցիչ հազարի, ամփոփիչ խորհրդոց, կրթարան կամաց, արձանացուցիչ յուզմանց, հանդարտութիւն մըրկաց, խաղաղութիւն ծփանաց. որ ունիս զթեւոց ամենընթաց իշխանականիս, և խմաստութեամբ նուաճեալ առ քեզ դարձուցանես :

Բ. Գոհարանեալ միշտ երախտաւոր, որ հեզութեամբ անհպարտութեան երկայնամտեալ հանգչիս տենչանօք անճառ հրաշիւք յանձինս սրբոց : Թագաւոր էից հանայնից, ամենայնիւ ծանուցեալ զթած. սկզբնահայր և նախաշաւիդ սիրոյն ընթացից. ճանապարհ կենաց, որ առաջնորդես քաղցրութեամբ դիմելոյս ի լոյսդ վերին: Զեռ նկալու մեծ վստահութեան, որ ոչ թողացուցանես գայթագղելոյս ի վայր կործանել. յուսոյ կերպարան, ճշմարիտ առ հաւատչեիւ աղաչողաց մատանց յայտնի երևեալ. ապաւինութիւն հանգստեան, որ ոչ երբէք մատնես

վտանգի դատապարտութեան : Ազատութիւն շնորհածիր, որ տաս լիապէս առանց փոխատրութեան փրկանաց. առատութիւն աննախանձելի, որ քոյին փառաւորութեամբ զանարգ նիւթ հողոյս ճոխացուցանես : Պայծառութիւն անստուեր, որ ճառագայթիւք ահեղ բարձրութեան պարածածկեալ զթշուառս՝ կրկին բարգաւաճ առնես : Քաւիչ մեղանաց բազմաց, որ զիերքեալս ի փրկութենէ առաջնուին պայծառութեամբ նորոգեալ՝ վերստին վայելչացուցանես : Հնարաւոր դիւրահաս առ ամենայն անբաւ զերամբարձութիւն յաւէտ յառաջեալ, ելք վստահութեան առ խոստացելոցն վայելս . Երանութիւն անձկալի, յոր զկենդանութիւն շնչոյս լրանելն է ախորժելի, զի զքեզ գտից՝ կենդանի: Կամք անփոխաղըելի առ ի քաւութիւն զերւոյս զօրացեալ ամենագուվելի . անսխալելի դեղ կենաց, որ և մեռելոց բնափին եղծելոց առնես զքանչելիս : Ամենաստեղծ աներկբայելի, որ զիուրբ կիզեալն և զիողմով հոսեալն և զժանեօք զազանաց ծախեալն ի քթթել ական նովին հիւթականութեամբ անպակաս յարուցանես : Անհաւասար համարձակութիւն, յորում ասուածօրէն պանծանօք պարծելն է իրաւացի :

Գ. Հայեաց, Տէր, յերկնից զուարթ քաղցրութեամբ յամենակործան վտանգ նեղելոյս, և

արա անդորք հանգստական դիւրաւոր ի բազմատագնապս հեծութենէ: Եւ զյարուցեալ գումարս սատակչացն, եթէ սպառազէնք այսական դնեայ հնարաւորութեան բուռն մարտակցաց պատկանեալ զինուք, եթէ մեղաց տգեղ և քո ատելի կերպարանք, եթէ ցաւոց և ախտից վատնիչ և կորստական նշմարանք, մերժեսցես հանցես հատցես խափանեսցես և հալածեսցես հեռի սահմանաւ ի սպառ տարագրեալ անդարձ որոշմամբ վերստին կորստեանն . և կառուսցես կացուսցես նպատակենաց և ամուր մահարձան զնշան խաչիդ ապաւինելոյս իքեզ փրկութիւն : Եւ յայսմ անպարտ և անպատիր և անվանելի արուեստից ահաւորիդ մեծութեան՝ լուծցին որոգայթքն զաղտնածածուկ սատանայականք, կապտեսցին մեքենայքն, վատնեսցին զայթակդութիւնքն, խայտառակեսցին հաղբիցն զրութիւնք, յայտնեսցին երևոյթք որսոյն, զցցին ներգողին ծուղակք, վերասցին վարմին վերարկուք, տոչորեսցին որոմանցն ըոյսք, նզովեսցին բռնաւորին չարաբանութիւնք, կտրեսցին լար խաբէութեան ի մահ որսողին, պարսեսցին պատրողին բանսարկութիւնք, պակասեսցին զէնք զրպարտողին, անկցին սուսերք մահաբերին, սուզեսցին սաղրողին պատրաստութիւնք, արձակեսցին տոռունք տազնապողին:

Այսպիսացին սուտ կերպարանք կեղծաւորին, սատակեսցին խրոխտականացն խիստ յարձակմունք, ցրուեսցին կցորդութիւնք կերչացն, բաժանեսցին ազինք աւազակացն, քայքայեսցին բոյլք բարբարոսացն, քանդեսցին ամրոցք ավըստամբողացն, արգելցին ամպրոպքյանդգնելոցն, փարատեսցին փորձողին անձրեք, հալեսցի և ցամաքեսցի եղեամն աղանդաւորին։ Խորտակեսցի եղջիւր գոռողին, մանրեսցին ամբառնալիք դրօշիցն կերպարանաց, փշրեսցին ամբարհաւաճութիւնք հպարտացելոցն, նահանջեսցին դիմեցմունք ճակատելոցն, քակտեսցին միաբանութիւնք զօրացն Բելիարայ՝ թէ անմարմինք և եթէ մարմնաւորք, փախիցն ընդ նոյն ճանապարհ ի մի շաւղաց նետոց յեօթն տարակոյս. իգուըն ինձ փորեալինքեանք ընկճեսցին։ Յեղանակեսցին ձմերունք ձանձրացուցչին, հատցի կապն կցորդութեան մշտաշան աւազակին, նողկասցի մտացս կայից համբոյր շողոքորթին, ընդմիջեալ մեկնեսցին նետաձգութիւնք նեղչին, կացցէ ի սասանման նաւ խարդախողին, խլեսցին յարմատոց անտի ատամունք խածանողին։

Դ. Վասն փայտիդ օրհնութեան կենաց՝ յորում պրկեցար Աստուածդ անըմբունելի, յիշատակաւքեւուացդ՝ որով ի զորճի մահուն մածուցար

արարիչդ երկնի և երկրի, արեամբդ տէրու-
նականաւ՝ որով զմիշապն մեծ կարթիւ ածեալ
որսացար, լեղւոյն դառնութեամբ՝ զոր արքեալ
զդեղատութիւն կորուսչին արտաքս հեղեր,
պատմաբանութեամբ ըղձական ճառիւք կրիցն
սարսափելեաց՝ որով զլրբութիւն հակառակո-
ղին ըմբերանեալ ամաչեցուցեր, անուամբդ
անհասականաւ ամենայնիւ անթարգմանելոյդ՝
յորմէ դողան և դատապարտին սոսկացեալ
սաստիկ սարսափմամբ ընութիւնք ամենայն
երևութից և աներևութից. Եղիցին այս ամենայն
պարզեք շնորհաց խոստովանելոյս ի պաշտպա-
նութիւն, ի բժշկութիւն և ի քաւութիւն : Եւ
մահաբեր դառնաթոյն օձին՝ որ ի նմա ազդեաց
տիեզերադաւ չարութիւնն, ի սատակումն Եղի-
ցի նորին. նոյն ինքն ի կորուստ և յանքըշ-
կական հարուած տանջանացն սրվաւ մատ-
եսցի, կապեսցի և ըմբռնեսցի : Եղիցի ողոր-
մութիւն ստեղծողիդ ընդ իս, և շունչ ոգւոյս
իմ ընդ քեզ անբաժանօրէն կապաւ միացեալ
ի մի :

Եւ որ ոք ընթերցցի զայս աղերս ձայնի
մաղթանաց գոչման աղօթից հայցման ծերոյ
և տղայոյ, կուսի և երիտասարդի, և եթէ յա-
ղախնաց ոք պաղատեսցի աստուածսիրաբար,
հաւասարապէս անաշառութեամբ ընկալցին ի

քէն մասն երանութեան պարտուց ազատութեան, հաստեալ վերստին յանարատութիւն նորոգ մաքրութեան, նկարեալ դարձեալ զքոյդ կերպարան անփոփոխելի։ Ահա տիրապէս հնարաւոր, զօրեղ, անպատում, անհաս, անիմանալի, տեսցնս աստանօր ի հառաչանս կողկողանաց այսր հեծութեան, որ ի բոլորից շրթանց ընծայեալ քեզ մատուցանի, վասն Հօր քո երկնաւորի և բարեբարի, և Հոգւոյդ սրբոյ փառակցի և կենդանատուի, Աստուածածնիդ բարեխօսութեամբ և խնդրուածովք՝ ամենայն սրբոց։ Զի դու ստեղծեր զամենայն, և ի քէն եղեն ամենայնք, և դու տիրես ամենայնի. և քեզ փառք յամենեցունց. միդ յիսկութեեկ անժամանակ նրբորդութեանդ, զուգակցապէս փառաւորեալ յանբաւս, և յաւիտենից յաւիտեանս. ամէն :

ԲԱՆ ՂԱ.

Վերսին յաւելուած կրկին հեծուրեան.

Ա. Տէր Տէր զթութեանց և Աստուած ողորմութեանց, անուն մեծութեան, ձայն ահաւորութեան, կոչումն սաստկութեան, լուր անհասութեան, բարբառ դողութեան, հնչումն հիացման, ուսադրութիւն բարեբարութեան ամենողորմ քաղցրութեան, յորմէ երկուցեալսասանին ամե-

Եայն բնութիւնք եղելոց իքո սպառնալեաց ահիդ
պակուցման, սաւառնին սերոբէք, ամփոփին
քերոբէք, պարուրին պարք լուսակերպիցն,
երկնչին հիացմամբ բոլոր պետութիւնք վերնոցն,
Ըոյնք ցնծան դողութեամբ մեծաւ ի մի նաւակա-
տիս բերկրութեան, զարհուրին դևք, ընկրկին
չարութեանցն գունդք, պակասին խաւարասի-
րացն հոգիք, անդնդոց մատնին հրեշտակք օտա-
րին: Կապին նշանաւ խաչին յարձակմունք դի-
մամարտին, փակին ի ստորին բանտի քինաւոր
ամաղեկացիքն, անխզելի հանգուցիւք պաշա-
րին խումբք հակառակորդին, արգելին անզերծ
զընդանաւ մահագինացն կաճառք, պնդին ի
մետաղս ահեղ հրամանիդ այսականացն գու-
մարք, պապանձին կարկեալ ընդդիմաբանիցն
դասակցութիւնք, պարաւանդին հիւծմամբ կո-
րստեան աներևութիցն ժողովք, անըջ շղթա-
յիւք նեղին առաքելութիւնք Դերաքքիստոսին:

Բ. Ահա կարկառեմ մատամբք ձեռինս ըգ-
տեառնազրութիւն նշանիդ ի ժամ գիշերիս,
որ ոչ մթանաս խաւարաւ անզիտութեան, ամե-
նենին տեսականութիւն, քան թէ ի լոյս անմա-
տոյց հանգուցեալ բնակես: Ընկալ զաղաչողս
վտանգաւոր գոհաբան ընդ պահպանութեամբ
թեոց հզօրիդ, փրկեա իցնորից եկամուտ պղտո-
րութեանց, սուըը արա զզզայարան հայելեաց

սրտիս նկատմանց, ամբացն փայտիւղ կենաց
ի տխրական անըջոց, արեամբ քո սրսկեան զշըր-
ջարկութիւնս կայիցս, զիետու Ելումտիցն կա-
թուածով կենարար կողիդ գծագրեան, երդոցն
պահպանարան քառակերպիդ ձևակերպութիւն
եղիցի, հանդէպ տեսութեան աչացս ամբարձ-
ման փրկարանդ քո կրից խորհուրդ առդիցի.
ընդ բարաւոր յարկիս չարչարանաց քոց գործի
հաստիցի, զծառոյդ օրինութեան հաւատք յու-
սոյ իմոյ կախեսցի: Արգել, Տէր, սովաւ զա-
տակիչն հոգւոց, մտցէ անխափան պաշտպանն
լուսոյ, և ընդ սաստիկ ծանրութեան ցաւոցս և
զրեռն պարտեացս թեթեացն, զոր ի լռարանի
մտացս ամփոփման մահճացս անկողնի ուշա-
բերեալ զյուսահատութեանցն դառն պտղոցն՝
խոստովանիմ ամենազիտիդ զանհամար մա-
սունս գործոց չարաչար անօրէնութեանցս :

Գ. Հանգն զվաստակեալս ի բազմածուփս աշ-
խատութենէ, բարձ զտագնապ տարակուսա-
նաց ոգւոյս կործանման, զդառնութիւնն ընդ
վշտացն, զիեծութիւնն ընդ կարեացն, զանձ-
կութիւնն ընդ թշուառութեանցն, զիառաչ-
մունսն ընդ խորտակմանցն, զբեկութիւնսն ընդ
ապշութեանցն, զթմբրութիւնսն ընդշրտմանցն,
զարբեցութիւնն ընդ յիմարութեանցն, զթերա-
մտութիւնն ընդ խելազարութեանցն, զառումն

սիրոյն և զիրային ջերմութիւն աղուական ախտին: Օժանդակ լեր տկարութեան բազմատիսուրս տարտամութեան, բարեգործ աջովկ շնորհի, ձեռամբդ նորոգողի, մատամբդ կենսաբաշխի, փառօքդ մշտափայլի, յարակայութեամբդ անեղծի, երեսօքդ զուարթականի, խսկութեամբ էիդ պաշտելի, բարձրութեամբդ երկրպագելի: Հատո՞ զչարաչար հեծութիւն կորստականս խեղդման, զնոր գիւտ չարին, զին խարդախութիւն բանսարկուին, զօտար ազդեցմունս ի մահ կրթողին, զանյարմարական երեոյթս հանապազորդեան եղեռնագործին, առ աչս հնարադրութիւնն դժնդակ դիւին, զոդրական բոցաշնութիւն ձգող կախարդին: Պահեա՞ ի տեղւոց հանգստեան մեռօրինակ այսր դադարման յաներեւոյթ մտածութեանց, ի մասնաւոր սխալութեանց, ի մեծագոյն գայթակղութեանց, ի փոքրագոյն ոտնառութեանց ի խարեբայ չար ձանձրութեանց: Հեռացն զանհանդէպ մտածութիւնն իզգայութեանց ծառայիս յանցաւորի, զկիրս բասրելիս, զվարս թշնամանելիս, զինտս վրիպելիս, զպատիրս ձաղելիս, զխորհուրդս անզոսնելիս, զաւելաբանութիւնս նշկահելիս: Անսխալհոգւով և անշաղախ մարմնով զապաւինեալս ի քեզհանդերձեա, ի շընչմանէ հողմոց, ի զարկմանէ բըռու

Ըութեանց, ի բախմանէ փոթորկաց, ի յոստմանէ մըրկաց, ի յարձակմանէ զազանաց: Ի կափման աչաց հայեցուած սրտիս մի ստուերասցի, այլ զուարթասցի պայծառասցի վայելչասցի՝ ընդ քեզ փայլեսցի, տէր թիսուս Քրիստոս, լուսաւոր վառմամբ անշիջանելեաւ: Բանիւ քո սրբեան դզ-պատսպարանս բազմականիս ի խորամանկութեանց, ի զբաղմանց, ի քո ատելի յիշատակաց, ի վերնամարտ մտածմանց, ի քրէական մորոսութեանց, ի տիրանենգ անշնորհութեանց, յաստը-ւածընդդէմհերձուածութեանց: Գնդիւք վերնայ-նոցդ վերակացու ինձ լիցիս, պետութեամբք, իշ-խանութեամբք զօրաւորօքն անյաղթականաց մաքուր մատակարարաց սուրբ աստուածութեանդ. առաքեալքն աւետեաց աւետարանաւն, մարգարէքն կտակարանօքն, մաղթանք երջան-կացն ի կատարածի աւուրն ընծայեալ: Որովք նիրհեցից երկիւղիւ ըստ քեզ տրտմութեամբ, և զարթեայց շնորհօք քո կրկին ուրախութեամբ. Եթէ վհատութեամբ ննջեցից, յարեայց դարձեալ հոգեւորական բերկրութեամբ, եթէ ընկողմնեցայց մեղանօք, կանգնեցայց վերստին զատեալ ի խղճէ անաղտ անբծութեամբ:

Դ. Լուր խնդրուածոց ամենահառաչ ձայնիս հեծութեան, միայն բազմագութ, բարեխօսութեամբ սրբոյ Աստուածածնիդ և ամենայն ար-

դարոց և նահատակաց ընտրելոց: Եւ քեզ փառք
յամենեցունց իմովս գոչմամբ վերառաքեցեալ
սրբովք զուարթնոցն անմահականաց դասուց,
ի գովեստ Հօր քոյ Աստուծոյ մերոյ և Հոգւոյդ
սրբոյ բնավից հաստողի և նորոգողի, յաւիտեա-
նըս յաւիտենից. ամէն :

ԲԱՆ ՂԲ.

Ի փայտն նրջանիկ բարերասուրեան ժամանարին խորհրդածու-
րեան. աղացանս եղեալ ընդ կերպարանս բարգմանուրեանն:

Ա. Գոչսւսս զքէն, բարեգութ, միայն մար-
դասէր, արարիչ երկնի և երկրի, Որդի Աստու-
ծոյ կենդանւոյ, այն ինչ զարթուցեալ անձկու-
թեամբ սիրոյ քոյ յիշատակի ի լրութիւն հընչ-
ման փայտիդ հրաւիրման: Որով բախեալ
զձայնարձակութեանցն զազդողարան, սթափե-
ցաք կանգնեցաք, ի վեր յարուցեալ ի մեռօրի-
նակս թմբրմանէ. ուստի իբր կոչմամբ սփոփա-
նաց հանի բերեալ ձգեցաք ի ժամ պաշտաման
օրհնաբանութեան, յանդիման լինել քեզ ուրա-
խութեամբ հանդէպ հաստուցմանս բեմի:

Բ. Ահա փառք քեզ, անսահման և անքավան-
դակելի զօրութիւն, որ այսքանեօք հնարաւո-
րութեամբ ընդ փրկութեան իմում հոգացար.
գոհաբանեալ անեղծ իսկութիւն, որ կերպարա-
նեցեր հրաշիւք աստատին գիանդերձելոցն նմա-

Յութիւն, հանդարտ գործեաւ վայելչականաւ
փայտի անօթոյ առ քունս անյարիր սաստիկս
որոտացեր. որպէս թէ ընդ ծուլութեանս դան-
դաղութիւն զյանդիմանութիւն խրատուդ խառ-
նեցեր, ի հայրենի սիրոյդ հեզութիւն զրւմբու-
թիւն ճայթմանն յարեցեր. յընդոստ զարկուած
երկուց միջնորդաց՝ մարդասիրապէս քաղցր
անձրևեցեր. ոչ մեղմութեամբ մեղմական վան-
գիւ նիրհմամբ ընկղմեցեր. և ոչ անխնամաբար
ահաւորութեամբ զտառապեալ հոգիս զարհու-
թեցուցեր: Ծնրադրական երկրպագութիւն ըս-
տեղծիդ բոլորից, որ այժմէն ցուցեր համայն
յայտնապէս, զօրինակ ահեղ բարբառոյն մեծի
աւուրն յարութեան, կենդանացուցեր ի դադար-
մանէ դժոխական անբանութենէ, ի խնդիր ելեալ
կոչեցեր զպակասամիտս ի գինիդ ուրախու-
թեան. արարեր զսյն լինել հանդերձիչ անա-
րատ հարսինն առ սէր փեսայիդ. երկուցեր
փոքր այս խթանաւ զապարասանին զվիթխա-
րութիւն, լուծ ստուար կրթութեան ստամբա-
կին ուսոյ զայս իր գործեցեր, վարապան վանիչ
չարախօսին կզակաց եղեալ կազմեցեր: Փառա-
ւորեալ յաւէտ անբաւ բարձրութիւն մեծիդ Աս-
տուծոյ, որ փոխարկեցեր զփայտին պարտիս
յազատութիւն շնորհիդ կենաց, իմաստնացուցեր
վերստին դարձեալ զիմարս ցնդեալ' հոգևորա-

կան հանճարովդ, կարկառ կոճմամբ զանքից
կութիւն հարուածոց օձին առանց մոռացման
միշտ թարգմանեցեր, ընդ Երբորդութեանդ
գծագրութիւն զկապն երեքկին իմ վեասակարին
ի կատարածին սովիմբ կրկնեցեր :

Գ. Գովեստ Եերբողից բուրմամբ խնկոց վե-
րառաքեմ քեզ, ամենախնամ, զի ի ստապատիր
կոոցն բազմաստուածութենէ առաւել յաճա-
խագունիւք որսացար զանձն իմ պարտաւոր
ի քո երկրպագութիւն, խրոխտև ահարկու նուի
բեալ փայտիւս զճշմարտութիւնն քարոզեցեր,
մեծացուցեր այսր պատճառաւ պատշաճակա-
նաւ զնոր աւետարանութեանդ պատիւ : Սոյն
ինքն աղաղակ բարձրութեան՝ զոչման՝ սպառա-
զինութեանդ քո, արքայ պետութեանց կայսե-
րաց երկրի տէր Քրիստոս . Եշան խրախութեան
աւարտման հանդիսի մարտի քո, Յիսուս, յորում
իմանալին Փարաւոն կապեալ ըմբռեցաւ, կրո-
փիչ հանապազորդեան զլիսոյ զագաթան հպարե-
տացեալ չարագործին՝ շերտս այս տաշեցեալ :
Սովաւ գումարին ի պատերազմի որդիք Սիոնի
ընդդէմ աշխարհակալին խաւարի . տուն իմն
աստուածաւանդ կրթութեան կարգեալ ի նե-
ռուստ այս դրօշուած իւղեալ՝ առանց հնանալոյ
և կամխափանման Եշարակիչ ժամանակի ապա-
գայիցն հատուցման ի բացուստ անդը ծանուց-

մամբն , ազգակից հանգունանման կենացն փայտի՝ որ ի դրախտիդ Աստուծոյ, կոչարան բարւոք հաւաքման փոյթ ընթացիւք իյարկն օրհնութեան , պատկեր տեսակի տնկոյն գիտութեան ի կարգընտրութեան բարւոյն և չարի, յիշատակ մեծ տեառնազրութեանյերեսս կերպիս Հոգւովդ սրբով զնշան խաչիդ, նախազեկոյց աւետամատոյց փառաց գալստեան ի դշխոյն պահեալսուրք թագաւորիդ, յորդորիչ քաջալերական մաքրապարիցն խրախնանութեան , անախտական սիրարկու անձնահամբոյրն կցորդութեան շքեղաշուք քողընծայ ամենածին կուսին թագուհույ , յարդարիչ ծածուկ պմնութեան՝ որ ի հոգին է վայելչութիւն, նմանութիւն պատզամին Սինայ, որ ի տէրունեացն արտաքս առաքիւր . միշտ օրիորդ պանծալի անշաղախ որդւոց մայր անարատից՝ սովաւ փառազարդէր :

Դ. Գերազոյն քան զերիքովին փողովն եղջերեայ զբոնութիւնն Բելիարայ սովաւ հարթեալ տապալեցեր , քարինս արձակեցեր պարսիւս այս փայտեայ՝ ընդդեմ Պողիաթու, գայիսոն նորոգ կառուցեր վկայ ահարկու կործանմանն սատանայի, զ'ի խոր աճեցեալ արմատս մեղացն մեքենայիւս այսու խլեցեր , զմոռացեալ գործոցս իմ պարտիս՝ այսր երախտեօք ընդ իս կապեցեր : Զոր եթէ այլ իմն ձայն բանիդ Աստուծոյ

անուանեմ նախապատում Եկաւորութեանն, ոչ
սխալեմ քան թէ ճշմարտեմ. ի տկար ամանս այս
նիւթոյ հոգեկրի՝ մեծութիւն գործոցդ Յիսուսի
առաւելապէս պատմեալ հոչակի. բիւրաւոր
օգնականութիւնս վերնապարզես և քոյինա-
տուրս ի յայսմ անպատսպար ապաւինութենէ
Երկրականաց զարմանազբեցեր :

Ե. Խոստովանեալ անունդ անքնին մարդա-
սիրիդ բարեխնամութեան, խնկեալ խորհրդով
սրբամասնութեան անգծազրելի կիրպարան լու-
սոյ, որ կրկնաձիր նշանաւս այսու նետս արձա-
կեցեր հեռաձիզս ձայնատրականս օղաչուս և
յարմարաթոփիչս ունողս յինքեան հոգի կենդանի,
որով անսխալ հանդիպմամբ զնպատակն խա-
ւարային աղեղնաւորին զաղտնութեան յաւետ
կործանմամբ ի յետս ընկնեցեր: Իբր զպատճեց-
ամբարերձ բերդամարտութեան կանգնաւորս
անվայրարկելիս՝ աստուստ անդանօր զկտեալ
դիպուածս այս փայտի զարկման հրեշտակ կա-
մարար թշնամւոյն Երհակ վեր յուղարկեցեր:
Բանիւ հրամանի մեծիդ ակնարկութեան, օծու-
թեամբ շնորհիդ արեամբ քո խառնեալ՝ զայս
եղջիւր խեթկիչ մոլի գոռոզին իբր զխաչիդ
փրկանակ յետանեալ սրեցեր: Ի մեծ ազդմանէ
այսօր աղաղակի գեր քան ի վերնոցն քանդեալ
վերացաւ դրանդն ամրութեան կամաց անվայե-

լուչ և ամէներկչոտ խենեղութեան կարճամտին,
ընդ հրէական սրտին իմաստից և ստուերա-
կան տանն կործանութեան :

Զ. Փառաբանութիւն քեզ վերընծայեմ, ան-
մահ թագաւոր, զոր արարեր և հաստատեցեր
աջովդ քո հզօր, աղաչեմ զքեզ, կրկին ներգոր-
ծեա: Անցուցեր սովաւհերքեալ առ ի մէնջ դժըն-
դակ խորամանկութեան բանսարկուին . զտա-
ծանական տապ մեղաց, զիողմն զառնութեան
շնչման խաբողին, զտարը արկածից մահու
երկիւղի, զառ ի յօղից ցնդմանէ վնասակար
բերմունս տխրեցուցիչս, զայսախառն հեծեծու-
թիւնս թալկացուցիչս: Ցրուեա վերստին քոյի-
նազէն հեծանաւս՝ օծանդակեալ թևօք նշանիդ՝
զամպս հրածինս, զորոտմունս կարկտաբերս,
զցաւագին ցոլմունս հրախաւար կեղծաւորու-
թեան փչման բազմոտանի վիշապին, զսուր սա-
տակման, զճակատամարտ դիմեցման, զյարու-
ցելոցն ի վերայ վայրենական խորհրդոց զդիւացն
կաքաւս: Ցորմէ զարհուրին յայսմ իրէ փոքուէ՝
տեղի տուեալ մեծաւ դողութեամբ, կիրթ իմն
ծանօթութեամբ յայտնի զիտացեալ, թէ յայս
ազգ ձայնի յառնէ Տէր ի դատաստան: Եւ խրա-
խուսին յոզի արութեամբ զրահեալ պնդապէս
սուսերաւ հոգւոյն աստուածարեալ մարտիկը
ամենայն ի ձև կանոնի այսր յիշատակի, որզամե-

նափորձհրոյնընտրութենէ գոչմամբանկերպա-
գրելեաւ համօրէն ազանց քարոզէ, իյօրինաւոր
ասպարէզ երջանկաբար նահատակութեան:

Ե. Հարաւ ահա փող աւագափող, համբար-
ձաւ սովաւ Աստուածօրինութեամբ, պատմեցաւ
սովիմբ ամենայն երկրի, հնչեաց ի լսելիս բա-
ժանման հեթանոսաց, ձայն պահապանաց մեծին
զօրացաւ, ըստ բանին նսայեայ, և ի նոյն բար-
բառ առ հասարակ ցնծասցուք: Ցնդեցան ջրոյն
առակաւ ի ձեռն սորին թշնամիք խաչին, ան-
պատուեցաւ ճաշակն պտղոյ առաջին փայտին,
տօնեցաւ նիւթս այս խորհրդական կենաց ան-
ւանեալ, անարգեցաւ երկաթ առ ի պէտս պա-
տերազմի, իբր զսրբութիւն Տեառն ի սանձս
երիվարին մեծին նշանի այս փայտ կենաձայն
յարմարագրեցաւ, ամփոփեցաւ օծեալս ցայով
հովուին երկնայնոյ սուր իշխանութեան մարդ-
կային ձեռին: Ոչ գծեաց ի քար տաճարին մուրճ
ինչ գործողի. իսկ յաստուածակերտս խորան
փայտս այս նուիրեալ ընդ խաչին թևոց սլա-
ցեալ զօրէ: Աչ իզլուխս ամսոցն և կամ յեօթնիցս՝
եօթներորդս յոբելինոցն՝ յանկեան. ուրեք խա-
փանմամբ փողէ, այլ ընդ ծագս տիեզերաց և
ընդ ծիրս եզերաց՝ ի ծոցս ջուրց բազմութեան
ծովուց և կղզեաց նոցա յաճախս սաստկութեամբ
անարգել ճայթմամբ իմն աստուածայնով հնչե-

ցեալ աւետարանէ : Կոտորեցան սուսերք սա-
տակողին այս փայտի ցուցմամբ . յանօգտա-
կարէ անտի մեզ փոխաձևեալ ի խոփս և ի
մանգաղս :

Ը. Ոչ արձագանք արձանաց ի խորոց ինչ գան-
չութենէ խիստս առաքեցեալ, և ոչ դժնղակա-
պէս ըստ իմաստակի ումեմն օտարի զօղ վիրա-
ւորեալ, ոչ անախորժ սրութեամբ ընդ ունկն
մտեալ և ոչ զաման ուղղոյն անկամակութեամբ
չաց թնդեցուցեալ, ոչ ոսկերցն փուշ խրտուցման
յանձն բուսուցեալ և ոչ մտացն այլայլ ապշու-
թիւն առաջի արկեալ, ոչ զանգակ նիւթոյ
պղնձոյ դանդաշեցուցեալ և ոչ քար ընդ վիրգս
սալի առանց քաղցրութեան առ նոյն զարկու-
ցեալ : Պարփակարան անխորտակելի նորոյս
Սիովնի, մի սա ի սպասուցն կազմուածոց արար-
չաւանդիցն զիսաւորաց, զոր եկեղեցականքս
քրիստոնէից ընդ դևտականացն զգուշաւորա-
պէս բարձեալ յանձանձեն . օրինակ ձայնի
հրեշտակին, զոր առակողին բան՝ հաւուն կոչ-
մամբ այսու տեսակաւ զայն տպաւորեաց . նոր
զործի շնորհի նուագարանաց աւետարանին՝
զարթուցիչ հոգւոյն առ մեզ, քան առ օրինա-
բանութիւն սաղմոսարանին ի վերայ Եղիսէին :
Ակզբանապար նախընթացութեան աղէ յարմար
ջութակաց բարետաւիդ ողբերգարկութեանց՝

բարացուցական բամբռան բառացի բարառնութեանց . սրինգ նորոգ այլ իմն տեսակաւ առեալ մեզ ընդ հնոյն փոխանորդութեամբ, ոչ հեթանոսօրէն ուրուաձայն հնչման և կամ հրէաբար խակախորհութեան, զոր մարզարէն Տերամբ ազդեցոյց՝ ի բաց արա յինէն, այլ զսա սիրեաց և կրկին պատուեաց մաքրական տածմամբ ահարկուղիւաց և ամենայն չար պատահարաց :

թ. Եւ արդ ընկալայ օրհնաբանութեանը յարգեալ գովեստիւ զայս տուր սրբութեան՝ ինձ պահպանութիւն և քո փառատրութիւն . քո պաշտօն և իմ գոհութիւն, անաղանդ արուեստ բարձրութեան արարչական փառաւորութեանդ : Մտցէ ձայնդ այդ աստուածարեալ ընդ պատւաստ յօդիցս շաղկապութեան, հանել ի հոգւոյս զպատիրս դիւաց և զմուտս անիծից և մեղաց ապականութեան : Արասցես լինել զայս իր նշանակիչ ջնար ջահաւորական, անջրելի նամակ, ջատագով անխափանական տէրունական տնօրինականացդ : Ահա պարզեեա սովաւ, բարեգութ, աղաչեմ, հզօր, կրկին մեզ շնորհեա պահպանութիւն ի դիմամարտից յաներեւոյթ և յերեւելի : Ընձեռեա մեզ, ձեռն ամենալի, որ բանաս և մատուցանես պատրաստաբար բաշխմամբ ի մասունս բազմապիսիս, օդոց քաղցրութիւն, անձրեւաց շահեկանութիւն : Պակասեսցին

քոյով հրամանաւ այսու բարբառով հողմ տապախառն, շնչումն ցաւաբեր, յարձակմուք հինգ չարխարդախութեան. սովաւ խափանեսցին ամենայն դիմամարտութիւնք զինուորութեանց դժնեայ մատնչին, հալեսցին հատցին և մեռցին յերջանիկ ձայնէ օծեալս այս փայտէ որդն և ուտիչ, և ամենայն նմանք սոցին, որ ի մերոց մեղաց զօրացեալ ընդ մեզ պատերազմին : Արմատացն մեզ սովաւ տունի երանութեան զյուսոյդ ի քեզ մեծ պաշտպանութիւն, ստեղծիչ բոլորից, Տէր արարածոց, զայս ծառ Սաբեկայ, որ ունի կախեալ ի դիտակ սատոցն զաւանդ սուրբ նորոգ այժմու փրկութեանս ծաղկեալք, Քրիստոս, ի պտուղ կենաց անմահականաց : Փախիցն յանհուն հեռաստան խորին խաւարի՝ այսր փայտի փառաւորելոյ բարեզեկոյց ձայնաձարկութեամբ' նէսարք ներհակք ստապատիրն ստորեականաց բազմաձեռնեան խարդաւանողաց : Մերժեսցին սովաւ ի յանդոց պտղատոհմական արօրագութեանց մերոց սահմանաց և իքո մշակեալ կենդանի երկրէ՝ վերք վատնիչք և հոյլք մորմոքեցուցիչք . կտրեսցին սովաւ յաւելուածք կրկնատզեղ և անվայելուչ պատահմանց՝ ի հնարից չարին ի մեզ յայտնելոց. խկապէս վանեսցի սովաւ, որք յերկաքանչիւրոց բնութեանց մերոց վերերեսին ինքնաստեղծու-

թիւնք մերձաւոր դաւաճանողաց, յումենն օտարին վրիպակ մտածմունս, և յայլումն գարշ գոյութիւնք անմաքուր զեռնոցն ապականողաց։ Փրկեա, տէր Յիսուս, աղաչեմ զքեզ, փրկեա, բարերար. կարկառեա առ իս զաջդ ամենագով, և օգնեալ ինձ սովաւ զերծն զիս յամենեցունց ընդդիմացողաց։

Ճ. Խառնեսցի միասցի հրաման քո ի սոյն՝ առ ի փոխարկել զադամանդեայ սիրտս յիմարեալ՝ ի քոյին բանիդ արդիւնատրութիւն. հարցես միւսցես զայս նեցուկ հրաշից քումդ սքանչելեաց ի սիրտս ծորեալս և յոգիս լքեալս, և հաստատեսցես կազմեալ պնդապէս ի կայումն ուղիդ անսասանելի. իսկ զանընդուստն կակդացուսցես զարթնուլ և զգաստ լինել յոգի հեզութեան աստուածաւանդ քո պատուիրանիդ, որպէս զՊօղոսն և զՄատթէոսն։ Յիշեցն, մարդասէր, պատուեալս այս փայտիւ զերախտիս խաչիդ, որով զանձառսն ներգործեցեր. բարձ յիշէն, կեցուցիչ, զվտանգ պարտեացս պանձալի լծակօք ամբառնալեաց նոր տապանկիդ։ Բացցին կամօք քո, հզօք, ի յայս ձայն կենաց՝ լսելիք սրտից յամառեցելոց. լուիցեն յայս մեծի բարութեան ի քումդ ակնարկութիւն՝ ականջք խլից։ պարզեսցին ի ձեռն սորին լեզուք համբացելոց լուսաւորեսցին ի սոյն տեսարանք աչաց, հայել

մաքրապէս ի քեզ պշուցեալ անայլայլաբար .
զղացին դարձցին կազդուրեալ կամք յափրա-
ցելոց . ընձեռեալ տացես , Տէր , տազնապելոյս
անձրև արտասուաց : Եղիցի քեւ սա մեզ լուր
ցնծութեան , ձայն ուրախութեան , բարբառ
բերկրութեան , նուազ հանգստեան , նիւթ երա-
նութեան , պատճառ փրկութեան , առիթ քա-
ւութեան , մերժումն վշտաց . խզումն խեղդմանց ,
ընդարձակութիւն նեղութեանց , համառօտումն
խեթմանց , հալածումն հեծութեանց , թեթեռու-
թիւն թառաչմանց , յապահովութիւն կարեաց ,
կարգադրութիւն կրից , սփոփութիւն վհատ-
մանց , բժշկութիւն ցաւոց , տևականութիւն
հեղգութեանց , ուշադրութիւն անտեսիցն :

Ճ. Իյայս կամուրջ ցանկալի անխոտոր և
անխոտորնակ , և ի վերնաշաւիդ բարձրաբերձ
սրբահետ սանդռւղ երկնաչու , առ հայր քո օրհ-
նաբան ահաւորանուն ձգեալ մատուսցես , բարե-
րար , Հոգւոյդ առաջնորդութեամբ միանալ
ի քեզ անընդմիջելի , որով և սրբոյ միոյ միայնոյ
և միասնական ի կենդանեաց և յանշնչականաց
հաստելոց վայելչական գոհութեամբ փառք և
իշխանութիւն յաւիտեանս յաւիտենից . ամէն :

ԲԱՆ ՂԳ.

Աղօրքաւզմանօրեն վասն սրբաշխ իւղոյն Միտոնն

Ա. Սուրբ ահաւոր անուն բարձրեալ անպատում, անձկութեան փափաք յարախորժելի, ի սրբերգենիցն փառատրողաց միշտ սրբաբանեալ բնակեալդ ի սրբում, լի և ամենազեղուն բարութեամբ առատաձեռն աննուազելի, լոյս բարի և ծագումն գովելի, երկրպագեալ փառաւորութիւն, ահեղ և անզննելի, ամէն և յամենայնում : Այսու բանիւ դաշամբք յուսոյ ուխտ ընդ քեզ միութեան՝ հզօր, այո՛, ամէն, ալէլուիայ . գովեալ թագաւոր հանուրց . Աստուած բոլորից, ստեղծիչ գոյից և Տէր կամարար, միայն առիթ պատճառաւորաց, Փրկիչ և օծեալ մշտապաշտելի :

Բ. Ուստի մեկնապէս թարգմանեալ ի մեզ զայս զանձ անվաճառ և հարստութիւն անփոխաղբելի, Յիսուս Քրիստոս արքայ Երկնաւոր, որում գողութեամբ մեծաւ սպասեն անմահականացն ահեղից լուսաբերան բոցաշնչութիւնք, կրկնեալ քեզ յօժարութեամբ ի հաճութենէ անխոտոր մտաց, ծունը գոհութեան ստեղծող էութեանց, որ են իտեսման և ի ծածկութեան: Որ եսդ և էիր միայն բովանդակ ամեննին անպակասելի, առեր զմերս իսկապէս համայն, զի

ի լրութենէ քումմէ լցուսցես. օրհնեալ և բարեբանեալ, ծանուցեալ յաւէտ միշտ անքննութեամբ ողորմութեամբ մեզ ի փրկութիւն, ի փառս և ի գովեստ անճառ բարձրութեան ահաւորիդ բարեբարութեան : Ակզբանաձիք օժմանս շնորհի մեծախորհուրդ հրաշազարդութեան . քանզի լոյս քո մեզ ծանուցեալ ճառազայթ անհաս, ծագումն անսահման, արեգակն անաչառափիո, աստղ սահմանիչ երկակշիռ տարրութեանց, ճրագ ոտից և լոյս հետևմանց, որով ի ցոյցս խմաստից եկեալ տեսութեամբ բանիս այս յարմարութեան, տօնեմք պարերգութեամբ հրեշտակօրէն յստակամտաբար փրկչավայելուչ կնդրկաւ խնկեալ զպարգևաբաշխ առատատրութիւն ամենիմաստիդ յիւղ զուարթ անբիծ դաւանման : Քանզի իսկզբան անդ կապտեցելոյ ողորմելի տխրականութեամբ ի փշմանէ բարձրագոյն շնորհին՝ հայրն իմ սկզբնաստեղծ' և հնացեալ յաւէտ մեղացն զերմամբ ի մահ գրաւեցաւ, կապեալ ընդ եղծման ապականութեան անզերծ հանգուցիւ, ի ծառոյն պատճառաւորեալ յանկումն անյարիք ամենակործան գըլրման, հերքեալ ի լրւսոյ' այսր խաւարին վայրի մատնեցաւ. իսկ դու, զթած Տէր ողորմութեան, քանզի յաւէտ քան զնոյն ծանեար զոր ստեղծեր, և զի չէիցն ակնկալութեամբ չե-

կաց յոր ինչ էրն, որով անկարողանայր իսկապէս տեսանել ի լրյան վերին անմատոյց զերակայութեան անսահմանելոյդ, ոչ մշտափայլ յարակայ վառմամբ անաղօտելի տարածանեցեր, այլ զիշերայնոյն ոտնալպիրծ մթին արհաւրաց ձեռնկալութիւն ձիթոյ՝ շարամանութեամբ նիւթոյ պատրուզի ընդ նոյն զանգելոյ՝ յօրինակ քո անախտ միութեամբ ընդ մեզ խառնելոյ՝ մարդասիրապէս հիւսեալ կազմեցեր. զի որ ի ստուերս մահու տարագրեալ գտաք՝ կանխակորուստ տնկովն պարտեաց, ի պատճառ իրին ազգակցաւ պտղոյն ջահաւորեցեալ հաւատոյն վառմամբ՝ ի նոյնն դարձուք իննկաւորութիւն. որպէս և փայտիւն մահու՝ մածմամբ քո ի նա՛ ածեալ մածուցեր զմեզ, առակաւ մեծի խորհրդոյն միաւորեալ ի փայտն կենաց :

Գ. Եւ արդ որպէս ոչ է օր լրմամբ առանց զիշերոյ, և ոչ տնօրէնութիւն յարկի առանց ձիթոյ պիտոյից խնդրոյ. քանզի իբր օրինակն հասարակային ոչ նուիրաւոր՝ զմարմնաւոր աչաց տեսութիւն լուսաւոր առնէ, նոյնպէս և մաքրեալն քոյինաշունչ շնորհին ընտրութեամբ անիմանալեաւ զաներեւոյթ հոգիս միութեամբ ի մեզ անտեսիդ հրաշափառապէս պայծառացուցանէ : Զի որպէս յիշումն լուսարանի սուրբ աւազանին լուսացմամբ մարմնոյն զանձինն հա-

ւատամք առնուլ սրբութիւն, սոյնպէս ի յօծումն
իւղոյն պարարեալ յուսով՝ զիոգւոյն զօրութիւն
սովիմք և ի սոյն համարիմք ունել ամենայնիւ
աներկմտելի : Եւ որպէս հրամանդ տէրունական
օրհնաբանելի զքաւութիւն մեղաց ախտացելոցն
նախավճռէիր, իսկ ոչ հաւատ ունողացն առ
այն բժշկութիւն հրաշալի յանդիմանակաց ան-
դուստ առ նմին մարմոյն տեսակի հաւատարիմ
վկայ անդարձիցն հաստատէիր, սոյնպէս իւղս
այս փրկութեան լրւով կատարեալ՝ հեղեալ ի
մեզ օծանէ զարտաքին խորանս . իսկ զներքին
մարդս աներևակ ծածկապէս մտեալ՝ նոր կեն-
դանածնէ :

Դ. Պատկեր պանծալի այս զանգուած նիւթոյ
արարչիդ երկնի . քանզի որք զիւղոյն կրեցին
օգտութիւն՝ որ յողորմութենէն շահընծայու-
թիւն, և դու ի գովեստ քեզ զայս բան սահմա-
նեալ, թէ ողորմած եմ ես տէր . քանզի որպէս
սիրոյն անուան կցորդիս Աստուած, նոյնպէս ի
մասնէ և այսու զիջեալ գծագրիս՝ ըստ տնտե-
սութեանն որ առ մեզ : Վեհագոյն մեծութեան
խորհրդոյ յարմարաւոր դիմակերպութիւն այս
ճարպ պարարտութեան երկրի թանձրութեան
հողանիւթ զոյականութեան . զի որպէս սոյն
մասն ի կենդանւոյն ոչ ի կերակուր հրամայիւր
անդ ըստ օրինին, այլ արարչութեանդ բոլորո-

վին պտուղ որոշիւք, նոյն Յմանութեամբ ևս և
աստանօր իբր զգօրութիւն՝ Տեառն մատչելի
յայս աւանդ հաճութեան Էկո Աստուծոյ վայել-
չապէս տուեալ նուիրի, հոգւոյս հարազատ
զուգաճանապարհ, արարողիդ պահեալ և ուխ-
տեալ. քանզի ոչ շունչ արեան և ոչ ձենձեր
ինչ զուարթութեան օրինակ հոգւոյս իմոյ և
կարոյս ընդ անդամաթիւս մսոյն ծախի, այլ
արքայութեանդ վերնում վիճակի տէրունական
բազմականին ձօնեցեալ ճաշակ՝ այս Ծիւթ ջա-
հաւորական մշտաբորբոք անազօտելի :

Ե. Ոչ էր մատչելի ի նախագահութիւն արու
անդրանիկ դատիչ քննողաց, եթէ ոչ օժմամբ
ինչ նշանակէր. ոչ քահանայութիւն ի յանկոխե-
լին տեղի ձեռնարկէր, եթէ ոչ այսու կատարեալ
լինէր : Ցակոք զքարն պատկեր Վիմին, ի խոր-
հուրդ երկար՝ խորանին ընտրութեան, օժմամբն
տպաւորեալ կերպացոյց . առ որ զիջումն անձառ
բարձրելոյդ տեսութեամբ սանդղոցն յարմա-
րութեան, և զիս ի վեր տանելոյն անդուղեկցու-
թեամբն, զարձանն իւղեալ կառոյց նպատակ
ի ցոյցս ապառնեացն յիշատակի : Ահարօնեան
քահանայութեանն պայծառութիւն հրամանաւ
մեծիդ Աստուծոյ օժմամբն ճոխանայր . որով ի
զիսոյ անտի ի մօրուսն զեղեալ զերափառ իւղոյն
զարմանազան կենդանագրութիւն՝ ըստ սաղմո-

սողին, զփառաց նախնւոյն առակեր զանդրադարձութիւն։ Թագաւորութիւն ոչ էր պանծալի անդանօր պատկերաւն ստեղծագործիդ, եթէ ոչ եղջերք իւղոյն օրհնութեան ձեռնադրեալ՝ պսակաւ պճնութեան թագին յանուն քո, Քրիստոս, զլուխ ամբառնայր։ Եւ զիարդ զնախնին վեհից մոռացայ, զծառայն մեծիդ և զկերպարանն անպարազրելոյդ։ Ոչ ահա Ս'ելքիսեղեկ յօրինակ ճշմարտիդ ահաւորութեան ի ձիթաստանեաց լերինն, ուր յետոյ ոտք մարմնացելոյդ Աստուծոյ զետեղեալ կացին, ի վերնոց անտի հրեշտակաց ի պտղոց տեղւոյն իւղեցաւ։ ուստի շիրմի սկզբնահօրն պաշտպան եպիսկոպոսական արքայապատիւնոխութեամբ ի քէն հանդերձեալ նատաւ, մինչև յայտնեցար երևեալ լրմամբ համայն իսկութիւն աղամային կենագործութեանդ։

Զ. Եւ արդ, քանզի քո են շնորհք և քեզ վայելեն գոհաբանութիւնք, օրհնաբանեալ Որդի Աստուծոյ, դու ինքն յարմարեա բարենշմար տպաւորութեամբ զաղաչանս իւղաւորականս խընկապատարս զմռոսալիրս պատճառ քեզ փառաց, և ինձ մեղապարտիս առիթ բժշկութեան. մատոն, տէր Յիսուս, վիրացս աներեսութից զայս ձէթ լուսանիթ, և արկ ի սոյն խարանս խոցոյ մահացուի զկատուած օրհնութեան իւղոյդ փրկու-

թեան անապակ զինեաւ սիրոյդ, միութեամբ
արարչականաւ պատսպարեալպատանօք խնա-
մոց. զի յիշատակարանս թարգմանօրէնս բանիս
մաղթանաց' վայելչական իմն յարմարութեամբ
ի թևս հոգւոյդ զկարգ իւր զտցէ: Ի վերայ
Դաւթի հոգի քո, բարձրեալ, յայնմօրէ խաղաց,
յորմէ օծութեամբն նուիրեցաւ. Սաւուղ յայր
յայլ և ի մարգարէս ոմանս անդուստ իսկ զրե-
ցաւ, յորժամ օծումն ժամանեցաւ զազաթան
նորին. արքայութիւն ասորեստանեայց օծմամբն
զրաւեալ մատուցաւ ի կցորդութիւն տանն Իս-
րայէլի. կայսերս ոմանս նշանաւորս վեհս և երե-
ւելիս ի խժականաց բարբարոս ազգաց իւղս այս
կենսացնցուղ ցողով անձրեւեալ՝ իբր կարթիւռոր-
սացաւ ի յընտանութիւն հպատակութեան մեծիդ
Աստուծոյ. բանն որ առ Կիւրոսերկնաւորին պա-
տուասիրութեան՝ զօծեալն ձայն նմին մեծ վար-
կաւ. ձայն սաղմոսողին զեր քան զմարգարէու-
թիւն զօծեալն անուն նախայարմարեաց, կանո-
նափակ ընդմիջարկութեամբ պատուէր աւան-
դեալ, մի մերձենայք և մի մեղանչէք. առ
Հեղիաս առաքելութիւն աստուածային հրամա-
տրութեանն, նշանակ իմն հանելոյ ի պաշտա-
մանէ անտի Բահաղու, զօծելութիւնն ի Քորեք
ազդեաց Ցէուայ և Ազայէլի: Իւղ թափեալ անուն
փեսայիդ ի հոգելից բանից իմաստնոյն վերա-

վկայեալ կանխաւ իսկ գրեցաւ. որպէս զի հոգին,
Աստուծոյ յաւէտ պատկեր և նշանակիչ, զի
փոքուս զմեծդ կերպազրութիւն քև նկարա-
գրեալ ընդ քեզ միասցուք առմամբ քո շնորհիու-
է. Եւ զի ևս երկարս պատուածօրէնս բացա-
կանագոյնս գծագրականս և առակաւորս շարա-
գրեցից առաջի վերնոյդ և ահաւորիդ մաղթո-
ղական բանաստեղծութիւնս. Տէրդ և կենդանա-
րարդ՝ արարիչդ երկնի և երկրի ի յօծմանէ
անտի սկսար քարոզել զաւետարանն արքայու-
թեան, վկայեալ անդուստ ի Յովիաննէ՛ օծեալ և
ծառն Աստուծոյ բաղձող մեղաց աշխարհի : Զի
թէպէտ ընդ օծմանն օրհնութեան հոգին էր քեզ
իսկաքար լրմամբ և աստուածութեան խառնու-
թիւն բովանդակապէս, այլ անունն պաշտի
խորհրդեամբ շնորհին հրաշափառապէս ազդե-
լոյ ի սուրբսն, զի զատրկութիւն աղամեան մարմ-
նոյն մեծանալ յաւէտ այսու յորջորջմամբ պատ-
րաստ արասցես : Բացեալ զառածս մարգարէու-
թեանն եսայեայ՝ դու ինքն աստուածութիւնդ
մարդացեալ ընթերցար, հաւատարիմ առնել
զբան ծառայից քոց, Տէր. և իբրև ծանուցեալ
եղեր օծութեամբն ի կարգ անդ բանին, թէ Հոգի
Տեառն ի վերայ իմ՝ որով և օծ իսկ զիս, ապա
փակեցեր ի հանգիտափառն օծելութենէ զորքա-
նութիւն երկաքանչիւրոցն յայտ արարեալ

խտրոցաւ սահմանի՝ ընդարձակ հեռաւորութեամբ մեծաւ կնքեցեր, զմերս կաթուածով ինչ շնորհազարդեալ, և զքոյդ իսկութեամբ ընդ Հօր և ընդ Հոգւոյդ հաւասարութեամբ թարգմանեալ: Ի նախածանօթ մերակերպութեանն պանձալի իմն գովեստիւ՝ օծեալն կոչմամբ ի հրեշտակացդ փառատրողաց արարածոց երկրի ծանուցար: Չոր մարգարէն կանխաւ գուշակեաց զի թորդանան, և յընտրեալն լեառն թաքօրական հայրենի ձայնիդ եկառորութիւն, թէ որ պատմէ ի մէջ մարդկան զօծեալ իւր, զոր սաղմոսին ձայն կանխաւ պատմէ՛ հզօրիդ փառաց զայս պատիւառ իզառեալդ ձեռնադրելոյ, օծզքեզ Աստուած՝ Աստուած քո իւղով ուրախութեան :

Ը. Հոգի երեսաց մերոց տէր Քրիստոս. որ է օծեալ անունդ իսկոյն, որով զփչումն կենդանութեան ի դէմս մեր լոյս բարերարութեամբդ քո ազդեցեր. իմաստութեամբ ումեմն երջանկի՛ մարդասիրութիւն խոստովանելի, ասելով առ ոմն, թէ եղ վկայութիւն առաջի Տեառն օծելոյն. զնոր աւետեացս վկայելով, թէ կօշիկս անզամ ոչ առի յամենայն մսեղեաց : Երգոցն երգ իւղեփեցական զինի զաստուծով ծանուցեալ զխորհուրդն ի գովեստ հարսին սուրբ եկեղեցւոյս՝ զմուռս առաքինութեան հանդերձ ամենայն առաջին իւղովն. և ևս զմուռսև կնդրուկ մաք-

բութեան վարուց ամենայն փոշեաց անուշից
իւղովքն զանգեալ՝ անդստին և այսը յառաջա-
բերեաց : Դանիէլ զկենսատու մահու քո, Քրիս-
տոս թագաւոր Երկնի, ի վեր քան զօրինակ
կոչումն ձայնի զայս անուանազրեալ վկայեաց
յայտնի, թէ զկնի վաթուն և ինն եօթներոր-
դացն սպանցի օծեալն, և օծեալ առաջնորդ
զքեզ յորջորջեաց : Ճրագակիր աշտանակն Զա-
քարիայ Աղդովայ՝ որ ի Բարեքեայ իւղոյն բա-
րեբաշխ բացատրութեամբ ի մասունս եօթանց
առաջադրութեանց զնոհիցն վառելոց՝ ի ջահէ ան-
տի զօրութեամբ անեկամտաբար վիճակաւորեալ
զ’ի քոյդլրութենէ իմեզ փրկութիւն և օծելութիւն
զերաբնապէս նախազեկուցեր : Զոր ըստ օրինին
անդուստ գուշակմամբ ի խորանին որ ի տաճա-
րին՝ ամենընդել իմն կրթութեամբ սովորաբար
մատուցեալ լինէր, պանք բաղարջընծայք և
նաշինք իւղովք խառնեցեալք, և զուարակք
եզանց իւղարկեալք, և տիրական անուամբ
ձայնեցեալք, և հաւուց ոմանց թաթաւմամբ յազ-
գակից ճարպին ի յարիւն, այսր խորհրդոյ առ-
ձեռն տեսակք և նշանակիչք յարմարականք
քեզ, միածին ծնունդ օրինաբանեալ մեծիդ
Աստուծոյ . միայն դու օծեալ նորոգ և զարմա-
նալի՝ ինքնութեամբ համայն էութեամբ իսկա-
պէս լրմամբ ամենայնիւ անպակասելի :

Թ. Եւ զի ես իցէ բազմապատիկս նշանակել
առ այս մեծ խորհուրդ անհասանելի, և ոչ
ճաշակել զքեզ, քաղցրութիւն. իմանալ քե
զայս' թէ զինչ իցէ իւղն, եթէ ոչ զտիրութիւնն
ի փայտն պարտեաց սովիմբ բժշկեալ, ըստ
սաղմոսողին, զուարթ գործեսցես, և զինչ պա-
րարտութիւնն, եթէ ոչ զկերակուրն մահու սո-
վաւ մոռասցուք լցեալ իսմանէ. և զինչ օծու-
թիւնն, եթէ ոչ զմոխրոյն թշուառ տեսութիւնն ի
ձեռն սորին փոխարկեացուք ի պայծառութիւն,
յաւէժուրախութեան, անուամբ քո ֆրկեալյոզի
զօրութեան՝ հօր անուանեսցուք. և զինչ արդեօք
մարգարէին հոգեւոր ըղձականութիւն ամենա-
տենչ բաղձանացն իցէ իմանալ, որոյ ծերութիւնն
առակի ի ձեթ պարարտութեան, և կամ օծա-
նելն իւղով զզիխոյն վերամբարձութիւն, եթէ
ոչ զինին խարդախութիւն սպոյն սաստիութեան
ի մահ կործանմանն կենագործեալ դեղովս այս
կենաց' պատսպարեալ օժանդակեսցես. և զինչ
ճրազին լրւաւորելոյ շնորհակալութիւն, եթէ
ոչ ի մէջ իմն անյուսութեան մեղացն միզի և
կռապաշտութեանն խաւարի կերպակցապէսմի-
ութեամբ ի յիս նմմանուէլ. և կամ զինչ մար-
գարէն աստուածաբանեալ ի սփոփանս զուար-
թարախ օրհնութեան՝ նշանակ յայտնի վայելչա-
պէս ոմանց աւետէ, օծցին իւղով ի մըրոյ պար-

զելոյ. և կամ իմաստունն ի դիմաց հարսինն
ասէօրիորդացն, հաստատեցէք զիս իւղով և զե-
ղեցկազարդ խնծորով յարկեալ ծածկեցէք, և ի
պարտէզ իւղենեաց տածեալ գրգեցէք, եթէ ոչ
այսր ահա ընտրական նիւթիւ հոգւովդ քո լցեալ՝
ի սոյն լոյս տեսցուք զանիմանալիդ ի մեզ բար-
ցրութիւն գովեալ: Եւ արդ քեզ, միայն խնա-
մակալ, պատճառ բարի բնաւից եղելոց, ձեռն
համբառնամ տարածմամբ բազկացս, երիկա-
մանցս գործակցութեամբ, սրտիս հեծութեամբ,
լեզուիս և շրթանցս ձայնարկութեամբ. լուր
ողորմութեամբ, Տէք, պաղատանացս խնդրուա-
ծոց առ քեզ կարդալոյս, շնորհաւորեալ այսու
պարզեօք՝ զոհաբանութիւն քեզ վերընծայեմ,
հզօր ահաւոր բարձրեալ անքնին, անփակ փա-
փաքմամբ միշտ համբուրեցեալ, սոնը սոնը
և միայն միշտ սուրբ, օրհնեալ հանապազյաւէժ
անդաղար երգաձայնութեամբ: Ընձեռեալ առա-
ւել բարերարութիւն ի սպառ վրիպելոյս. տոնը
յոյս քաղցրութեան՝ ոչ մասին միոյ մատուցման
լուսոյ արժանաւոր ինչ հանդիպելոյս, լայնելքե,
բարի, զերբութիւն ծածուկ խորհրդոյս, գրգու-
թիւն խառնեալ ընդ աղերս՝ ասել ընդ Դաւթի,
ընկալաք Աստուած զողորմութիւն քո, և զծա-
րուկս գաղտնեացդ անտեսից՝ իմաստութեամբ
քով յայտնի արարեր:

Ժ. Եւարդ մեծութիւն քեզ, ամենակալառատաձեռն աննուազելի, ամենափոյթ առ ի գթութիւն, մշտայօժար ի բժշկութիւն, զի միացուցեր խառնեցեր ընդ մերձաւոր դիւրազիւն ընտանի նիւթոյս զիրաշս անձառս քումդ սքանչելեաց ահաւորութեան։ Քանզի զոր երկին ամենայն բարձանց՝ երկրիս լայնութեամբ և անդրնդոց ներքնոց խորութեամբ՝ ծովուց բազմութեամբ ոչ զօրէ տանել, այլ իբր զղոյզն ի մեծէ բերի, ի փոքր զոյս տեսականեցեր զօրութեամբ՝ սահմանեալ ճշմարտապէս անհրապուրելի. զի մի նորոգ իմն երևելով յայլ էութենէ՝ առ աչս հարեանցի երեականութիւն ինչ վարկանիցի, վիրաւորելքան թէ բժշկել անընտրաբար զկարծիս մտաց։ Քանզի որպէս մարմին քեզ հաւատապէս, օրինաբանեալ Որդի Սատուծոյ, իսկութիւն և ոչ օրինակ ի յարդեանցն ցորենոյ արարչապէս միշտ հանդերձեցեր, և կայլակ կողիդ զարիւն խաղողոյ, և արգանդ կենաց հոգեսոր ծննդեանն զառատութիւն ջուրց յոլովութեան, նոյնպես և զիոզի անմահիդ ֆչման՝ սովաւ և ի սոյն արդիւնատրեցեր. երկունք կենաց՝ որոյ կերպարան յառաջ եկելոյն և ոչ հեթանոսութեամբ է փոխարկութիւն. որպէս ոչ տեառնազրութեան խաչական փայտի ինչ երկրորդութիւն, նատելոց յերկրի խաւարի ըստ նմանու-

թեան քո, Տէր, ծագեցեր : Քանզի յայս կերպարան շնորհի զանպակաս լրութիւն անհասիդ յայտնեալ աշխարհի լուսաւորեցեր, զի մի տը-նանկն կարօտասցի և մի ընչեղն բարձրա-մտեցէ, ըստ օդոյ հաւասար բաշխման և լուսոյ արեգական տարածման և ջրական վտակաց զեղման . զի հաւասարապէս բաշխիւր երկրած-նաց մանանային զուգամասնութեամբ՝ փոքուն-ցըն առաւելքան մեծամեծացն :

Ճ. Եսկ այս նիւթոյ տեսաւորութիւն խորին խորհրդոյ և ի ընուստ անդուստ հրաշապէսունի զթարգմանութիւն, որպէս զի ոչ երկմիտ ինչ շութափութեամբ անհաստատապէս զտեղի փո-խէ, և ոչ նենգողաբար զբնակութիւն ինքեան լրանէ . քանզի ոչ վերջնականօք աճառովք հերքի, և ոչ ընդ յընդդիմակցէ ումեքէ ողողեալ արտաքս ելանէ : Վասն զի որպէս պատահումն գունոյ յեռութիւն մարմնոյ անվտիուս իմն և ան-հրաժեշտ, որ գոլովն գոյացուցանէ և ոչ գոլովն ապականէ, այսպիսեաւ իմն յարմարութեամբ իւղոյս զօրութիւն անդստին ի յիւրոց անտի կերպարան զառեալն ունողի միասնական զու-գութեամբ ընդ մեզ իսկ կցորդեցեր, Տէր Յիսուս Քրիստոս, ընդ իրին գոյի և զօրինակն լծակցե-լով, քանզի զանիմանալին տեսութեան աչաց և մտաց ըղձից ի դէմս բերեալ կերպաւորեցեր,

ի պտղոց երկրի ճնշեալ մզելով զարմանալեօք
հրաշագործութեամբ մատակարարիլ մեզ պատ-
րաստեցեր : Մանաւանդ զի ոչ յոլովից խառնից
ի մի եկելոց խմբակցութենէ զանազան ծաղ-
կանց, ըստ հնոյն և ստուերին բազմաբուրեան
այլայլութենէ, զայս իւղ օծութեան հրամանա-
տրեցեր, այլ իբր օրինակ փոխեալ զայն առ
այս՝ դու ինքն խառնեցար ի սոյն մաքրութիւն
վերնալոյս ձիթոյ : Որ թէպէտ անձառ են համե-
ղութիւնք քումդ անուշութեան, և ընդ օրինա-
կաց իրիք ոչ համեմատի, այլ ծաղիկ դաշտի և
շուշան հովտաց և նարդոս ընտիր և եղեգնա-
խունկ խառնեալ հալուէիւ, յարմարութեամբ
հոտոյ քրքմոյ՝ ֆթթեալ ողկուզոյ և ազնիւ զին-
ւոյ, ոչ սոսկ քան թէ իւղոյ միութեամբ պատ-
շաճապէս օրինակեցար փառաւորեալ անունդ
անքնին, որ զամենայն լնուս, և յիրի իմերէ
ամենեին ոչ կարօտանաս : Ռւստի ոչ շփոթելովք
ի հակառակաց բռնադատութեանց բաժանեալ
կամաց մեկին առակի, այլ ի սիրոյ հաւանութե-
նէ աստուածապէս ի մենջ պարարիս, վասն մեր
ըստ մեզ առ ամենայն վայելչական նմանութիւն
օրինակեցեալ, առ որս լոյս բարի և հուր ջեռու-
ցիչ, տապ սիրոյ առանց մասին ինչ շնչման
անգթական սառնացրտութեան այս զանգուած
նիւթոյ կաթուածոյ ձիթոյ մաքուր մտաց տեսեալ

իմանի, որով յիրաւի սովաւ ի յԱստուած է միանալի : Ընդ Սողոմոնի օծելոյ որդեգրեցելոյ Աստուծոյ երգեմ բերանով հարսինն երկնաւոր փեսայիդ, բարեբան գոհաբանութիւն, համբուրեալ ի յիղձս մտաց զիոտ իւղոց քոց քան զամենայն խունկս, և իբր զբանս կենաց յափառենականաց ունողի, ըստ հոգելից բանի իմաստնոյն և աստուածաբան աւետարանչին, զիետ քո ի հոտ իւղոց քոց ընթացուք լուացեալ զերեսս ջուրբք կենաց . որ ի վեր է քան զերկին օղոյս այսորիկ, և օծեալ զզլուխս անախտական իւղովդ երկնայնով՝ յանդիման եղէց քեզ ուրախութեամբ, զուարթապէս և ոչ տխրաբար :

ԺԲ. Այս իւղ խնկելի պաշտելի և երանելի, ոչ սոսկ օծումն ուղղոյս սենեկի, և կամ հերաց վարսից զազաթան նպաստ ինչ մատուցանի, եթէ ոչ տէրունական կենսատու խաչիւդ տեառնագրեսցի : Սոյն իւղ զարմանահրաշ օրհնութեան լուսոյ զիրեայն և զխուժն՝ զինդիկն և զբարբարոսն՝ զսկիւթացին և զելենացին՝ ըզդուժն դմեկաբար և զարհաւրատեսակ շանազլուխս սոսկավիթխար, զտէրն ազատ և զըստրուկն ծառայածին՝ քրիստոսեան արարեալ, անուամբ քո կնքէ, և հոգւոյդ սրբոյ ընծայէ, և Հօրդ երկնաւորի հարազատ որդի հաստատէ : Բազմօրինակ են սովաւ տրուեստից

տեսմունք յարմարեցեալք նախ նիւթոյն, ապա
զօրութեանն : Քանզի իբր անօթ փայտեղէն մինչ
չև օծեալ իցէ՝ դիւրաբար հերձի և անօգուտ
եղեալ անպատուի, նոյնպէս և մարդ ոչ իւղեալ
սովա՛ հեշտեաւ խորտակի, և մեկուսի եղեալ
առ ի քէն՝ ոչ լուսաւորի : Մատն սա քո, Յիսուս,
որով զիրաշալիսն զարմանագրես . քանզի իբր
անզծելի կազմութեամբ կարծր պահպանակաւ՝
ամենապատրաստն շրջարկութեամբ պաշտպա-
նեալ ծածկէ յայլագունակ խրթնի եկամտից .
մինչ զի այսու մաքրութեամբ թաթաւեալն ի
ամա ոչ ներկի արեամբ, և ոչ տիսրատեսակ
երփնիւ այլայի : Նա զի և թափանցանց իսն
խառնութեամբ հոգեպէս ընդ թանձրութիւն մե-
րոյս գոյութեան մտեալ անցանէ, զի թէ անէծք
սաղմոսողին ձիթոյ առակաւ ընդ ոսկերս չարին
համայնիւ բաշխի, որչափ ևս հոգիդ սոյն ճար-
պով լուսոյ զաներեւոյթ ներքնոյն տեսակս կե-
նագործեալ ողջացուցանէ, ազդումն տուեալ
ի խորոց անտի շնչման հագագին՝ մինչև ի ըս-
պառուած ծայրիցն եզերաց զբնաւն ընկղմէ
զյիշատակ մարմնոյ մահուն արկածից . քանզի
կենդանական զօրութիւն քո միշտ ահաւոր,
տէք Յիսուս Քրիստոս, ի սմին խառնեցեալ ընդ
սոյն իսկ բնակէ :

ՃԳ. Այս օծումն բարետեսիլ և առ բռնամար-

տիկ մերկամբցանակ ըմբիշս իբր զօրաւոր հնարից կերպարան ճգնաւորական անըմբոնելի ձեռաց ներհակին օրինօք պաշտի , դիւաց և ախտից հզօր ահարկու : Քանզի յոքնապահոյն պննութիւն բանին Եզեկիէլի առ իմանալին Փարաւոն , հենզնաւոր առակազրութեամբ ողբականօք շարայարմարեալ, յորժամեղեր , ասէ , և հանդերձեցար ընդ օծելոյ քերովքէին . ուր արձանքն հրեղէնք հաստատեալ կառուցան : Օրհնաբանեալ ահաւորութիւն ամենավայր ձեռընկալութեան , որ միշտ անձառ ես բանից և զերազանցեալ քննութեանց , որ աւետարանաւն կենաց խնկիս յարակայ իբր նորածին օծեալ ի քաղաքէ Դաւթի , և ի քահանայապետին հարցմանէ , դու ես օծեալն որդի օրհնելոյն , և յերանաւորն դաւանութենէ Պետրոսի օծեալ միայն որդի Աստուծոյ կենդանւոյ , և յապահաւատ քննողացն , եթէ դու ես օծեալն , ասեն , ասան մեզ համարձակ . և ի կանոնականացն քոց հաւատամք յօծեալդ ուսուցիչ և Տէր ամենայնի , և Հերովդիս յառաջ քան զսոյն զօծեալդ անուն յայնապէս հարցեալ . և զիանդ զրեն , դու իսկ ասացեր , զօծեալն Աստուծոյ զՏէրն Դաւթի զանսկիզբն որդի՝ ժամանակաւ որդի : Քանզի այսպէս ընկալաք վայելչաբար զայս թարգմանեցեալ , որ ի մեզ ըերի ծայրն կատարման խոր-

հրդական կոչմանն՝ վիճակ քրիստոնէից նախապատռութեան :

ԺԴ. Այնքան ունի ահաւորութիւն միանգամայն և սրբութիւն իւղաւորական խնկաւորութիւնսոսկալի անունս օծութեան, մինչզի որպէս ոչ է համարձակել ուրուք յերկրայնոցս աստուած անուանիլ՝ այլ աստուածային, նոյնպէս ոչ բերէ մարմին զբրիստոսդ անուն անձին համարել, այս զբրիստոնեայն. անտանելի նախնոյն մեծութեան մկրտչին՝ ջուրը զնոզին հրաւիրողին. քանզի չեմ ես, ասէ, օծեալն, այլ առաքեալ առաջի նորա : Սովաւ շրչէին, որպէս բանն ազդէ աւետարանչին Մարկոսի, առաքելականացն լծակցութիւնք, իբր ազգակից հարազատ ձեռինդ Աստուծոյ՝ այսու վարեցեալք . քանզի իւղով օծանէին և առանց մարդկային հնարից անուամբ քո բժշկէին : Վասն զի որպէս խաւար ի լրւոյ և ցաւ յառողջութենէ, զիշեր ի տունցենէ և մահ ի կենաց, այսպէս և ի սոյն իրէ տիրապարզեւէ ամենայն չարին երևոյթք մերժին իւափանին և բնաւին ամփոփին : Քանզի որպէս ճանճք զազիրք և փոքր զեռունք սարդից և ունկնամտից իբր ի դեղոց մահու յայս նիւթոյ սպառեալ պակասին, սոյնպէս լրութեամբ շընորհի օրհնութեան սոյն իւղ զօրացեալ և զայս վանէ և զմուրհակս չարեաց շրէ և զվճիռ մա-

հու պատառէ : Ոչ է աւազան կատարեալ՝ առանց
օժման օժանդակութեան : Եթէ աւազակացն մա-
հու խոցման զմարդն առաջին, այս դեղ փրկու-
թեան մատուցեալ տուաւ . Եթէ անճարակ վի-
րացն Յակոբայ և Խորայէլի, սոյն իր պատուա-
կան յիշատակեցաւ . այս իւղոյ փափաքեալ Դա-
փիթ՝ իբր ձիթենի պտղալից ի տանն Աստուծոյ
յուսով յարակայի, լքեալ զթլփատութիւնն՝ ան-
դստին զմկրտութեանս շնորհ գուշակէ : Եւ զի
է ինձ զայսմանէ ճառել և համայնին կարծել
հասանել, որ և ոչ վերինքն զօրեն ձեռնարկու-
թեամբ ինչ բանի զսոյն խորհուրդ ի մասնաւո-
րէ ինչ ճառելով նշանակել, թողում ասել՝ թէ
յիսկութենէ :

Ճէ. Փառք քեզ միշտ և յամենայնի, անմահ
թագաւոր, ի յայժմու երգեցեալ օրհնաբանու-
թեանս, զոր արարեր և կատարեցեր առ իս,
բարեխնամ զթած և երկայնամիտ, հարուստ և
առատ ամենայադիող . անդստին իհարցն զժա-
զբելով զօրինակն՝ մինչև ի լրումն ածեր զիսկու-
թիւնն ճշմարտապէս : Դու լոյս իսկ բնութեամբ
և արեգակն մշտապայծառ, և զաշակերտացն
դաս լոյս անուանեցեր, որով զարարածս ամե-
նայն երկրի ճառագայթիւք երջանիկ շնորհի նո-
ցին լցուցեր : Էնկալար զիւղն անուշութեան յու-
մեմնէ ի յոտս՝ յօրինակ ընդունելութեան մաղ-

թանաց առ քեզ, և ի միւսմէ պոռնկէ ի գլուխ՝
նշանակ սիրոյ զթութեանդ առ մեզ. մշտափա-
փաք բաղձանօք անսահմանելիդ ի սոյն հոտո-
տեալ, մինչզի ուստիւ անփոխադրելեաւ օրէնս
յարակայս օրհնաբանելիս՝ քոյինահրաման պա-
տուէրս կենաց ընդ համօրէն աշխարհ քարո-
զել զսակաւածեռն իւղոյն յարգաւորութիւն,
զարմանս հրաշից լսողացն առ ապառնեացն
յուսադրութիւն։ Դուք օծութիւն ունիք զսրբոյն՝
ասաց երջանիկն առաքելութեանց, մեկնեալ
զխորհուրդն որ ի մեզ զեղեալ յառաւելութենէ
կենդանարարիդ անպակաս բովանդակութեան։
Ուստիյաւէտիմնյարմարաւոր և հանգունատիպ
առ ի մասնաւորն նմանութիւն լրտոյդ և Հոգ-
ւոյդ սրբոյ՝ այս կաթուած օրհնութեան վերնոյդ
բարեբաստութեանց անսպառաբար սրսկեցեալ
ի մեզ, և ասի լրյս, իբր զնախաթիւ գոլ ստեղ -
ծուածոց և արարչութեանդ պատկերակից, որով
զխաւար մթութեան մեղաց հալածես. իսկ հուր,
զի յամենայն տարր արարածոց հաւասարապէս
ունի զուգութիւն ըստ էականին կշիռ բաշխու-
թեան, ծածուկ և յայտնի, լրեալ և ծանուցեալ.
և եթէ ոչ ընդ հարցի ի հակառակէն, ոչ յինքնա-
սաստ յօժարամտութենէ բաղձայքորբոքիլ։ Դար-
ձեալ և օծումն, զի արքայաբար որդեգրեալ ընդ
քեզ ի ժառանգութիւն Հօրդ մատուսցես, ողոր-

մութեանդ ազգակցաւ նկարեալի մեզ անեղծա-
նելի՝ ի հանդերձեալ փառսն փայլեսցուք. դար-
ձեալ և հոգի, զի մաքրեալ զարկածս խարէու-
թեանն՝ որ ի բանսարկուին Շերգործութենէ,
նորոգ փոփոխմամբ հոգւով և ճշմարտութեամբ
Հօրդ երկնաւորի երկրպագեսցուք, բևեռեալ
ընդ քեզ յուսոյն հաւատովք, ամենապարզեւ :

ՃԶ. Սհա արդարեւ յաւէտ իսկապէս իւղս այս
լուսապատար խնկալիր՝ վերնականիդ սիրոյ
տեսութիւն։ Վասն որոյ և Պողոս իսկ պատշաճ
վարկաւ ի ճառ գոհաբանութեանն՝ ասելով յայ-
տնի, որ օծ զմեզ ձեօք հանդերձ ի Քրիստոս Յի-
սուս՝ Աստուած է, որ և կնքեաց զմեզ և ետ զառ-
հաւատչեայ հոգւոյն ի սիրտս մեր. և դարձեալ
մի, ասէ, տրտմեցուցանէք գոհգին սուրբ Աս-
տուծոյ, որովկնքեցարուք յաւուրն փրկութեան։
Պատկառելի և անվանելի օծութեանս յորջորջու-
թիւն՝ իբր ի նորումս յաւէտ քան ի հնումն. քան
զի բանն դաւթեան սաղմոսին զտիրական տնօ-
րինականացդ սկզբնաւոր կրիցդ խորհուրդ՝ ճըշ-
մարտաբար վերասահմանէ, ժողովեցան կուտե-
ցան իշխանք ժողովրդոց վասն Տեառն և վասն
օծելոյ նորա։ Մարգարէութիւն մեծ տպաւորեալ
զանսրբելի արեանդ պարտիս հրէախումբ չար
մոլեզնութեանն՝ որ ի Տէրդ յանդնութիւն, ով է
որ ձգիցէ զձեռն իւր յօծեալն Տեառն և քաւեսցի.

քանզի թէ և յազգայնոյն սպանաւ Սաւուդ, այլ
ոչ ի սպառ մերժեցան յամօթ և ի նախատինս ազ-
գաց օտարաց, մինչև արեանն Աստուծոյ հաղոր-
դեալ գտան : Գրաւական մեծ յիշատակի ապա-
գայիցն ժառանգութեան աղօթանուէր աղեր-
սարկութիւն ասել սաղմոսիւն, վասն Դաւթի
սիրելոյ քոյ մի դարձուցաներ զերեսս քոյ յօծելոյ
քումմէ. և դարձեալ, նայեա և տես յերեսս օծե-
լոյ քոյ, և արա ողորմութիւն ընդ օծելոյ քոյ:

Ժէ. Զեռին քո, Քրիստոս, Երկրպագեալ պար-
գևատրութիւն այս հիւթ լուսակիր . քանզի ոչ
այլ մեծ բարձրութիւն յարքայութեանն ճոխու-
թենէ ասէ մարգարէն ի դիմաց քոց, Տէր, քան
թէ գտի զԴաւիթ ծառայ իմ և իւղով սրբով իմով
օծի զնա: Ուստի կիրթ իմն յիշատակաւ զքոյդ
համբուրեալ լուսոյ օծութիւն, Տէր Յիսուս Քրիս-
տոս. ծանիցուք զքեզ անփոփոխ մշտնջենաւո-
րութիւն, թէ դու ես ամենայն և յամենայնի
միայն թագաւոր թագաւորութեանց, և ճշմարիտ
օծեալ իւղելոց, Փառաբանեալ Երկրպագու-
թեամբ Երեկ և այսօր : Քանզի զոր օրինակ պա-
տրոյգ թացեալի ճարպում ոչ Երևեցուցանէ ինչ
նշոյլ' մինչև հուըբ լուցեալ վառիցի. սոյնպէս
և այս օծութիւն լուսոյ առ ի մեզ հեղեալ ի հան-
դերձեալսն ջահաւորի: Այս է կերպարանին մել-
նաւոր բացերեւութիւն ի նախնեացն և այսը բե-

ըեալ բարենշան իմն յարմարութեամբ՝ հրաշապայծառ երանգաւ գունեալ:

Ճ. Արդ այսոցիկ պատճառ վերազոյն մասանց կեցուցչաց աստուածականաց արարչութեանդ հարազատաց, առանց որոյ ոչ է գրիլ քրիստոսեան, և ոչ նազովքեցի անուանիլ, և ոչ յիշատակիլյորդիս Յուղայի, և կամ խրախոյս բառնալ յանուն Աստուծոյ Յակոբայ, այս հիւթականութիւն օրհնութեան ձիթոյս, յորում սուրբ Նըրորդութիւնդ խառնեցեալ միաւորի, ճառագայթ շնորհաց, շուք մերոց դիմաց, նկարագրութիւն երեսաց, բարեձևութիւն պատահմանց, լուսաւորութիւն աչաց, տեառնագրութիւն բրաց, վայելչութիւն այտից, զարդ կերպարանաց, պահպանարան շրթանց, հանդերձիչ կրօնից, յարմարիչ վարուց, շաղկապ հաւաքմանց, զօրութիւն անձանց, ուժգնութիւն դիմեցմանց, խափանիչ յուռթից, քակտիչ հմայեկաց, նահանջիչ ձեռնածուաց, խայտառակիչ կախարդաց, զտիչ աղանդից, բռնախոյեանդիւաց, փարատիչ ցաւոց, կատարիչ կնքեցելոց, տենչանք երախայից, անզնին արտաքնոց, հիացումն հեթանոսաց, նախանձարկու անհաւատից, մերկացուցիչ գաղտնեաց, յարգանք յետնոց, փառք ստրկաց, պճնումն կանանց, աճեցումն տղայոց, հրճուանք ծերոց, ձեռնադրիչ նուիրելոց, զգուշութիւն

մաքրոց, պսակ թագաւորաց, ճոխութիւնարքայից, յառաջադրութիւն կայսերաց : Քանզի զոր օրինակ աման ինչ կնքեալ նշանակիչ իմն է ներքեայնոցն մեծագնութեան, նոյնպէս բարձրութիւն շնորհին ի մեզ սովաւ ծածկեցեալ յանուն քո, Աստուած տէք Յիսուս Քրիստոս, վայելչական իմն տեսակաւ ծանուցեալ նշանակի: Խոկ անունն իսկոյն անդստին ի նոյն յորջորջեալ կոչմամբ, ըստ հոգելից արանց իմաստնոց՝ որ յեգիպտացւոց անտի սկսեալ, ի դէմս ածելով զիրին կերպարան՝ ահաւոր խորհրդոյ պատկեր:

ՍԱԿՍ ՄՐԹՍԱՂՑՍ ԻՒԳԱՑՆ ՄԻՒԹՈՇՆ

ՃԹ. Քանզի միւռոնս այս օրհնաբանեալ, զոր մարգարէն կանխաւ լրյա աչաց գրեթէ զսոյն աղերսեալ խնդրէր, ըստ քերթութեանն բառի որ ըստ խտրութեանն Հոմերոնի, թարգմանեալ իմանի, ինձ մայր. այսինքն է՝ առ ի յինքն ձգող զմերս բնութիւն զօրապէս, և կայուն հաստատել չքնաղ փոփոխմամբ զջուրց լուծականութիւն առ աւազանին լուսաւորութիւն. և իբրև զդեղ մածուցիչ կաթին՝ ի նոյն ինքն յեղանակել զցնդեալս իմ վայրագութիւն և զաղբերց հեղեղեալ մշտահոսութիւն : Խոկ մառնամուտ՝ որ և այս միւռոն, ըստ այլում բառի ցուցանի. այս ինքն է մթին, որ և խաւարչուտ գոլ և

ծածկեցեալ՝ կամ անտեսական. որ և սոյն կոչումն դիմառութեան չէ օտարացեղ. քանզի արդարե յիրէ անտի անունն նշանակի. վասն զի անքնին է այս խորութիւն յաւէտ քան զամենայն սրբութիւն սրբոց : Զի ոչ եթէ ջրոյ օրինակաւ զաղտ ինչ լուանայ, և կամ հացի բնութեամբ զսիրտն հաստատէ, այլ նորոգ իմն յարմարութեամբ ի մասունս ազդողականացն տնօրինապէս տեառնազրի. սակայն անհասութեամբն վերնականաւ և զանունն ունի անքընին : Քանզի որպէս Աստուած իսկ և իսկ ի լոյս անմատոյց ասի, իսկ անսահման փառաւորութեամբն յեղանակաւ իմն անբաւութեան ի խաւար անզնին ծածկեալ իմանի, փակեալ արտաքուստ ի ձեռնարկութեանց մերոց իմաստից, նոյնպէս և այս ծորումն լուսոյ ի լեզուաց ոմանց ճարտարաց ի ճահ ճեմութեանց դրականապէս անուանադրութեամբ մռայլ առձայնի, վասն ոչ զօրելոյ երկրածին բնութեան զիսկն զիտելոյ : Իսկ զերկաքանչիւրս աստուածականացն անդստին յինքեան հարստաբար տիրապէս ունի. քանզի ի կոչումն անուան բարձրելոյն նմանակերպեալ՝ կրկին մեծանայ իւղս այս նուիրեալ ամենաբուրեան ազնիւ կնդրկաւ. վասն զի Աստուած մեր հուր ծախիչ է ըստ Մովսէսի, և դարձեալ լոյս է ըստ Յովհաննու. ուստի և

Եսայի ճշմարտապէս զսոյն ակնարկէ, եղիցի,
ասէ, լոյսն Խրայէի ի հուր :

Ի. Դարձեալայլիմն կերպացուցանելով զբանս
առ ի նոյն պատկեր յայտնութեան իրի. վասն
չի ոչ մոռանամ զիմն նողկութիւն՝ որ ի զթու-
թենէ մեծիդ քաղցրացաւ՝ վերստին գովեստիւ
օրհնել. քանզի Մեռայ, որ է դառնութիւն, այս
ինքն նշանակ իմն յարմարական չարչարաւոր
կրից տաժանմանց, որ և միւռոն ստուգաբա-
նեալ մեկնապէս ըստ մեզ՝ մեռելութեան ազգա-
կանութիւն։ Քանզի այսու օծմամբ հոգևորակա-
նաւ խզեալ կամ հատեալ ի սնոտիասէր մահա-
կերպարան տաղտկազագրական հեշտութեանց
հակառակողին որ օդախոնաւ մեղկութիամբըզ-
քնարս ձայնատրական և կամ զարկուած վե-
րածածկութեան մզնարհեստ ուժգնաբարբառ
խրոխտահնչական կազմուածոյ թմբկիս գործա-
կանութեան ջրացիր իմն զիջութեամբ անվայե-
լուչ թուլաղաշնակեալ՝ ի ստորև անվայելուչ
թուլաղաշնակեալ՝ ի ստորև կորստեան քարշէ
զօրինակ մերս գոյութեան, կապիմքյուսով վերս-
տին դարձեալ ընդ անձառ խորհրդոյ խաչի քո,
Քրիստոս, մկրտեալք ի մահ կանդանւոյդ՝ ան-
վախճան կենացդ սովաւ հաղորդիմք ի քեզ խկ
Աստուած համայնիւ խրախուսեալ ի սպառ ամե-
նեին անհատուածելի :

ԱՅԱ ԽԵՂ ՊՐՈՉԵԿԱԸ ՔԱՌԱԿՈՒՏԵԿԱՆ յա-
նուն քո, ՅԻՍՈՒՍ, ԵՇԱՆԻ ԲԱՐՁՐԵԼՈՅԴ հաւասար
հաստէ. ՉՆՈՐԻ ԸՆՃԵՌԵԿԱԼ զուզափառ և նմա-
ճատիպ արեան կեցուցչիդ նոյն անվանելի փա-
ռոք պակեալ մեծացուցանէ : Փայտ անուանի
խղոյ օրհնութեան, ըստ մարգարէին կանխա-
ձայնութեան, զի հասարակաց կազմեցեալ բու-
սոց անտառաց զօրապէս ուղղեալ՝ ի խակութենէ
չարին արկածից և օտար կարծեաց ի ստեղծողդ
վերաբերեալ առ նոյն նիւթս կենաց հասուն
ներգործէ : Զի և որ ի մեզ մտիցն պատուհանաց
մշտաբացիկ թափանցանցութիւնք, յանուն մե-
ծութեան ահաւորիդ զօրութեան ի խոհական
իմն համեստութիւն քև տեառնազբեցեալ առ
իլրդակերտ օթեվան հոգուց՝ անազդելի պատ-
րանաց չարին խաւարանողմ խարդախողին,
այսու լրւով զապեալ ամփոփիմք ի նուազ գո-
հութեան երեկորեան պաշտաման ընդ երկնայ-
նոցն դամբարաց՝ առ օրինակ վառման շնորհիդ
որ ի մեզ . ի սոյն յիշատակ փրկութեան բա-
րեացն սովու տնկեցեալ ծագի, և ծաղկաւէտ
եղեալ պտղածնի, ի սպաս ընթրեացն պատ-
րաստութեան յետնում զիշերի ի մեծիդ զալրս-
տեան. ահա զայս լոյս ճրագի համարեալ ի կիր
արկանեմք :

ԻԲ. Դարձեալ ըստ զծազրացն գումարութեան

քսան և չորիցնշարագրութեանորյալվափետաց
անտի վերաթուի մինչև ի քսաներորդ երկրոր-
դըն կարգի, յորում զայս խորհուրդ խորութեան
անտուստ թարգմանեալ՝ ճաշակ հեղտալի որոց
հաղորդին ջամբել պատրաստեմք ամենակազմ
յարմարութեամբ. քանզի յութսներորդէ անտի
զրոյ ի չորեքհարիւրն փոխաբերեալ՝ ստուգա-
բանօրէնքնութեամբ ընդ ձիթոյն անուան նիւթ
ճշմարտագրի. որ է կերպարան արդեան խմո-
րոյ յինքն բերողի զզանգուածն զօրեղապէս. որ
ոչ սակաւն ի յոլովէն պարագայի, քան թէ ի
նոյն իրն դարձուցեալ, ըստ աւետարանական
առակին, զամենայն առ ինքն վերաբերեալ
ամեցուն առնէ:

Իգ. Սոյն իւղ հեղութեան միշտ համբարձման
և խոնարհութեան օրինակ և նմանութիւն, առ
ոմն կակուղ պատառաւ մատուցեալ ջամբի,
հարթակշիռ և բարեյարմար քանի կերպարան.
իսկ համայնքու լուծականաց հոսանուտ և ստո-
րածորելի նիւթից գերափառ վերաշրջական
հրաշափառ խորհրդոյ պատկեր. քանզի և յա-
ման ինչ մորթոյ արկեալ՝ ոչ ըստ զինւոյ ձեռյ և
կամ ջրոյ թացութեան մեղկէ, այլ ի սահման
պատշաճին պահէ: Այսպէս ընկալեալ զքոյոցդ
բարեաց անհաւասար առաւելութիւն՝ Որդի Աս-
տուծոյ կենդանւոյ, զսրբանուէր այս օծելութիւն

ի ճակատ դիմացս արեամբ քո գրեմք, և ի բնութիւն շնչոյս հոգւով քո տպաւորեմք հաւատացեալ խորհրդով մտացս. Եթէ յաւէտ յայտնեսցի նորոգ փայլեցեալ բազմաճաճանչ ծայրարձակութեամբ ի տարածումն յոգնատեսիլ զարմանահրաշ ընդարձակութեան պտուղ իւղոյ ընծայեալ զլոյս ի փառս ապառնեացն հանդերձելոցն։ Այս ճարպ հողեւոր երջանիկ և վերնանըշոյլ ի դէմս երեսաց իմս պատկերի՝ քումդ նշանաւ ջահաւորեսցի։

Ի՞դ. Եւ քանզի իբր անհաս ոչ ըմբռնական այս մեծ զօրութիւն արագ սլացմամբ ի թևս թեթևս մտաց պայմանի, անդր քան զկարծիս ուշոյ իմաստից անհուն հետևման անհետ փախստեան՝ լայն իմն միջոցաւ ի սպառ որոշեալ, փակեցաւ յինէն, ոչ օրինակեցաւ կցորդաւ, ոչ նմանեցաւ զուգամասնութեամբ, ոչ սահմանեցաւ ձևակերպութեամբ, ոչ կշռեցաւ ընկերին չափով. այլ ահա ընդ աստուածեան խաչիդ նշանի հաւասարութեամբ արեան կեցուցչիդ հոգիապէս գերազանցեցաւ։ Եւ արդ օրննեան զմեզ Տէր, սովաւ և ի սոյն. ևս և անունդ քո ահաւոր, լուսաւոր, երկնաւոր և զարմանաւոր, ի գովեստ փառաց անճառից մաքրակրօնից բուրփառաւ խնկեալ, սուրբ, սուրբ, անքնին, անպատում, բարձրեալ, ողորմած, վերերգեալ, ճշմարիտ,

բարերար և սուրբ, արա ոռվաւ փրկութիւն, տուր և քաւութիւն, պարզեւեա բժշկութիւն, հանդերձաւորեա շնորհ, առատաձեռնեա երանութիւն: Յօծումն այս ձիթոյ երկնանձրև լուսոյ անարատ գտայց. յիւղեալս այս թեզան բանաւորական մի մտցէ և մի գրաւեսցէ տիրականութիւն աղտոց մեղանաց՝ զաղախել երբէք զոգւոյս կերպարան: Եղիցի սոյն ինքն որոց մատչին օծանիլ սովաւ հարսնապաճոյն պանձանօք պճնել գեղայօրէն սուրբ վայելչութեամբ՝ երջանկապէս յոզի զարդարեալ: Եղիցի հուրս այս լուսափառ և աստուածաձիր՝ մերձեցելոցն ի սոյն ընտրութիւն՝ մուխ կրկնեռաց և բարեփափաք զերմութեան այլ յօրինուածոյ, որով ամենայնիւ ամենապատրաստ պնդութեամբ՝ ի կարծրականումդ անսասան վիմիդ յարակայցեալ միշտ արձանացայց ի քեզ հաստատեալ աներկմտելի: Լիցի նշանակ վերնամրցանակ այսը պարզելի սովաւ վառելոցն, ոչ ողողիլ ջուրը, ոչ այրիլ հուրը, ոչ ցրտանալ ի սառնութենէ, ոչ վնասակար հողմով շիջանիլ, ոչ աղտեղիլ յուրուական ինչ պղծութենէ, ոչ զպահեալս՝ չարին մատանել, և ոչ ի ստորև ելիցն զմթերս գանձուն կենաց յիմարաբար արտաքս հանել. ոչ անպատսպար մնալ ի թեոց գոց օգնականութենէ, և ոչ զէացեալն ի մեզ օծութիւն

անմաքրապէս ի բաց մերկանալ : Այլ եղիցուք
քև ի սոյն հրացեալ, սովիմբ պարարեալ սո-
վաւ լուսաւորեալ, այսու արդարացեալ ազա-
տացեալ պսակեալև թագաւորեալ : Եւքեզ միայ-
նոյ միայն օծելոյ յամենեցունց օրհնութիւնք
երգոց, ալէլուք լեզուաց, հնչմունք ձայնից, յադ-
թանակութիւնք գովեստից, բարեբաստութիւնք
շրթանց, սրբարանութիւնք սաղմոսաց, ընդ Հօր
և Հոգւոյդ սրբոյ յաւիտեանս յաւիտենից . ամէն :

Այս իմ ձեռնաւրկութիւն ի սրբութիւն, եւ այս արձանագրութիւն
կարութեանցն սրբութիւն :

ԲԱՆ ՂԻ.

Աղօրքաւզմանորկներ վասն սրբադյոյ խողոյն Միւռոնի

Ա. Աստուած յաւիտենական, բարեբար և ամե-
նակալ, ստեղծիչ լուսոյ և յօրինիչ գիշերոյ,
կեանք ի մահու և լոյս ի խաւարի, յոյս ակնու-
նողաց և երկայնմտութիւն տարակուսելոց, որ
ամենարուեստ իմաստութեամբ քո դարձուցա-
նես յայգ զսուերս մահու, աննուազ ծագումն
և անմուտ արեգակն . քանզի ոչ զօրէ ծածկել
զփառս տէրութեան քո խաւար գիշերոյ, որում
կրկնի ծունք երկրպագութեան ամենայն եղելոց
երկնաւորաց և երկրաւորաց և սանդարամե-
տականաց . որ լսես զիեծութիւն կապելոց և
հայիս յադօթս խոնարհաց և ընդունիս զիսրն-

դրուածս նոցա Աստուած իմ և թագաւոր իմ՝
կեանք իմ և ապաւէն իմ, յնյա իմ և վստահութիւն
ին, թիսուս Քրիստոս Աստուածդ ամենայնի,
սուրբդ հանգուցեալ ի հոգիս սրբոց, մխիթարու-
թիւն վշտաց և քաւարան մեղուցելոց, որ գիտես
զամենայն յառաջ քան զինել նոցա. առաքեա
զպահպանողական զօրութիւն աջոյքո, և փրկեա
զիս յերկիւղէ գիշերի և ի դիւէ չարէ: Որպէս զի
զյիշատակ սոսկալի և սուրբ քո անուանդ միշտ
համբուրեալ շրթամբք հոգւոյ ըղձութեան շըն-
չոյ, կեցից պահպանեալ ընդ այնոսիկ՝ որ կար-
դան զքեղ ի բոլոր սրտէ:

Բ. Եւ ի դրոշմէ խաչի քոյոյ նշանիդ, զոր աս-
տուածային արեամբ քո ներկեալ նորոգեցեր, և
ի նոյն շնորհ որդեզքրութեան զմեզ մկրտեցեր,
և ի փառս պատկերի քո նկարեալ յօրինեցեր,
այսու պարզեօք աստուածականօք ամաչեսցէ
սատանայ, քակտեսցին մեքենայքն, բարձին
որոգայթքն, պարտեսցին մարտուցեալքն, պա-
կասեսցին զէնքն սայրասուրք, մերժեսցի մէզն,
փարատեսցի խաւարն, մեկնեսցի մառախուղն:
Բազուկ, քո հովանասցի, և աջ քո կնքեսցէ.
վասն զի զթած ես և ողորմած, և անուն քո կո-
չեցեալ է ի վերայ ծառայից քոց: Եւ քեզ ընդ
Հօր Հոգւովդ սրբով փառք և իշխանութիւն յաւի-
տեանս յաւիտենից. ամէն:

ԲԱՆ ՂԵ.

Վերսին յաւելուած կրկին հեծութեան.

Ա. Արեգակն արդար, ճառազայթ օրհնեալ,
լուսոյ կերպարան, փափաք անձկութեան, բար-
ձրեալ անքնին, զօրեղ անպատում, բարւոյ
բերկրութիւն, յուսոյ տեսութիւն, գովեալ երկ-
նաւոր, թագաւոր փառաց, Քրիստոս արարիչ,
խոստովանեալ կեանք : Եւ արդ զթերութիւն
վրիպանաց բազմասխալ ձայնի եղկելոյս ամենա-
զօրդ բանիւ լցեալ, մատուցես յաղերս հաճու-
թեան Հօր քում բարձրելոյ : Որ վասն իմ ի փորձ
եկիր անիծից, կերպարանեալ զիմ նմանութիւն,
ամենեւին կենաց օրհնութիւն, վերնոց և Եերք-
նոց բարեխնամող տեսուչ համայնից : Զի թէ
յանձն առեր մեռանիլ վասն իմ, Աստուած և
տէրդ բոլորեցուն, որչափ հաճեսցիս առաւել
և այժմ վտանգաւորս կրից կարեկցել, ընդ իմ
պարտաւորիս միշտ աղօթելով ազգակցաւ մարմ-
նոյդ առելոյ ի մէջ՝ առ համապատիւդ քո Հայր :

Բ. Եւ վասն արեանդ պատուականի միշտ մա-
տուցելոյ ի հաճութիւն կամաց առաքչիդ, բարձ-
ցին վտանգք մեղուցեալ դատապարտելոյս,
թողցին պարտիքն, ապաքինեսցի ամօթն, մո-
ռասցին պատկառանքն, բարեգործեսցին դա-
տակնիքն, սատակեսցին որդունքն, վերասցի

լալն, հանդարտեսցէ կրճումնատամանցն, սպառեսցին ողբքն, հատցին արտասուքն, մերժեսցի սուզն, հալածեսցի խաւարն, վատնեսցի հուքն սաստկութեան, հերքեսցին տանջանարանքն բազմօրինակք :

Գ. Եկեսցեն գթութիւնք կամողիդ և պարգևողիդ կենաց ամենից, ծագեսցի լոյսդ, արագեսցէ փրկութիւնդ, հասցէ օգնութիւնդ, ժամանեսցէ այցելութիւնդ, կանխեսցէ ցողդ ողորմութեան, յառաջեսցէ արբուսցէ զանդաստանս պասքեալ՝ անկեալ ոսկերացս թշուառութեամբ ի վիհն մահու, ծաղկեցուսցէ պտղաբերեսցէ բաժակդ երկնաւոր արեան կենարարիդ զերկիրս խնամեալ աւուրն լուսոյ, որ անծախապէս միշտ պատարագի յիշատակ կենաց փրկութեան հոգւոց ննջեցելոց : Զի ամենայնիւ մահացեալ հոգիս մարմնովս մեղաց՝ շնորհօք քո, գթած, ի քեզ զօրացեալ քեւ նորոգեցայց, զատեալ ի մեղաց անմահ կենդանութեամբ ի յարութեանն արդարոց, Հօր քումօրհնեցեալ : Ընդ որումքեզ վառք, և Հոգւոյդ սրբոյ բարեբանութիւն վայելչական զոհութեամբ, այժմ և միշտ և յաւիտեանս յաւիտենից . ամէն :

ՅԻՇԱՏԱԿԱՐԱՆ ՄԱՏԵՆԻԾ

ԴՊՐՈՒԹԵԱՆ

Ըստ հոլովման ընթացից ամանակաց յառաջ շարժութեան, ոք ըստ լրապատարն նշուշագեղն արփիանաճանչ լուսակիրն օրակշիռն մղտափարատն ակնապարար ականն արևու՝ ստեղծականն արուսեկի, ոք համբարէ հոլովէ կուտէ ամաց յոլովութիւն ի չափս դարուց շընչասպառ և կենդանանորոգ առուղեկան յաւիտենիս, ի յաւարտումն կատարման իններեակ յոբելինին, ի սկիզբն պսակելոյ մտի տասնեկին յաքեթական տոհմիս տումարի, յետերից ամաց անցելոց՝ ոք զկնի գալստեան ի կայս և ի կոյս կողմանց հիւսիսոյ դիմաց արևելից՝ յաղթող և մեծ կայսերն Հոռոմոց Բասի, յորժամ ընդարձակ և մակազաւիթ կանոնաւ սփիռ տարածէր՝ լիասահման և անխորոց ի ստուարակարկատ կոթողս կարծը արձանաց՝ ի ձգումն ձեռին և յանխզելի լարս պարանաց երկարագունից՝ անթարթափ ի նոյն վերասլացեալ ի յաջ և յահեակ՝ սեպհականել յաւելու բաժինս մասանց վիճակաց խմբից աշխարհաց ի ծոց իւր. արդ ի յայնմ անդորրութեան միջոցի, յորում եզերեալ ընդոտնեցաւ թշնամին եկեղեցւոյ, ստացեալ հիմնեցի, կառուցի, կարգեցի, կուտեցի, արձանացուցի, դիզի, բարդեցի,

կացուցի, ցուցի, հաստատալով ի հրաշակեր-
տութիւն միազոյ իրի զբազմաստեղծեան դը-
րուագս դրութեան այսմ սովերի արգասաւորի,
ես Գրիգոր կրօնաւոր քահանայ, յետին բանա-
հիւաց և կրտսեր վարժապետաց, գործակցու-
թեամբ եղբօր իմոյ ընտրելոյ Յովաննէս կոչեցե-
լոյ՝ Նարեկայ մեծափառ և բարձրապատիւ
ուխտի վանականի, որք իբրև զմի մարմին բա-
նական ի յերկուց առ մի կերպարան շինելոյ
դիմաց կենցաղափարելով, ոչ միայն հարա-
զատք, այլև միաշունչք միակրօնք համապա-
տիւք զուզահաւանք, ի քառից աչաց առ մի և
նոյն շաւիդ խորհրդոյ տեսեալք :

Արդ հայցեմք ի ճաշակողացդ յայսմ սեղանոյ
յոքնօրէն և ախորժահամ հանդերձելոյ՝ յիշատա-
կել զմեզ ի մաղթանս ուղիղս և ի պատկանաւոր
խնդրուածս, սեռն սիրով ի միտս բարիս. որով
և դուք եղիջիք զբեալի մատեանս կենաց վերին
դպրութեանն :



Ճամառօսուրիւն աղօրից եռամեծի եւ քաջ վարդապետի Մխիրա-
այ զոօի խաչակրօն նգնաւորի եւ բանիրուն եռեսորի՝
ասացեալ ի սուրբ Պատարազին :

Տէր Աստուած իմ Յիսուս Քրիստոս բան հօր
և կերպարան, կենդանի և կենդանարար, յոյս և
փրկութիւն ամենեցուն որ կարդան առ քեզ : Որ
շնորհես առաւելքան զարժանն, և տաս խնդրո-
ղացն զպիտոյս կարեաց : Զի ոչ միայն արարեր
և ստացար ի վերստին յանցանելն մեր՝ չար-
չարանօք խաչի քո, այլ և միշտ զքեզ ետուր
փրկանս կենաց մարդկան : Վասն որոյ մեծ եղեւ
մինչև յերկինս ողորմութիւն քո, և յամենայն
երկրի ցուցաւ փառք քո : Եւ այնքան զերազան-
ցեաց պարզեաց քոց նշանակ, մինչ զի ոչ միայն
մարդկայինս հիանան ազգք, այլ և երկնային
զօրքն և առաւել մերձակայքն . ընդ որս սոս-
կացեալ փառաւորեն անլոելի ձայնիւ ասելով,
սուրբ՝ սուրբ՝ սուրբ՝ տէր զօրութեանց . զորս և
ուսեալ մեր՝ երգեմք ի ժամ անմահիդ զենման՝
կցորդելով անմարմնոցն երջանկաց :

Զի զառ մեզ զանձառն տեսանելով զխոր-
հուրդ՝ զօրինակ մահուն նշմարտի, ընդ մեր
եղեալ՝ մարդկապէս ընդ մեզ եղանակեն զերզս
օրհնութեան : Զի եթէ զօրինակն անզիտանան
զովասանութեան՝ միայն զսուրբն կարդան զա-
նուն, ուստի զերեսսն ծածկեն և զոտսն . մեք

զ՞ր ասացուք զօրհնութիւն և զգովութիւն,
բայց միայն զքեզ օրհնեսցուք սարսափմամբ, և
հաւատովք մերձեսցուք յանտեսանելիդ և ի տե-
սանելիդ անձառութիւն :

Օրհնեմք զհայր՝ զառաքող ֆրկողիդ :

Օրհնեմք և զհողիդ սուրբ՝ զկատարիչ և զսրբիչ
զգալւոյն օրինակի :

Օրհնեմք զանիմանալի զքո՛ խոնարհութիւնդ :

Օրհնեմք և զմեծ քո քաղցրութեան կամսդ :

Օրհնեմք՝ որ զկենդանարար մարմին և զա-
րիւն քո սուրբ շնորհեցեր մեզ ի քաւութիւն :

Օրհնեմք՝ որ հուր աստուածութեան քոյ՝ ոչ
կիզու զբնութիւնս հողեղէն :

Օրհնեմք՝ զորոչ տանին երկինք ամենայն, այլ
տանին նիւթական և նուաստական եկեղեցիք :

Օրհնեմք՝ որ նստիս ի քերովքէս, և բազմիս ի
սեղան սրբութեան :

Օրհնեմք՝ զոր ոչ ունին երկինք վերին՝ և ին-
նեակ դասք անմարմնոցն, բառնան մատունք
քահանայից :

Օրհնեմք՝ զոր և սերովքէն ունելեօք մատու-
ցանէր ի բերան մարգարէին, իսկ աստ ձեռամբ
բաշխիս հողեղինաց և մատամբ մատչիս ճաշա-
կողաց :

Օրհնեմք՝ որ ոչ գարշիս յաղտեղութենէ մարմ-
նական կրից, այլ մաքրես սրբութեամբ քով :

Օրհնեմք՝ որ զպէսպէս յանցանսն անտես
առնես զազգի մարդկան՝ որք հաւատով ապաւի-
նին ի քեզ :

Օրհնեմք՝ որ միջնորդութեամբ կենարար
մարմնոյ և արեան քոյ՝ հաշտեցուցանես զիայր
քո ընդ օտարացեալս մեղօք, տալով վճիռ ան-
ստելի, ոչ ուտողացն և ոչ ըմպողացն ոչ ունել
կեանս, և ուտողացն և ըմպողացն զբնակիլն ի
քեզ, և զքեզ ի նոսա :

Քանզի տիրապէս մարմին և արիւն քո սուրբ
կատարեալ արձակումն է և ազատութիւն ի
կապանաց մեղաց :

Զի եթէ սուրբք ամենայն առ հասարակյիշին,
և քոյոցդ բարեաց կարօտին, զիարդ և ոչ ես
անկեալս ի շնորհաց և ունայնս ի բարեզարդու-
թեանց :

Զի եթէ այժմ ոչ ողորմիս, յորում բացեալ ես
զղուռն անձառ ձրից, Երբ տայցես յայլում ժա-
մու. քանզի անվրէալ յայսմ ժամու է առնուլ ի
քէն զիսնդիրս, որպէս և սուրբք ի քաղցրու-
թեան ժամանակի :

Զի եթէ յորժամ ընդհանուր երկինք և երկիր
առ հասարակ բարեխօսեն՝ ոչ լսես, այլ յորում
ժամու զամենեսեան ժողովեցից :

Զի եթէ մինչ հիանան անմարմնոցն դասք ընդ
առատութիւն պարզեաց քոց, և զօրինութիւնս

մատուցանեն, ոչ առնում. յորժամ ի կշիռ
դնես՝ զիարդ ընկալայց :

Զի եթէ յորժամ դասք հրանիւթիցն գոչեն ասե-
լով՝ ողորմեա քո արարածոց, մասն ինչ ոչ
տացի. ընդ որոց այլոց առփց :

Աղաչեմ զքեզ տէր, մի ունայն դարձուցաներ
զիս յամենասուրբ երեսաց քոց, անչափ պար-
գևացդ իշխան :

Յորժամ յարգեալ է իբրև զգետս ի լրութենէ
ծովու մեծիդ պարզեք, ուստի և ինձ կաթիլ մի
բաւական է. զի սակաւն քո անչափ ունի մե-
ծութիւն, և առաւելեալ է քան զխորս ծովու :

Զի եթէ ի ծագիլ լուսոյ արեգականդ ոչ լու-
սաւորիմ, ի զիշերի որպէս պայծառացայց :

Եւ եթէ ձրի բժիշկդ մերձ ես՝ և զգեղդ կենաց
ոչ տացես, այլ ուր գտից բժիշկ զի բժշկեցայց :

Եթէ յարուցչիդ պատահեալ մեռանիմ, և ո զիս
յարուսցէ :

Եթէ քնութեամբ ճոխացուցիչդ զադքատու-
թիւնս ոչ բարձես, առ այլ ով երթայց ի փար-
թամաց :

Ծնդ խաղաղութեան աշխարհիս զոր շնորհես,
տուր և ինձ խաղաղութիւն յամբոխից կրից.
Ծնդ հաստատութեան եկեղեցւոյ՝ հաստատեա և
զշարժեալ անձինս :

Ծնդ քահանայապետաց և քահանայից՝ սար-

կաւագաց և դպրաց՝ և ամենայն ուխտի մանկանց եկեղեցւոյ պահպանութեան, զօրութեամբ քո և զիս ընդ հովանեաւ քով ամրացո :

Ընդ թագաւորաց և իշխանաց՝ զօրավարաց և զօրականաց յաղթող և զիս ի վերայ աներևոյթ թշնամույն արասցես :

Ընդ ննջեցելոցն հաւատացելոց յիշեա և զիս տէր զմեռեալս մեղօք. զորս ի խորոցն հաներ անդնդոց, ընդ նոսին հան և զիս ի չարին բանդէ՛ միջնորդութեամբ կենարար մարմնոյ քոյ և արեան, արժանապէս գոհանալ զողորմութենէ քումմէ :

Գոհանամ գքէն տէր՝ որ արժանի արարեր զիս տեսլեան սուրբ խորհրդոյ քոյ :

Գոհանամ՝ զի զսոսկալին և զահաւորն լուայց զօրհնութեան :

Գոհանամ՝ զի զաստուածախօսութիւն քո լսել արժանացայ :

Գոհանամ՝ որ զիոգիս յուսով լցեր, և զսիրտս ուրախութեամբ :

Զոր օրհնութիւն կամ զգոհութիւն քեզ մատուցանեմ՝ Աստուած իմ Յիսուս, զի արժանի եղէ կենաց հացիդ և անմահարար բաժակիդ :

Գիտեմ՝ զի չար է ինձ մերձենալն չարեօք, և տարակուսանք հեռանալն. մանաւանդ զի անսուտ սահմանեցեր, եթէ որ ոչ ուտէ զմարմին

իմ և ըմպէ զարիւն իմ, կեանս ոչ ունիցի յանձին
իւրում :

Ահա յայտնապէս խոստովանիմ, զի ես մե-
ռեալ եմ, և քեզ է յարուցանելն. զի փառաւո-
րեցից զքեզ ընդ հօր քում ամենազօրի, և ընդ
ամենասուրբ հոգւոյդ ճշմարտի, այժմ և միշտ
և յաւիտեանս, ամէն :

Ամենակալ ամենախնամ Աստուած՝ յամե-
նայնի օրհնեալ. որ յամենայնի ես և ամենեցուն
անհաս' և բովանդակեալ պահես զամենայն
արարածս'. զնոգեղէնս և զիողեղէնս, զաննիւթս
և զնիւթեղէնս. զի մահկանացուաց կեանք ես և
անմահութեան յարամենացութիւն : Բաց զդուոն
ողորմութեան քոյ' զթած, և ծագեա լոյս խաւա-
րելոյս : Զծանրացեալս բեռամբք մեղաց' թե-
թեացո. զսւացեալս աղտեղեալ կրիւք' սպիտա-
կացո. զսառուցեալս յաստուածային սիրոյդ'
ջերմացո. զմթացեալս անասնական սահեց-
մամբ' զգաստացո : Զըմբռնեալս ի ծուղակ որսո-
ղին' փրկեա և ազատեա. զմանրեալս ի ժանեաց
կերչին' կորզեա և կենագործեա. և զիոզիս խա-
ւարեալ մեղօք' անճառ լուսով քով լուսաւերեա,
և միշտ առ քեզ հայեցո : Զգերեալ խորհուրդս
ի գերողէն' առ քեզ դարձո. զըմբռնեալ կամս ի
խարդախողէն' զերծո. զյօթարութիւնս' քաղ-
ցրութեամբ ի քեզ միացո. զբանական մասն

հոգւոյս' խոհեմացո. զարտմտականն արիացո. զցանկականն ողջախոհացո, և առ քեզ դարձո. զերիս մասունս' արդարութեամբ ամրացո. զնսեմացեալ միտս' պայծառացո :

Զներտրամադրեալ բնութիւն բանիս' հոգւով քո խառնեա. զարտաբերեալս յօգուտ լսողաց' շնորհօք քո ներկեա. զըզգայարանս կարկառ- ման մտացս' առ քեզ հայեցո, զզգայութիւն պա- տուհանացս' ազդմամբ քո լցո : Տեսանելեացս' ցոյց զողորմութիւն քո. լսելեացս' լսելի արա զձայն քո. ճաշակելեացս' քաղցրասցին բանք քո. հոտոտելեացս' բուրեսցի հոտ կենաց քոց, միշտ առ քեզ պաղատիլ և աղաչել և երկիրպա- գանել' բաղխմամբ կրծից, տարածմամբ ձեռաց' տատանմամբ մատանց, կականմամբ ձայնից, հառաչմամբ սրտից, հեծութեամբ ողբոց, ար- տասուօք աչաց, յայտնութեամբ զաղտնեաց, խոստովանութեամբ մեղանաց, և ի քէն ընդու- նիլ թողութիւն սխալանաց, քաւութիւն յանցա- նաց, հանգիստ փառաց, և զուարձանալ տե- սութեամբ աչաց, և վայելելի փառս երրեակ անձնաւորութեանդ յաւիտենից յաւիտեանս. ամէն :

Մորոյ աւետարանիս Յիսուսի Քրիստոսի որ բա Յովհաննու :

Տէրն ՄԵՐ ՅԻՍՈՒՍ ՔՐԻՍՏՈՍ

ԵՒ յետ երկուց աւուրց ել անտի և գնաց ի
Գալիլեայ : Զի ինքն իսկ Յիսուս վկայեաց՝ եթէ
մարզարէ յիւրում գաւառի պատիւ ոչ ունի :
Այլ յորժամ եկն նա ի Գալիլեայ, ընկալան զնա
գալիլեացիքն . զի տեսեալ ևս էր զամենայն
նշանսն, զոր արար յերուսաղէմ ի տօնին . քան-
զի և նոքա եկեալ էին ի տօնն : Եկն դարձեալ
ի Կանա գալիլեացւոց՝ ուր արար զջուրն զինի .
և անդ էր թագաւորազն մի, որոյ որդի նորա
հիւանդ կայր ի Կափառնաում : Նա իբրև լուաւ
եթէ Յիսուս եկեալ է ի հրէաստանէ ի Գալիլեայ,
եկն առ նա՝ և աղաչէր, զի իջցէ և բժշկեսցէ
զորդի նորա . քանզի մերձ էր ի մեռանել : Ասէ
ցնա . եթէ ոչ նշանս ինչ և արուեստս տեսանէք՝
ոչ հաւատայք : Ասէ ցնա թագաւորազն . տէր,
էջ մինչչեւ մեռեալ իցէ մանուկն իմ : Ասէ ցնա
Յիսուս . երթ' որդին քո կենդանի է . և հաւատաց
այրն բանին՝ զոր ասաց նմա Յիսուս, և գնաց :
Եւ մինչդեռ իջանէր, ընդ առաջ եղեն նմա ծա-
ռայքն նորա . աւետիս ետուն և ասեն, թէ մա-
նուկն նորա կենդանի է : Հարցանէր ցնոսա
վասն ժամուն՝ յորուն ապաքինեաց . և ասեն
ցնա երէկ յեօթներորդ ժամու եթող զնա ջերմն :

Գիտաց հայրն նորա' եթէ յայնմ ժամու' յորուս
ասացն ցնա Յիսուս' թէ որդին քո կենդանի է.
և հաւատաց ինքն և ամենայն տուն իւր : Զայս
դարձեալ երկրորդ նշանս արար Յիսուս եկեալ
ի Հրէաստանէ ի Գալիլեայ :

Յետ այսորիկ տօն էր հրէից, և ԵԼ Յիսուս
յերուսաղէմ ի Պրօպատիկէ աւազանին, որ կո-
չէր եբրայեցերէն Բեթհեղդայ' հինգ սրահ : Յորս
անկեալ դնէր բազմութիւն յոյժ հիւանդաց' կու-
րաց կաղաց գոսացելոց, որ ակն ունէին ջրոցն
յուզելոյ : Եւ հրեշտակ տեառն իշանէր ըստ ժա-
մանակի յաւազանն' և յուզէր զջուրսն . և որ
նախ ի շարժումն ջուրցն իշանէր յաւազանն'
բժշկեր, ոչ ունելով նշան հիւանդութեան : Եւ
անդ էր այր մի, որոյ երեսուն և ութ ամ էր ի
հիւանդութեան իւրում : Զնա իբրև ետես Յի-
սուս, զի անկեալ դնէր, և զիտաց եթէ բազում
ժամանակը են այնուհետև, ասէ ցնա . կամի՞ս
ողջ լինել : Պատասխանի ետ նմա հիւանդն .
Տէր, ոչ զոք ունիմ, թէ յորժամ ջուրքն յուզիցին'
արկցէ զիս յաւազանն . և մինչ ես դանդաղիմ,
այլ ոք քան զիս յառաջազոյն իշանէ : Ասէ ցնա
Յիսուս, արի, առ զմահիճս քո' և զնա : Եւ ող-
ջացաւ այրն, և յարեաւ' էառ զմահիճս իւր'
և շրջէր . և էր շաբաթ յաւուրն յայնմիկ :
Սսեն հրէայքն ցբժկեալն . շաբաթ է' և ոչ է

արժան քեզ առնուլ զմահիճս քո : Պատաս
խանի ետ նոցա և ասէ. որ բժշկեացն զիս
նա ասաց ցիս, առ զմահիճս քո' և գնա : Հարցիլ
ցնա և ասեն. ով է այրն' որ ասաց ցքեզ, առ
զմահիճս քոյ և շրջեաց : Եւ բժշկեալն' ոչ զիտէր
թէ ով իցէ. քանզի Յիսուս խոյս ետ վասն ամ
բոխին ի տեղւոչէ անտի : Յետ այսորիկ գտանէ
զնա Յիսուս ի տաճարին, և ասէ ցնա . ահաւա-
դիկ ողջացար, մի ևս մեղանչեր' զի մի չար ևս
ինչ լինիցի քեզ : Գնաց այրն' և պատմեաց հրէիցն
եթէ Յիսուս էր' որ բժշկեացն զիս : Եւ վասն այնո-
րիկ հալածէին զՅիսուս հրէայքն, զի զայն առ-
նէր ի շաբաթու : Եւ Յիսուս պատասխանի ետ
նոցա . Հայր իմ մինչեւ ցայժմ գործէ, և ես գոր-
ծեմ : Վասն այնորիկ առաւել խնդրէին հրէայքն
սպանանել զնա . զի ոչ միայն լուծանէր զշաբա-
թըս, այլ և հայր իւր կոչէր զՅատուած, և հա-
ւասար առնէր զանձն Աստուծոյ :

Եւ մինչդեռ անցանէր' ետես այր մի կոյր ի
ծնէ. և հարցին ցնա աշակերտքն նորա' և ասեն.
ուաբբի, ոյր վնաս է, սորա' թէ հօր և մօր իւրոյ,
զի կոյր ծնցի : Պատասխանի ետ Յիսուս, ոչ դո-
րա վնաս է, և ոչ հօր և մօր իւրոյ, այլ զի յայտ-
նի լիցին գործքն Աստուծոյ ի դմա :

1608

F.D.

